

讀史兵略

第四册

上海图书馆藏书



A541 212 0008 8695B

民國二十一年九月

一九三二、三、四


購於首都

中政合作社

讀史兵略

第四册

中央政治學校總務處印刷所印



~~1547570~~

讀史兵略卷二十八

益陽胡林翼纂

通鑑

唐紀 高祖武德元年 春正月王世充既得東都兵進擊李密于洛北敗之遂屯鞏北辛酉世充命諸軍各造浮橋度洛擊密橋先成者先進前後不一虎賁郎將王辯破密外翻密營中驚擾將潰世充不知鳴角收衆密因帥敢死士乘之世充大敗爭橋溺死者萬餘人王辯死世充僅自免洛北諸軍皆潰世充不敢入東都北趣河陽是夜疾風寒雨軍士涉水沾溼道路凍死者又以萬數世充獨與數千人至河陽自繫獄請罪越王侗遣使赦之召還東都世充收合亡散得萬餘人屯含嘉城密乘勝進據金墉城修其門堞廬舍而居之鉦鼓之聲聞於東都未幾擁兵三十萬陳於北邙南逼上春門乙丑金紫光祿大夫段達民部尙書韋津出兵拒之達望見密兵盛懼而先還密縱兵乘之軍遂潰韋津死於是偃師柏谷及河陽都尉孤武都檢校河內郡丞柳燮職方郎柳續等各舉所部降於密竇建德朱粲孟海公徐圓朗等並遣使奉表勸進密曰東都未平不可議此（按含嘉倉在洛陽北上春門東面北頭門也偃師在其東北七十里柏谷塢又在東北河陽今孟縣河內今懷慶府）夏四月世子建成等至東都軍於芳華苑東都閉門不出遣人招諭不應李密出軍爭之小戰各引去城中多欲

爲內應者趙公世民曰吾新定關中根本未固雖得東都不能守也遂不受戊寅引軍還世民曰城中見吾追必來追躡乃設三伏於三王陵以待之段達果將萬餘人追之遇伏而敗世民逐北抵其城下斬四千餘級遂置新安宜陽二郡使行軍總管史萬寶盛彥師鎮宜陽呂紹宗任瓌將兵鎮新安而還（按三王陵在洛陽西北新安在洛陽西七十里宜陽在洛陽西南七十里）

六月詔曰近世以來時運遷革前代親族莫不誅夷興亡之效豈伊人力其隋蔡王智積等子孫並付所司量才選用萬年縣法曹孫伏伽上表以爲隋以惡聞其過亡天下陛下龍飛晉陽遠近響應未期年而登帝位徒知得之之易不知隋失之之不難也臣謂宜易其覆轍務盡下情凡人君言動不可不慎竊見陛下今日卽位而明日有獻鷓鴣者此乃少年之事豈聖主所須哉又百戲散樂亡國淫聲近太常於民間借婦女裙襦五百餘襲以充妓女擬五月五日元武門遊戲此亦非所以爲子孫法也凡如此類悉宜廢罷善惡之習朝夕漸染易以移人皇太子諸王參僚左右宜謹擇其人自古及今骨肉乖離以至敗國亡家未有不因左右離開而然也願陛下慎之上省表大悅下詔褒稱擢爲治書侍御史賜帛三百匹仍頒示遠近（按萬年縣與長安縣分治蓋今咸寧縣也元武門北門也）

宇文化及留輜重於滑臺以王軌爲刑部尙書使守之引兵趣黎陽李密將徐世勣據黎陽畏其軍鋒以兵西保倉城化及度河保黎陽分兵圍世勣密帥步騎二萬壁於清淇與世勣以烽火相應深溝高壘不與化及戰化及

每攻倉城密輒引兵以倚其後密與化及隔水而語密數之曰卿本匈奴阜隸破野頭耳父兄子弟並受隋恩富貴累世舉朝莫二主上失德不能死諫反行弑逆欲規篡奪天地所不容將欲何之若速來歸我尙可得全後嗣化及默然俯視良久瞋目大言曰與爾論相殺事何須作書語耶化及盛修攻具以逼倉城世勣於城外掘深溝以固守化及阻塹不得至城下世勣於塹中爲地道出兵擊之化及大敗焚其攻具時密與東都相持日久又東拒化及常畏東都議其後散騎常侍蓋琮齎敕書賜密密大喜遂上表乞降請討滅化及以贖罪元文都等以密降爲誠實盛飾賓館於宣仁門東册拜密太尉尙書令東南進大行臺行軍元帥魏國公令先平化及然後入朝輔政王世充作色謂起居侍郎崔長文曰朝廷官爵乃以與賊其志欲何爲耶秋七月皇泰主遣大理卿張權鴻臚卿崔善福賜李密書曰今日以前咸共刷蕩使至以後彼此通懷七政之重佇公匡弼九伐之利委公指揮權等旣至密北面拜受詔書旣無西慮悉以精兵束擊化及密知化及軍糧且盡因僞與和化及大喜恣其兵食冀密饋之會密下有人獲罪亡抵化及具言其情化及大怒其食又盡乃度永濟渠與密戰于童山之下自辰達酉密爲流矢所中墮馬悶絕左右奔散追兵且至唯秦叔寶獨捍衛之密由是獲免叔寶復收兵與之力戰化及乃退房公蘇威在東郡隨衆降密密以其隋氏大臣虛心禮之威見密初不言帝室艱危唯再三舞蹈稱不圖今日復覩聖明時人鄙之化及猶有衆二萬北趣魏縣密知其無能爲西還鞏洛留徐世勣以備之（按清淇今淇縣宣仁門東都東門童山在淇縣東北魏縣在今大名府）

薛舉進逼高墪，遊兵至於鹵岐。秦王世民深溝高壘，不與戰。會世民得瘧疾，委軍事於長史納言劉文靜。司馬殷開山且戒之曰：「薛舉懸軍深入，食少兵疲，若來挑戰，慎勿應也。俟吾疾愈，爲君等破之。」開山退，謂文靜曰：「王慮公不能辦，故有此言耳。且賊聞王有疾，必輕我，宜耀武以威之。」乃陳於高墪西南，恃衆而不設備。舉潛師掩其後，壬子戰于淺水原，八總管皆敗，士卒死者什五六。大將軍慕容羅睺、李安遠、劉宏基皆沒。世民引兵還長安，舉遂拔高墪，收唐兵死者爲京觀。文靜等皆坐除名。（按高墪城在長武縣，邠州卽甯州，岐州卽鳳翔府，淺水原在長武縣西北）

初，李密嘗受業於儒生徐文遠。文遠爲皇泰主國子祭酒，自出樵采爲密軍所執。密令文遠南面坐，備弟子禮。北面拜之。文遠曰：「老夫旣荷厚禮，敢不盡言。未審將軍之志，欲爲伊霍以繼絕，扶傾乎？則老夫雖遲暮，猶願盡力。若爲莽卓乘危邀利，則無所用老夫矣。」密頓首曰：「昨奉朝命，備位上公，冀竭庸虛，匡濟國難。此密之本志也。」文遠曰：「將軍名臣之子（胡氏曰：李密寬之子，寬爲周將，以驍勇著名），失途至此，若能不遠而復，猶不失爲忠義之臣。及王世充殺元文都等，密復問計於文遠。文遠曰：「世充亦門人也，其爲人殘忍褊隘，旣乘此勢，必有異圖。將軍前計爲不諧矣，非破世充不可入朝也。」密曰：「始謂先生儒者，不達時事，今乃坐決大計，何其明也。」

隋河間郡丞王琮守郡城，以拒羣盜竄。建德攻之，歲餘不下。聞煬帝凶問，帥吏士發喪，乘城者皆哭。建德遣使弔之，琮因使者請降。建德退，舍具饌以待之。琮言及隋亡，俯伏流涕。建德亦爲之泣。諸將曰：「琮久拒我軍，殺傷甚衆。」

力盡乃降請烹之建德曰琮忠臣也吾方賞之以勸事君奈何殺之往在高鷄泊爲盜容可妄殺人今欲安百姓定天下豈得害忠良乎乃徇軍中曰先與王琮有怨敢妄動者夷三族以琮爲瀛州刺史於是河北郡縣聞之爭附於建德先是建德陷景城執戶曹張元素將殺之縣民千餘人號泣請代其死曰戶曹清慎無比大王殺之何以勸善建德乃釋之饒陽令宋正本博學有才氣說建德以定河北之策建德引爲謀主（按瀛州卽河間府景城今交河縣饒陽縣屬深州）

初李密旣殺翟讓頗自驕矜不恤士卒倉粟雖多無府庫錢帛戰士有功無以爲賞又厚撫初附之人衆心頗怨徐世勣嘗因宴會刺譏其短密不憚使世勣出鎮黎陽雖名委任實亦疏之密開洛口倉散米無防守典當者又無文券取之者隨意多少或離倉之後力不能致委棄衢路自倉城至郭門米厚數寸爲車馬所輻踐羣盜來就食者並家屬近百萬口無甕盎織荊筐淘米洛水十里兩岸之間望之皆如白沙密喜謂賈閏甫曰此可謂足食矣閏甫對曰國以民爲本民以食爲天今民所以襁負如流而至者以所天在此故也而有司曾無愛吝屑越如此竊恐一旦米盡民散明公孰與成大業哉密謝之王世充旣專大權厚賞將士繕治器械亦陰圖取密時隋軍乏食而密軍少衣世充請交易密難之長史邴元真等各求私利勸密許之先是東都人歸密者日以百數旣得食降者益少密悔而止世充欲乘其弊擊之恐人心不壹乃詐稱左軍衛士張永通三夢周公令宣意於世充當勒兵相助擊賊當有大功不卽兵皆疫死世充兵多楚人信妖言皆請戰世充簡練精銳得二萬餘人馬二千餘

匹九月壬子出師擊密癸丑至偃師營於通濟渠南作三橋於渠上密留王伯當守金墉自引精兵出偃師阻邙山以待之密召諸將會議裴仁基曰世充悉衆而至洛下必虛可分兵守其要路令不得東簡精兵三萬傍河西出以逼東都世充還我且按甲世充再出我又逼之如此則我有餘力彼勞奔命破之必矣密曰公言大善今東都兵有三不可當兵仗精銳一也決計深入二也食盡求戰三也我但乘城固守蓄力以待之彼欲鬪不得求走無路不過十日世充之頭可致麾下陳智略樊文超單雄信皆曰計世充戰卒甚少屢經摧破悉已喪膽兵法曰倍則戰況不倍哉且江湖新附之士望因此機展其勳效及其鋒而用之可以得志於是諸將誼然欲戰者什支密惑於衆議而從之仁基苦爭不能得擊地歎曰公後必悔之魏徵言於長史鄭頰曰魏公雖驟勝而驍將銳卒多死戰士心怠此二者難以應敵且世充乏食志在死戰難與爭鋒未若深溝高壘以拒之不過旬月世充糧盡必自退追而擊之蔑不勝矣頰曰此老生之常談耳徵曰此乃奇策何謂常談拂衣而起程知節將內馬軍與密同營在北邙山上單雄信將外馬軍營于偃師城北世充遣數百騎度通濟渠攻雄信營密遣裴行儼與知節助之行儼先馳赴敵中流矢墜於地知節救之殺數人世充軍披靡乃抱行儼重騎而還爲世充騎所逐刺槊洞過知節迴身捩折其槊兼斬追者與行儼俱免會日暮各斂兵還營密驍將孫長樂等十餘人皆被重創密新破宇文化及有輕世充之心不設壁壘世充夜遣二百餘騎潛入北山伏谿谷中命軍士皆秣馬蓐食甲寅旦將戰世充誓衆曰今日之戰非直爭勝負死生之分在此一舉若其捷也富貴固所不論若其不捷必無一人獲免所

爭者死非獨爲國各宜勉之遲明引兵薄密密出兵應之未及成列世充縱兵擊之世充士卒皆江淮剽勇出入如飛世充先索得一人貌類密者縛而匿之戰方酣使牽以過陳前諫曰已獲李密矣士卒皆呼萬歲其伏兵發乘高而下馳壓密營縱火焚其廬舍密衆大潰其將張童仁陳智略皆降密與萬餘人馳向洛口世充夜圍偃師鄭頊守偃師其部下翻城納世充偃師破世充得其兄世偉子元應虔恕瓊等又獲密將佐裴仁基鄭頊祖君彥等數十世充於是整兵向洛口密將入洛口城因與衆謀待世充兵半濟洛水然後擊之世充軍至密候騎不時覺比將出戰世充軍悉已濟矣單雄信等又勒兵自據密自度不能支帥麾下輕騎奔虎牢元真遂以城降初雄信驍捷善用馬槊名冠諸軍軍中號飛將房彥藻以雄信輕於去就勸密除之密愛其才不忍也及密失利雄信遂以所部降世充時王伯當棄金墉保河陽密自虎牢歸之引諸將共議密欲南阻河北守太行東連黎陽以圖進取諸將皆曰今兵新失利衆心危懼若更停留恐叛亡不日而盡又人情不願難以成功密曰孤所恃者衆也衆既不願孤道窮矣欲自刎以謝衆伯當抱密號絕衆皆悲泣密復曰諸君幸不相棄當共歸關中密身雖無功諸君必保富貴衆咸曰然密又謂伯當曰將軍室家重大豈復與孤俱行哉伯當曰昔蕭何盡帥子弟以從漢王伯當恨不兄弟俱從豈以公今日失利遂輕去就乎縱身分原野亦所甘心左右莫不感激從密入關者凡二萬人秦州總管竇軌擊薛仁果不利驃騎將軍劉威鎮涇州仁果圍之城中糧盡感殺所乘馬以分將士感一無所噉唯煮馬骨取汁和木屑食之城垂陷者數矣會長平王叔良將士至涇州仁果乃揚言食盡引兵南去乙卯又

遣高撫人僞以城降叔良遣感帥衆赴之己未至城下扣城中人曰賊已去可踰城入感命燒其門城上下水灌之感知其詐遣步兵先還自帥精兵爲殿俄而城上舉三烽仁果兵自南原大下戰於百里細川唐軍大敗感爲仁果所擒仁果復圍涇州令感語城中云援軍已敗不如早降感許之至城下大呼曰逆賊飢餒亡在旦夕秦王帥數十萬衆四面俱集城中勿憂勉之仁果怒執感於城旁埋之至膝馳騎射之至死聲色愈厲叔良嬰城固守庚申隴州刺史陝人常達擊仁果于宜祿川斬首千餘級仁果屢攻常達不能克乃遣其將件士數以數百人詐降達厚撫之乙丑士政伺隙以其徒劫達擁城中二千人降於仁果達見仁果詞色不屈仁果壯而釋之奴賊帥張貴謂達曰汝識我乎達曰汝逃死奴賊耳貴怒欲殺之人救之得免（按百里細川在涇州宜祿川在長武縣）冬十月鄧州刺史呂子臧與撫慰使馬元規擊朱粲破之子臧言於元規曰粲新敗上下危懼請併力擊之一舉可滅若復遷延其徒稍集力彊食盡致死於我爲患方深元規不從子臧請獨以所部兵擊之元規不許旣而粲收集餘衆兵復大振自稱楚帝於冠軍改元昌達進攻鄧州子臧撫膺謂元規曰老夫今坐公死矣粲圍南陽會霖雨城壞所親勸子臧降子臧曰安有天子方伯降賊者乎帥麾下赴敵而死俄而城陷元規亦死（按鄧州南陽郡今鄧州也冠軍縣在其西北四十里）初北海賊帥綦公順帥其徒三萬攻郡城已克其外郭進攻子城城中食盡公順自謂克在旦夕不爲備明經劉蘭成糾合城中驍健百餘人襲擊之城中見兵繼之公順大敗棄營走郡城獲全於是郡官及望族分城中民爲

六軍各將之蘭成亦將一軍有宋書佐者離開諸軍蘭成恐終及禍亡奔公順公順軍中喜謀欲奉以爲主固辭乃以爲長史軍事咸聽焉居五十餘日蘭成簡軍中驍健者百五十人往鈔北海距城四十里留十人使多芟草分爲百餘積二十里又留二十人各執大旗五六里又留三十人伏險要蘭成自將十人夜詎城一里許潛伏餘八十人分僻便處約聞鼓聲卽鈔人畜而去仍一時焚積草明晨城中遠望無煙塵皆出樵牧日向中蘭成以十人直抵城門城上鉦鼓亂發伏兵四出鈔掠雜畜十餘頭及樵牧者而去蘭成度鈔者已遠徐步而還城中雖出兵恐有伏兵不敢急追又見前有旌旗煙火遂不敢進而還旣而城中知蘭成前者衆少悔不窮追居月餘蘭成謀取郡城更以二十人直抵城門城中人競出逐之行未十里公順將大兵總至郡兵奔馳還城公順進兵圍之蘭成一言招諭城中人爭出降蘭成撫存老幼禮遇郡官見宋書佐亦禮之如舊仍資送出境內外安堵時海陵賊帥臧君相聞公順據北海帥其衆五衆來爭之公順衆少聞之大懼蘭成爲公順畫策曰君相今去此尙遠必不爲備請將軍倍道襲擊其營公順從之自將驍勇五千人齎熟食倍道襲之將至蘭成與敢死士二十人前行距君相營五十里見其鈔者負擔向營蘭成亦與其徒負擔蔬米燒器詐爲鈔者擇空而行聽察得其號及主將姓名至暮與賊並肩而入負擔巡營知其虛實得其更號乃于空地燃火營食至三鼓忽於主將幕前交刀亂下殺百餘人賊衆驚擾公順兵亦至急攻之君相僅以身免俘斬數千收其資糧甲仗以還由是公順黨衆大盛及李密據洛口公順以衆附之密敗亦來降（按青州北海郡今青州府海陵今泰州）

薛仁果之爲太子也（胡氏曰去年秋七月薛舉稱帝仁果爲太子）與諸將多有隙及卽位衆心猜懼郝瑗哭舉得疾遂不起由是國勢浸弱秦王世民至高墮仁果使宗羅睺將兵拒之羅睺數挑戰世民堅壘不出諸將咸請戰世民曰我軍新敗士氣沮喪（胡氏曰謂是年七月淺水原之敗也）賊恃勝而驕我心宜閉壘以待之彼驕我奮可一戰而克也乃令軍中曰敢言戰者斬相持六十餘日仁果糧盡其將梁胡郎等帥所部來降世民知仁果將士雖心命行軍總管梁實營於淺水原以誘之羅睺大喜盡銳攻之梁實守險不出營中無水人馬不飲者數日羅睺攻之甚急世民度賊已疲謂諸將曰可以戰矣遲明使右武侯大將軍龐玉陳於淺水原羅睺併兵擊之玉戰幾不能支世民引大軍自原北出其不意羅睺引兵還戰世民帥饒騎數十先陷陳唐兵表裏奮擊呼聲動地羅睺士卒大潰斬首數千級世民帥二千餘騎追之竇軌叩馬苦諫曰仁果猶據堅城雖破羅睺未可輕進且按兵以觀之世民曰吾慮之久矣破竹之勢不可失也（胡氏曰兵威已振譬如破竹數節之後迎刃而解）勇勿復言（胡氏曰世民竇氏之出呼軌爲勇）遂進仁果陳於城下世民據涇水臨之仁果驍將渾幹等數人臨陳來降仁果懼引兵入城拒守日向暮大軍繼至遂圍之夜半守城者爭自投下仁果計窮十一月己酉出降得其精兵萬餘人男女五萬口諸將皆賀因問曰大王一戰而勝遽捨步兵又無攻具輕騎直造城下衆皆以爲不克而卒取之何也世民曰羅睺所將皆隴外之人將驍卒悍吾特出其不意而破之斬獲不多若緩之則皆入城仁果撫而用之未易克也急之則散歸隴外折墟虛弱仁果破膽不暇爲謀此吾所以克也衆皆悅服世民所得

降卒悉使仁果兄弟及宗羅睺翟長孫等將之與之射獵無所疑開賊畏威銜恩皆願效死世民間褚亮名求訪獲之禮遇甚厚引爲王府文學上遣使謂世民曰薛舉父子多殺我士卒必盡誅其黨以謝冤魂李密諫曰薛舉虐殺無辜此其所以亡也陛下何怨焉懷服之民不可不撫乃命戮其謀首餘赦之上使密迎秦王世民於鹵州密自恃智略功名見上猶有傲色及見世民不覺驚服（胡氏曰此豈獨相表服之哉威靈氣燄足以服之也）私謂殷開山曰真英主也不如是何以定禍亂乎詔以員外散騎常侍姜謨爲秦州刺史謦撫以恩信盜賊悉歸首士民安之（按淺水原在長武西北高墪在其北折墪在涇州）

徐世勳據李密舊境未有所屬魏徵隨密至長安乃自請安集山東上以爲秘書丞乘傳至黎陽遣徐世勳書勸之早降世勳遂決計西向謂長史陽翟郭孝恪曰此民衆土地皆魏公有也吾若上表獻之是利主之敗自爲功以邀富貴也吾實恥之今宜籍郡縣戶口士馬之數以啓魏公使自獻之乃遣孝恪詣長安又運糧以餉淮安王神通上聞世勳使者至無表止有啓與密甚怪之孝恪具言世勳意上乃歎曰徐世勳不肯德不邀功真純臣也賜姓李以孝恪爲宋州刺史使世勳經略虎牢以東所得州縣委之選補（按時世勳在黎陽倉故有糧餉神通宋州今歸德府）

李密驕貴日久又自負歸國之功朝廷待之不副本望鬱鬱不樂嘗遇大朝會密爲光祿卿常進食深以爲恥退以告王伯當伯當心亦怏怏因謂密曰天下事在公度內耳今東海公在黎陽（胡氏曰密封徐世勳爲東海公）

襄陽公在羅口（胡氏曰密將張善相時爲伊州刺史據襄城自襄城北出則羅口蓋李密封善相爲襄城公伯當指言之也）河南兵馬屈指可計豈得久如此也密大喜乃獻策於上曰臣虛蒙榮寵安坐京師曾無報效山東之衆皆臣故時麾下請往收而撫之憑藉國威取王世充如拾地芥耳上聞密故將士多不附世充亦欲遣密往收之羣臣多諫曰李密狡猾好反今遣之如投魚於泉放虎於山必不反矣上曰帝王自有天命非小子所能取借使叛去如以蒿箭射蒿中耳今使二賊交鬪吾可以坐收其弊辛未遣密詣山東收其餘衆之未下者密請與賈閏甫偕行上許之命密及閏甫同升御榻賜食傳飲卮酒曰吾三人同飲是酒以明同心善建功名以副朕意丈夫一言許人千金不易有人確執不欲弟行朕推赤心於弟非他人所能開也密閏甫再拜受命上又以伯當爲密副而遣之（按羅口卽羅川口在鞏縣南苻堅之於慕容垂唐高祖之於李密其利鈍相反者降人如虎豹吾之氣力足取之始可受降始可縱降）

初王須拔掠幽州中流矢死其將魏刀兒代領其衆據深澤掠冀定之間衆至十萬自稱魏帝建德僞與連和刀兒弛備建德襲擊破之遂圍深澤其徒執刀兒降建德斬之盡并其衆易定等州皆降唯冀州刺史麴稜不下稜婿崔履行暹之孫也自言有奇術可使攻者自敗稜信之履行命守城者皆坐毋得妄鬪曰賊雖登城汝曹勿怖吾將使賊自縛於是爲壇夜設章醮然後白衣衰絰杖竹登北樓慟哭又令婦女升屋四面振裙建德攻之急稜將戰履行固止之俄而城陷履行哭猶未已建德見稜曰卿忠臣也厚禮之以爲內史令（按幽州今順天府深

澤屬定州冀州今猶曰冀州錄此爲信術數者戒）

隋將堯君素守河東上遣呂紹宗韋義節獨孤懷恩相繼攻之俱不下時外圍嚴急君素爲木鵝置表於頸具論事勢浮之於河河陽守者得之達於東都皇泰主見而歎息拜君素金紫光祿大夫龐玉皇甫無逸自東都來降上悉遣詣城下爲陳利害君素不從又賜金券許以不死其妻又至城下謂之曰隋室已亡君何自苦君素曰天下名義非婦人所知引弓射之應弦而倒君素亦自知不濟然志在守死母言及國家未嘗不歔歔謂將士曰吾昔事主上於藩邸（胡氏曰隋書堯君素傳煬帝爲晉王君素以左右從）大義不得不死必若隋祚永終天命有屬自當斷頭以付諸君聽君等持取富貴今城池甚固倉儲豐備大事猶未可知不可橫生心也君素性嚴明善御衆下莫敢叛久之倉粟盡人相食又獲外人微知江都傾覆十二月丙子君素左右薛宗李楚客殺君素以降傳首長安君素遣朝散大夫解人王行本將精兵七百在他所聞之赴救不及因捕殺君素者黨與數百人悉誅之復乘城拒守懷恩引兵圍之

初宇文文化及遣使招羅藝藝曰我隋臣也斬其使者爲煬帝發喪臨三日竇建德高開道各遣使招之藝曰建德開道皆劇賊耳吾聞唐公已定關中人望歸之此真吾主也吾將從之敢沮議者斬會張道源慰撫山東藝遂奉表與漁陽上谷等諸郡皆來降詔以藝爲幽州總管薛萬均世雄之子也與弟萬徹俱以勇略爲藝所親待詔以萬均爲上柱國永安郡公萬徹爲車騎將軍武安縣公竇建德既克冀州兵威益盛帥衆十萬寇幽州藝將逆

戰萬均曰被衆我寡出戰必敗不若使羸兵背城阻水爲陳彼必度水擊我萬均請以精騎百人伏于城旁俟其半度擊之蔑不勝矣藝從之建德果引兵度水萬均邀擊大破之建德竟不能至其城下乃分兵掠霍堡及雍奴等縣藝復邀擊敗之凡相拒百餘日建德不能克乃還樂壽藝得隋通直謁者溫彥博以爲司馬藝以幽州歸國彥博贊成之詔以彥博爲幽州總管府長史未幾徵爲中書侍郎兄大雅時爲黃門侍郎與彥博對居近密時人榮之（按漁陽今薊州上谷今易州雍奴今武清縣樂壽今獻縣）

上使李密分其麾下之半留華州將其半出關長史張寶德上封事言其必叛上意乃中變又恐密驚駭乃降勅書勞來令密留所部徐行單騎入朝更受節度密至稠桑得謂賈閔甫曰勅遣我去無故復召我還天子勳云有人確執不許此讚行矣吾今若還無復生理不若破桃林縣收其兵糧走度河北比信達熊州吾已遠矣苟得至黎陽大事必成公意何如閔甫曰主上待明公甚厚况國家姓名著在圖讖天下終當一統明公旣已委質復生異圖任壞史萬寶據熊穀二州此事朝舉彼兵夕至雖克桃林兵豈暇集一稱叛逆誰復容人爲明公計不若且應朝命以明元無異心自然浸潤不行更欲出就山東徐思其便可也密怒曰唐使吾與絳灌同列何以堪之且讖文之應彼我所共今不殺我聽使東行足明王者不死縱使唐遂定關中山東終爲我有天與不取乃欲束手投人公吾之心腹何意如是若不同心當斬而後行閔甫泣曰明公雖云應讖近察天人稍已相違且自翟讓受戮之後人皆謂明公棄恩忘本今日誰肯復以所有之兵束手委公乎彼必慮公見奪逆相拒抗一朝失勢豈有

容足之地哉自非荷恩殊厚者詎肯深言不諱乎願明公熟思之但恐大福不再王伯當亦止密以爲未可密不從因執使者斬之庚子且密給桃林縣官曰奉詔暫還京師家人請寄縣舍乃簡驄勇數十人著婦人衣戴髻羅藏刀裙下詐爲妻妾自帥之入縣舍須臾變服突出因據縣城驅掠徒衆直趣南山乘險而東遣人馳告故將伊州刺史張善相令以兵應接右翊衛將軍史萬寶鎮熊州謂行軍總管盛彥師曰李密驍賊也又輔以王伯當今決策而叛殆不可當也彥師笑曰請以數千之衆邀之必梟其首萬寶曰公以何策能爾彥師曰兵法尙詐不可爲公言之卽帥衆踰熊耳山南據要道令弓弩夾路乘高刀楯伏於溪谷令之曰俟賊半度一時俱發或問曰聞李密欲向洛州而公入山何也彥師曰密聲言向洛實欲出人不意走襄城就張善相耳若賊人谷口我自後追之山路險隘無所施力一夫殿後必不能制今吾先得入谷擒之必矣密旣度陝以爲餘不足慮（胡氏曰陝州之兵旣不能邀密密自以爲踰山而南他無邀阻不足慮也）遂擁衆徐行果踰山南出彥師突擊之密衆首尾斷絕不得相救遂斬密及伯當俱傳首長安（按稠桑在闕鄉縣桃林縣在陝州西四十五里熊州今宜陽縣穀州今新安縣伊州今嵩縣襄城今汝州熊耳山在宜陽縣西）

有犯法不至死者上特命殺之監察御史李素立諫曰三尺法王者所與天下共也法一動搖人無所措手足陛下甫創洪基奈何棄洋臣忝法司不敢奉詔上從之自是特承恩遇命所司授以七品清要官所司擬雍州司戶上曰此官要而不清又擬祕書郎上曰此官清而不要遂擢授侍御史上以舞胡安叱奴爲散騎侍郎禮部侍郎

李綱諫曰古者樂工不與士齒今天下新定建義功臣行賞未徧高才碩學猶滯草萊而先擢舞胡爲五品非所以規模後世也上不從

二年 宇文化又以珍貨誘海曲諸賊賊帥王薄帥衆從之與共守聊城竇建德謂其羣下曰吾爲隋民隋爲吾君今宇文化及弑逆乃吾讎也吾不可以不討乃引兵趣聊城淮安王神通攻聊城化及糧盡請降神通不許安撫副使崔世幹勸神通許之曰今建德方至若化及未平內外受敵吾軍必敗夫不攻而下之爲功甚易奈何貪其玉帛而不受乎神通怒囚世幹於軍中旣而宇文士及自濟北餽之化及軍稍振遂復拒戰建德軍且至神通引兵退建德與化及連戰大破之化及復保聊城建德縱兵四面急攻王薄開門納之建德入城生擒化及先謁隋蕭皇后語皆稱臣素服哭煬帝盡哀收傳國璽及鹵簿儀仗撫存隋之百官然後執逆黨宇文智及楊士覽元武達許宏仁孟景集隋官而斬之梟首軍門之外以檻車載化及并二子承基承趾至襄國斬之建德每戰勝克城所得資財悉以分將士身無所取又不噉肉常食蔬茹粟飯妻曹氏不衣紈綺所役婢妾纔十許人及破化及得隋官人千數卽時散遣之以隋黃門侍郎裴矩爲左僕射掌選事自餘隨才授職委以政事其不願留欲詣關中及東都者亦聽之仍給資糧以兵援之出境隋驍果尙近萬人亦各縱遣任其所之又與王世充結好遣使奉表於隋皇泰主皇泰主封爲夏王建德起於羣盜雖建國未有文物法度裴矩爲之定朝儀制律令建德甚悅每從之諮訪典禮（按聊城縣屬東昌府濟州治廬縣卽濟北也今長清縣貝州今清河縣襄國今順德府邢臺縣

也)

驃騎將軍張孝珉以勁卒百人襲王世充汜水城入其郛沈米船百五十艘閏二月己未世充寇穀州以秦叔寶程知節爲將軍待之皆厚然二人疾世充多詐知節謂叔寶曰王公器度淺狹而多妄語好爲咒誓此乃老巫嫗耳豈撥亂之主乎世充與唐兵戰于九曲叔寶知節皆將兵在陳與其徒數十騎西馳百許步下馬拜世充曰僕荷公殊禮深思報効公性猜忌喜信讒言非僕託身之所今不能仰事請從此辭遂躍馬來降世充不敢逼上使事秦王世民世民素聞其名厚禮之以叔寶爲馬軍總管知節爲左三統軍時世充驍將又有驃騎武安李君羨征南將軍田留安亦惡世充之爲人帥衆來降世民引君羨置左右以留安爲右四統軍(按汜水今汜水縣九曲今在宜陽縣)

李軌將安脩仁兄興貴仕長安表請說軌諭以禍福上曰軌阻兵恃險連結吐谷渾突厥吾興兵擊之尙恐不克豈口舌所能下乎興貴曰臣家在涼州累世豪望爲民夷所附弟脩仁爲軌所信任子弟在機近者以十數臣往說之軌聽臣固善若其不聽圖之肘腋易矣上乃遣之興貴至武威軌以爲左右衛大將軍興貴乘閒說軌曰涼地不過千里土薄民貧今唐起太原取函秦宰制中原戰必勝攻必取此殆天啓非人力也不若舉河西歸之則竇融之功復見於今日矣軌曰吾據山河之固彼雖疆大若我何汝自唐來爲唐遊說耳興貴謝曰臣聞富貴不歸故鄉如衣繡夜行臣闔門受陛下榮祿安肯附唐但欲效其愚慮可否陛下耳於是退與脩仁陰結諸胡起兵

擊軌軌出戰而敗嬰城自守興貴狗曰大唐適我來誅李軌敢助之者夷三族城中人爭出就興貴軌計窮與妻子登玉女臺置酒爲別五月庚辰興貴執之以聞河西悉平鄧曉在長安舞蹈稱慶上曰汝爲人使臣聞國亡不感而喜以求媚於朕不忠於李軌肯爲朕用乎遂廢之終身軌至長安并其子弟皆伏誅

初易州賊帥宋金剛有衆萬餘與魏刀兒連結刀兒爲竇建德所滅金剛救之戰敗帥衆四千西奔劉武周武周聞其善用兵得之甚喜號曰宋王委以軍事中分家貲以遺之金剛亦深自結因說武周圖晉陽南向爭天下武周以金剛爲西南道大行臺使將兵三萬寇并州六月丁未武周進逼介州沙門道澄以佛幡絕之入城遂陷介州詔左武衛大將軍姜寶誼行軍總管李仲文擊之武周將黃子英往來雀鼠谷數以輕兵挑戰兵纔接子英陽不勝而走如是再三寶誼仲文悉衆逐之伏兵發唐兵大敗寶誼仲文皆爲所虜旣而俱逃歸上復使二人將兵擊武周上以武周入寇爲憂右僕射裴寂請自行癸亥以寂爲晉州道行軍總管討武周聽以便宜從事（按易州今仍曰易州并州今太原府介州今介休縣雀鼠谷在其西南晉州今平陽府）

秋九月裴寂至介休宋金剛據城拒之寂軍於度索原營中飲澗水金剛絕之士卒渴乏寂欲移營就水金剛蹤兵擊之寂軍遂消失亡略盡寂一日一夜馳至晉州先是劉武周屢遣兵攻西河沿州刺史劉瞻拒之李仲文引兵就之與共守西河及寂敗自晉州以北城鎮俱沒唯西河獨存寂上表謝罪上慰諭之復使鎮撫河東（胡氏曰劉文靜淺水原之敗貶落不偶以至於誅裴寂度索原之敗位任如故唐高祖以賞罰馭羣臣上下其手矣）

武周進逼并州齊王元吉給其司馬劉德威曰卿以老弱守城吾以彊兵出戰辛巳元吉夜出兵攜其妻妾棄州奔還長安元吉始去武周兵已至城下晉陽土豪薛深以城納武周武周據太原遣金剛攻晉州拔之進逼絳州陷龍門冬十月進攻澮州陷之軍勢甚銳寂性怯無將帥之略唯發使絡繹趣虞秦二州居民入城堡焚其積聚民驚擾愁怨皆爲盜時王行本猶據蒲反未下亦與武周相應關中震駭上出手敕曰賊勢如此難與爭鋒宜棄大河以東謹守關西而已秦王世民上表曰太原王業所基國之根本河東富實京邑所資若舉而棄之臣竊憤恨願暇臣精兵三萬必冀平殄武周克復汾晉上於是悉發關中兵以益世民所統使擊武周乙卯幸華陰至長春宮以送之（按度索原在介休縣東南介山下涪州西河郡今汾州絳州今絳州非注所云新田也龍門今河津縣西澮州今翼城縣虞州今安邑縣秦州今榮何縣蒲反卽蒲州府長春宮在朝邑縣）

竇建德引兵趣衛州建德每行軍分爲三道輜重細弱居中央步騎夾左右相去三里許建德以千騎前行過黎陽三十里李世勣遣騎將邱孝剛將三百騎偵之孝剛驍勇善馬槩與建德遇遂擊之建德敗走右方兵救之擊斬孝剛建德怒還攻黎陽克之虜淮安王神通李世勣父蓋魏徵及帝妹同安公主唯李世勣以數百騎走度河數日以其父故還詣建德降衛州聞黎陽陷亦降建德以世勣爲左驍衛將軍使守黎陽常以其父蓋自隨爲質以徵爲起居舍人滑州刺史王軌奴殺軌攜其首詣建德降建德曰奴殺主大道吾何爲受之立命斬奴返其首於滑州吏民感悅卽日請降於是其旁州縣及徐圓朗等皆望風歸附建德還洛州築萬春宮徙都之置淮安王

神通於下博待以客禮（按衛州卽衛輝府黎陽在其東北一百十里今濬縣也滑州今滑縣洛州今廣平府下博卽深州）

夏侯端至黎陽（胡氏曰是年四月遣夏侯端安撫淮左）李世勣發兵送之自澶淵濟河傳檄州縣東至於海南至於淮二十餘州皆遣使來降行至譙州會汴毫降於王世充還路遂絕端素得衆心所從二千人雖糧盡不忍委去端坐澤中殺馬以饗士因歔歔謂曰卿等鄉里皆已從賊特以共事之情未能見委我奉王命不可從卿卿有妻子無宜效我可斬吾首歸賊必獲富貴皆皆流涕曰公於唐室非有親屬直以忠義志不圖存某等雖賤心亦人也甯肯害公以求利乎端曰卿不忍見殺吾當自刎衆抱持之乃復同進潛行五日餒死及爲賊所擊奔潰相失者大半唯餘五十二人同走采營豆生食之端持節未嘗離身屢遣從者散自求生衆又不可時河南之地皆入世充唯杞州刺史李公逸爲唐堅守遣兵迎端館給之世充遣使召端解衣遺之仍送除書以端爲淮南郡公尙書少吏部端對使者焚書毀衣曰夏侯端天子大使豈受王世充官乎汝欲吾往唯可取吾首耳因解節旄懷之置刃於竿自山中西走無復蹊徑冒踐荆棘晝夜兼行得達宜陽從者墜崖溺水及爲虎狼所食又喪其半其存者鬢髮禿落無復人狀端詣闕見上但謝無功初不自言艱苦上復以爲祕書監郎楚之至山東亦爲竇建德所獲楚之不屈竟得還（胡氏曰卽楚之與夏侯端同時出使史言唐之興也使於四方者皆能不辱君命按澶淵在開州西譙州今亳州杞州今杞縣）十一月巳卯劉武周寇滑州秦王世民引兵自龍門乘冰堅度河

屯柏壁與宋金剛和持時河東州縣俘掠之餘未有倉廩人情恒擾聚入城堡徵斂無所得軍中乏食世民發教諭民民聞世民爲帥而來莫不歸附（胡氏曰此豈可以聲音笑貌致之）自近及遠至者日多然後漸收其糧食軍食以充（胡氏曰孔子曰足食足兵民信之矣民已信之足食足兵當知所先後也）乃休兵秣馬唯令偏裨乘閒抄掠大軍堅壁不戰由是賊勢日衰世民嘗自帥輕騎覘敵騎皆四散世民獨與一甲士登邱而寢俄而賊兵四合初不之覺會有蛇逐鼠觸甲士之面甲士驚寤遂白世民俱上馬（胡氏曰史言世民之有天命）馳百餘步爲賊所及世民以大羽箭射殛其驍將（胡氏曰史言世民不惟有天命亦武藝絕人）賊騎乃退十二月于筠說永安王孝基急攻呂崇茂獨孤懷恩請先成攻具然後進孝基從之崇茂求救於宋金剛遣其將尉遲敬德尋相將兵奄至夏縣孝基表裏受敵軍遂大敗孝基懷恩筠唐儉及行軍總管劉世讓皆爲所虜敬德名恭以字行上徵裴寂人朝責其敗軍下吏旣而釋之寵待彌厚尉遲敬德尋相將還滄州秦王世民遣兵部尙書殷開山總管秦叔寶等邀之於美良川大破之斬首二千餘級頃之敬德尋相潛引精騎援王行本於蒲反世民自將步騎三千從閒道夜趨安邑邀擊大破之敬德相僅以身免悉俘其衆復歸柏壁諸將咸請與金剛戰世民曰金剛懸軍深入精兵猛將咸聚於是武周據太原倚金剛爲扞蔽軍無蓄積以虜掠爲資利在速戰我閉營養銳以挫其鋒分兵汾隰衝其心腹彼糧盡計窮自當遁走當待此機未宜速戰（按涪州今汾州府柏壁在絳州西南二十里龍門之東北也善陽今朔州夏縣今屬解州滄州今翼城縣美良川在開喜縣南四十里蒲反今蒲州府

安邑縣屬解州汾州隰隰州

三年春正月李世勣謀俟竇建德至河南掩襲其營殺之翼得其父并建德土地以歸唐會建德妻產久之不至曹旦建德之妻兄也在河南多所侵擾諸賊羈屬者皆怨之賊帥李文相號李商胡聚五千餘人據孟津中潭母霍氏亦善騎射自稱霍總管世勣結商胡爲昆弟入拜商胡之母母泣謂世勣曰竇氏無道如何事之世勣曰母無憂不過一月當殺之相與歸唐耳世勣辭去母謂商胡曰東海公許我共圖此賊事久變生何必待其來不如速決是夜商胡召曹旦偏裨二十三人飲之酒盡殺之旦別將高雅賢阮君明尙在河北未濟商胡以巨舟四艘濟河北之兵三百人至中流悉殺之有獸醫游水得免至南岸告旦旦嚴警爲備商胡既舉事始遣人告世勣世勣與旦連營郭孝恪勸世勣襲旦世勣未決聞旦已有備遂與孝恪帥數十騎來奔商胡復引精兵二千北襲阮君明破之高雅賢收衆去商胡追之不及而還建德羣臣請誅李蓋建德曰世勣唐臣爲我所虜不忘本朝乃忠臣也其父何罪遂赦之甲午世勣孝恪至長安曹旦遂取濟州復還洛州（按孟津中潭卽河陽之中潭也濟州今長清縣時世勣父爲建德所虜）

夏四月劉武周數攻浩州爲李仲文所敗宋金剛軍中食盡丁未金剛北走秦王世民追之及尋相於呂州大破之乘勝逐北一晝夜行二百餘里戰數十合至高壁嶺總管劉宏基執轡諫曰大王破賊逐北至此功亦足矣深入不已不愛身乎且士卒飢疲宜留壁於此俟兵糧畢集然後復進末晚也世民曰金剛計窮而走衆心離沮功

難成而易敗機難得而易失必乘此勢取之若更淹留使之計立備成不可復攻矣吾謁忠徇國豈顧身乎遂策馬而進將士不敢復言飢追及金剛於雀鼠谷一日八戰皆破之俘斬數萬之夜宿於雀鼠谷西原世民不食二日不解甲三日矣軍中止有一羊世民與將士分而食之世民引兵趣介休金剛尙有衆二萬出西門背城布陳南北七里世民遣總管李世勣與戰小卻爲賊所乘世民帥精騎擊之出其陳後金剛大敗斬首三千級金剛輕騎走世民追之數十里至張難堡涪州行軍總管樊伯通張德政據堡自守世民免胄示之堡中喜譟且泣左右告以王不食獻濁酒脫粟飯尉遲敬德收餘衆守介休世民遣任城王道宗宇文士及往諭之敬德與尋相舉介休及永安降世民得敬德甚喜以爲右一府統軍使將其舊衆八千與諸營相參屈突通慮其變驟以爲言世民不聽武周開金剛敗大懼棄并州走突厥金剛收其餘衆欲復戰衆莫肯從亦與百餘騎走突厥（胡氏曰秦王之破劉武周宋金剛與破薛仁果宗羅巖方略一也）世民至晉陽武周所署僕射楊伏念以城降唐儉封庫以待世民武周所得州縣皆入於唐未幾金剛謀走上谷突厥追獲腰斬之嵐州總管劉六兒從金剛在介休秦王世民擒斬之其兄季真棄石州奔武周將高滿政滿政殺之武周之南寇也其內史令苑君璋諫曰唐主舉一州之衆直取長安所向無敵此乃天授非人力也晉陽以南道路險隘懸軍深入無繼於後若進戰不利何以自還不如北連突厥南結唐朝南面稱孤足爲長策武周不聽留君璋守朔州及敗泣謂君璋曰不用君言以至於此久之武周謀亡歸馬邑事泄突厥殺之（按呂州今霍州高壁在其北又北爲介休西南之雀鼠谷張難堡在孝

義東南永安在趙城東北上谷今易州嵐州今嵐縣石州今永甯州馬邑今朔州及馬邑縣）

秋七月壬戌詔秦王世民督諸軍擊王世充陝東道行臺屈突通二子在洛陽上謂通曰今欲使卿東征如卿二子何通曰臣昔爲俘囚分當就死陛下釋縛加以恩禮當是之時臣心口相誓期以更生餘年爲陛下盡節但恐不獲死所耳今得備先驅二兒何足顧乎上歎曰徇義之士一至此乎壬午秦王世民至新安王世充遣魏王宏烈鎮襄陽荆王行本鎮虎牢宋王泰鎮懷州齊王世暉檢校南城楚王世偉守寶城太子元應守東城漢王元恕守含嘉城魯王道徇守曜儀城世充自將戰兵楊公卿帥左龍驤二十八府騎兵郭善才帥內軍二十八府步兵跋野綱帥外軍二十八府步兵總三萬人以備唐羅士信將前軍圍慈澗世充自將兵三萬救之己丑秦王將輕騎前覘世充猝與之遇衆寡不敵道路險阨爲世充所圍世民左右馳射獲其左建威將軍燕琪世充乃退世民還營塵埃覆面軍不復識欲拒之世民免胄自言乃得入旦日帥步騎五萬進軍慈澗世充拔慈澗之戍歸於洛陽世民遣行軍總管史萬寶自宜陽南據龍門將軍劉德威自太行東圍河內上谷公王君廓自洛口斷其餉道懷州總管黃君漢自河陰攻迴洛城大軍屯於北邙連營以逼之世充洧州長史張公謹與刺史崔樞以州城來降八月甲辰黃君漢遣校尉張夜叉以舟師襲迴洛城克之獲其將達奚善定斷河陽南橋而還降其堡聚二十餘世充使太子元應帥公卿等攻迴洛不克乃築月城於其西留兵戍之世充陳於青城宮秦王世民亦置陳當之世充隔水謂世民曰隋室傾覆唐帝關中鄴帝河南世充未嘗西侵王忽舉兵東來何也世民使子宇文士及

應之曰四海皆仰皇風唯公獨阻聲教爲此而來世充曰相與息兵講好不亦善乎又應之曰奉詔取東都不令講好也至暮各引兵還（按新安縣在洛陽西七十里襄陽今襄陽府虎牢今汜水縣懷州今懷慶府洛陽東都城南曰南城東曰東城東城外別有曜儀城北城外有含嘉倉城西城外有寶城其都城西北隅則皇城也朝堂在焉皇宮又在皇城之北慈澗在宜陽縣西龍門卽伊闕也在洛陽東南河內卽懷慶府洛口在鞏縣今有洛口驛河陰在孟津瀕河洛城在其東北邙山在洛陽北洧州今鄆陵縣繁水今南樂縣青城在都城西北）

九月癸酉王世充顯州總管田瓚以所部二十五州來降自是襄陽聲問與世充絕史萬寶進軍甘泉宮丁丑秦王世民遣右武衛將軍王君廓攻轅轅拔之王世充遣其將魏隱等擊君廓君廓僞遁設伏大破之遂東徇地至管城而還先是世充將郭士衡許羅漢掠唐境君廓以策擊卻之詔勞之曰卿以十三人破賊一萬自古以少制衆未之有也世充尉州刺史時德叡帥所部杞夏陳隨許潁尉七州來降秦王世民以便宜命州縣官並依世充所署無所變易改尉州爲南汴州於是河南郡縣相繼來降劉武周降將尋相等多叛去諸將疑尉遲敬德囚之軍中屈突通殷開山言於世民曰敬德驍勇絕倫今旣囚之心必怨望留之恐爲後患不如遂殺之世民曰不然敬德若叛豈在尋相之後耶遽命釋之引入臥內賜之金曰丈夫意氣相期勿以小嫌介意吾終不信讒言以害忠良公宜體之必欲去者以此金相資表一時共事之情也辛巳世民以五百騎行戰地登魏宣武陵世充帥步騎萬餘猝至圍之單雄信引槊直趨世民敬德躍馬大呼橫刺雄信墜馬世充兵稍卻敬德翼世民出圍世民敬德

更帥騎兵還戰出入世充陳往反無所擬屈突通引大兵繼至世充兵大敗僅以身免擒其冠軍大將軍陳智略斬首千餘級獲排稍兵六千世民謂敬德曰公何相報之速也賜敬德金銀一篋自是寵遇日隆敬德善避稍每單騎入敵陳中敵稍稍刺之終莫能傷又能奪敵稍返刺之齊王元吉以善馬稍自負敬德之能請各去刃相與校勝負敬德曰敬德謹當去之王勿去也既而元吉刺之終不能中秦王世民間敬德曰奪稍與避稍孰難敬德曰奪稍難乃命敬德奪元吉稍元吉操稍躍馬志在刺之敬德須臾三奪其稍元吉雖面相歎異內甚恥之冬十月甲辰行軍總管羅士信襲世充硤石堡拔之士信又圍千金堡堡中人罵之士信夜遣百餘人抱嬰兒數十至堡下使兒啼呼詐云從東都來歸羅總管既而相謂曰此千金堡也吾屬誤矣卽去堡中以爲士信已去來者洛陽亡人出兵追之士信伏兵於道伺其開突入屠之（按顯州今泌陽縣甘泉宮胡氏以爲宜陽之甘棠宮是也轅轅山在偃師東南管城今鄭州杞今杞縣夏今太康縣陳今陳州府隋胡註作洧是也今鄆陵縣許今許州穎今潁州府尉今尉氏縣魏宣武陵在北邙山硤石堡在新安縣千金堡在洛陽西）

初王世充以邴元眞爲滑州行臺僕射濮州刺史杜才幹李密故將也恨元眞叛密詐以其衆降之元眞恃其官勢自往招慰才幹出迎延入就坐執而數之曰汝本庸才魏公置汝元僚不建毫髮之功乃構滔天之禍今來送死是汝之分遂斬之遣人齎其首至黎陽祭密墓以濮州來降（按滑州今滑縣濮州今仍曰濮州）

竇建德之圍幽州也李藝告急於高開道開道帥二千騎救之建德兵引去開道因藝道使來降以開道爲蔚州

總管賜姓李氏封北平郡王開道有矢鏃在頰召醫出醫曰鏃深不可出開道怒斬之別召一醫曰出之恐痛又斬之更召一醫醫曰可出乃鑿骨置楔其間骨裂寸餘竟出其鏃開道奏妓膳不輟竇建德帥衆二十萬復攻幽州建德兵已攀堞薛萬均萬徹帥敢死士百人從地道出其背掩擊之建德兵潰走斬首千餘級藝兵乘勝薄其營建德陳於營中填塹而出奮擊大破之建德逐北至其城下攻之不克而還（按蔚州今大同府靈邱縣）李密之敗也楊慶歸洛陽復姓楊氏及王世充稱帝慶復姓郭氏世充以爲管州總管妻以兄女秦王世民逼洛陽慶潛遣人請降世民遣總管李世勣將兵往據其城慶欲與其妻偕來妻曰主上使妾侍巾櫛者欲結君之心也今君旣辜付記徇利求全妾將如君何若至長安則君家一婢耳君何用爲願送至洛陽君之惠也慶不許慶出妻謂侍者曰若唐遂勝鄭則吾家必滅鄭若勝唐則吾夫必死人生至此何用生爲遂自殺庚戌慶來降復姓楊氏拜上柱國郇國公時世充太子元應鎮虎牢軍於滎汴之間聞之引兵趣管城李世勣擊卻之使郭孝恪爲書說滎州刺史魏陸舉州來降陽城令王雄帥諸堡來降秦王世民使世勣引兵應之以雄爲嵩州刺史嵩南之路始通魏陸使張志詐爲元應書停其東道之兵令其將張慈寶且還汴州又密告汴州刺史王要漢使圖慈寶要漢斬慈寶以降元應聞諸州皆叛大懼奔還洛陽王宏烈據襄陽上令金州總管府司馬李大亮安撫樊鄧以圖之十一月庚申大亮攻樊城鎮拔之斬其將國大安下其城柵十四（按滎州在滎陽縣陽城今登封縣卽嵩州也汴州今開封府金州今興安府涇陽縣屬西安府樊城也在襄陽府城北鄧鄧州）

初王世充侵建德黎陽建德襲破殷州以報之自是二國交惡信使不通及唐兵逼洛陽世充遣使求救於建德建德中書侍郎劉彬說建德曰天下大亂唐得關西鄭得河南夏得河北共成鼎足之勢今唐舉兵臨鄭自秋涉冬唐兵日增鄭地日蹙唐彊鄭弱勢必不支鄭亡則夏不能獨立矣不如解仇除忿發兵救之夏擊其外鄭攻其內破唐必矣唐師既退徐觀其變若鄭可取則取之并二國之兵乘唐師之老天下可取也建德從之遣使詣世充許以赴援又遣其禮部侍郎李大師等詣唐請罷洛陽之兵秦王世民留之不答十二月辛卯世充許亳等十一州皆請降辛丑世充隨州總管徐毅舉州降（殷州今獲嘉縣許州洧州上已云來降此復云請降者時德劼帥之降至是二州實眞降也）

是歲李子通度江攻沈法興取京口法興遣其僕射蔣元超拒之戰於陵亭元超敗死法興棄毗陵奔吳郡於是丹陽毗陵等郡皆降於子通子通以法興府掾李百藥爲內史侍郎國子祭酒杜伏威遣行臺左僕射輔公祏將卒數千攻子通以將軍闕稜王雄誕爲之副公祏度江攻丹陽克之進屯溧水子通帥衆數萬拒之公祏簡精甲千人執長刀爲前鋒又使千人踵其後曰有退者卽斬之自帥餘衆復居其後子通爲方陳而前公祏前鋒千人殊死戰公祏復張左右翼以擊之子通敗走公祏逐之反爲所敗還閉壁不出王雄誕曰子通無壁壘又狃於初勝乘其無備擊之可破也公祏不從雄誕以其私屬百人夜出擊之因風縱火子通大敗降其卒數千人子通食盡棄江都保京口江西之地盡入於伏威伏威徙居丹陽子通復東走太湖收合亡散得二萬人襲法興於吳郡

大破之法興帥左右數百人棄城走吳郡賊帥聞人遂安遣其將葉孝辯迎之法興中途而悔欲殺孝辯更向會稽孝辯覺之法興窘迫赴江溺死子通軍勢復振徙都餘杭盡收法興之地北自太湖南至嶺東包會稽西距宣城皆有之（京口今鎮江府陵亭在丹陽縣東丹陽今江甯縣之小丹陽溧水縣屬江甯府江西之地胡註以爲廬和等州是也太湖在吳縣西南五十里餘杭縣屬杭州府嶺仙霞嶺也在衢州府會稽今紹興府宣城今甯國府）

讀史兵略卷二八唐

讀史兵略卷二十九

益陽胡林翼纂

通鑑

武德四年 春正月王世充梁州總管程嘉會以所部來降杜伏威遣其將陳正通徐紹宗帥精兵二千來會秦王世民擊王世充秦王世民選精銳千餘騎皆皂衣元甲分爲左右隊使秦叔寶程知節尉遲敬德翟長孫分將之每戰世民親被元甲帥之爲前鋒乘機進擊所向無不摧破敵人畏之行臺僕射屈突通贊皇公竇軌引兵按行營元粹與世充遇戰不利世民帥元甲救之世充大敗獲其騎將葛彥璋俘斬六千餘人世充遁歸二月世充太子元應將兵數千人自虎牢運糧入洛陽世民遣將軍李君羨邀聲大破之元應僅以身免世民使宇文士及奏請進圍東都上謂士及曰歸語爾王今取洛陽止於息兵克城之日乘輿法物圖藉器械私家所須者委汝收之其餘子女玉帛並以分賜將士辛丑世民移軍青城宮壁壘未立世充帥衆二萬自方諸門出憑故馬坊塹臨穀水以拒唐兵諸將皆懼世民以精騎陳於北邙登魏宣武陵以望之謂左右曰賊勢窘矣悉衆而出徼倖一戰今日破之後不敢復出矣命屈突通帥步卒五千度水擊之戒通曰兵交則縱烟烟作世民引騎南下身先士卒與通合勢力戰世民欲知世充陳厚薄與精騎數十衝之直出背衆皆披靡殺傷甚衆旣而限以長堤與諸騎相

失將軍墀行恭獨從世民世充數騎追之世民馬中流矢而斃行恭回騎射追者發無不中追者不敢前乃下馬以授世民行恭於馬前步執長刀距躍大呼斬數人突陳而出得入大軍世充亦帥衆死戰散而復合者數四自辰至午世充兵始退世民縱兵乘之直抵城下俘斬七千人遂圍之驃騎將軍段志元與世充兵力戰深入馬倒爲世充兵所擒兩騎夾持其髻將渡洛水志元躡身而奮二人俱墜馬志元馳歸追者數百騎不敢逼初驃騎將軍王懷文爲唐軍斥候爲世充所獲世充欲慰悅之引置左右壬寅世充出右門臨洛水爲陳懷文忽引槊刺世充世充衷甲槊折不能入左右猝出不意皆愕眙不知所爲懷文走趣唐軍至寫口追獲殺之先是御史大夫鄭頌不樂仕世充多稱疾不預事（胡氏曰鄭頌李密之臣爲世充所獲疾其多詐故不樂仕焉）至是謂世充曰臣聞佛有金剛不壞身陛下真是也臣實多幸得生佛世願棄官削髮爲沙門服勤精進以資陛下之神武固請不許退謂其妻曰吾束髮從官志慕名節不幸遭遇亂世流離至此側身猜忌之朝累足危亡之地智力淺薄無以自全人生會有死早晚何殊姑從吾所好死亦無憾遂削髮被僧服世充聞之大怒曰爾以我爲必敗欲苟免耶不誅之何以制衆遂斬頌於市頌言笑自若觀者壯之（按梁州今歸德府方諸門東都城西門也馬坊在城外西北穀水又在其北右門註云右掖長則在都城內也寫口在城西）

秦玉世民圍洛陽宮城城中守禦甚嚴大礮飛石重五十斤擲二百步八弓弩箭如車幅鏃如巨斧射五百步世民四面攻之晝夜不息旬餘不克城中欲鬪城者凡十三輩皆不果發而死唐將士皆疲弊思歸總管劉宏基等

請班師世民曰今大舉而來當一勞永逸東方諸州已望風款服唯洛陽孤城勢不能久功在垂成奈何棄之而去乃下令軍中日洛陽未破師必不還敢言班師者斬衆乃不敢復言上聞之亦密敕世民使還世民表稱洛陽必可克又遣參謀軍事封德彝入朝面論形勢（胡氏曰參謀之官蓋始於此）德彝言於上曰世充得地雖多率皆羈屬號令所行淮洛陽一城而已智盡力窮克在期夕今若旋師賊勢復振更相連結後必難圖上乃從之世民遺世充書諭以禍福世充不報戊午世充鄭州司兵沈悅遣使詣左武侯大將軍李世勣請降左衛將軍王君廓夜引兵襲虎牢悅爲內應遂拔之獲荆王行本及長史戴胄（按時鄭州治虎牢今汜水縣也李世勣屯管城在其東）

三月唐兵圍洛陽掘塹築壘而守之城中乏食絹一匹直粟三升布十匹直鹽一升服飾珍玩賤如土芥民食草根木葉皆盡相與澄取浮泥投米屑作餅食之皆病身腫脚弱者相枕倚於道皇泰主之遷民入宮城也凡三萬家至是無三千家雖貴爲公卿糠覈不充尙書郎以下親自負戴往往餒死竇建德使其將范願守曹州悉發孟海公徐圓朗之衆西救洛陽至滑州王世充行臺僕射韓洪開門納之己卯軍於酸棗遂陷管州殺刺史郭士安又陷滎陽陽翟水陸並進汎舟運糧泝河西上世充之弟徐州行臺世辯遣其將郭士衡將兵數千會之合十餘萬號三十萬軍於成皋之東原築宮板渚遣使與世充相聞先是建德遺秦王世民書請退軍潼關返鄭侵地復修前好世民集將佐議之皆請避其鋒郭孝恪曰世充窮蹙垂將面縛建德遠來助之此天意欲兩亡之也宜

據武牢之險以拒之伺閒而動破之必矣記室薛收曰世充保據東都府庫充實所將之兵皆江淮精銳卽日之患但乏糧食耳以是之故爲我所持求戰不得守則難久建德親帥大衆遠來赴援亦當極其精銳若縱之至此兩寇合從轉河北之粟以饋洛陽則戰爭方始偃兵無日混一之期殊未有涯也今宜分兵守洛陽深溝高壘世充出兵慎勿與戰大王親帥驍銳先據成皋厲兵訓士以待其至以逸待勞決可克也建德旣破世充自下不過二旬兩主就縛矣世民善之收道衡之子也（胡氏曰薛道衡爲隋煬帝所殺隋之伐陳道衡知其必克收之識時審勢蓋有父風）蕭瑀屈突通封德彝皆曰吾兵疲老世充憑守堅城未易猝拔建德席勝而來鋒銳氣盛吾腹背受敵非完策也不若退保新安以承其弊世民曰世充兵摧食盡上下離心不煩力致可以坐克建德新破海公將驕卒情吾據武牢扼其咽喉彼若冒險爭鋒吾取之甚易若狐疑不戰旬日之間世充自潰城破兵彊氣勢自倍一舉兩克在此行矣若不速進賊入武牢諸城新附必不能守兩賊并力其勢必彊何弊之承吾計決矣通等又請解圍據險以觀其變世民不許中分麾下使通等副齊王元吉圍守東都世民將驍勇三千五百人東趣武牢時正晝出兵歷北邙抵河陽趨鞏而去王世充登城望見莫之測也竟不敢出癸未世民入武牢將驍騎五百出武牢東二十餘里覘建德之營緣道分留從騎使李世勣程知節秦叔寶分將之伏於道旁纔餘四騎與之偕進世民謂尉遲敬德曰吾執弓矢公執槊相隨雖百萬衆若我何又曰賊見我還上策也去建德營三里所建德遊兵遇之以爲斥候也世民大呼曰我秦王也引弓射之斃其一將建德軍中大驚出五六千騎逐之從者

咸失色世民曰汝第前行吾自與敬德爲殿於是按轡徐行追騎將至則引弓射之輒斃一人追者懼而止而復來如是再三每來必有斃者世民前後射殺數人敬德殺十許人追者不敢復逼世民遂巡稍卻以誘之入於伏內世勣等奮擊大破之斬首三百餘級獲其驍將殷秋石瓚以歸乃爲書報建德諭以趙魏之地久爲我有爲足下所侵奪但以淮安見禮公主得歸故相與坦懷釋怨（胡氏曰武德二年竇建德盡取趙魏虜淮安王神通及同安公主待淮安以客禮次年八月遣公主歸）世充頃與足下修好已嘗反覆今亡在朝夕更飾辭相誘足下乃以三軍之衆仰哺他人千金之資坐供外費良非上策今前茅相遇彼遽崩摧郊勞未通能無懷愧故抑止鋒銳冀聞擇善若不獲命恐雖悔難追建德迫於武牢不得進留屯累月戰數不利將士思歸夏四月丁巳秦王世民遣王君廓將輕騎千餘抄其糧運又破之獲其大將軍張青特凌敬言於建德曰大王悉兵濟河攻取懷州河陽使重將守之更鳴鼓建旗踰大行入上黨徇汾晉趣蒲津如此有三利一則蹈無人之境取勝可以萬全二地拓地收衆形勢益彊三則關中震駭鄆圍自解爲今之策無以易此（胡氏曰凌敬之策善矣當是時洛城危急秦王定計而堅守之蓋計曰而收功吾恐建德未得至蒲州洛城已破矣）建德將從之而世充遣使告急相繼於道王琬長孫安世朝夕涕泣請救洛陽又陰以金玉啗建德諸將以撓其謀諸將皆曰凌敬書生安知戰事其言豈可用也建德乃謝敬曰今衆心甚銳天贊我也因之決戰必將大捷不得從公言敬固爭之建從怒令扶出其妻曹氏謂建德曰祭酒之言不可違也今大王自溢口乘唐國之虛連營漸進以取山北又因突厥西抄關中唐必還

師自救鄭圍何憂不解若頓兵於此老師費財欲求成功在於何日建德曰此非女子所知吾來救鄭鄭今倒懸亡在朝夕吾乃捨之而去是畏敵而棄信也不可諱者告曰建德伺唐軍芻盡牧馬於河北將襲武牢五月戊午秦王世民北濟河南臨廣武察敵形勢因留馬千餘匹牧於河洛以誘之夕還武牢已未建德果悉衆而至（胡氏曰此所謂善戰者因其勢而利導之也）白板渚出牛口置陳北距大河西薄汜水南屬鵠山亘二十里鼓行而進諸將皆懼世民將數騎升高邱而望之謂諸將曰賊起山東嘗見大敵今度險而羈是無紀律逼城而陳有輕我心我按甲不出彼勇氣自衰陳久卒飢勢將自退（胡氏曰所謂以計稽之也）追而擊之無不克者與公等約甫過日中必破之矣建德意輕唐軍遣三百騎涉汜水距唐營一里所止遣使與世民相聞曰請選銳士數百與之劇世民遣王君廓將長槩二百以應之相與交戰乍進乍退兩無勝負各引還王琬乘隋煬帝驄馬鎧仗甚鮮迴出陳前以誇衆世民曰彼所乘真良馬也敬德請往取之世民止之曰豈可以一馬喪猛士敬德不從與高甌生梁建方三騎直入其陳擒琬引其馬馳歸衆無敢當者世民使召河北馬待其至乃出戰建德列陳自辰至午士卒飢倦皆坐列又爭飲水遂巡欲退世民命宇文士及將三百騎經建德陣西馳而南上（胡氏曰所以嘗敵也）戒之曰賊若不動爾宜引歸動則引兵東出士及至陳前陳果動世民曰可擊矣時河渚馬亦至乃命出戰世民帥輕騎先進大軍繼之東涉汜永直薄其陳建德羣臣方朝謁唐騎猝來朝臣趨就建德建德召騎兵使拒唐兵騎兵阻朝臣不得過建德揮朝臣令卻進退之閒唐兵已至建德窘迫退依東陂竇抗引兵擊之戰小不

利世民帥騎赴之所向皆靡淮陽王道元挺身陷陳直出其後復突陳而歸再入再出飛矢集其身如蝟毛勇氣不衰射人皆應弦而仆世民給以副馬使從已於是諸軍大戰塵埃漲天世民帥史大奈程知節秦叔寶宇文歆等卷旆而入其陳後張唐旗幟建德將士顧見之大潰追奔三十里斬首三千餘級建德中槩竄匿於牛口渚車騎將軍白士讓楊武威逐之建德墜馬士讓授槩欲刺之建德曰勿殺我我夏王也能富貴汝武威下擒之載以從馬來見世民世民讓之曰我自討王世充何預汝事而來越境犯我兵鋒建德曰今不自來恐煩遠取建德將士皆潰去所俘獲五萬人世民卽日散遣之使還鄉里德彝入賀世民笑曰不用公言得有今日智者千慮不免一失乎德彝甚慚建德妻曹氏與左僕射齊善行將數百騎遁歸洛州甲子世充偃師鞏縣皆降乙丑以太子左庶子鄭善果爲山東道撫慰大使世充將王德仁棄故洛陽城而遁亞將趙季卿以城降秦王世民囚竇建德王琬長孫安世郭士衡等至洛陽城下以示世充世充與建德語而泣仍遣安世等入城言敗狀世充召諸將議突圍南走襄陽諸將皆曰吾所恃者夏王夏王今已爲擒雖得出終必無成內寅世充素服帥其太子羣臣二千餘人詣軍門降世民禮接之世充俯伏流汗世民曰卿常以童子見處今見童子何恭之甚耶世充頓首謝罪於是部分諸軍先入洛陽分守市肆禁止侵掠無敢犯者丁卯世民入宮城命記室房元齡先入中書門下省收隋圖籍制詔已爲世充所毀無所獲命蕭瑀竇軌等封府庫收其金帛頒賜將士收世充之黨罪尤大者段達王隆崔洪丹薛德音楊汪孟孝義單雄信楊公卿郭什柱郭士衡董叡張童兒王德仁朱粲郭善才等十餘人斬於洛水

之上初世勣與雄信友善誓同生死及洛陽平世勣言雄信驍健絕倫請盡輸己之官爵以贖之世民不許世勣固請不能得涕泣而退雄信曰我固知汝不辦事世勣曰吾不惜餘生與兄俱死但既以此身許國事無兩途且吾死之後誰復視兄之妻子乎乃割股肉以啗雄信曰使此肉隨兄爲土庶幾不負昔誓也士民疾朱粲殘忍競投瓦礫擊其尸須臾如冢秦王世民坐闔闔門蘇威請見稱老病不能拜世民遣人數之曰公隋室宰相危不能扶使君弑國亡見李密王世充皆拜伏舞蹈今既老病無勞相見秦王世民觀隋宮殿歎曰逞侈心窮人欲無亡得乎（按曹州今曹州府滑州今滑縣酸棗今延津縣陽翟今禹州東原即東廣武城在滎澤縣西板渚在汜水東武牢即成皋洛陽東面之險兵不可使度險也懷州今懷慶府河陽今孟縣太行山在懷慶北上黨今潞安也汾今汾州府晉今平陽府蒲津關在蒲州府此解洛陽圍之上策孫臏馬陵之故智也解圍而必至所圍之地先制於人矣滏口在磁州山北太行以北也南臨廣武註云西廣武在廣武山西也河渚在汜水北牛口谷在汜水西北二十五里汜水出浮戲山逕虎牢東合洛水入河洛州建德治所今廣平府偃師鞏二縣皆屬河南府）前真定令周法明法尚之弟也隋末結客襲據黃梅遣族子孝節攻斬春兄子紹則攻安陸子紹德攻沔陽皆拔之庚午以四郡來降壬申齊善行以洛相魏等州來降時建德餘衆走至洛州欲立建德養子爲主徵兵以拒唐又欲剽掠居民還向海隅爲盜善行獨以爲不可曰隋末喪亂故吾屬相聚草野苟求生耳以夏王之英武平定河朔士馬精彊一朝爲擒易如反掌豈非天命有所屬非人力所能爭耶今喪敗如此守亦無成逃亦不免等爲

亡國豈可復遺毒於民不若委心請命於唐必欲得繒帛者當盡散府庫之物勿復殘民也於是運府庫之帛數十萬段置萬春宮東街以散將卒凡三晝夜乃畢仍布兵守坊巷得物者卽出無得更入人家士卒散盡然後與僕射裴矩行臺曹旦帥其百官奉建德妻曹氏及傅國八璽并破宇文化及所得珍寶請降於唐上以善行爲秦王左二護軍仍厚賜之（按真定今改爲正定縣黃梅縣今屬黃州府蘄春今蘄州安陸今德安府沔陽今沔陽州相今彰德府魏今大名府）

秋七月上徵竇建德故將范願董康買曹湛高雅賢等願等相謂曰吾屬皆爲夏王所厚今不爲之報仇將無以見天下之士乃謀作亂卜之以劉氏爲主吉因相與之漳南見建德故將劉雅以其謀告之雅曰天下適安定吾將老於耕桑不願復起兵衆怒且恐泄其謀遂殺之故漢東公劉黑闥時屏居漳南諸將往詣之告以其謀黑闥欣然從之黑闥方種蔬卽殺耕牛與之共飲食定計聚衆得百人襲漳南縣據之八月丁酉黑闥陷鄆縣魏州刺史權威貝州刺史戴元祥與戰皆敗死黑闥悉取其餘衆及器械建德舊黨稍稍出歸之衆至二千人爲壇於漳南祭建德告以舉兵之意自稱大將軍詔發關中步騎三千使將軍秦武通定州總管藍田李元通擊之又詔幽州總管李藝引兵會擊黑闥初洛陽旣平徐圓朗請降拜兗州總管封魯郡公黑闥作亂陰與圓朗通謀上使葛公盛彥師安集河南行至任城圓朗執彥師舉兵反黑闥以圓朗爲大行臺元帥圓朗厚禮彥師使作書與其弟令舉虞城降彥師爲書曰吾奉使無狀爲賊所擒爲臣不忠誓之以死汝善侍老母勿以吾爲念圓朗初色動而

彥師自若圓朗乃笑曰盛將軍有壯節不可殺也待之如舊河南道安撫大使任瓌行至宋州屬圓朗反副使柳濬勸瓌退保汴州瓌笑曰柳公何怯也圓朗又攻陷楚邱引兵將圍虞城瓌遣部將崔樞張公謹自鄆陵帥諸豪右質子百餘人守虞城濬曰樞與公謹皆王世充將諸州質子父兄皆反恐必爲變瓌不應樞至虞城分質子使與土人合隊共守城賊稍近質子有叛者樞斬其隊帥於是諸隊帥皆懼各殺其質子樞不禁梟其首於門外遣使白瓌瓌陽怒曰吾所以使與質子俱者欲招其父兄耳何罪而殺之退謂濬曰吾固知崔樞能辦此也縣人旣殺質子與賊深仇吾何患乎賊攻虞城果不克而去（按漳南今恩縣鄆縣今平原西南五十里魏州今大名府貝州今清河縣兗州今兗州府任城今濟甯州虞城屬歸府宋州卽歸德也汴州今開封府楚邱在曹州府曹縣鄆陵屬開封府）

九月詔發巴蜀兵以趙郡王孝恭爲荆湘道行軍總管李靖攝行軍長史統十二總管自夔州順流東下以廬江王瑗爲荆郢道行軍元帥黔州刺史田世康出辰州道黃州總管周法明出夏口道以擊蕭銑是月孝恭發夔州時峽江方漲諸將請俟水落進軍李靖曰兵貴神速今吾兵始集銑尙未知若乘江漲倏忽抵其城下掩其不備此必成擒不可失也孝恭從之（巴蜀兵概謂川兵也荆今荊州府湘今長沙府郢州今安陸府辰州今辰州府夏口今漢口鎮）

淮安王神通將關內兵至冀州與李藝兵合又發邢洛相魏恆趙等兵合五萬餘人與劉黑闥戰於饒陽城南布

陳十餘里黑闥衆少依堤單行而陳以當之會風雪神通乘風擊之旣而風返神通大敗士馬軍資失亡三分之一
二藝居西偏擊高雅賢破之遂奔數里聞大軍不利退保藁城黑闥就擊之藝亦敗薛萬均萬徹皆爲所虜截髮
驅之萬均兄弟亡歸藝引兵歸幽州黑闥兵勢大振（冀州今冀州邢今順德府洺今廣平府相今彰得府魏今
大名府恆今正定府趙今趙州饒陽縣屬深州）

上以秦王功大前代官皆不足以稱之特置天策上將位在王公上冬十月以世民爲天策上將領司徒陝東道
大行臺尙書令增邑二萬戶仍開天策府置官屬以齊王元吉爲司空世民以海內浸平乃開館於宮西延四方
文學之士出教以王府屬杜如晦記室房元齡虞世南文學褚亮姚思廉主簿李元道參軍蔡允恭薛元敬顏相
時諮議典籤蘇勗天策府從事中郎于志寧軍諮祭酒蘇世長記室薛收倉曹李守素國子助教陸德明孔穎達
信都蓋文達宋州總管府戶曹許敬宗並以本官兼文學館學士分爲三番更日值宿供經珍膳恩禮優厚世民
朝謁公事之暇輒至館中引諸學士討論文籍或夜分乃寢又使庫直閣立本圖像褚亮爲贊號十八學士士大
夫得預其選者時人謂之登瀛州初如晦爲秦王府兵曹參軍俄遷陝州長史時府僚多補外官世民患之元齡
曰餘人不足惜至於杜如晦王佐之才大王欲經營四方非如晦不可世民驚曰微公言幾失之卽奏爲府屬與
元齡常從世民征伐參謀帷幄軍中多事如晦剖決如流世民每破軍克城諸將佐爭取寶貨元齡獨收采人物
致之幕府又將佐有勇略者元齡必與之深相結使爲世民盡死力世民每令元齡入奏事上歎曰元齡爲吾兒

陳事雖隔千里皆如面談李元道嘗事李密爲記室密敗官屬爲王世充所虜懼死者皆達曙不寐獨元道起居自若曰死生有命非憂可免衆服其識量

蕭銑鄂州刺史雷長穎以魯山來降趙郡王孝恭帥戰艦二千餘艘東下銑以江水方漲殊不爲備孝恭等拔其荆門宜部二鎮進至夷陵銑將文士宏將精兵數萬屯清江孝恭擊走之獲戰艦三百餘艘殺溺死者萬計追奔至百里洲士宏收兵復戰又敗之進入北江銑江州總管蓋彥舉以五洲來降蕭銑之罷兵營農也纔留宿衛數千人聞唐兵至士宏敗大懼倉猝徵兵皆在江嶺之外道塗阻遠不能遽集乃悉見兵出拒戰孝恭將擊之李靖止之曰彼救敗之師策非素立勢不能久不若且泊南岸緩之一日彼必分其兵或留拒我或歸自守兵分勢弱我乘其懈而擊之蔑不勝矣今若急之彼則併力死戰楚兵剽銳未易當也孝恭不從留靖守營自帥銳師出戰果敗走趣南岸銑衆委舟收掠軍資人皆負重靖見其衆亂縱兵奮擊大破之乘勝直抵江陵入其外郭又攻水城拔之大獲舟艦靖使孝恭盡散之江中諸將皆曰破敵所獲當藉其用奈何棄以資敵靖曰蕭銑之地南出嶺表東距洞庭吾懸軍深入若攻城未拔援軍四集吾表裏受敵進退不獲雖有舟楫將安用之今棄舟艦使塞江而下援兵見之必謂江陵已破未敢輕進往來覘伺動淹旬月吾取之必矣銑援兵見舟艦果疑不進其交州刺史邱和長史高士廉司馬杜之松將朝江陵聞銑敗悉詣孝恭降孝恭勒兵圍江陵銑內外阻絕問策於中書侍郎岑文本勸銑降銑乃謂羣下曰天不祚梁不可復支矣若必待力屈則百姓蒙患奈何以我一人之故陷

百姓於塗炭乎銑以太牢告於太廟下令開門出降守城者皆哭銑帥父臣總縷布幘詣軍門曰當死者唯銑耳百姓無罪願不殺掠孝恭入撻其城諸將欲大掠岑文本說孝恭曰江南之民自陵末以來困於虐政重以羣雄虎爭今之存者皆鋒鏑之餘跂踵延頸以望真主是以蕭氏君臣江陵父老決計歸命庶幾有所息肩今若蹤兵俘掠恐自此以南無復向化之心矣孝恭稱善邊禁止之諸將又言梁之將帥與官軍拒鬪死者其罪既深請籍沒其家以賞將士靖曰王者之師宜使義聞先路彼爲其主鬪死乃忠臣也豈可同叛逆之科籍其家乎於是城中安堵秋毫無犯南方州縣聞之皆望風款附銑降數日援兵至有十餘萬聞江陵不守皆釋甲而降孝恭送銑於長安上數之銑曰隋失其鹿天下共逐之銑無天命故至此若以爲罪無所逃死竟斬於都市詔以孝恭爲荊州總管李靖爲上柱國賜爵永康縣公仍使之安撫嶺南得承制拜授（按鄂州今武昌府魯山在西北岸荊門鎮在荊門山下宜都今宜昌府卽夷陵也清江在長陽縣卽夷水也百里洲在枝江縣東江水至此分流出洲北者曰北江）

十一月杜伏威使其將王雄誕擊李子通子通以精兵守獨松嶺雄誕遣其將陳當將千餘人乘高據險以逼之多張旗幟夜則縛炬於樹布滿山澤子通懼燒營走保杭州雄誕追擊之又敗之於城下子通窮蹙請降伏威執子通并其左僕射樂伯通送長安上釋之先是汪華據黟歙稱王十餘年雄誕還軍擊之華拒之於新安洞口甲兵甚銳雄誕伏精兵於山谷帥羸弱數千犯其陳戰纔合陽不勝走還營華進攻之不能克會日暮引還伏兵已

據其洞口華不得入窘迫請降聞人遂安據崑山無所屬伏威使雄誕擊之雄誕之崑山險隘難以力勝乃單騎造其城下陳國威靈示以祥福遂安感悅帥諸將出降於是伏威盡有淮南江東之地南至嶺東距海雄誕以功除歙州總管賜爵宜春郡公（胡氏曰自廣德州東南過獨松嶺卽湖州黟縣歙縣皆屬徽州府新安洞口疑今叢山關崑山縣屬蘇州府）

劉黑闥陷定州執總管李元通黑闥愛其才欲以爲大將元通不可故吏有以酒肉饋之者元通曰諸君哀吾幽辱幸以酒肉來相開慰當爲諸君一醉酒酣謂守者曰吾能劍舞願假吾刀守者與之元通舞竟太息曰大丈夫受國厚恩鎮撫方面不能保全所守亦何面目視息世閒哉卽引刀自刺潰腹而死上聞爲之流涕拜其子伏護爲大將十二月乙卯黑闥陷冀州殺刺史麴稜黑闥旣破淮安王神通移書趙魏故竇建德將卒爭殺唐官吏以應黑闥庚申遣右屯衛大將軍義安王孝常將兵討黑闥黑闥將兵數萬進逼宗城黎州總管李世勣先屯宗城棄城走保洺州甲子黑闥追擊世勣等破之殺步卒五千人世勣僅以身免丙寅洺州土豪翻城應黑闥黑闥於城東南告天及祭竇建德而後入後旬日引兵攻拔相州執刺史房晃右武衛將軍張士貴潰圍走黑闥南取黎衛二州半歲之間盡復建德舊境又遣使北連突厥頡利可汗遣俟斤宗那那帥胡騎從之丁卯命秦王世民齊王元吉討黑闥（按宗城在今威縣黎今濬縣衛今衛輝府）

五年 春正月劉黑闥自稱漢東王改元天造定都洺州以范願爲左僕射董康買爲兵部尙書高雅賢爲右領

軍徵王琮爲中書令劉斌爲中書侍郎竇建德時文武悉復本位其設法行政悉師建德而攻戰勇決過之秦王世民軍至獲嘉黑闥棄相州退保洺州丙申世民復取相州進軍肥鄉列營洺水之上以逼之幽州總管李藝將所部兵數萬會秦王世民討黑闥黑闥聞之留兵萬人使范願守洺州自將兵拒藝夜宿沙河程名振載鼓六十具於城西二里隄上急擊之城中地皆震動願驚懼馳告黑闥黑闥遽遣其弟十善與行臺張君立將兵一萬擊藝於鼓城壬子戰於徐河十善君立大敗所死亡八千人洺水人李去惑據城來降秦王世民遣彭公王君廓將千五百騎赴之入城共守二月黑闥引兵還攻洺水癸亥行至列人秦王世民使秦叔寶邀擊破之己巳復取邢州辛未井州人馮伯讓以城來降黑闥攻洺水甚急城四旁皆有水廣五十餘步黑闥於城東北築二甬道以攻之世民三引兵救之黑闥拒之不得進世民恐君廓不能守召諸將謀之李世勣曰若甬道達城下城必不守行軍總管鄴公羅士信請代君廓守之世民乃登城南高冢以旗招君廓君廓帥其徒力戰潰圍而出士信帥左右二百人乘之入城代君廓固守黑闥晝夜急攻會大雪救兵不得往凡八日丁丑城陷黑闥素聞其勇欲生之士信詞色不屈乃殺之時年二十三月世民與李藝營於洺水之南分兵屯水北黑闥數挑戰世民堅壁不應別遣奇兵絕其糧道黑闥以高雅賢爲左僕射軍中高會世勣引兵逼其營雅賢乘醉單騎逐之世勣部將潘毛刺之墜馬左右繼至扶歸未至營而卒甲午諸將復往逼其營潘毛爲王小胡所擒黑闥運糧於冀貝滄瀛諸州水陸俱進程名振以千餘人邀之沈其舟焚其車秦王世民與黑闥相持六十餘日黑闥潛師襲世勣營世民引

兵掩其後以救之爲黑闥所圍尉遲敬德帥壯士犯圍而入世民與略陽公道宗乘之得出世民度黑闥糧盡必來決戰乃使人堰洛水上流謂守吏曰待我與賊戰乃決之丁未黑闥帥步騎二萬南度洛水壓唐營而陳世民自將精騎擊其騎兵破之乘勝蹂其步兵黑闥帥衆殊死戰自午至昏戰數合黑闥勢不能支王小胡謂黑闥曰智力盡矣宜早亡去遂與黑闥先遁餘衆不知猶格戰守吏決堰水洛大至深丈餘黑闥衆大潰斬首萬餘級溺死數千人黑闥與范願等二百騎奔突厥山東悉平（胡民曰秦王之討黑闥前後接戰黑闥之衆皆決死確鬪特秦王大展方略黑闥智力俱困而敗走耳秦王之平羣盜黑闥最爲堅敵按獲嘉屬衛輝府肥鄉屬廣平府洛水在廣平府西北沙河縣屬順德府鼓城今晉州徐河在清苑縣洛水今曲周縣列人今肥鄉井州今井陘縣冀今冀州貝今清河縣滄今滄州瀛今河閒府）

夏四月徐圓朗聞劉黑闥敗大懼不知所出河閒人劉復禮說圓朗曰有劉世徹者其才不世出名高東夏且有非常之相真帝王之器將軍若自立恐終無成若迎世徹而奉之天下指揮可定圓朗然之使復禮迎世徹於浚儀或說圓朗曰將軍爲人所惑欲迎劉世徹而奉之世徹若得志將軍豈有全地乎僕不敢遠引前古將軍獨不見翟讓之於李密乎圓朗復以爲然世徹至已有衆數千人頓於城外以待圓朗出迎圓朗不出使人召之世徹知事變欲亡走恐不免乃入謁圓朗悉奪其兵以爲司馬使徇譙杞二州東人素聞其名所向皆下圓朗遂殺之秦王世民自河北引兵將擊圓朗會上召之使馳傳入朝乃以兵屬齊王元吉庚申世民至長安上迎之於長樂

世民具陳取圓朗形勢上復遣之詣黎陽會大軍趨濟陰丙子行臺民部尙書史萬寶攻圓朗陳州拔之秋七月世民擊圓朗下十餘城聲震淮泗杜伏威懼請入朝世民以淮濟之間略定使淮安王神通行軍總營任瓌李世勣攻圓朗乙酉班師（長樂坡在長安城東濟陰濟今曹州府曹縣陳州今陳州府）

八月乙卯突厥頡利可汗寇邊遣左武衛將軍段德操雲州總管李子和將兵拒之丙辰頡利十五萬騎入雁門已未寇并州別遣兵寇原州庚子命太子出幽州道秦王世民出秦州道以禦之李子和趨雲中掩擊可汗段德操趨夏州邀其歸路辛酉上謂羣臣曰突厥入寇而復求和與戰孰利太常卿鄭元璠曰戰則怨深不如和利中書令封德彝曰突厥恃犬羊之衆有輕中國之意若不戰而和示之以弱去年將復來臣愚以爲不如擊之旣勝而後與和則恩威兼著矣上從之己巳并州大總管襄邑王神符破突厥於汾東汾州刺史蕭顓破突厥斬首五千餘級上遣鄭元璠詣頡利是時突厥精騎數十萬自介休至晉州數百里閒填溢山谷元璠見頡利責以負約與相辨詰頡利頗慙元璠因說頡利曰唐與突厥風俗不同突厥雖得唐地不能居也今虜掠所得皆入國人於可汗何有不如旋師復修和親可無跋涉之勞坐受金幣又皆入可汗府庫孰與棄昆弟積年之歡而結子孫無窮之怨乎頡利引兵還（按雲州今大同府原州今固原州幽州注云當作幽州今邠州秦州注云當作秦州今榮河縣雲中今歸化城夏州今榆林府）

冬十月己酉詔齊王元吉討黑闥於山東乙丑行軍總管淮陽王道元與黑闥戰於下博軍敗爲黑闥所殺時

道元將兵三萬與副將史萬寶不協道元帥輕騎先出犯陳使萬寶將大軍繼之萬寶擁兵不進謂所親曰我奉手敕云淮陽小兒軍事皆委老夫今王輕脫妄進若與之俱必同敗沒不如以王餌賊王敗賊必爭進我堅陳以待之破之必矣由是道元獨進敗沒萬寶勒兵將戰士卒皆無鬪志軍遂大潰萬寶逃歸道元數從秦王世民征伐死時年十九世民深惜之謂人曰道元常從吾征伐見吾深入賊陳心慕効之以至於此爲之流涕世民自起兵以來前後數十戰常身先士卒輕騎深入雖屢危殆而未嘗爲矢刃所傷（胡氏曰史言秦王有天命）淮陽王道元之敗也山東震駭洺州總管廬江王瑗棄城西走州縣皆叛附於黑闥旬日閒黑闥盡復故地乙亥進據洺州十一月庚辰滄州刺史程大買爲黑闥所迫棄城走齊王元吉畏黑闥兵彊不敢進太子中允王珪洗馬魏徵說太子曰秦王功蓋天下中外歸心殿下但以年長位居東宮無大功以鎮服海內今劉黑闥散亡之餘衆不滿萬資糧匱乏以大軍臨之勢如拉朽殿下宜自擊之以取功名因結納山東豪傑庶可自安太子乃請行於上許之甲申詔太子建成將兵討黑闥其陝東道大行臺及山東道行軍元帥河南河北諸州並受建成處分得以便宜從事黑闥擁兵而南自相州以北州縣皆附之唯魏州總管田留安勒兵拒守黑闥攻之不下引兵南拔元城復還攻之十二月甲子留安擊黑闥被之獲其莘州刺史孟柱降將卒六千人是時山東豪傑多殺長吏以應黑闥上下相猜人益離怨留安待吏民猶坦然無疑白事者無問親疏皆聽直入臥內每謂吏民曰吾與爾曹俱爲國禦賊固宜同心協力必欲棄順從逆者但自斬吾首去吏民皆相戒曰田公推至誠以待人當共竭死力

報之必不可負有苑竹林者本黑闥之黨潛有異志留安知之不發其事引置左右委以管鑰竹林感激遂更歸心卒收其用黑闥攻魏州未下太子建成齊王元吉大軍至昌樂黑闥引兵拒之再陳皆不戰而罷魏徵言於太子曰前破黑闥其將帥皆懸名處死妻子係虜故齊王之來雖有詔書赦其黨與之罪皆莫之信今宜悉解其囚俘慰諭遺之則可坐視離散矣太子從之黑闥食盡衆多亡或縛其渠帥以降黑闥恐城中兵出與大軍表裏擊之遂夜遁至館陶永濟橋未成不得度壬申太子齊王以大軍至黑闥使王小胡背水而陳自視作橋成卽過橋西衆遂大潰捨仗來降大軍度橋追黑闥度者纔千餘騎橋壞由是黑闥得與數百騎亡去（下博今深州元城今大名府莘州今莘縣昌樂今南樂縣館陶屬東昌府永濟渠在西）

六年 正月己卯劉黑闥所署饒州刺史諸葛德威執黑闥舉城降時太子遣騎將劉宏基追黑闥黑闥爲官軍所迫奔走不得休息至饒陽從者纔百餘人餒甚德威出迎延黑闥入城黑闥不可德威涕泣固請黑闥乃從之至城旁市中憩止德威饋之食食未畢德威執之送詣太子并其弟十善斬於洛州黑闥臨刑歎曰我幸在家鉏菜爲高雅賢輩所誤至此二月丙寅徐圓朗窺蹙與數騎棄城走爲野人所殺其地悉平（饒州卽饒陽縣）

秋八月壬子淮南道行臺僕射輔公祏反初杜伏威與公祏相友善公祏年長伏威兄事之軍中謂之伯父畏敬與伏威等伏威浸忌之乃署其養子闡稜爲左將軍王雄誕爲右將軍潛奪其兵權公祏知之怏怏不平與其故人左遊仙陽爲學道辟穀以自晦及伏威入朝留公祏守丹陽令雄誕典兵爲之副陰謂雄誕曰吾至長安苟不

失職勿令公祐爲變伏威旣行遊仙說公祐謀反而雄誕握兵公祐不得發乃詐稱得伏威書疑雄誕有貳心雄誕聞之不悅稱疾不視事公祐因奪其兵使其黨西門君儀諭以反計雄誕始寤而悔之曰今天下方平吳王又在京師大唐兵威所向無敵奈何無故自求族滅乎雄誕有死而已不敢聞命今從公爲逆不過延百日之命耳大丈夫安能愛斯須之死而自陷於不義乎公祐知不可屈縊殺之雄誕善撫士卒得其死力又約束嚴整每破城邑秋毫無犯死之日江南軍中及民間皆爲之流涕公祐又詐稱伏威不得還江南貽書令其起兵大修鎧仗運糧儲尋稱帝於丹陽與張善安連兵以善安爲西南道大行臺乙丑詔襄州道行臺僕射趙郡王孝恭以舟師趣江州嶺南道大使李靖以交廣泉桂之衆趣宣州懷州總管黃君漢出譙亳齊州總管李世勣出淮泗以討輔公祏孝恭將發與諸將宴集命取水忽變爲血在坐者皆失色孝恭舉止自若曰此乃公祐授首之徵也飲而盡之衆皆悅服（江州今九江府宣州今甯國府譙州即今亳州淮泗今清河縣）

突厥數爲邊患并州大總管府長史竇靜表請於太原置屯田以省餽運議者以爲煩擾不許靜切論不已敕徵靜入朝使與裴寂蕭瑀封德彝相論難於上前寂等不能屈乃從靜議歲收穀數千斛上善之命檢校并州大總管十一月辛巳秦王世民復請增置屯田於并州之境從之

黃州總管周法明將兵擊輔公祐張善安據夏口拒之法明屯荊口鎮壬午法明登戰艦飲酒善安遣刺客數人詐乘魚鱗而至見者不以爲虞遂殺法明而去甲申舒州總管張鎮周等擊輔公祐將陳當世於猷州之黃沙大

破之十二月癸卯安撫使李大亮擊善安於洪州與善安隔水而陳遙相與語大亮諭以禍福善安曰善安初無反心正爲將士所誤欲降又恐不免大亮曰張總管有降心則與我一家耳因單騎度水入其陳與善安執手共語示無猜聞善安大悅遂許之降旣而善安將數十騎詣大亮營大亮止其騎於門外引善安入與語久之善安辭去大亮命武士執之從騎皆走善安營中聞之大怒悉衆而來將攻大亮大亮使人諭之曰吾不留總管總管赤心歸國謂我曰若還營恐將士或有異同爲其所制故自留不去耳卿輩何怒於我其黨復大罵曰張總管賣我以自媚於人遂皆潰大亮追擊多所虜獲送善安於長安善安自稱不與輔公祏交通上赦其罪善遇之及公祏敗得所與往還書乃殺之（荊口鎮在荊州府黃沙今涇縣之黃沙鎮涇縣卽猷州也洪州今南昌府）

七年 春二月高開道將張金樹殺開道來降開道見天下皆定欲降自以數反覆不敢且恃突厥之衆遂無降意其將卒皆山東人思鄉里咸有離心開道選勇敢士數百謂之假子常直閣內使金樹領之故劉黑闥將張君立亡在開道所與金樹密謀取開道金樹遣其黨數人入閣內與假子遊戲向夕潛斷其弓弦藏刀槊於牀下合暝抱之趨出金樹帥其黨大譟攻開道閣假子將禦之弓弦皆絕刀槊已失爭出降君立亦舉火於外與相應內外惶擾開道知不免乃擐甲持兵坐堂上與妻妾奏樂酣飲衆憚其勇不敢逼天且明開道縊妻妾及諸子乃自殺金樹陳兵悉收假子斬之并殺君立死者五百餘人遣使來降三月趙郡王孝恭破輔公祏於蕪湖拔梁山等三鎮安撫使任瓌拔揚子城廣陵城主龍龕降戊戌孝恭克丹陽先是輔公祏遣其將馮慧亮陳當世將舟師三

萬屯博望山陳正通徐紹宗將步騎三萬屯青林山仍於梁山連鐵鑠以斷江路築卻月城延袤十餘里又結壘江西以拒官軍孝恭與李靖帥舟師次舒州李世勣帥步卒一萬度淮拔壽陽次硤石慧亮等堅壁不戰孝恭遣奇兵絕其糧運慧亮等軍乏食夜遣兵薄孝恭營孝恭堅臥不動孝恭集諸將議軍事皆曰慧亮等擁彊兵據水陸之險攻之不可猝拔不如直指丹陽掩其巢穴丹陽旣潰慧亮等自降矣孝恭將從其議李靖曰公祐精兵雖在此水陸二軍然所自將亦不爲少今博望諸柵尙不能拔公祐保據石頭豈易取哉進攻丹陽旬日不下慧亮躡吾後腹背受敵此危道也（胡氏曰李靖此議與長孫無忌安市之議略同然李靖決勝而太宗無功及安市班師靖咎其不能用道宗之策此用兵之所以難也）慧亮正通皆百戰餘賊其心非不欲戰正以公祐立計使之持重欲以老我師耳我今攻其城以挑之一舉可破也孝恭然之使羸兵先攻賊營而勒精兵結陳以待之攻壘者不勝而走賊出兵賊出兵追之行數重遇大軍與戰大破之（胡氏曰此左傳楚五大夫破吳師以滅舒鳩之故智也）闕稜免胄謂賊衆曰汝曹不識我耶何敢來與我戰賊多稜故部曲皆無鬪志或有拜者由是遂敗孝恭靖乘勝逐北轉戰百餘里博山青林兩戍皆潰慧亮正通等遁歸殺傷及溺死者萬餘人李靖兵先至丹陽公祐大懼擁兵數萬棄城東走欲就左遊仙於會稽李世勣追之公祐至句容從兵能屬者纔五百人夜宿常州其將吳騷等謀執之公祐覺之棄妻了獨將腹心數十人斬關走至武康爲野人所攻西門君儀戰死遂執公祐送丹陽梟首分捕餘黨悉誅之江南皆平己亥以孝恭爲東南道行臺右僕射李靖爲兵部尙書上深美靖功曰

靖蕭輔之膏肓也（胡氏曰謂蕭銑輔公祐皆爲靖所殺也按蕪湖縣屬太平府梁山卽博望山所謂東梁山也揚子城在揚州府南廣陵卽揚州也青林山卽當塗縣之青山舒州今安慶府句容屬江寧府武康屬湖州府公祐蓋據石頭城爲治也）

七月戊寅突厥寇原州遣甯州刺史鹿大師救之又遣楊師道趨大木根山庚辰突厥寇隴州遣護軍尉遲敬德擊之癸未突厥寇陰盤已丑突厥吐利設與苑君璋寇并州或說上曰突厥所以屢寇關中者以子女玉帛皆在長安故也若焚長安而不都則胡寇自息矣上以爲然遣中書侍郎宇文士及踰南山至樊鄧行可居之地將徙都之太子建成齊王元吉裴寂皆贊成其策蕭瑀等雖知其不可而不敢諫秦王世民諫曰戎狄爲患自古有之陛下以聖武龍興光宅中夏精兵百萬所征無敵奈何以胡寇擾邊遽遷都以避之貽四海之羞爲百世之笑乎彼霍去病漢廷一將猶志滅匈奴况臣忝備藩維願假數年之期請繫頡利之頸致之闕下若其不効遷都未晚上曰善建成曰昔樊噲欲以十萬衆橫行匈奴中秦王之言得無似之世民曰形勢各異用兵不同樊噲小豎何足道乎不出十年必定漠北非虛言也上乃止（大木根山在河套內陰盤在平涼縣東南涇州西北）

初隋末京兆章仁壽爲蜀郡司法書佐所論囚至市猶西向爲仁壽禮佛然後死唐與饜宏達帥西南夷內附朝廷遣使撫之類皆貪縱遠民患之有叛者仁壽時爲雋州都督長史上聞其名命檢校南甯州都督寄治越雋使之歲一至其地慰撫之仁壽性寬厚有識度旣受命將兵五百人至西洱河周歷數千里蠻夷豪帥皆望風歸附

仁壽承制置七州十五縣各以其豪帥爲刺史縣令法令清肅蠻夷悅服將還豪帥皆曰天子遣公都督南甯何爲遽去仁壽以城池未立爲辭蠻夷卽相帥爲仁壽築城立廨舍旬日而就仁壽乃曰吾受詔但令巡撫不敢擅留蠻夷號泣送之因各遣子弟入貢壬戌仁壽還朝上大悅命仁壽徙鎮南甯以兵戍之（舊州越舊卽今寧遠府西洱河在大理府鄧川州東時黔省猶未開關故往滇者皆由川中）

八月壬申突厥寇忻州丙子寇并州京師戒嚴戊寅寇綏州刺史劉大俱擊卻之是時頡利突利二可汗舉國入寇連營南上秦王世民引兵拒之會關中久雨糧運阻絕士卒疲於征役器械頓罄朝廷及軍中咸以爲憂世民與虜遇於鹵州勒兵將戰已卯可汗將萬餘騎奄至城西陳於五隴阪將士震恐世民謂元吉曰今虜騎憑陵不可示之以怯當與之一戰汝能與我俱乎元吉懼曰虜形勢如此奈何輕出萬一失利悔可及乎世民曰汝不敢出吾當獨往汝留此觀之（胡氏曰世民獨出外以威示突厥內以服元吉之心）世民乃帥騎馳詣虜陳告之曰國家與可汗和親何爲負約深入我地我秦王也可汗能鬪獨出與我鬪若以衆來我直以此百騎相當耳頡利不之測笑而不應（胡氏曰頡利素服秦王神武恐其以百騎挑戰而伏大兵四合以擊之故不敢應）世民又前遣騎告突利曰爾往與我盟有急相救今乃引兵相攻何無香火之情也突利亦不應（胡氏曰秦王以此疑頡利之心突利恐因此爲頡利所疑故亦不敢應）世民又前將渡溝水頡利見世民輕出又聞香火之言疑突利與世民有謀乃遣止世民曰王不須度我無他意更欲與王申固盟約耳乃引兵稍卻是後霖雨益甚世民

謂諸將曰虜所恃者弓矢耳今積雨彌時筋膠俱解弓不可用彼如飛鳥之折翼吾屋居火食刀槊犀利以逸制勞此而不乘將復何待乃潛師夜出冒雨而進突厥大驚世民又遣說突利以利害突利悅聽命頡利欲戰突利不可乃遣突利與其夾畢特勒阿史那思摩來見世民請和親世民許之突利因自託於世民請結爲兄弟世民亦以恩意撫之與盟而去（忻州今忻州并州今太原府綏州今綏德州隴州今邠州五隴阪在其南）

九年 秋八月己卯突厥進寇高陵辛己涇州道行軍總管尉遲敬德與突厥戰於涇陽大破之獲其俟斤阿史德烏沒曷斬首千餘級癸未頡利可汗進至渭水便橋之北遣其腹心執失思力入見以觀虛實思力盛稱頡利與突利二可汗將兵百萬今至矣上讓之曰吾與汝可汗而結和親贈遺金帛前後無算汝可汗自負盟約引兵深入於我無愧汝雖夷狄亦有人心何得全忘大恩自誇強盛我今先斬汝矣思力懼而請命蕭瑀封德彝請禮遣之上曰我今遣還虜謂我畏之愈肆憑陵乃囚思力於門下省上自出元武門與高士廉房元齡等六騎徑詣渭水上與頡利隔水而語責以負約突厥大驚皆下馬羅拜俄而諸軍繼至旌甲蔽野頡利見執失思力不返而上挺身輕出軍容甚盛有懼色上麾諸軍使卻而布陳獨留與頡利語蕭瑀以上輕敵叩馬固諫上曰吾籌之已熟非卿所知突厥所以敢傾國而來直抵郊甸者以我國內有難朕新卽位謂我不能抗禦故也我若示之以弱閉門拒守虜必放兵大掠不可復制故朕輕騎獨出示若輕之又震耀軍容示之必戰出虜不意使之失圖虜入我地既深必有懼心故與戰則克與和則固矣制服突厥厥在此一舉卿第觀之是日頡利來請和詔許之上卽

日還宮乙酉又幸城西斬白馬與頡利盟於便橋之上突厥引兵還瑀請於上曰突厥未和之時諸將爭請戰陛下不許臣等亦以爲疑旣而虜自退其策安在上曰吾觀突厥之衆雖多而不整君臣之志唯賄是求當其請和之時可汗獨在水西達官皆來謁我我若醉而縛之因襲擊其衆勢如拉朽又命長孫無忌李靖伏兵於幽州以待之虜若奔歸伏兵邀其前大軍躡其後覆之如反掌耳所以不戰者吾卽今日淺國家未安百姓未富且當靜以撫之一與虜戰所損甚多虜結怨旣深懼而修備則吾未可以得志矣故卷甲韜戈略以金帛彼旣得所欲理當自退志意驕惰不復設備然後養威伺釁一舉可滅也將欲取之必固與之此之謂矣瑀再拜曰非所及也（按高陵在西安府東北七十里涇陽在西安府北七十里便橋渭水橋幽州註言當作幽州是也上謂太宗時已受禪於東宮顯德殿也）

突厥頡利獻馬三千匹羊萬口上不受但詔歸所掠中國戶口丁未上引諸衛將卒習射於顯德殿庭諭之曰戎狄侵盜自古有之患在邊境少安則人主逸遊忘戰是以寇來莫之能禦今朕不使汝曹穿池築苑專習弓矢居閒無事則爲汝師突厥入寇則爲汝將庶幾中國之民可以少安乎於是日引數百人教射於殿庭上親臨試中多者賞以弓刀帛其將帥亦加上考羣臣多諫曰於律以兵刃至御在所者絞今使卑碎之人張弓挾矢於軒陛之側陛下親在其閒萬一有狂夫竊發出於不意非所以重社稷也上皆不聽曰王者視四海如一家封域之內皆朕赤子朕一一推心置其腹中奈何宿衛之士亦加猜忌乎由是人思自厲數年之閒悉爲精銳上嘗言吾自

少輕略四方頗知用兵之要每觀敵陳則知其強弱常以吾弱當其強強當其弱彼乘吾弱逐奔不過數十百步吾乘其弱必出其陳後反擊之無不潰敗所以取勝多在此也

上面定勳臣長孫無忌等爵邑命陳叔達於殿下唱名示之且曰朕敍卿等勳賞或未當且各自言於是諸將爭功紛紜不已淮安王神通曰臣舉兵關西首應義旗今房元齡杜如晦等專弄刀筆功居臣上臣竊不服上曰義旗初起叔父雖首唱舉兵蓋亦自營脫禍及竇建德吞噬山東叔父全軍覆沒劉黑闥再合餘燼叔父望風奔北元齡等運籌帷幄坐安社稷論功行賞固宜居叔父之先諸將乃相謂曰陛下至公雖淮安王尙無所私吾儕何敢不安其分遂皆悅服房元齡嘗言秦府舊人未遷官者皆嗟怨上曰王者至公無私故能服天下之心朕與卿輩日所衣食皆取諸民者也故設官分職以爲民也當擇賢才而用之豈以新舊爲先後哉上與羣臣論止盜或請重法以禁之上哂之曰民之所以爲盜者由賦繁役重官吏貪求飢寒切身故不暇顧廉恥耳朕當去奢省費輕徭薄賦選用廉吏使民衣食有餘則自不爲盜安用重法邪上又嘗謂侍臣曰君依於國國依於民刻民以奉君猶割肉以充腹腹飽而身斃君富而國亡故人君之患不自外來常由身出夫欲盛則費廣費廣則賦重賦重則民愁民愁則國危國危則君喪矣

讀史兵略卷二十九唐

讀史兵略卷三十

益陽胡林翼纂

通鑑

太宗貞觀元年 春正月宴羣臣奏秦王破陣樂上曰朕昔受委專征民間遂有此曲雖非文德之雍容然功業由茲而成不敢忘本封德彝曰陛下以神武平海內豈文德之足比上曰戡亂以武守成以文文武之用各隨其時卿謂文不及武斯言過矣德彝頓首謝上令德彝舉賢久無所舉上詰之對曰非不盡心但於令未有奇才耳上曰君子用入如器各取所長古之致治者豈借才於異代乎正患已不能知安可誣一世之人德彝慚而退上謂太子少師蕭瑀曰朕少好弓矢得良弓十數自謂無以加近以示弓工乃曰皆非良材朕問其故工曰木心不直則脈理皆斜弓雖勁而發矢不直朕始寤癖者辨之未精也朕以弓矢定四方識之猶未能盡况天下之務其能徧知乎乃令京官五品以上更宿中書內省數延見問以民間疾苦政事得失初突厥性淳厚政令質略頡利可汗得華人趙德言委用之德言專其威福多變更舊俗政令煩苛國人始不悅頡利又好信任諸胡而疏突厥胡人貪冒多反覆兵革歲動會大雪深數尺雜畜多死連年饑饉民皆凍餒頡利用度不給重斂諸部由是內外離怨諸部多叛兵浸弱言事者多請擊之上以問蕭瑀長孫無忌曰頡利君臣昏

虐危亡可必今擊之則新與之盟不擊恐失機會如何而可瑀請擊之無忌對曰虜不犯塞而棄信勞民非王者之師也上乃止

嶺南酋長馮盎談殿等迭相攻擊久未入朝諸州奏稱盎反前後以十數上命將軍蘭謩等發江嶺數十州兵討之魏徵諫曰中國初定嶺南瘴癘險遠不可以宿大兵且盎反狀未成未宜動衆上曰告者道路不絕何云反狀未成對曰盎若反必分兵據險攻掠州縣今告者已數年而兵不出境此不反明矣諸州旣疑其反陛下又不遣使鎮撫彼畏死故不敢入朝若遣信臣示以至誠彼喜於免禍可不煩兵而服上乃罷兵遣員外散騎侍郎李公掩持節慰諭之盎遣其子智戴隨使者入朝上曰魏徵令我發一介之使而嶺表遂安勝十萬之師不可不賞賜徵絹五百匹

青州有謀反者州縣逮捕支黨收繫滿獄詔殿中侍御史安喜崔仁師覆按之仁師至悉脫去桎械與飲食湯沐寬慰之止坐其魁首十餘人餘皆釋之還報敕使將往決之大理少卿孫伏伽謂仁師曰足下平反者多人情誰不貪生恐見徒侶得免未肯甘心深爲足下憂之仁師曰凡治獄當以平恕爲本豈可自規免罪知其冤而不爲申邪萬一闔短誤有所縱以一身易十囚之死亦所願也伏伽慚而退及敕使至更訊諸囚皆曰崔公平恕事無枉濫請速就死無一人異辭者

二年 初突厥突利可汗建牙直幽州之北主東偏奚霫等數十部多叛突厥來降頡利可汗以其失衆責之及

薛延陁回紇等敗欲谷設頡利遣突利討之突利兵又敗輕騎奔還頡利怒拘而撻之突利由是怨陰欲叛頡利頡利數徵兵於突利突利不與表請入朝上謂侍臣曰曷者突厥之強控弦百萬憑陵中夏用是驕恣以失其民今自請入朝非窮困肯如是乎朕聞之且喜且懼何則突厥衰則邊境安矣故喜然朕或失道他日亦將如突厥能無懼乎卿曹宜不惜苦諫以輔朕之不逮也頡利發兵攻突利突利遣使來求救上謀於大臣曰朕與突利爲兄弟有急不可不救然頡利亦與之有盟柰何兵部尙書杜如晦曰戎狄無信終當負約今不因其亂而取之後悔無及夫取亂侮亡古之道也契丹酋長帥其部落來降頡利遣使請以梁師都易契丹上謂使者曰契丹與突厥異類今來歸附何故素之師都中國之人盜我土地暴我百姓突厥受而庇之我興兵致討輒來救之彼如魚游釜中何患不爲我有借使不得亦終不以降附之民易之也先是上知突厥政亂不能庇梁師都以書諭之師都不從上遣夏州都督長史劉闔司馬劉蘭成圖之闔等數遣輕騎踐其禾稼多縱反間離其君臣其國漸虛降者相屬其名將李正寶等謀執師都事洩來奔由是上下益相疑闔等知可取上表請兵上遣右衛大將軍柴紹殿中少監薛萬均擊之又遣闔等據朔方東城以逼之師都引突厥兵至城下蘭成偃旗臥鼓不出師都宵遁蘭成追擊破之突厥大發兵救師都紹等未至朔方數十里與突厥遇奮擊大破之遂圍朔方突厥不敢救城中食盡師都從父弟洛仁殺師都以城降以其地爲夏州（夏州今榆林府）

三年 荏平人馬周客遊長安舍於中郎將常何之家六月壬午以旱詔文武官極言得失何武人不學不知所

言周代之陳便宜二十餘條上怪其能以問何對曰此非臣所能家客馬周爲臣具草耳上卽召之未至遣使督促者數輩及謁見與語甚悅令直門下省尋除監察御史奉使稱旨上以常何爲知人賜絹三百匹

秋八月薛延陁毗伽可汗遣其弟統特勒入貢上賜以寶刀及寶鞭謂曰卿所部有大罪者斬之小罪者鞭之夷男甚喜突厥頡利可汗大懼始遣使稱臣請尙公主修塔禮代州都督張公謹上言突厥可取之狀以爲頡利縱欲逞暴誅忠良暱姦佞一也薛延陁等諸部皆叛二也突利拓設欲谷設皆得罪無所自容三也塞北霜旱糶糧乏絕四也頡利疏其族類親委諸胡胡人反覆大軍一臨必生內變五也華人入北其衆甚多比聞所在嘯聚保據山險大軍出塞自然響應六也上以頡利可汗旣請和親復援梁師都命兵部尙書李靖爲行軍總管討之以張公謹爲副以并州都督李世勣爲通漢道行軍總管兵部尙書李靖爲定襄道行軍總管華州刺史柴紹爲金河道行軍總管靈州大都督薛萬徹爲暢武道行軍總管衆合十餘萬皆受李靖節度分道出擊突厥十二月戊辰突利可汗入朝上謂侍臣者往者太上皇以百姓之故稱臣於突厥朕常痛心今單于稽顙庶幾可雪前恥壬午靺鞨遣使入貢上曰靺鞨遠來蓋突厥已服之故也昔人謂禦戎無上策朕今治安中國而四夷自服豈非上策乎（通漢道註作通漠是也通漠暢武取佳名爾非地也）

四年 春正月李靖帥驍騎三千自馬邑進屯惡陽嶺夜襲定襄破之突厥頡利可汗不意靖猝至大驚曰唐不傾國而來靖何敢孤軍至此其衆一日數驚乃徙牙於磧口靖復遣諜離其心腹頡利所親康蘇密以隋蕭后及

煬帝之孫政道來降乙亥至京師李世勣出雲中與突厥戰於白道大破之二月甲辰李靖破突厥頡利可汗於陰山先是頡利既敗竄於鐵山餘衆尙數萬遣執失思力入見謝罪請舉國內附身自入朝上遣鴻臚卿唐儉等慰撫之又詔靖將兵迎頡利頡利外爲卑辭內實猶豫欲俟草青馬肥亡入漠北靖引兵與世勣會白道相與謀曰頡利雖敗其衆猶盛若走度磧北保依九姓道阻且遠追之難及今詔使至彼虜必自寬若選精騎一萬齋二十日糧往襲之不戰可擒矣以其謀告張公謹公謹曰詔書已許其降使者在彼柰何擊之靖曰此韓信所以破齊也唐儉輩何足惜遂勒兵夜發世勣繼之軍至陰山遇突厥千餘帳俘以隨軍頡利見使者大喜意自安靖使武邑蘇定方帥二百騎爲前鋒乘霧而行去牙帳七里虜乃覺之頡利乘千里馬先走靖軍至虜衆遂潰儉脫身得歸靖斬首萬餘級俘男女十餘萬獲雜畜數十萬殺隋義成公主擒其子疊羅施頡利帥萬餘人欲度磧世勣軍於磧口頡利至不得度其大酋長皆帥衆降世勣虜五萬餘口而還斥地自陰山北至大漠露布以聞（馬邑今朔州北定襄城今歸化城也惡陽嶺在其南白道在其北陰山在其東北鐵山又在其北皆在漠南）

初始畢可汗以啓民母弟蘇尼失爲沙鞠羅設督部落五萬家牙置靈州西北及頡利政亂蘇尼失所部獨不攜貳突利之來奔也頡利立之爲小可汗及頡利敗走往依之將奔吐谷渾大同道行軍總管任城王道宗引兵逼之使蘇尼失執送頡利頡利以數騎夜走匿於荒谷蘇尼失懼馳追獲之三月庚辰行軍副總管張寶相帥衆奄至沙鞠羅營俘頡利送京師蘇尼失舉衆來降漠南之地遂空頡利至長安夏四月戊戌上御順天樓盛陳文物

引見頡利數之曰汝藉父兄之業縱淫虐以取亡罪一也數與我盟而背之二也恃強好戰暴骨如莽三也蹂我稼穡掠我子女四也我宥汝罪存汝社稷而遷延不來五也然自便橋以來不復大入爲寇以是得不死耳頡利哭謝而退詔館於太僕厚廩食之上皇聞擒頡利嘆曰漢高祖困白登不能報今我子能滅突厥吾託付得人復何憂哉

突厥旣亡其都落或北附薛延陁或西奔西域其降唐者尙十萬口詔羣臣議區處之宜朝士多言北狄自古爲中國患今幸而破亡宜悉徙之河南兗豫之間分其種落散居州縣教之耕織可以化胡虜爲農民永空塞北之地中書侍郎顏師古以爲突厥鐵勒皆上古所不能臣陛下旣得而臣之請皆寘之河北分立酋長領其部落則永永無患矣禮部侍郎李百藥以爲突厥雖云一國然其種類區分各有酋帥今宜因其離散各卽本部署爲君長不相臣屬縱欲存立阿史那氏唯可使存其本族而已國分則弱而易制勢敵則難相吞滅各自保全必不能抗衡中國仍請於定襄置都護府爲其節度此安邊之長策也夏州都督竇靜以爲夷狄之性有如禽獸不可以刑法威不可以仁義教况彼首邱之情未易忘也置之中國有損無益恐一旦變生犯我王略莫若因其破亡之餘施以望外之恩假之王侯之號妻以宗室之女分其土地析其部落使其權弱勢分易爲羈制可使長爲藩臣永保邊塞溫彥博以爲徙於兗豫之間則乖違物性非所以存養之也請準漢建武故事置降匈奴於塞下全其部落順其土俗以實空虛之地使爲中國扞蔽策之善者也魏徵以爲突厥世爲寇盜百姓之讎也今幸而破亡

陛下以其降附不忍盡殺宜縱之使還故土不可留之中國夫戎狄人面獸心弱則請服強則叛亂固其本性今降者衆近十萬數年之後蕃息倍多必爲腹心之疾不可悔也晉初諸胡與民雜居中國郭欽江統皆勸武帝驅出塞外以絕亂階武帝不從後二十餘年伊洛之間遂爲氐裘之域此前事之明鑑也彥博曰王者之於萬物天覆地載靡有所遺今突厥窮來歸我柰何棄之而不受乎孔子曰有教無類若救其死亡授以生業教之禮義數年之後悉爲吾民選其酋長使入宿衛畏威懷德何後患之有上卒用彥博策處突厥降衆東自幽州西至靈州分突利故所統之地置順祐化長四州都督府又分頡利之地爲六州左置定襄都督府右置雲中都督府以統其衆五月辛未以突利爲順州都督使帥部落之官上戒之曰爾祖啓民挺身奔隋隋立以爲大可汗奄有北荒爾父始畢反爲隋患天道不容故使爾今日亂亡如此我所以不立爾爲可汗者懲啓民前事故也今命爾爲都督爾宜善守中國法勿相侵掠非徒欲中國久安亦使爾宗族永全也（順祐化長四州皆在河套內）

西突厥種落散在伊吾詔以涼州都督李大亮爲西北道安撫大使於磧口貯糧來者賑給使者招慰相望於道大亮上言欲懷遠者必先安近中國如本根四夷如枝葉疲中國以奉四夷猶拔本根以益枝葉也臣遠考秦漢近觀隋室外事戎狄皆致疲弊今招致西突厥但見勞費未見其益况河西州縣蕭條突厥微弱以來始得耕獲今又供億此役民將不堪不若且罷招慰爲便伊吾之地率皆沙磧其人或自立君長求稱臣內屬者羈縻受之使居塞外爲中國藩蔽此乃施虛惠而收實利也上從之隋末伊吾內屬置伊吾郡隋亂臣於突厥頡利旣滅舉

其屬七城來降因其地置西伊州思結部落飢貧朔州刺史張儉招集之儉因勸其營田歲大稔儉恐虜畜積多有異志奏請和糴以充邊儲部落喜營田轉力而邊備實焉十二月高昌王麴文泰入朝西域諸國咸欲因文泰遣使入貢上遣文泰之臣厭怛紇干往迎之魏徵諫曰昔光武不聽西域送侍子置都護以爲不以蠻夷勞中國今天下初定前者文泰之來勞費已甚今借使十國入貢其徒旅不減千人邊民荒耗將不勝其弊若聽其商賈往來與邊民交市則可矣倘以賓客遇之非中國之利也時厭怛紇干已行上遽令止之（按伊吾今哈密）

九年任城王道宗敗吐谷渾於庫山吐谷渾可汗伏允悉燒野草輕兵走入磧諸將以爲馬無草疲瘦未可深入侯君集曰不然彘者段志元軍還纔及鄯州虜已至其城下蓋虜猶完實衆爲之用故也今一敗之後鼠逃鳥散斥候亦絕君臣攜離父子相失取之易於拾芥此而不乘後必悔之李靖從之中分其軍爲兩道靖與薛萬均李大亮由北道君集與任城王道宗由南道靖部將薛孤兒敗吐谷渾於曼頭山斬其名王大獲雜蓄以充軍食靖等敗吐谷渾於牛心堆又敗諸赤水源君集道宗引兵行無人之境二千餘里盛夏降霜經破邏真谷其地無水人齧冰馬噉雪五月追及伏允於烏海與戰大破之獲其名王薛萬均薛萬徹又敗天柱王於赤海赤水之戰萬均萬徹輕騎先進爲吐谷渾所圍兄弟皆中槍失馬步鬪從騎死者什六七左領軍將軍契苾何力將數百騎救之竭力奮擊所向披靡萬均萬徹由是得免李大亮敗吐谷渾於蜀渾山獲其名王二十人將軍執失思力敗吐谷渾於居茹川靖督諸軍經積石山河源至且未窮其西境聞伏允在突倫川將奔于闐何力欲追襲之萬均

懲其前敗固言不可何力曰虜非有城郭隨水草遷徙若不因其聚居襲取之一朝雲散豈得復傾其巢穴耶自選饒騎千餘直趣突倫川萬均乃引兵從之磧中乏水將士刺馬血飲之襲破伏允牙帳斬首數千級獲雜蓄二十餘萬伏允脫身走俘其妻子君集等進逾星宿川至柏海還與靖軍合大甯王順隋氏之甥伏允之嫡子也爲侍子於隋久不得歸伏允立他子爲太子及歸意常怏怏會靖破其國國人窮蹙怨天柱王順因衆心斬天柱王舉國請降伏允帥千騎逃磧中十餘日衆散稍盡爲左右所殺國人立順爲可汗李靖奏平吐谷渾（吐谷渾地居今青海其伏俟城在青海西十五里庫山在其東北和碩特東上旂界曼頭山在和碩特南右翼後旂赤水源在輝特南旂赤海在和碩特南右翼末旂之北此在大河以北破邏眞谷在撒拉二土司西烏海在貴德廳南今曰烏蘭河在大河以南）

李靖之擊吐谷渾也厚賂黨項使爲鄉導黨項酋長拓跋赤辭來謂諸將曰隋人無信喜暴掠我今諸軍苟無異心我請供其資糧如或不然我將據險以塞諸軍之道諸將與之盟而遣之赤水道行軍總管李道彥行至闊水見赤辭無備襲之獲牛羊數千頭於是羣羌怨怒屯野狐峽道彥不得進赤辭擊之道彥大敗死者數萬退保松州左饒衛將軍樊興逗遛失軍期士卒死亡多道彥與皆坐滅死徒邊上遣使勞諸將於大斗拔谷薛萬均排毀契必何力自稱己功何力不勝忿拔刀起欲殺萬均諸將救止之上聞之以讓何力何力具言其狀上怒欲解萬均官以授何力何力固辭曰陛下以臣之故解萬均官羣胡無知以陛下爲重胡輕漢轉相誣告馳競必多且使

胡人謂諸將皆如萬均將有輕漢之心上善之而止岷州都督鹽澤行軍總管高甌生後軍期李靖按之甌生恨靖誣告靖謀反按驗無狀八月庚辰甌生滅死徙邊或言甌生秦府功臣宜寬其罪上曰甌生違李靖節度又誣其反此而可寬法將安施且國家自起晉陽功臣多矣若甌生獲免則人人犯法安可復禁乎我於舊勳未嘗忘也爲此不敢赦耳靖自是闔門杜絕賓客雖親戚不得妄見也（胡氏曰以李靖事太宗然猶如此豈非功名之際難居哉按黨項在吐谷渾東南大河南岸闕水今日廣通河在臨洮衛土司西北野狐峽卽大夏河之峽循化廳南境也松州卽松潘廳也此大河以南路此道不得進故改從庫山也）

十一年 侍御史馬周上疏以爲今之戶口不及隋之什一而給役者兄去弟還道路相繼陛下雖加恩詔使之裁損然營繕不休民安得息故有司徒行文書曾無事實昔漢之文景恭儉養民武帝承其豐富之資故能窮奢極欲而不至於亂彘使高祖之後卽傳武帝漢室安得久存乎臣觀自古以來百姓愁怨聚爲盜賊其國未有不亡者人主雖欲追改不能復全故當脩於可脩之時不可悔之於已失之後也貞觀之初天下饑歉斗米直匹絹而百姓不怨者知陛下憂念不忘故也今年豐穰匹絹得粟十餘斛而百姓怨咨者知陛下不復念之多營不急之務故也自古以來國之興亡不以蓄積多少在於百姓苦樂且以近事驗之隋儲洛口倉而李密因之東都積布帛而世充資之西京府庫亦爲國家之用至今未盡夫蓄積不可無要當人有餘力然後收之不可強斂以資寇敵也又百姓所以治安唯在刺史縣令苟選用得人則陛下可以端拱無爲今朝廷唯重內官而輕州縣之

選刺史多用武人或京官不稱職始補外任邊遠之處用人更輕百姓未安殆由於此疏奏上稱善久之謂侍臣曰刺史朕當自選縣令宜詔京官五品以上各舉一人（按史言選吏爲撥亂之本）

十三年 自結社率之反言事者多云突厥留河南不便秋七月庚戌詔右武侯大將軍化州都督懷化郡王李思摩爲乙彌泥孰俟利苾可汗賜之鼓纛突厥及胡在諸州安置者並令度河還其舊部俾世作藩屏長保邊塞突厥咸憚薛延陁不肯出塞上遣司農卿郭嗣本賜薛延陁璽書言頡利旣敗其部落咸來歸化中國貴尙禮義不滅人國前破突厥止爲頡利一人爲百姓害實不貪其土地利其人畜恆欲更立可汗故置所降部落於河南任其畜牧今戶口蕃滋秋中將遣突厥度河復其故國爾薛延陁受冊在前突厥受冊在後後者爲小前者爲大爾在磧北突厥在磧南各守土疆鎮撫部落其踰分故相鈔掠我則發兵各問其罪薛延陁奉詔於是遣思摩帥所部建牙於河北上御齊政殿餞之又遣趙郡王孝恭等齎冊書就其種落築壇於河上而立之上謂侍臣曰中國根幹也四夷枝葉也割根幹以奉枝葉木安得滋榮朕不用魏徵言幾致狼狽

十四年 高昌王文泰聞唐兵起謂其國人曰唐去我七千里沙磧居其二千里地無水草寒風如刀熱風如燒安能致大軍乎往吾入期見秦隴之北城邑蕭條非復有隋之比今來伐我發兵則多則糧運不給三萬以下吾力能制之當以逸待勞坐收其弊若頓兵城下不過二十日食盡必走然後從而虜之何足憂也及聞唐兵臨磧口憂懼不知所爲發疾卒子智盛立軍至柳谷詞者言文泰刻日將葬國人咸集於彼諸將請襲之侯君集曰不

可天子以高昌無禮故使吾討之今襲人於墟墓之間非問罪之師也於是鼓行而進至田城諭之不下詰朝攻之及午而克虜男女七千餘口以中郎將辛獠兒爲前鋒夜趨其都城高昌逆戰而敗大軍繼至抵其城下智盛致書於君集曰得罪於天子者先王也天罰所加身已物故智盛襲位未幾惟尙書憐察君集報曰苟能悔過當束手軍門智盛猶不出君集命塹塹攻之飛石雨下城中人皆室處又爲巢車高十丈俯瞰城中有行人及飛石所中皆唱言之先是文泰與西突厥可汗相結約有急相助及君集至可汗懼而西走智盛窮蹙開門出降君集分兵略地下其二十二城下欲以高昌爲州縣魏徵諫曰陛下初卽位文泰夫婦首來朝其後稍驕倨故王誅加之罪止文泰可矣宜撫其百姓存其社稷復立其子則威德被於遐荒四夷皆悅服矣今若利其土地以爲州縣則常須千餘人鎮守數年一易往來死者什有三四供辦衣資遠離親戚十年之後隴右虛耗矣陛下終不得高昌撮粟尺帛以佐中國所謂散有用以事無用臣未見其可上不從（高昌今土魯番也柳谷在其北田城在西北可汗浮圖城卽今濟木薩也）

十五年 薛延陁眞珠可汗聞上將東封謂其下曰天子封泰山士馬皆從邊境必虛我以此時取思摩如拉朽耳乃命其子大度設發同羅僕骨迴紇黠戛等兵合廿萬度漠南屯白道川據善陽嶺以擊突厥俟利苾可汗不能禦帥部落入長城保朔州遣使告急上命張儉李世勣李大亮張士貴出雲中諸將辭行上戒曰薛延陁負其疆盛踰漠而南行數千里馬已疲瘦凡用兵之道見利速進不利速退薛延陁不能掩思摩不備急擊之思摩

入長城又不速退吾已勅思摩燒薙秋草彼糧糗日盡野無所獲頃偵者來云其馬齧林木枝皮略盡卿等當與思摩共爲犄角不須速戰俟其將退一時奮擊破之必矣十二月甲辰世勣敗薛延陁於諾真水初薛延陁擊西突厥沙鉢羅及阿史那社爾皆以步戰取勝及將入寇乃大教步戰使五人爲伍一人執馬四人前戰戰勝則授以馬追奔於是大度設將三萬騎逼長城欲擊突厥而思摩已走知不可得遣人登城罵之會世勣引唐兵至塵埃漲天大度設懼將其衆自赤柯灤北走世勣選麾下及突厥精騎六千自直道邀之踰白道川追及於青山大度設走累日至諾真水勒兵還戰陳亘十里突厥先與之戰不勝還走大度設乘勝追之遇唐兵薛延陁萬矢俱發唐馬多死世勣命士卒皆下馬執長稍直前衝之薛延陁衆潰副總管薛萬徹以數千騎收其執馬者薛延陁失馬不知所爲唐兵縱擊斬首三千餘級捕虜五萬餘人大度設脫身走萬徹追之不及其衆至漠北值大雪人畜凍死者什八九世勣還軍定襄突厥思結部居五臺者叛走州兵追之會世勣軍還夾擊悉誅之丙子薛延陁使者辭還上謂之曰吾約汝與突厥以大漠爲界有相侵者我則討之汝自恃其強踰漠攻突厥李世勣所將纔數千騎耳汝已狼狽如此歸語可汗凡舉措利害可善擇其宜（思摩西突厥也薛延陁在漠北白道川在漠南今歸化城北善陽嶺在其南長城今張家口朔州今朔州雲中卽歸化城諾真水今茂明安旂塔爾渾河赤柯灤今四子部落旂西錫拉木倫河青山在歸化城界五臺縣屬代州）

十六年 初高昌旣平歲發兵千餘人戍守其地褚遂良上疏以爲聖王爲治先華夏而後夷狄陛下興兵取高

昌數郡蕭然累年不復歲調千餘人屯戍遠去鄉里破產辦裝又謫徙罪人皆無賴子弟適足騷擾邊鄙豈能有益行陳所遣多復逃亡徒煩追捕加以道塗所經沙磧千里冬風如割夏風如焚行人往來道之多死設使張掖酒泉有烽燧之警陛下豈得高昌一夫斗粟之用終當發隴右諸州兵食以赴之耳然則河西者中國之心腹高昌者他人之手足柰何糜弊本根以事無用之士乎且陛下得突厥吐谷渾皆不有其地爲之立君長以撫之高昌獨不得與爲比乎叛而執之服而封之刑莫威焉德莫厚焉願更擇高昌子弟可立者使君其國子子孫孫負荷大恩永爲唐室藩輔內安外甯不亦善乎上弗聽及西突厥入寇上悔之曰魏徵褚遂良勸我復立高昌吾不用其言今方自咎耳

十八年 上欲自征高麗褚遂良上疏以爲天下譬猶一身兩京心腹也州縣四支也四夷身外之物也高麗罪大誠當致討但命二三猛將將四五萬衆仗陛下威靈取之如反掌耳今太子新立年尚幼穉自餘藩屏陛下所知一旦棄金湯之全踰遼海之險以天下之君輕行遠舉皆愚臣之所甚憂也上不聽 以左衛將軍薛萬徹守右衛大將軍上嘗謂侍臣曰於今名將惟世勣道宗萬徹三人而已世勣道宗不能大勝亦不大敗萬徹非大勝則大敗

焉耆貳於西突厥西突厥大臣屈利啜爲其弟娶焉耆王女由是朝貢多闕安西都護郭恪請討之詔以孝恪爲西州道行軍縣管帥步騎三千出銀山道以擊之會焉耆王弟頡鼻兄弟三人至西州孝恪以頡鼻弟粟婆準爲

鄉導焉耆城四面皆水恃險而不設備孝恪倍道兼行夜至城下命將士浮水而度比曉登城執其王突騎支獲首虜七千級留粟婆準攝國事而還孝恪去三日屈利啜引兵救焉耆不及執粟婆準以勁騎五千追孝恪至銀山孝恪還擊破之追奔數十里上謂侍臣曰孝恪近奏稱八月十一日往擊焉耆二十日應至必以二十二日破之朕計其道里使者今日至矣言未畢驛騎至（焉耆今哈喇沙爾在波斯騰泊北開都河東哈布齊垓河南哈什塔河西故云四面距水安西治西州今土魯番廣安城銀山天山支阜）

鴻臚奏高麗莫離支貢白金楮遂良曰莫離支弑其君九夷所不容今將討之而納其金此郢鼎之類也臣謂不可受上從之上謂高麗使者曰汝曹皆事高武有官爵莫離支弑逆汝曹不能復讐今更爲之遊說以欺大國罪孰大焉悉以屬大理前宣州刺史鄭元璫已致仕上以其嘗從隋煬帝伐高麗召詣行在問之對曰遼東道遠糧運艱阻東夷善守城攻之不可猝下上曰今日非隋之比公但聽之（胡氏曰帝所謂恃國家之大甲兵之強算略之足以取勝欲見威於敵者也）張儉等值遼水漲久不得濟上以爲畏懦召儉詣洛陽至具陳山川險易水草美惡上悅上聞涿州刺史程名振善用兵召問方略嘉其才敏勞勉之曰卿有將相之器朕方將任使名振失不拜謝上試責怒以觀其所爲名振謝曰疏野之臣未嘗親奉聖問適方心思所對故忘拜耳舉止自若應對愈明辯上乃歎曰真奇士也即日拜右驍衛將軍以刑部尙書張亮爲平壤道行軍大總管帥江淮嶺峽兵四萬長安洛陽募士三千戰艦五百艘自萊州泛海趨平壤又以太子詹事左衛率李世勣爲遼東道行軍大總管帥步

騎六萬及蘭河二州降胡趨遼東兩軍合勢並進諸軍大集於幽州遣行軍總管姜行本少府少監邱行淹先督衆工造梯衝於安羅山時遠近勇士應募及獻攻城器械者不可勝數上皆親加損益取其便易又手詔諭天下以高麗蓋蘇文弑主虐民情何可忍今欲巡幸幽薊問罪遼碣所過營頓無爲勞費今略言必勝之道有五一日以大擊小二日以順討逆三日以治乘亂四日以逸待勞五日以悅當怨何憂不克布告元元勿爲疑懼（胡氏曰太宗以高麗爲必可克而卒不克所謂常勝之家難與慮敵也）十一月辛丑武陽公李大亮卒於長安遺表請罷高麗之師甲寅詔諸軍及新羅百濟奚契丹分道擊高麗（新羅百濟在高麗東南奚契丹在高麗西北）十九年二月庚戌上自將諸軍發洛陽以特進蕭瑀爲洛陽宮留守乙卯詔朕發定州後宜令皇太子監國開府儀同三司致仕尉遲敬德上言陛下親征遼東太子在定州長安洛陽心腹空虛恐有元感之變且邊隅小夷不足以勤萬乘願遣偏師征之指期可殄上不從以敬德爲左一馬軍總管使從行上至鄴自爲文祭魏太祖曰臨危制變料敵設奇一將之智有餘萬乘之才不足是月李世勣軍至幽州三月丁丑車駕至定州上謂侍臣曰遼東本中國之地隋氏四出師而不能得朕今東征欲爲中國報子弟之讐高麗雪君父之恥耳且方隅大定惟此未平故及朕之未老用士大夫餘力以取之朕自發洛陽唯噉肉飯雖春蔬亦不之進懼其煩擾故也上將發太子悲泣數日上曰今留汝鎮守輔以俊賢欲使天下識汝風采夫爲國之要在於進賢退不肖賞善罰惡至公無私汝當努力行此悲泣何爲壬辰車駕發定州親佩弓矢手結雨衣於鞍後李世勣軍發柳城多張形勢若出

懷遠鎮者而潛師北趨甬道出高麗不意夏四月戊戌朔世勣自通定濟遼水至元菟高麗大駭城邑皆閉門自守壬寅遼東道副總管江夏王道宗將兵數千至新城折衝都尉曹三良引十餘騎直壓城門城中驚擾無敢出者營州都督張儉將胡兵爲前鋒進渡遼水趨建安城破高麗兵斬首數千級丁未車駕發幽州上悉以軍中資糧器械簿書委岑文文本夙夜勤力躬自料配籌筆不去手精神耗竭言辭舉措頗異平日上見而憂之謂左右曰文本與我同行恐不與我同返是日遇暴疾而薨其夕上聞嚴鼓聲曰文本殞沒所不忍聞命撤之壬子世勣江夏王道宗攻高麗蓋牟城丁巳車駕至北平癸亥李世勣等拔蓋牟城獲二萬餘口糧十餘萬石張亮帥舟師自東萊渡海襲卑沙城其城四面懸絕惟西門可上程名振引兵夜至副總管王大度先登五月己巳拔之獲男女八千口分遣總管邱孝忠等曜兵於鴨綠水世勣進至遼東城下庚午車駕至遼澤泥淖二百餘里人馬不可通將作大匠閻立德布土作橋軍不留行壬申度澤東乙亥高麗步騎四萬救遼東江夏王道宗將四千騎逆擊之軍中皆以爲衆寡懸絕不若深溝高壘以俟車駕之至道宗曰賊恃衆有輕我心遠來疲頓擊之必敗且吾屬爲前軍當清道以待乘輿乃更以賊遣君父乎（胡氏曰不以賊遣君父漢耿弇之言）世勣以爲然果毅都尉馬文舉曰不遇勦敵何以顯壯士策馬趨敵所向皆靡衆心稍安旣合戰行軍總管張君乂退走唐兵不利道宗收散卒登高而望見高麗陳亂與饒騎數十衝之左右出入世勣引兵助之高麗大敗斬首千餘級丁丑車駕度遼水撤橋以堅士卒之心軍於馬首山勞賜江夏王道宗超拜馬文舉中郎將斬君乂（胡氏曰有功必賞退

儒必誅則將士知所懲勸矣）上自將數百騎至遼東城下見士卒負土填塹上分其尤重者於馬上持之從官爭負土致城下世勣攻遼東城晝夜不息旬有二日上引精兵會之圍其城數百重鼓譟聲震天地甲申南風急上遣銳卒登衝竿之末爇其西南樓火延燒城中因麾將士登城高麗力戰不能敵遂克之所殺萬餘人得勝兵萬餘人男女四萬口以其城爲遼州乙未將進白巖城丙申右衛大將軍李思摩中弩矢上親爲之吮血將士聞之莫不威動烏骨城遣兵萬餘爲白巖聲援將軍契苾何力以勁騎八百擊之何力挺身陷陳梁中其腰尙輦奉御薛萬備單騎往救之拔何力於萬軍之中而還何力氣益憤束瘡而戰從騎奮擊遂破高麗兵追奔數十里斬首千餘級會暎而罷（柳城在今建昌縣東北懷遠鎮在土默特右翼旂通定鎮在今海城縣西北遼水西白旂堡南元菟在鐵嶺縣東新城在興京之西建安城在蓋平縣東北蓋牟城在今蓋平縣北平今永平府卑沙城今九連城遼東城今遼陽州遼澤遼水西也馬首山卽首山在遼陽州西南白巖城在秀巖城北烏骨城在大洋河）

六月丁酉李世勣攻白巖城西南上臨其西北城主孫代音潛遺腹心請降臨城投刀鉞爲信且曰奴願降城中有不從者上以唐幟與其使曰必降者宜建之城上代音建幟城中人以爲唐兵已登城皆從之上之克遼東也白巖城請降旣而中悔上怒其反覆令軍中曰得城當悉以人物賞戰士李世勣見上將受其降帥甲士數十人請曰士卒所以爭冒矢石不顧其死者貪虜獲耳今城垂拔柰何更受其降孤戰士之心（胡氏曰觀世勣此言

蓋少年爲盜之氣習未除耳）上下馬謝曰將軍言是也然縱兵殺人而虜其妻孥朕所不忍將軍麾下有功者朕以庫物賞之庶因將軍贖此一城世勳乃退得城中男女萬餘口上臨水設幄受其降仍賜之食八十以上賜帛有差他城之兵在白巖者悉慰諭給糧仗任其所之契苾何力瘡重上自爲傅藥推求得刺何力者高突勃付何力使自殺之何力奏稱彼爲其主冒白刃刺臣乃忠勇之士也與之初不相識非有怨讐遂捨之己亥以蓋牟城爲蓋州丁未車駕發遼東丙辰至安市城進兵攻之丁巳高麗北部樞薩延壽惠真帥高麗靺鞨兵十五萬救安市上謂侍臣曰今爲延壽策有三引兵直前連安市城爲壘據高山之險食城中之粟縱靺鞨掠吾牛馬攻之不可猝下欲歸則泥濘爲阻坐困吾軍上策也（胡氏曰若高延壽出於上策不知太宗何以應之唯有江夏王道宗之計策耳）拔城中之衆與之宵遁中策也不度智能來與吾戰下策也卿曹觀之必出下策成擒在吾目中矣高麗有對盧年老習事謂延壽曰秦王內芟羣雄外服戎狄獨立爲帝此命世之材代舉海內之衆而來不可敵也爲吾計者莫若頓兵不戰曠日遲久分遣奇兵斷其運道糧食旣盡求戰不得欲歸無路乃可勝也（胡氏曰此卽帝所謂上策也）延壽不從引軍直進去安市城四十里上猶恐其低徊不至命左衛大將軍阿史那社爾將突厥千騎以誘之兵始交而僞走高麗相謂曰易與耳競進乘之至安市城東南八里依山而陳上悉召諸將問計長孫無忌對曰臣聞臨敵將戰必先觀士卒之情臣適行經諸營見士卒聞高麗至皆拔刀結旆喜形於色此必勝之兵也陛下未冠身親行陣凡出奇制勝皆上稟聖謀諸將奉成算而已今日之事乞陛下指蹤上

笑曰諸公以此見讓朕當爲諸公商度乃與無忌等從數百騎乘高望之觀山川形勢可以伏兵及出入之所高麗鞞揭合兵爲陳長四十里江夏王道宗曰高麗傾國以拒王師平壤之守必弱願假臣精卒五千覆其本根則數十萬之衆可不戰而降上不應（胡氏曰爲上悔不用道宗策張本）遣使給延壽曰我以爾國疆臣弑其主故來問罪至於交戰非吾本心入爾境芻粟不給故取爾數城俟爾國修臣禮則所失必復矣延壽信之不復設備上夜召文武計事命世勣將步騎萬五千陳於西嶺無忌將精兵萬一千爲奇兵自山北出於狹谷以衝其後上自將步騎四千挾鼓角偃旗幟登北山上敕諸軍聞鼓角齊出奮擊因命有司張受降幕於朝堂之側戊午延壽等獨見世勣布陳勒兵欲戰上望見無忌軍塵起命作鼓角舉旗幟諸軍鼓譟並進延壽等大懼欲分兵禦之而其陳已亂會有雷電龍門人薛仁貴著奇服大呼陷陳所向無敵高麗兵披靡大軍乘之高麗兵大潰斬首二萬餘級上望見仁貴召拜游擊將軍仁貴安都之六世孫名禮以字行延壽等將餘衆依山自固上命諸軍圍之無忌悉撤橋梁斷其歸路己未延壽惠真帥其衆三萬六千八百人請降入軍門膝行而前拜伏請命上語之曰東夷少年跳梁海曲至於摧堅決勝故當不及老人自今復敢與天子戰乎皆伏地不能對上簡擗薩以下酋長三千五百人授以戎秩遷之內地餘皆縱之使還平壤皆雙舉手之頽頓地歡呼聞數十里外收鞞揭三千三百人悉阮之獲馬五萬匹牛五萬頭鐵甲萬領佗器械稱是高麗舉國大駭後黃城銀城皆自拔遁去數百里無復人烟上驛書報太子仍與高士廉等書曰朕爲將如此何如（胡氏曰史言太宗有矜功之心）更名所幸山曰

駐驢山秋七月辛未上徙營安市城東嶺詔標識戰死者尸俟軍還與之俱歸以高延壽爲鴻臚卿高惠眞爲司農卿張亮軍過建安城下壁壘未固士卒多出樵牧高麗兵奄至軍中駭擾亮素怯踞胡牀直視不言將士見之更以爲勇總管張金樹等鳴鼓勒兵擊高麗破之八月甲辰候騎獲莫離支諜者高竹離反接詣軍門上召見解縛問曰何瘦之甚對曰竊道閒行不食數日矣命賜之食謂曰爾爲諜宜速反命爲我寄語莫離支欲知軍中消息可遣人徑詣吾所何必閒行辛苦也竹離徒跳上賜屨而遣之丙午徙營於安市城南上在遼外凡置營但明斥候不爲塹雖逼其城高麗終不敢出爲寇鈔軍士單行野宿如中國焉（胡氏曰史言帝威懾絕域所謂善師者不陳）上之克白巖也謂世勣曰吾聞安市城險而兵精其城主材勇莫離支之亂城守不服莫離支擊之不能下因而與之建安兵弱而糧少若出其不意攻之必克公可先攻建安建安下則安市在吾腹中此兵法所謂城有所不攻者也對曰建安在安市市在北吾軍糧皆在遼東今踰安市而攻建安若賊斷吾運道將若之何不先攻安市安市下則鼓行而取建安耳上曰以公爲將安得不用公策勿誤吾事世勣遂攻安市安市人望見上旗蓋輒乘城鼓譟上怒世勣請克城之日男女皆阬之安市人聞之益堅守攻久不下延壽惠眞請於上曰奴旣委身大國不敢不獻其誠欲天子早成大功奴得與妻子相見安市人顧惜其家人自爲戰未易猝拔今奴以高麗十餘萬衆望旗沮潰國人膽破烏骨城耨薩老耄不能堅守移兵臨之朝至夕克其餘當道小城必望風奔潰然後收其資糧鼓行而前平壤必不守矣羣臣亦言張亮兵在沙城召之信宿可至乘高麗兇懼併力拔烏骨

城度鴨綠水直取平壤在此舉矣上將從之獨無忌以爲天子親征異於諸將不可乘危檄幸今建安新城之虜衆猶十萬若向烏骨皆躡吾後不如先破安市取建安然後長驅而進此萬全之策也上乃止（胡氏曰太宗之定天下多以出奇取勝獨遼東之役欲以萬全制敵所以無功）諸軍急攻安市上聞城中雞斃聲謂世勣曰圍城積久城中煙火日微今雞斃甚喧此必饗士欲夜出襲我宜嚴兵備之是夜高麗數百人縋城而下上聞之自至城下召兵急擊斬首數十級高麗退走江夏王道宗督衆築土山於城東南隅浸逼其城城中亦增高其城以拒之士卒分番交戰日六七合衝車礮石壞其樓堞城中隨立木柵塞其缺道宗傷足上親爲之針築山晝夜不息凡六旬用功五十萬山頂去城數丈下臨城中道宗使果毅傅愛將兵屯山頂以備敵山頽壓城城崩會伏愛私離所部高麗數百人從城缺出戰遂奪據土山塹而守之上怒斬伏愛以徇命諸將攻之三日不能克上以遼左早寒草枯水凍士馬難久留且糧食將盡癸未勅班師先拔遼蓋二州戶口渡遼乃耀兵於安市城下而旋冬十月丙申朔上至蒲溝駐馬督填道諸軍度渤錯水暴風雪士卒沾溼多死者勅然火於道以待之上以不能成功深悔之歎曰魏徵若在不使我有是行也命馳驛祀徵以少牢復立所製碑召其妻子詣行在勞賜之上謂薛仁貴曰朕諸將皆老思得新進驍勇者將之無如卿者朕不喜得遼東喜得卿也上謂李靖曰吾以天下之衆困於小夷何也靖曰此道宗所解上顧問江夏王道宗具陳在駐蹕時乘虛取平壤之言上悵然曰當時匆匆吾不憶也（胡氏曰是役也不唯不用乘虛取平壤之策乘勝取烏骨之策亦不用也按安市今蓋平縣北耀州城

鞞揭今甯古塔建安城在蓋平縣東北黃城銀城皆在鴨綠江濱蒲溝渤錯水皆在廣甯縣東此時赴遼東者猶循盧龍故道至營州也）

二十二年 右衛率長史元策擊那伏諾王阿羅那順大破之初中天竺王尸羅逸多兵最彊四天竺皆臣之元策奉使至天竺諸國皆遣使入貢會尸羅逸多卒國中大亂其臣阿羅那順自立發胡兵攻元策元策帥從者三十人與戰力不敵悉爲所擒阿羅那順盡掠諸國貢物元策脫身宵遁抵吐蕃西境以書徵鄰國兵吐蕃遣精銳千二百人泥婆國遣七千餘騎赴之元策與其副將師仁帥二國之兵進至中天竺所居茶傅和羅城連戰三日大破之斬首三千餘級赴水溺死者且萬人阿羅那順棄城走更收餘衆還與師仁戰又破之擒阿羅那順餘衆奉其妃及王子阻乾陀衛江師仁進擊之衆潰獲其妃及王子虜男女萬二千人於是天竺響震城邑聚落降者五百八十餘所俘阿羅那順以歸（五天竺今東西南北中印度也吐蕃今西藏泥婆羅疑信度河西之健陀羅乾陀衛江今岡噶江佛書之恆河也）

司空梁公房元齡留守京師疾篤謂諸子曰吾受主上厚恩今天下無事唯東征未已羣臣莫敢諫吾知而不言死有餘責乃上表諫以爲老子曰知足不辱知止不殆陛下功名威德亦可足矣拓地開疆亦可止矣且陛下每決一重囚必令三覆五奏進素膳止音樂者重人命也今驅無罪之士卒委之鋒刃之下使肝腦塗地獨不足愍乎（胡氏曰明慎用刑重人命也踴躍用兵則忘人命之爲重矣引彼形此元齡之言可謂深切著明）向使高

麗違失臣節誅之可也侵擾百姓滅之可也他日能爲中國患除之可也今無此三條而坐煩中國內爲前代雪恥外爲新羅報讎豈非所存者小所損者大乎（胡氏曰說到此分明見得高麗不必征當時在朝之臣諫東征者未有能及此者也是忠誠懇切中流出）願陛下許高麗自新焚陵波之船罷應募之衆自然華夷慶賴遠肅邇安臣旦夕入地儻蒙錄此哀鳴死且不朽元齡子遺愛尙上女高陽公主上謂公主曰彼病篤如此尙能愛我國家上自臨視握手與訣悲不自勝秋七月癸卯卒柳芳曰元齡佐太宗定天下及終相位凡三十二年天下號爲賢相然無跡可尋德亦至矣故太宗定禍亂而房杜不言功王魏善諫諍而房杜讓其賢英衛善將兵而房杜行其道理致太平善歸人主爲唐宗臣宜哉

阿史那社爾旣破處月處密引兵自焉耆之西趨龜茲北境分兵爲五道出其不意焉耆王薛婆阿那支棄城奔龜茲保其東境社爾遣兵追擊擒而斬之立其從父弟先那準爲焉耆王使修職貢龜茲大震守將多棄城走社爾進屯磧口去其都城三百里遣伊州刺史韓威帥千餘騎爲前鋒右衛將軍曹繼叔次之至多褐城龜茲王訶利布失畢其相那利羯獵顛帥衆五萬拒戰鋒刃甫接威引兵僞遁龜茲悉衆追之行三十里與繼叔軍合龜茲懼將卻繼叔乘之龜茲大敗逐北八十里龜茲王布失畢旣敗走保都城社爾進軍逼之布失畢輕騎西走社爾拔其城使安西都護郭孝恪守之沙州刺史蘇海政尙奉御薛萬備帥精騎追布失畢行六百里布失畢窘急保撥換城社爾進軍攻之四旬閏月丁丑拔之擒布失畢及羯獵顛那利脫身走潛引西突厥之衆并其國兵萬

餘人襲擊孝恪孝恪營於城外龜茲人或告之孝恪不以爲意那利奄至孝恪帥所部千餘人將入城那利之衆已登城矣城中降胡與之相應共擊孝恪矢刃如雨孝恪不能敵將復出死於西門城中大擾倉部郎中崔義超召募得二百人衛軍資財物與龜茲戰於城中曹繼叔韓威亦營於城外自城西北隅擊之那利經宿乃退斬首三千餘級城中始定後旬餘日那利復引山北龜茲萬餘人趣都城繼叔逆擊大破之斬首八千級那利單騎走龜茲人執之以詣軍門社爾前後破其大城五遣左衛郎將權祇甫詣諸城開示禍福皆相帥請降凡得七百餘城虜男女數萬口社爾乃召其父老宣國威靈諭以伐罪之意立其王之弟葉護爲王龜茲人大喜西域震駭西突厥于闐安國爭饋駝馬軍糧社爾勒石紀功而還（處月在今阜康縣處密在今小珠勒都斯河東磧口在今和支納克嶺東多褐城在今布克爾都城今庫車城撥換城在今奇魯克布魯特境）

高宗永徽四年 初睦州女子除碩真以妖言惑衆與妹夫章叔允舉兵反自稱文佳皇帝以叔允爲僕射冬十月叔允帥衆攻桐廬陷之碩真撞鐘焚香引兵二千攻陷睦州及於潛進攻歙州不克敕揚州刺史房仁裕發兵討之碩真遣其黨童文寶將四千人寇婺州刺史崔義元發兵拒之民間訛言碩真有神犯其兵者必滅族士衆兇懼司功參軍崔元籍曰起兵仗順猶且無成况憑妖妄其能久乎義元以元籍爲前鋒自將州兵繼之至下淮戍遇賊與戰左右以楯蔽義元義元曰刺史避箭人誰致死命撤之於是士卒齊奮賊衆大潰斬首數千級聽其餘衆歸首進至睦州境降者萬計十一月仁裕軍合獲碩真叔允斬之餘黨悉平（睦州今嚴州府桐廬縣其屬

縣也於潛縣屬杭州府歙州今徽州府婺州今金華府下淮戍在今蘭溪縣）

顯慶二年 蘇定方擊西突厥沙鉢羅可汗至金山北先擊處木昆部大破之其俟斤嬾獨祿等帥萬餘帳來降定方撫之發其千騎與俱右領軍郎將薛仁貴上言泥孰部素不伏賀魯爲賀魯所破虜其妻子今唐兵所破賀魯諸部得泥孰妻子者宜歸之仍加賜資使彼明知賀魯爲賊而大唐爲之父母則人致其死不遺力矣上從之泥孰喜請從軍共擊賀魯定方至曳咥河西沙鉢羅帥十姓兵且十萬來拒戰定方將唐兵及回紇萬餘人擊之沙鉢羅輕定方兵直進圍之定方令步兵據南原攢稍外向自將騎兵陳於北原沙鉢羅先攻步軍三衝不動定方引騎兵擊之沙鉢羅大敗追奔三十里斬獲數萬人明日勒兵復進沙鉢羅獨與處木昆屈律啜數百騎西走定方乃命肅嗣業回紇婆閭將胡兵趨邪羅斯川追沙鉢羅定方與任雅相將新附之衆繼之會大雪平地二尺軍中咸請俟晴而行定方曰虜恃雪深謂我不能進必休息士馬亟追之可及若緩之彼遁逃遠不可復追省日兼功在此時矣乃蹋雪晝夜兼行所過收其部衆至雙河與彌射步眞合去沙鉢羅所居二百里布陳長驅徑至其牙帳沙鉢羅與其徒將獵定方掩其不備縱兵擊之斬獲數萬人得其鼓纛沙鉢羅與其子咥運塔閭啜等脫走趣石國定方於是息兵諸部各歸所居通道路置郵驛掩骸骨問疾苦畫疆場復生業凡爲沙鉢羅所掠者悉括還之十姓安堵如攻乃命嗣業將兵追沙鉢羅定方引軍還（金山今阿爾泰山也曳咥河在伊犁東北今博羅塔拉河也邪羅斯川今伊犁西之車里克河是也石國在今那林河南額得格納霍罕所屬也）

四年 思結俟斤都曼帥疏勒朱俱波謁般隨三國反擊破于闐十一月癸亥以左驍衛大將軍蘇定方爲安撫大使以討之定方軍至業葉水思結保馬頭川定方選精兵萬人騎三千匹馳往襲之一日一夜行三百里詰旦至城下都曼大驚戰於城外都曼敗退保其城及暮諸軍繼至遂圍之都曼懼而出降定方獻俘於乾陽殿法司請誅都曼定方請曰臣許以不死故都曼出降願宥其餘生上曰朕屈法以全卿之信乃免之（疏勒國今喀什噶爾城朱俱波今和闐之哈拉哈什河謁盤隨今日喀楚特城于闐卽和闐業葉水卽塔里木河馬頭川卽和闐河皆在今日回疆也）

龍朔元年 以任雅相爲溟江道行軍總管契苾何力爲遼東道行軍總管蘇定方爲平壤道行軍總管與蕭嗣業及諸胡兵凡三十五軍伐高麗水陸分道進秋七月定方破高麗於溟江屢戰皆捷遂圍平壤城高麗蓋蘇文遣其子男生以精兵數萬守鴨綠水諸軍不得度何方至值冰大合何力引衆乘冰度水鼓譟而進高麗大潰追奔數十里斬首三萬級餘衆悉降男生僅以身免會有詔班師乃還（溟水今大同江平壤城居江之北鴨綠江在鳳凰邊門東平壤西北數百里定方蓋海道何力步道）

二年 三月鄭仁泰等敗鐵勒於天山鐵勒九姓聞唐兵將至合衆十餘萬以拒之選驍健者數十人挑戰薛仁貴發三矢殺三人餘皆下馬請降仁貴悉阮之度磧北擊其餘衆獲葉護兄弟三人而還軍中歌之曰將軍三箭定天山壯士長歌入漢關思結多濫葛等部落先保天山聞仁泰等將至皆迎降仁泰等縱兵擊之掠其家以賞

軍虜相帥遠遁將軍楊志追之爲虜所敗候騎告仁泰虜輜重在近往可取也仁泰將輕騎萬四千倍道赴之遂踰大磧至仙萼河不見虜糧盡而還值大雪士卒飢凍棄捐甲兵殺馬食之馬盡人自相食比入塞餘兵纔八百人軍還司憲大夫楊德裔劾奏文泰等誅殺已降使虜逃散不撫士卒不計資糧遂使骸骨蔽野棄甲資寇自聖朝開創以來未有如今日之喪敗者仁貴於所監臨貪淫自恣雖矜所得不補所喪並請付法司推科詔以右驍衛大將軍契苾何力爲鐵勒道安撫使何力乃謂曰國家知汝皆脅從赦汝之罪罪在酋長得之則已其部落大喜共執其葉護及設特勒等二百餘人以授何力何力數其罪而斬之九姓遂定（天山今新疆之北騰格里山仙萼河未詳）

熊津都督劉仁願帶方州刺史劉仁軌大破百濟於熊津之東拔真峴城初仁願仁軌等屯熊津城上與之敕書以平壤軍回一城不可獨固宜拔就新羅若金法敏籍卿留鎮宜且停彼若其不須卽宜泛海還也將士咸欲西歸仁軌曰人臣徇公家之利有死無貳豈得先念其私主上欲滅高麗故先誅百濟留兵守之制其心腹雖餘寇充斥而守備甚嚴宜礪兵秣馬擊其不意理無不克旣捷之後士卒心安然後分兵據險開張形勢飛表以聞更求益兵朝廷知其有成必命將出師聲援纔接凶醜自殲非直不棄成功實亦永清海表今平壤之軍旣還熊津又拔則百濟餘燼不日更興高麗逋寇何時可滅且今以一城之地居敵中央苟或動足卽爲擒虜縱入新羅亦爲羈客脫不如意悔不可追況福信凶悖殘虐君臣猜離行相屠戮正宜堅守觀變乘便取之不可動也行從之

時百濟王豐與福信等以仁願等孤城無援遣使謂之曰大使等何時西還當遣相送仁願仁軌知其無備忽出擊之拔其支羅城及尹城大山沙井等柵殺獲甚衆分兵守之福信等以眞峴城險要加兵守之仁軌伺其稍懈引新羅兵夜傅城上攀草而上比明入據其城遂通新羅運糧之路仁願乃奏請益兵詔發淄青萊海之兵七千人以赴熊津福信專權與百濟王豐浸相猜忌福信稱疾臥於窟室欲俟豐間疾而殺之豐知之帥親信襲殺福信遣使詣高麗倭國乞師以拒唐兵（此今高麗國中地熊津江卽漢江百濟國在其全州界新羅在其慶州界餘城柵不能指目矣）

三年 初劉仁願劉仁軌既克眞峴城詔孫仁師將兵浮海助之百濟王豐南引倭人以拒唐兵仁師與仁願仁軌合兵勢大振諸將以加林城水陸之衝欲先攻之仁軌曰加林險固急攻則傷士卒緩之則曠日持久周留城虜之巢穴羣凶所聚除惡務本宜先攻之若克周留諸城自下於是仁師仁願與新羅王法敏將陸軍以進仁軌與別將杜爽扶餘隆將水軍及糧船自熊津入白江以會陸軍同趣周留城遇倭兵於白江口四戰皆捷焚其舟四百艘煙炎灼天海水皆赤百濟王豐脫身奔高麗王子忠勝忠志等帥衆降百濟盡平唯別帥遲受信據任存城不下初百濟西部人黑齒常之長七尺餘驍勇有謀略蘇定方克百濟常之帥所部隨衆降定方繫其王及太子縱兵劫掠壯者多死常之懼與左右十餘人遁歸本部收集亡散保任存山結柵以自固旬月間歸附者三萬餘人常之與別部將沙吒相如各據險以應福信百濟既敗皆帥其衆降仁軌使常之相如自將其衆取任存城

仍以糧仗助之仁師曰此屬獸心何可信也仁軌曰吾觀二人皆忠勇有謀敦信重義但勳者所託未得其人今正是其感激立效之時不用疑也遂給其糧仗分兵隨之攻拔任存城遲受信棄妻子奔高麗詔劉仁軌將兵鎮百濟召孫仁師劉仁願還百濟兵火之餘比屋彫殘僵尸滿野仁軌始命瘞骸骨籍戶口理付聚署官長通道塗立橋梁補堤堰復陂塘課耕桑賑貧乏養孤老立唐社稷頒正朔及廟諱百濟大悅闔境各安其業然後脩屯田儲糗糧訓士卒以圖高麗仁願至京師上問之曰卿在海東前後奏事皆合機宜復有文理卿本武人何能如是仁願曰此皆劉仁軌所爲非臣所及也上悅加仁軌六階正除帶方州刺史爲築第長安厚賜其妻子遣使齎璽書勞勉之上官儀曰仁軌遭黜削而能盡忠仁願秉節制而能推賢皆可謂君子矣（倭今日本國自熊津入白江謂舟師先在熊津江而退入白江也白江今朝鮮保甯縣南之江然則周留城其全州歟）

麟德元年 檢校熊津都督劉仁軌上言臣伏觀所存戍兵疲羸者多勇健者少衣服貧敝唯思西歸無心展効臣間以往在海西見百姓人人應募爭欲從軍或請自辦衣糧謂之義征何爲今日士卒如此咸言今日官府與曩時不同人亦殊曩時東西征役身沒王事並蒙敕使弔祭追贈官爵或以死者官爵同授子弟凡度遼海者皆賜勳一轉自顯慶五年以來征人屢經渡海官不記錄其死者亦無人誰何州縣每發百姓爲兵其壯而富者行錢參逐皆亡匿得免貧者身雖老弱被發卽行頃者破百濟及平壤苦戰當時將帥號令許以勳賞無所不至及達西岸惟聞枷鎖推禁奪賜破勳州縣追呼無以自存公私困弊不可悉言以是昨發海西之日已有逃亡自殘

者非獨至海外而然也又本因征役授勳級以爲榮寵而比年出征皆使勳官挽引勞苦與白丁無殊百姓不願從軍率皆由此臣又問曩日士卒留鎮五年尙得支濟今爾等始經一年何爲如此單露咸言初發家日惟令備一年資裝今已二年未有還期臣檢校軍士所留衣今冬僅可充事來秋以往全無準擬陛下留兵海外欲殄滅高麗百濟高麗舊相黨援倭人雖遠亦共爲影響若無鎮兵還成一國今旣資戍守又置屯田所籍士卒同心同德而衆有此議何望成功自非有所更張厚加慰勞明賞重罰以起士心若止如今日以前處置恐師衆疲老立效無日逆耳之事或無人爲陛下盡言故臣披露肝膽昧死奏陳上深納其言遣右威衛將軍劉仁願將兵渡海以代舊鎮之兵仍敕仁軌俱還仁軌謂仁願曰國家懸軍海外欲以經略高麗其事非易今收穫未畢而軍吏與士卒一時代去軍將又歸夷人新服衆心未安必將生變不如且留舊兵漸令收穫辦具資糧節級遣還軍將且留鎮撫未可還也仁願曰吾前還海西大遭讒謗云吾多留兵衆謀據海東幾不免禍今日唯知准敕豈敢擅有所爲仁軌曰人臣苟利於國知無不爲豈恤其私乃上表陳便宜自請留鎮海東上從之仍以扶餘隆爲熊津都尉使招輯其餘衆

乾封二年 九月辛未李勣拔高麗之新城使契苾何力守之勣初度遼謂諸將曰新城高麗西邊要害不先得之餘城未易取也遂攻之城人師夫仇等縛城主開門降勣引兵進擊一十六城皆下之龐同善高侃尙在新城泉男建遣兵襲其營左武衛將軍薛仁貴擊破之侃進至金山與高麗戰不利高麗乘勝南逐北仁貴引兵橫擊

大破之斬首五萬餘級拔南蘇木底蒼巖三城與泉男生軍合郭待封以水軍自別道趣平壤勅遣別將馮師本載糧仗以資之師本船破失期待封軍中飢窘欲作書與勣恐爲虜所得知其虛實乃作離合詩以與勣（胡氏曰離合詩離析字畫合之成文以見其意）勣怒曰軍事方急何以詩爲必斬之行軍管記通事舍人元萬頃爲釋其義勣乃更遣糧仗赴之郝處俊在高麗城下未及成別高麗奄至軍中大駭處俊據胡床方食乾糲潛簡精銳擊敗之將士服其膽略（新城在今興京之西南蘇木底蒼巖三城在興京西南遼陽州東北）

總章元年以右相劉仁軌爲遼東道副大總管二月壬午李勣等拔高麗扶餘城薛仁貴既破高麗於金山乘勝將三千人將攻扶餘城諸將以其兵少止之仁貴曰兵不在多顧用之何如耳遂爲前鋒以進與高麗戰大破之殺獲萬餘人遂拔扶餘城扶餘川中四十餘城皆望風請服侍御史賈言忠奉使自遼東還上問以軍事言忠對曰高麗必平上曰卿何以知之對曰隋煬帝東征而不克者人心離怨故也先帝東征而不克者高麗未有覺也今高麗微弱權臣擅命蓋蘇文死男建兄弟內相攻奪男生傾心內附爲我鄉導彼之情僞靡不知之以陛下明聖國家富彊將士盡力以乘高麗之亂其勢必克不俟再舉矣且高麗連年饑饉妖異屢降人心危駭其亡可翹足待也上又問遼東諸將孰賢（胡氏曰謂征遼東之諸將也）對曰薛仁貴勇冠三軍龐同善雖不善鬪而持軍嚴整高侃勤儉自處忠果有謀契苾何力沈毅能斷雖頗忌前而有統御之才然夙夜小心忘身憂國皆莫及李勣也上深然其言泉男建復遣兵五萬人救扶餘城與勣等遇於薛賀水（胡氏曰新書作薩賀水）合戰大

破之斬獲三萬餘人進攻大行城拔之九月癸巳勦拔平壤勦既克大行城諸軍出他道者皆與勦會進至鴨綠柵高麗發兵拒戰勦等奮擊大破之近奔二百餘里拔辱夷城諸城遁逃及降者相繼何力先引兵至平壤城下勦軍繼之圍平壤月餘高麗王藏遣泉男產帥首領九十八人持白幡詣勦降勦以禮接之泉男建猶閉門拒守頻遣兵出戰皆敗男建以軍事委僧信誠信誠密遣人詣勦請爲內應後五日信誠開門勦縱兵登城鼓譟焚城四月男建自刺不死遂擒之高麗悉平（高麗扶餘城疑在若額邊門外金山在其東扶餘川疑卽土門江薛賀水疑卽修家江大行城疑在修家江西也）

儀鳳三年 劉仁軌鎮洮河每有奏請多爲李敬元所抑由是怨之軌知敬元兩將帥才欲中傷之（胡氏曰仁軌以私怨奏用敬元以至敗國殄民矯情以容袁異式挾怨以陷李敬元得爲賢乎）奏言西邊鎮守非敬元不可敬元固辭上曰仁軌須朕朕亦自往卿安得辭春正月丙子以敬元代仁軌爲洮河道大總管兼安撫大使仍檢校鄯州都督秋九月丙寅敬元將兵十八萬與吐蕃將論欽陵戰於青海之上兵敗工部尚書右衛大將軍彭城公劉審禮爲吐蕃所虜時審禮將前軍深入頓於濠所爲虜所攻敬元懦怯按兵不救聞審禮戰沒狼狽還走頓於承風嶺阻泥溝以自固虜屯兵高岡以壓之左領軍員外將軍黑齒常之夜帥敢死之士五百人襲擊虜營虜衆潰亂其將跋地設引兵遁去敬元乃收餘衆還鄯州審禮諸子自縛詣闕請入吐蕃贖其父敕聽次子易從詣吐蕃省之比至審禮已病卒易從晝夜號哭不絕聲吐蕃哀之還其尸易從徒跣負之以歸上嘉黑齒常之

功擢拜左武衛將軍充河源軍副使敬元之西征也監察御史婁師德應猛士詔從軍及敗敕師德收集散亡軍乃復振上以吐蕃爲憂悉召侍臣謀之議竟不決太學生魏元忠上封事言禦吐蕃之策以爲理國之要在文與武今言文者則以辭華爲首而不及經綸言武者則以騎射爲先而不及方略是皆何益於理亂哉故陸機著辯亡之論無救河橋之敗養由基射穿七札不濟鄢陵之師此已然之明效也古語有之人無常俗政有理亂兵無彊弱將有巧拙故選將當以智略爲本勇力爲末今朝廷用人類取將門子弟及死事之家彼皆庸人豈足常關外之任李左車陳湯呂蒙孟觀皆出貧賤而立殊功未聞其家代爲將也夫賞罰者軍國之切務苟有功不賞有罪不誅雖堯舜不能以致理議者皆云近日征伐虛有賞格而無事實蓋由小才之吏不知大體徒惜勳庸恐虛倉庫不知士不用命所損幾何黔首雖微不可欺罔豈得懸不信之令設虛實之科而望其立功乎自蘇定方征遼東李勣破平壤賞絕不行勳仍淹滯不聞斬一臺郎戮一令史以謝勳人大非川之敗薛仁貴郭待封等不卽重誅曷使早誅仁貴等則自餘諸將豈敢失利於後哉臣恐吐蕃之平非旦夕可冀也又出師之要全資馬力臣請開畜馬之禁使百姓皆得畜馬若官軍大舉委州縣長吏以官錢增價市之則皆爲官有彼胡虜恃馬力以爲彊若聽人閒市而畜之是損彼之彊爲中國之利也先是禁百姓畜馬故元忠言之上善其言（洮河在蘭州府西河州東鄯州令西寧府青海今青海也承風嶺疑在輝特南旂東）

調露元年 初西突厥十姓可汗阿史那都支及其別帥李遮旬與吐蕃連和侵逼安西朝議欲發兵討之吏部

侍郎裴行儉曰吐蕃爲寇審禮覆沒干戈未息豈可復出師西方今波斯王卒其子泥洹師爲質在京師宜遣使者送歸國道過二虜以便宜取之可不血刃而擒也上從之命行儉册立波斯王仍爲安撫大食使行儉奏肅州刺史王方翼以爲已副仍令檢校安西都護初行儉嘗爲西州長史又奉使過西州吏人郊迎行儉悉召其豪傑子弟千餘人自隨且揚言天時方熱未可涉遠須稍涼乃西上阿史那都支覘知之遂不設備行儉徐召四鎮諸胡酋長（胡氏曰四鎮龜茲毗沙焉耆疏勒四都督府也）謂曰昔在西州縱獵甚樂今欲尋舊賞誰能從吾獵者諸胡子弟爭請從行近得萬人行儉陽爲畋獵校勒部伍數日遂倍道西進去都支部落十餘里先遣都支所親問其安否外示閑暇似非討襲續使促召相見都支先與李遮旬約秋中拒漢使（胡氏曰漢家威加四夷故夷人率謂中國人爲漢人猶漢時匈奴謂漢人爲秦人也）猝聞軍至計無所出帥其子弟迎謁遂擒之因傳其契箭悉召諸部酋長執送碎葉城行儉釋遮旬使者使先往諭遮旬以都支已就擒遮旬亦降於是囚都支遮旬以歸遣波斯王自還其國留王方翼於安西使築碎葉城（胡氏曰碎葉城焉耆都督府治所也方翼築四面十二門爲屈曲隱出伏沒之狀按碎葉城疑在今伊犁）

永隆元年 裴行儉大破突厥於黑山擒其酋長奉職可汗泥熟旬爲其下所殺以其首來降初行儉行至朔川謂其下曰用兵之道撫士貴誠制敵貴詐前日蕭嗣業糧運爲突厥所掠士卒凍餒故敗今突厥必復爲此謀宜有以詐之乃詐爲糧車三百乘每車伏壯士五人各持陌刀勁弩以羸兵數百爲之援且伏精兵於險要以待之

虜果至羸兵棄車散走虜驅車就水草解鞍牧馬欲取糧壯士自車中躍出擊之虜驚走復爲伏兵所邀殺獲殆盡自是糧運行者虜莫敢近軍至單于府北抵暮下營掘塹已周行儉遽命移就高岡諸將皆言士卒已安堵不可復動行儉不從趣使移是夜風雨暴至前所營地水深丈餘諸將驚服問其故行儉笑曰自今但從我命不必問其所由知也奉職旣就擒餘黨走保狼山（黑山在蘇拉木倫河東朔川卽朔州今仍曰朔州單于府在歸化城東南今托克托城狼山在其東北）

吐蕃寇河源左武衛將軍黑齒常之擊卻之擢常之爲河源軍經略大使常之以河源衝要欲加兵戍之而轉輸險遠乃廣置烽戍七十餘所開屯田五千餘頃歲收五百餘萬石由是戰守有備焉先是劍南募兵於茂州西南築安戎城以斷吐蕃通蠻之路吐蕃以生羌爲鄉導攻陷其城以兵據之由是西洱諸蠻皆降於吐蕃吐蕃盡據羊同黨項及諸羌之地東接涼松茂嶺等州南鄰天竺西陷龜茲疏勒等四鎮北抵突厥地方萬餘里諸胡之盛莫與爲比（河源軍疑在河州小積石山界茂州今仍曰茂州西洱河在雲南大理府東涼州合涼州府松州今松潘廳嶺今甯遠府天竺今五印度龜茲疏勒四鎮今新疆羊同黨項在青海大河之南川省西北邊外也）

開耀元年 裴行儉軍於代州之陘口多蹤反聞由是阿史那伏念與阿史德溫傳浸相猜貳伏念留妻子輜重於金牙山以輕騎襲曹懷舜行儉遣裨將何迦密自通漠道程務挺自石地道掩取之伏念與曹懷舜約和而還比至金牙山失其妻子輜重士卒多疾疫乃引兵北走細沙行儉又使副總管劉敬同程務挺等將單于府兵追

蹠之伏念請執溫傳以自效然尙猶豫又自恃道遠唐兵必不能至不復設備敬同等軍到伏念狼狽不能整其衆遂執溫傳從閒道詣行儉降候騎告以塵埃漲天而至將士皆震恐行儉曰此乃伏念執溫傳來降非他盜也然受降如受敵不可無備乃命嚴備遣單使迎前勞之少選伏念果帥酋長縛溫傳詣軍門請罪行儉盡平突厥餘黨以伏念溫傳歸京師冬十月丙寅斬伏念及溫傳等五十四人於都市初行儉許伏念以不死故降裴炎疾行儉之功遂誅之行儉歎曰渾濬爭功古今所恥但恐殺降無復來者因稱疾不出（陁口在代州胡氏所云陁嶺關口是也突厥建牙之地皆曰金牙山此東突厥牙疑在廂黃旂察哈爾界通漠疑在其西南石地在其東南細沙又在其東南近伊克勒泊境）

永淳元年 阿史那車薄圍弓月城安西都護王方翼引軍救之破虜衆于伊麗水斬首千餘放俄而三姓咽麵與車薄合兵拒方翼方翼與戰于熱海流矢貫方翼臂方翼以佩刀截之左右不知所將胡兵謀執方翼以應車薄方翼知之悉召會議陽出軍資賜之以次引出斬之會大風方翼振金鼓以亂其聲誅七十餘人其徒莫之覺既而分遣裨將襲車薄咽麵大破之擒其酋長三百人西突厥遂平（弓月今烏魯木齊伊麗水卽今伊犁河熱海在今果子溝）

突厥餘黨阿史那骨篤祿阿史德元珍等招集亡散據黑沙城反入寇并州及單于府之北境殺嵐州刺史王德茂檢校代州都督薛仁貴將兵擊元珍於雲州虜問唐大將爲誰應之日薛仁貴虜曰吾聞仁貴流象州死久矣

何以給我仁貴免胄示之面虜相顧失色下馬列拜稍引去仁貴因奮擊大破之（黑沙城疑在獨石口外伊克勒泊并州太原府也單于府今托克托城嵐州今嵐縣雲州今大同府）

吐蕃入寇河源軍軍使婁師德將兵擊之於白水澗八戰八捷上以師德爲經略副使曰卿有文武材勿辭也（河源軍在河州小積石山西白水澗疑在巴燕戎格廳）

宏道元年 阿史那骨篤祿等寇蔚州殺刺史李思儉豐州都督崔智辯將兵邀之於朝那山北兵敗爲虜所擒朝議欲廢豐州遷其百姓於靈夏豐州司馬唐休璟上言以爲豐州阻河爲固居賊衝要自秦漢以來列爲郡縣土宜耕牧隋季喪亂遷百姓於甯慶二州致胡虜深侵以靈夏爲邊境貞觀之末募人實之西北始安今廢之則河濱之地復爲賊有靈夏等州人不安業非國家之利也乃止（此時蔚州仍治靈邱縣注云忠順軍非也豐州在鄂爾多斯右翼後旂界靈州屬甯夏府夏州今榆林府）

讀史兵略卷三十一

益陽胡林翼纂

通鑑

中宗嗣聖元年 時諸武用事唐宗室人人自危衆心憤惋會眉州刺史英公李敬業及弟整厓令敬猷給事中唐之奇長安主簿駱賓王詹事司直杜求仁皆坐事敬業貶柳州司馬敬猷免官之奇貶括蒼令賓王貶臨海丞求仁貶黟令整厓尉魏思溫嘗爲御史復被黜皆會於揚州各自以失職怨望乃謀作亂以匡復廬陵王爲辭思溫爲之謀主使其黨監察御史薛仲璋求奉使江都令雍州人韋超詣仲璋告變云揚州長史陳敬之謀反仲璋收敬之繫獄居數日敬業乘傳而至矯稱揚州司馬來之官云奉密旨以高川酋長馮子猷謀反發兵討之於是開府庫令士曹參軍李宗臣就錢坊驅囚徒工役授以甲斬敬之於繫所錄事參軍孫處行拒之亦斬以徇僚史無敢動者遂起一州之兵復稱嗣聖元年開三府一曰匡復府二曰英公府三曰揚州大都督府敬業自稱匡復府上將領揚州大都督以之奇求仁爲左右長史宗臣仲璋爲左右司馬思溫爲軍師賓王爲記室旬日閒得勝兵十餘萬移檄州縣太后見檄問曰誰所爲或對曰駱賓王太后曰宰相之過也人有如此才而使之流落不偶乎敬業求得人貌類故太子賢者給衆云賢不死亡在此城中令吾屬舉兵因奉以號令楚州司馬李崇福帥

所部三縣應敬業盱眙人劉行舉獨據縣不從敬業遣其將尉遲昭攻盱眙詔以行舉爲游擊將軍以其弟行實爲楚州刺史九月甲申以左玉鈐衛大將軍李孝逸爲揚州道大總管將兵三十萬以將軍李知十馬敬臣爲之副以討李敬業（按眉州屬四川蓋屋屬陝西西安府柳州府屬廣西括蒼今處州府臨海縣屬台州府黟縣屬徽州府楚州今淮安府三縣註云山陽鹽城安宜山陽鹽城今屬淮安府安宜今寶應縣屬揚州府盱眙屬泗州）

魏思溫說李敬業曰明公以匡復爲辭宜帥大衆鼓行而進直指洛陽則天下知公在勤王四面響應矣薛仲璋曰金陵有王氣且大江天險足以爲固不如先取常潤爲定霸之基然後北向以圖中原進無不利退有所歸此良策也思溫曰山東豪傑以武氏專制憤惋不平聞公舉事皆自蒸麥飯爲糧伸鋤爲兵以俟南軍之至不乘此勢以立大功乃更蓄縮自謀巢穴遠近聞之其誰不解體敬業不從使唐之奇守江都將兵度江攻潤州思溫謂杜求仁曰兵勢合則強分則弱敬業不并力度淮收山東之衆以取洛陽敗在眼中矣壬辰敬業陷潤州執刺史李思文以李宗臣代之思文敬業之叔父也知敬業之謀先遣使問道上變爲敬業所攻拒守久之力屈而陷思溫請斬以徇敬業不許謂思文曰叔黨於武氏宜改姓武潤州司馬劉延嗣不降敬業將斬之思溫救之得免與思文皆囚於獄（按金陵今江甯府常州在潤州東潤州卽鎮江府也在江寧東）

追削李敬業祖考官爵發冢斲棺復姓徐氏敬業聞李孝逸將至自潤州回軍拒之屯高郵之下阿溪使徐敬猷

逼淮陰別將韋超尉遲昭屯都梁山孝逸軍至臨淮偏將雷仁智與敬業戰不利孝逸懼按兵不進殿中侍御史魏元忠謂孝逸曰天下安危在茲一舉四方承平日久忽聞狂狡注心傾耳以俟其誅今大軍久留不進遠近失望萬一朝廷更命他將以代將軍將軍何辭以逃逗撓之罪乎孝逸乃引軍而前馬敬臣擊斬尉遲昭於都梁山十一月辛亥以左鷹揚大將軍黑齒常之爲江南道大總管討敬業韋超擁衆據都梁山諸將皆曰超憑險自固士無所施其勇騎無所展其足且窮寇死戰攻之多殺士卒不如分兵守之大軍直趨江都覆其巢穴支度使薛克揚曰超雖據險其衆非多今多留兵則前軍勢分少留兵則終爲後患不如先擊之其勢必舉舉都梁則淮陰高郵望風瓦解矣魏元忠請先擊徐敬猷諸將曰不如先攻敬業敬業敗則敬猷不戰自擒矣若擊敬猷則敬業引兵救之是腹背受敵也元忠曰不然賊之精兵盡在下阿烏合而來利在一決萬一失利大事去矣敬猷出於博徒不習軍事其衆單弱人情易搖大軍臨之駐馬可克敬業雖欲救之計程必不能及我克敬猷乘勝而進雖有韓白不能當其鋒矣今不先取弱者而遽攻其強非計也孝逸從之引兵擊超超夜遁進擊敬猷敬猷脫身走庚申敬業勒兵阻溪拒守後軍總管蘇孝祥夜將五千人以小舟渡溪先擊之兵敗孝祥死士卒赴溪溺死者過半左豹韜衛果毅成三朗爲敬業所擒唐之奇給其衆曰此李孝逸也將斬之三朗大呼曰我果毅成三朗非李將軍也官軍今大至矣爾曹破在旦夕我死妻子受榮爾死妻子籍沒爾終不及我也遂斬之孝逸等諸軍繼至戰數不利孝逸懼欲引退魏元忠與行軍管記劉知柔言於孝逸曰風順荻乾此火攻之利固請決戰敬業置陳

既久士卒多疲倦願望陳不能整孝逸進擊之因風縱火敬業大敗斬首七千級溺死者不可勝紀敬業等輕騎走入江都挈妻子奔潤州將入海奔高麗孝逸進屯江都分遣諸將追之乙丑敬業至海陵界阻風其將王那相斬敬業敬猷及駱賓王首來降餘黨唐之奇魏思溫皆捕得傳首神都揚潤楚三州平陳嶽論曰敬業苟能用魏思溫之策直指河洛專以匡復爲事縱軍敗身戮忠義在焉而妄希金陵王氣是真爲叛逆不敗何待（按下阿溪在天長西北三十里淮陰今清河縣都梁山在盱眙縣臨淮卽泗州高郵州屬揚州府海陵今泰州）

五年 太后欲發梁鳳巴蜒自雅州開山通道出擊生羌因襲吐蕃正字陳子昂上書以爲雅州邊羌自國初以來未嘗爲盜今一旦無罪戮之其怨必甚且懼誅滅必蜂起爲盜西山盜起則蜀之邊邑不得不連兵備守久不解臣愚以爲西蜀之禍自此結矣臣聞吐蕃愛蜀富饒欲盜之久矣徒以山川阻絕障隘不通勢不能動今國家乃亂邊羌開隘道使其收奔亡之種爲鄉導以攻邊是借寇兵爲賊除道舉全蜀以遺之也蜀者國家之寶庫可以兼濟中國今執事者乃圖僥倖之利以事西羌得其地不足以稼穡財不足以富國徒爲糜費無益聖德况其成敗未可知哉夫蜀之所恃者險也人之所以安者無役也今國家乃開其險役其人險開則便寇人役則傷財臣恐未見羌戎已有姦盜在其中矣且蜀人尪劣不習兵戰山川阻曠去中夏遠今無故生西羌吐蕃之患臣見其不及百年蜀爲戎矣國家近廢安北拔單于棄龜茲放疏勒天下翕然謂之盛德者蓋以陛下務在養人不在廣地也今山東饑關隴弊而徇貪夫之讎謀動甲兵興大役自古國亡家敗未嘗不由黷兵願陛下熟計之既而

役不果興（按梁今漢中府鳳今鳳縣自雅州開道出打箭爐巴塘裏塘至前藏也今西藏大道）

十三年 夏五月壬子營州契丹松漠都督李盡忠歸誠州刺史孫萬榮舉兵反攻陷營州殺都督趙文翽文翽剛愎契丹饑不加賑給視會長如奴僕故二人怨而反乙丑遣左鷹揚衛將軍曹仁師右金吾衛大將軍張元遇左威衛大將軍李多祚司農少卿麻仁節等二十八將討之盡忠尋自稱無上可汗據營州以萬榮爲前鋒略地所向皆下旬日兵至數萬進圍檀州清邊前軍副總管張九節擊卻之八月丁酉仁師元遇仁節與契丹戰於碣石谷唐兵大敗先是契丹破營州獲唐俘數百囚之地牢聞唐兵將至使守牢給之曰吾輩家屬饑寒不能自存惟俟官軍至卽降耳旣而契丹引出其俘飼以糠粥慰勞之曰吾養汝則無食殺汝又不忍今縱汝去遂釋之俘至幽州具言其狀諸軍聞之爭欲先入至黃臺谷虜又遣老弱迎降故遣老牛瘦馬於道側仁師等三軍棄步卒將騎兵先進契丹設伏橫擊之飛索以縶元遇仁節生獲之將卒死者填山谷鮮有脫者契丹得軍印詐爲牒令元遇等署之牒總管匪石宗懷昌等云官軍已破賊若至營州軍將皆斬兵不敘勳匪石等得牒晝夜兼行不遑寢食以赴之士馬疲弊契丹伏兵於中道邀之全軍皆沒九月制天下繫囚及庶士家奴驍勇者官償其直發以擊契丹右拾遺陳子昂上疏曰恩制免天下罪人及募諸色奴充兵討擊契丹此乃捷急之計非天子之兵且比來刑獄久清罪人全少奴多怯弱不慣征行縱其募集未足可用况今天下忠臣義士萬分未用其一契丹小孽假命待誅何勞免罪贖奴損國大體臣恐此策不可威示天下（營州柳州縣卽松漠府歸誠州在其境檀州

今密雲縣硤石谷黃巖谷皆在臨渝縣）

吐蕃復遣使請和親太后遣右武衛胄曹參軍郭元振往察其宜吐蕃將論欽陵請罷安西四鎮戍兵并求分十姓突厥之地元振曰四鎮十姓與吐蕃種類本殊今請罷唐兵豈非有兼并之志乎欽陵曰吐蕃苟貪土地欲爲邊患則東侵甘涼豈肯規利於萬里之外邪乃遣使者隨元振入請之朝廷疑未決元振上疏以爲欽陵求罷兵割地此乃利害之機誠不可輕舉措也今若直拒其善意則爲邊患必深四鎮之利遠甘涼之害近不可不深圖也宜以計緩之使其和望未絕則善矣彼四鎮十姓吐蕃之所甚欲也而青海吐谷渾亦國家之要地也亦報之宜曰四鎮十姓之地本無用於中國所以遣兵戍之欲以鎮撫西域分吐蕃之勢使不得併力東侵也今若果無東侵之志當歸我吐谷渾諸部及青海故地則五俟斤部亦當以歸吐蕃如此則足以塞欽陵之口而亦未足與之絕也若欽陵小有乖違則曲在彼矣且四鎮十姓欲附日久今未察其情之向背事之利害遙割而棄之恐傷諸國之心非所以御四夷也太后從之元振又上言吐蕃百姓疲於徭戍早願和親欽陵利於統兵專制獨不欲歸款若國家歲發和親使而欽陵常不從命則彼國之人怨欽陵日深望國恩日甚設欲大舉其徒固亦難矣斯亦離間之漸可使其上下猜阻禍亂內興矣太后深然之（四鎮謂龜茲今庫車于闐今和闐疏勒今喀什噶爾碎葉在今伊黎西十姓西突厥之十部所謂五咄陸五弩失畢也）

十四年 孫萬榮之破王孝傑也於柳城西北四百里依險築城留其老弱婦女所獲器仗資財使妹夫乙窵羽

守之引精兵寇幽州恐突厥默啜襲其後遣五人至黑沙語默啜曰我已破王孝傑百萬之衆唐人破膽請與可汗乘勝共取幽州三人先至默啜喜賜以緋袍二人後至默啜怒其稽緩將殺之二人曰請一言而死默啜問其故二人以契丹之情告默啜乃殺前三人而賜二人緋使爲鄉導發兵取契丹新城殺所獲涼州都督許欽明以祭天圍新城三日克之盡俘以歸使乙冤羽馳報萬榮時萬榮方與唐兵相持軍中聞之恟懼奚人叛萬榮神兵道總管楊元基擊其前奚兵擊其後獲其將何阿小萬榮軍大潰帥輕騎數千東走前軍總管張九節遣兵邀之於道萬榮窮蹙與其奴逃至潞水東息於林下嘆曰今次歸唐罪已大歸突厥亦死歸新羅亦死將安之乎奴斬其首以降梟之四方館門其餘衆及奚醫皆降於突厥（柳城西北四百里今翁牛特旂界卽所謂新城也黑沙在獨石外元中都之東潞水在順天府通州東）

以幽州都督狄仁傑爲鸞臺侍郎司刑卿杜景儉爲鳳閣侍郎並同平章事仁傑上疏以爲天生四夷皆在先王封略之外故東拒滄海西阻流沙北橫漠南阻五嶺此天所以限夷狄而隔中外也自典籍所紀聲教所及三代不能至者國家盡兼之矣詩人矜薄伐於太原美化行於江漢則三代之遠裔皆國家之域中也若乃用武方外邀功絕域竭府庫之實以爭不毛之地得其人不足增賦獲其土不可耕織苟求冠帶遠夷之稱不務固本安人之術此秦皇漢武之所行非五帝三王之事業也始皇窮兵極武務求廣地死者如麻致天下潰叛漢武征伐四夷百姓困窮盜賊蜂起末年悔悟息兵罷役故能爲天所祐近者國家頻歲出師所費滋廣西戍四鎮東戍安東

調發日加百姓虛弊今關東饑饉蜀漢逃亡江淮已南徵求不息人不復業相率爲盜本根一搖憂患不淺其所以然者皆以爭蠻貊不毛之地乖子養蒼生之道也昔漢元納賈捐之之謀而罷朱崖郡宣帝用魏相之策而棄車師之田豈不欲慕向虛名蓋憚勞人力也近貞觀中克平九姓立李思摩爲可汗使統諸部者蓋以夷狄叛則伐之降則撫之得推亡固存之義無遠戍勞人之役此近日之令典經邊之故事也竊謂宜立阿史那斛瑟羅爲可汗委之四鎮繼高氏絕國使守安東省費於遠方并甲兵於塞上使夷狄無侵侮之患則可矣何必窮其窟穴與螻蟻校長短哉但當敕邊兵謹守備遠斥候聚資糧待其自致然後擊之以逸待勞則戰士力倍以主禦客則我得其便堅壁清野則寇無所得自然二賊深入則有顛躓之慮淺入必無寇獲之益如此數年可使二虜不擊而服矣事雖不行識者是之

十五年 默啜移書數朝廷曰與我蒸穀種種之不生一也金銀器皆行濫非真物二也我與使者緋紫皆奪之三也繒帛皆疏惡四也我可汗女當嫁天子兒武氏小姓門戶不敵罔冒爲昏五也我爲此起兵欲取河北耳時諸州聞突厥入寇方秋爭發民修城衛州刺史敬暉謂僚屬曰吾聞金湯非粟不守柰何捨收穫而事城郭乎悉罷之使歸田百姓大悅九月甲戌命太子爲河北道元帥以討突厥先是募人月餘不滿千人及聞太子爲元帥應募者雲集未幾數盈五萬戊寅以狄仁傑爲河北道行軍副元帥時太子不行命仁傑知元帥事太后親送之藍田令薛訥仁貴之子也太后擢爲左威衛將軍安東道經略將行言於太后曰太子雖立外議猶疑未定苟此

命不易醜虜不足平也突厥默啜盡殺所掠趙定等州男女萬餘人自五迴道去冬十月癸卯以狄仁傑爲河北道安撫大使時北人爲突厥所驅逼者虜退懼誅住往亡匿仁傑上疏以爲朝廷議者皆罪契丹突厥所脅從之人言其迹雖不同心則無別誠以山東近緣軍機調發傷重家道悉破或至逃亡重以官典侵漁因事而起枷杖之下痛切肌膚事迫情危不循禮義愁苦之地不樂其生有利則歸且圖賒死此乃君子之愧辱小人之常行也又諸城入僞或待天兵將士求功皆云攻得臣憂濫賞亦恐非辜（胡氏曰以攻取之賞賞將士則爲濫賞以從虜之罪罪士民則爲非辜）以經與賊同是爲惡地至於汚辱妻子劫掠貨財兵士信知不仁簪笏未能以免乃是賊平之後爲惡更深且除賊務招攜秋毫不犯（胡氏曰言除賊務在招撫攜貳秋毫無所侵犯也）令之歸正卽是平人翻被破傷豈不悲痛夫人猶水也壅之則爲泉疏之則爲川通塞隨流豈有常性今負罪之伍必不在家露宿草行潛竄山澤赦之則出不赦則狂山東羣盜緣茲聚結臣以邊塵暫起不足爲憂中土不安此爲大事罪之則衆情恐懼恕之則反側自安伏願曲赦河北諸州一無所問制從之仁傑於是撫慰百姓得突厥所驅掠者悉遞還本貫散糧運以賑貧乏修郵驛以濟旋師恐諸將及使者妄求供頓乃自食疏糲禁其下無得侵擾百姓犯者必斬河北遂安（趙定皆直隸州五回道在廣昌縣）

蜀州每歲遣兵五百人戍姚州路險遠死亡者多蜀州刺史張柬之上言以爲姚州本哀牢之國荒外絕域山高水深國家開以爲州未嘗得其鹽布之稅甲兵之用而空竭府庫驅卒平人受役蠻夷肝腦塗地臣竊爲國家惜

之請廢姚州以隸舊州歲時朝覲同之蕃國瀘南諸鎮亦皆廢省於瀘北置關百姓非奉使無得交通往來疏奏不納（蜀州今崇慶州姚州今屬楚雄府哀牢今永昌府舊州今甯遠府瀘指今金沙江）

十七年 初契丹將李楷固善用縲索及騎射舞槊每陷陳如鷗入烏羣所向披靡黃鑿之戰張元遇麻仁節皆爲所縲又有駱務整者亦爲契丹將屢敗唐兵及孫萬榮死二人皆來降有司責其後至奏請族之狄仁傑曰楷固等並驍勇絕倫能盡力於所事必能盡力於我若撫之以德皆爲我用知奏請赦之所親皆止之仁傑曰苟利於國豈爲身謀太后用其言赦之又請與之官太后以楷固爲左鈐衛將軍務整爲右武威衛將軍使將兵擊契丹餘黨悉平之

十八年 以主客郎中郭元振爲涼州都督隴右諸軍大使先是涼州南北境不過四百餘里突厥吐蕃頻歲奄至城下百姓苦之元振始於南境硤口置和戎城北境磧中置白亭軍控其衝要拓州境千五百里自是寇不復至城下元振又令甘州刺史李漢通開置屯田盡水陸之利舊涼州粟麥斛至數千及漢通收率之後一縑糴數十斛積軍糧支數十年元振善於撫御在涼州五年夷夏畏慕令行禁止牛羊被野路不拾遺（白亭軍宜爲今涼州邊外沙拉泊）

十九年 春正月乙酉初設武舉（胡氏曰武舉之制有長塏馬射步射平射筒射馬槍翹關負重身材之選唐六典曰武舉以七等闕其人一曰射長塏試射長塏三十發不出第三院爲第入中院爲上入次院爲次上入外

院爲次二曰騎射發而並中爲上或不中爲次上總不中爲次三曰馬槍三板四板爲上二板爲次上一板及不中爲次四曰步射草人中者爲次上雖中而不中者爲次五曰材貌以身長六尺已上者爲次上已下爲次六曰言語有神采堪統領者爲次上無者爲次七曰舉重謂翹關率以五次上爲第皆試其高第以名聞）

二十年 始安獠歐陽倩擁衆數萬攻陷州縣朝廷思得良吏以鎮之朱敬則稱司封郎中裴懷古有文武才制以懷古爲桂州都督仍充招慰討擊使懷古纔及嶺上飛書示以禍福倩等迎降且言爲吏所侵逼故舉兵自救耳懷古輕騎赴之左右曰夷獠無信不可忽也懷古曰吾仗忠信可通神明而况人乎遂詣其營賊衆大喜悉歸所掠貨財諸洞酋長素持兩端者皆來款附嶺外悉定（始安今桂林府）

景龍元年 春正月庚戌制以突厥默啜寇邊命內外官各進平突厥之策右補闕盧備上疏以爲卻覈說禮樂敦詩書爲晉元師杜預射不穿札建平吳之勳是知中權制謀不取一夫之勇如沙吒忠義驍將之材本不足以當大任又鳴沙之役主將先逃（胡氏曰鳴沙之敗亦指言沙吒忠義）宜正邦憲賞罰旣明敵無不服又邊州刺史宜精擇其人使之蒐卒乘積資糴來則禦之去則備之去歲四方旱災未易興師當理內以及外綏近以來遠俟倉廩實士卒練然後大舉以討之上善之

二年 三月朔方道大總管張仁愿築三受降城於河上初朔方軍與突厥以河爲境河北有拂雲祠突厥將入

寇必先詣祠祈禱牧馬料兵而後度河時默啜悉衆西擊突騎施仁愿請乘虛奪取漠南地於河北築三受降城首尾相應以絕其南寇之路太子少師唐休瓌以爲兩漢以來皆北阻大河今築城寇境恐勞人費功終爲虜有仁愿固請不已上竟從之仁愿表留歲滿鎮兵以助其功咸陽兵二百餘人逃歸仁愿悉擒之斬於城下軍中股慄六旬而成以拂雲祠爲中城距東西兩城各四百餘里皆據津要拓地三百餘里於牛頭朝那山北置烽候千八百所以左玉鈐衛將軍論弓仁爲朔方軍前鋒遊奕使戍諸真水爲邏衛（胡氏曰遊奕使領遊兵以巡奕者也杜佑曰遊奕於軍中選驍勇諳山川泉井者充日夕邏候於亭障之外捉生問事其副使子將並久軍行人取善騎射人）自是突厥不敢度山敗牧朔方無復寇掠滅鎮兵數萬人仁愿建三城不置塞門及備守之具（胡氏曰塞門卽古之懸門也或曰門外築垣以遮塞城門今壘城是也塞城之外又有八卦牆萬人敵皆以遮塞城門范祖禹曰張仁愿築三受降城不置塞門曲敵戰格）或問之仁愿曰兵貴進取不利退守寇至當併力出戰回首望城者猶應斬之安用守備生其退惡之心也其後常元楷爲朔方軍總管始築塞門人是以重仁愿而輕元楷（東受降城漢雲中地今托克托城中受降城卽拂雲堆秦九原縣地今蘇爾哲河濱西受降城漢臨河縣地唐豐州河北今鄂爾多斯右翼後旗北河北岸牛頭朝那山在托克托東北諸真水今茂明安旂塔爾渾河）突騎施酋長娑葛自立爲可汗殺唐使者御史中丞馮嘉賓遣其弟遮努等帥衆犯塞初娑葛旣代烏質勒統衆父時故將闕啜忠節不服數相攻擊忠節衆弱不能支金山道行軍總管郭元振奏追忠節入朝宿衛忠節行至

播仙城經略使右威衛將軍周以悌說之曰方今宰相宗楚客紀處訥用事不若厚賂二公請留不行發安西兵及引吐蕃以擊娑葛求阿史那獻爲可汗以招十姓使郭虔瓘發拔汗那兵以自助既不失部落又得報仇比於入朝豈可同日語哉忠節然其言遣問使賂楚客處訥請加以悌之策元振聞其謀上疏以爲往歲吐蕃所以犯邊正爲求十姓四鎮之地不獲故耳比者息兵請和不能慕悅中國之禮義也直以國多內難人畜疫癘恐中國乘其弊故且屈志求自昵使其國小安豈能忘取十姓四鎮之地哉今忠節不論國家大計直欲爲吐蕃鄉導恐四鎮危機將從此始頃緣默啜遼陵所應者多兼四鎮兵疲弊勢未能爲忠節經略非憐突騎施也忠節不體國家中外之意而更求吐蕃吐蕃得志則忠節在其掌握豈得復事唐也往年吐蕃無恩於中國猶欲求十姓四鎮之地今若破娑葛有功請分子闕疏勒不知以何理抑之又其所部諸蠻及婆羅門等方不服若借唐兵助討之亦不知以何詞拒之是以古之智者皆不願受夷狄之惠蓋豫憂其求請無厭終爲後患故也又彼請阿史那獻者豈非以獻爲可汗子孫欲依之以招懷十姓乎此屬非有過人之才恩威不足以動衆雖復可汗舊種衆心終不親附況獻又疏遠於其父兄乎若使忠節兵力自能誘脅十姓則不必求立可汗子孫也又欲令郭虔瓘入拔汗那發其兵虔瓘前此已嘗與忠節擅入拔汗那發兵不能得其片甲匹馬而拔汗那不勝侵擾南引吐蕃奉倭子還侵四鎮今北有娑葛急則與之并力內則諸胡堅壁拒守外則突厥伺隙邀遮臣料虔瓘等此行必不能如往年之得志內外受敵自陷危亡徒與虜結隙令四鎮不安以臣愚揣之實爲非計楚客等不從於是娑葛發五

千騎出安西五千騎出撥換五千騎出焉耆五千騎出疏勒入寇忠節逆嘉賓於計舒河口娑葛遣兵襲之生擒忠節殺嘉賓擒呂守素於僻城縛於驛柱渴而殺之（播仙城疑在大珠勒都斯河南岸安西時治龜茲今庫車撥換卽撥汗今安濟彥東之孟科爾焉耆時治碎葉今伊犁西疏勒今喀什噶爾計舒河疑卽大小珠勒都斯河也）

牛師獎與突騎施娑葛戰於火燒城師獎兵敗沒娑葛遂陷安西斷四鎮路遣使上表求宗楚客頭楚客又奏以周以悌代郭元振統衆徵元振入朝以阿史那獻爲十姓可汗置軍焉耆以討娑葛娑葛遣元振書稱我與唐初無惡但讐闕啜宗尙書受闕啜金欲枉破奴部落馮中丞牛都護相繼而來奴豈得坐而待死又聞史獻欲來徒擾軍州恐未有寧日乞大使商量處置元振奏娑葛書楚客怒奏言元振有異圖召將罪之元振使其子鴻開道具奏其狀乞留定西土不敢歸周以悌竟坐流白州復以元振代以悌赦娑葛罪册爲十四姓可汗（火燒城疑今庫車西之賽里木城白州今鬱林州之博白縣）

睿宗太極元年 幽州大都督薛訥鎮幽州二十餘年吏民安之未嘗舉兵出塞虜亦不敢犯與燕州刺史李謹有隙瑾毀之於劉幽求幽求薦左羽林將軍孫佺代之三月丁丑以佺爲幽州大都督徙訥爲并州長史六月庚申佺與奚酋李大酺戰於冷陁全軍覆沒是時佺帥左驍衛將軍李楷洛左威衛將軍周以悌發兵二萬騎八千分爲三軍以襲奚契丹將軍烏可利諫曰道險而天熱懸軍遠襲往必敗佺曰薛訥在邊積年竟不能爲國家復

營州今乘其無備往必有功使楷洛將騎四千前驅遇奚騎八千楷洛戰不利佺怯懦不敢救引兵欲還虜乘之唐兵大敗佺阻山爲方陳以自固大酺使謂佺曰朝廷旣與我和親今大軍何爲而來佺曰吾奉敕來招慰耳大酺曰請將軍南還勿相驚擾將士懼無復部伍虜追擊之士卒皆潰佺以悌爲所擒獻於突厥默啜皆殺之楷洛可利脫歸（按燕州時寄治順天城內冷陁山在今柰曼旗西救漢旗東）

元宗開元元年 晉陵尉楊相如上疏言時政其略曰煬帝自恃其彊不憂時政雖制敕交行而聲實舛謬言同堯舜迹如桀紂舉天下之大一擲而棄之又曰隋氏縱欲而亡太宗抑欲而昌願陛下詳擇之又曰人主莫不好忠正而惡佞邪然忠正者常疏佞邪者常親以至於覆國危身而不寤者何哉誠由忠正者多忤意佞邪者多順指積忤生憎積順生愛此親疏之所以分也明主則不然愛其忤以收忠賢惡其順以去佞邪則太宗太平之業將何遠哉又曰夫法貴簡而能禁罰貴輕而必行陛下方興崇至德大布新政請一切除去碎密不察小過小過不察則無煩苛大罪不漏則止姦慝使簡而難犯寬而能制則善矣上覽而善之

二時 薛訥與左監門衛將軍杜賓客定州刺史崔宣道等將兵六萬出檀州擊契丹賓客以爲士卒盛夏負戈甲齎資糧深入寇境難以成功訥曰盛夏草肥羔犢孳息因糧於敵正得天時一舉滅虜不可失也行至灤水山峽中契丹伏兵遮其前後從山上擊之唐兵大敗死者什八九訥與數十騎突圍得免虜中嗤之謂之薛婆救免訥死削除其官爵（檀州今密雲灤縣水山峽在灤平縣東北）冬十月吐蕃復寇渭源薛訥與戰於武街大破之

時太僕少卿隴右羣牧使王濼帥所部二千人與訥會擊吐蕃至達延將吐蕃兵十萬屯大來谷峻選勇士七百衣胡服夜襲之多置鼓角於其後五里前軍遇敵大呼後人鳴鼓角以應之虜以爲大軍至驚懼自相殺傷死者萬計訥時在武街去大來谷二十里虜軍寨其中開曉復夜出襲之虜大潰始得與訥軍合追奔至洮水復戰於長城堡又敗之前後殺獲數萬人豐安軍使王海賓戰死姚崇盧懷慎等奏頃者吐蕃以河爲境神龍中尙公主遂踰河築城置獨山九曲兩軍（胡氏曰卽楊矩所與九曲之地也）去積石三百里又於河上造橋今吐蕃旣叛宜毀橋拔城從之以王海賓之子忠嗣爲朝散大夫尙整奉御養之宮中（武街在今狄道州東大來谷在其東北長城堡秦築長城所始處也在狄道州西北獨山在貴德廳南九曲之東）

三年 突厥十姓降者前後萬餘帳高麗莫離支文簡十姓之塔也二月與陝跌都督思泰等亦自突厥帥衆來降制皆以河南地處之三月胡祿屋酋長支旬忌等入朝上以十姓降者浸多夏四月以右羽林大將軍薛訥爲涼州鎮大總管赤水等軍並受節度居涼州左衛大將軍郭虔瓘爲朔州鎮大總管和戎等軍並受節度居并州勒兵以備默啜默啜發兵擊葛邏祿胡祿屋鼠尼施等屢破之敕北庭都護湯嘉惠左散騎常侍解琬等發兵救之五月壬辰敕嘉惠等與葛邏祿胡祿屋鼠尼施及定邊道大總管阿史那獻互相應援

十一月以左羽林大將軍郭虔瓘兼安西大都護四鎮經略大使虔瓘請自募關中兵萬人詣安西討擊皆給遞馱及熟食（胡氏曰遞馱者泐路遞發馬牛驢馱運兵器什物也唐六典曰驢馱曰馱每馱一百斤其脚直一百

里一百文山阪處一百二十文驢少處不得過一百五十文平易處不得下八十文其有人負處兩人分一馱又給熟食欲其速達安西）敕許之將作大匠韋湊上疏以爲今西域服從雖或時有小盜竊舊鎮兵足以制之關中常宜充實以彌幹弱枝自頃西北二虜寇邊凡在丁壯征行略盡豈宜更募驍勇遠資荒服又一萬征人行六千餘里咸給遞馱熟食道次州縣將何以供奉隴之西戶口漸少涼州已往沙磧悠悠遣彼居人如何取濟縱令必克其獲幾何儻稽天誅無乃甚損請計所得校其多少則知利害昔唐堯之代兼愛夷夏中外又安漢武窮兵遠征雖多克獲而中國疲耗今論帝王之盛德者皆歸唐堯不歸漢武况邀功不成者復何足比議乎時姚崇亦以虔瓘之策爲不然旣而虔瓘卒無功

初監察御史張孝嵩奉使廓州還陳積西利害請往察其形勢上許之聽以便宜從事拔汗那者古烏孫也內附歲久吐菴與大食共立阿了達爲王發兵攻之拔汗那王兵敗奔安西求救孝嵩謂都護呂休璟曰不救則無以號令西域遂帥旁側戎落兵萬餘人出龜茲西數千里下數百城長驅而進是月攻阿了達於連城孝嵩自擐甲督士卒急攻自己至西屠其三城俘斬千餘級阿了達與數騎逃入山谷孝嵩傳檄諸國威振西域大食康居大宛罽賓等八國皆遣使請降（按廓州在西甯府西南拔汗那卽撥汗今安濟彥東之孟科爾大食今科克倫康居今薩馬爾罕河東之塔什干大宛今哈薩克罽賓今溫都斯坦）

四年 拔曳固斬突厥可汗默啜首來獻時默啜北擊拔曳固大破之於獨樂水恃勝輕歸不復設備遇拔曳固

逆卒頡質略自柳林突出斬之時大武軍子將郝靈荃奉使在突厥頡質略以其首歸之與偕詣闕懸其首於廣街拔曳固回紇同羅霫僕固五部皆來降置於大武軍北（獨樂水未詳疑在克西克騰旗東饒樂水之南）

突厥默啜既死奚契丹拔曳固等諸部皆內附突騎施蘇祿復自立爲可汗突厥部落多離散毗伽可汗患之乃召默啜時牙官噉欲谷以爲謀主噉欲谷年七十餘多智略國人信服之突厥降戶處河曲者聞毗伽立多復叛歸之并州長史王陵上言此屬徒以其國喪亂故相帥來降若彼安甯必復叛去今置之河曲此屬桀黠實難制御往往不受軍州約束與兵剽掠聞其逃者已多與虜聲問往來通傳委曲乃是畜養此屬使爲間諜日月滋久姦詐逾深窺伺邊隙將成大患虜騎南牧必爲內應來逼軍州表裏受敵雖有韓彭不能取勝矣願以秋冬之交大集兵衆諭以利害給其資糧徙之內地二十年外漸變舊俗皆成勁兵雖一時暫勞永久安靖比者守邊將吏及出境使人多爲諛辭皆非事實或云北虜破滅或云降戶妥帖皆欲自銜其功非能盡忠徇國願察斯利口勿忘遠慮議者必曰國家薨時已嘗寘降戶於河曲皆獲安寧（胡氏曰謂貞觀時也）今何所疑此則事同時異不可不察薨者頡利既亡降者無復異心故得久安無變今北虜尙存（胡氏曰謂默啜雖死毗伽又立也）此屬或畏其威或懷其惠或其親屬豈樂南來較之彼時固不侔矣（胡氏曰彼時謂貞觀之時）以臣愚慮徙之內地上也多屯士馬大爲之備華夷相參人勞費廣次也正如今日下也願審茲三策擇利而行縱使因徙逃亡得者皆爲唐有若留至河冰恐必有變疏奏未報降戶跌跌思泰阿悉爛等叛冬十月甲辰命朔方大總管薛訥發兵

追討之王陵引并州兵西濟河晝夜兼行追擊叛者破之斬獲三千級先是單于副都護張知運悉收降戶兵仗令度河而南降戶怒御史中丞姜晦爲巡邊使降戶訴無弓矢不得射獵晦悉還之降戶得之遂叛張知運不設備與之戰於青剛嶺爲虜所擒欲送突厥至綏州境將軍郭知運以朔方兵邀擊之大破其衆於黑山呼延谷虜釋知運而去上以知運喪師斬之以徇毗伽可汗旣得思泰等欲南入爲寇噉欲谷曰唐主英武民和年豐未有閒隙不可動也我衆新集力尙疲羸且當息養數年始可觀變而舉毗伽又欲築城并立寺觀噉欲谷曰不可突厥人徒稀少不及唐家百分之一所以能與爲敵者正以逐水草居處無常射獵爲業人皆習武彊則進兵鈔掠弱則竄伏山林唐兵雖多無所施用若築城而居變更舊俗一朝失利必爲所滅釋老之法教人仁弱非用武爭勝之術不可崇也毗伽乃止（按河曲今歸化城西南也青剛嶺在環縣東北黑山呼延谷在河外不在綏州邀宜作追唐人詩萬里黃河繞黑山者此也噉欲谷之論極精城多便於承平不利行師）

以刑部尙書宋璟守吏部尙書兼黃門監紫微侍郎蘇頌同平章事璟爲相務在擇人隨材授任使百官各稱其職刑賞無私敢犯顏直諫上甚敬憚之雖不合意亦曲從之突厥默啜自則天世爲中國患朝廷旰食傾天下之力不能克郝靈荃得其首自謂不世之功璟以天子好武功恐好事者競生心微倖痛抑其賞逾年始授郎將靈荃慟哭而死（胡氏曰郝靈荃因人以爲功授以郎將非抑之也）姚宋相繼爲相崇善應變成務璟善守法持正二人志操不同然協心輔佐使賦役寬平刑罰清省百姓富庶唐世賢相前稱房杜後稱姚宋他人莫得比焉紫

徵舍人高仲舒博通典籍濟泮練習時務姚宋每坐二人以質所疑既而歎曰欲知古問高君欲知今問齊君可以無闕政矣

五年 奚契丹既內附貝州刺史宋慶禮建議請復營州三月庚戌制復置營州都督於柳城兼平盧軍使管內州縣鎮戍皆如其舊以太子詹事姜師度爲營田支度使與慶禮等築之三旬而畢慶禮清勤嚴肅開屯田八十餘所招安流散數年之間倉廩充實市里浸繁（營州柳城縣在土默特右翼旗）

六年 二月戊子移蔚州橫野軍於山北屯兵三萬爲九姓之援以拔曳固都督頡質略同羅都督毗伽末啜營都督比言回紇都督夷健頡利發僕固都督曳勒歌等各出騎兵爲前後左右軍討擊大使皆受天兵軍節度有所討捕量宜追集無事各歸部落營生仍常加存撫天兵軍使張嘉貞入朝有告其在軍奢僭及賊賄者按驗無狀上欲反坐告者嘉貞奏曰今若罪之恐塞言路使天下之事無由上達願特赦之其人遂得減死上由是以嘉貞爲忠有大用之意（按此時蔚州仍在靈邱縣天兵軍在太原府城中）

八年 突厥降戶僕固都督勺磨及跌跌部落散居受降城側朔方大使王陵言其陰引突厥謀陷軍城密奏請誅之誘勺磨等宴於受降城伏兵悉殺之河曲降戶殆盡拔曳固同羅諸部在大同橫野軍之側者聞之皆懼擢并州長史天兵節度大使張說引二十騎持節卽其部落慰撫之因宿其帳下副使李憲以虜情難信馳書止之說復書曰吾肉非黃羊必不畏食血非野馬必不畏刺士見危致命此吾效死之秋也拔曳固同羅由是遂安

突厥寇甘涼等州敗河西節度使楊敬述掠契苾部落而去先是朔方大總管王曠奏請西發拔悉密東發奚契丹期以今秋掩毗伽牙帳於稽落水上毗伽聞之大懼噉欲谷曰不足畏也拔悉密在北庭與奚契丹相去絕遠勢不相及朔方兵計亦不能來此若必能來俟其垂至徙牙帳北行三日唐兵食盡自去矣且拔悉密輕而好利得王曠之約必喜而先至曠與張嘉貞不相悅奏請多不相應必不敢出兵（胡氏曰史言在廷在邊之謀不叶爲夷狄所窺）曠兵不出拔悉密獨至擊而取之勢甚易耳旣而拔悉密果發兵逼突厥牙帳而朔方及奚契丹兵不至拔悉密懼引退毗伽欲擊之噉欲谷曰此屬去家千里將死戰未可擊也不如以兵蹙之去北庭二百里噉欲谷分兵閒道先圍北庭因縱兵擊拔悉密大破之拔悉密衆潰走趨北庭不得入盡爲突厥所虜噉欲谷引兵還出赤亭掠涼州羊馬楊敬述遣裨將盧公利判官元澄將兵邀擊之噉欲谷謂其衆曰吾乘勝而來敬述出兵破之必矣公利等至刪丹與噉欲谷遇唐兵大敗公利澄脫身走毗伽由是大振盡有默啜之地（北庭唐庭州今秦木薩赤水軍在涼州西北刪丹縣在甘州府東百二十里稽落水宜在河套西北今西拉木倫河也）

九年 蘭池州胡康待賓誘諸降戶同反夏四月攻陷六胡州有衆七萬進逼夏州命朔方大總管王曠隴右節度使郭知運共討之秋七月己酉王曠大破康待賓生擒之殺叛胡萬五千人辛酉集四夷酋長屢斬康待賓於西市先是叛胡潛與黨項通謀攻銀城連谷據其倉庾張說將步騎萬人出合河關掩擊大破之追至駱駝峽黨項乃更與胡戰胡衆潰西走入鐵建山說安集黨項使復其居業討擊使阿史那獻以黨項翻覆請并誅之說曰

王者之師當伐叛柔服豈可殺已降耶因奏置麟州以鎮撫黨項餘衆（按六胡州在鄂爾多斯右翼前旗之北夏州在榆林府城西銀城在神木縣南四十里連城縣在縣北七十里合河關在縣東麟州卽神木縣駱駝環鐵建山皆在其境）

十年先是緣邊戍兵常六十餘萬說以時無疆寇奏罷二十餘萬使還農上以爲疑說曰臣久在疆場具知其情將帥苟以自衛及役使營私而已若禦敵制勝不必多擁擁冗卒以妨農務陛下若以爲疑臣請以闔門百口保之上乃從之初諸衛府兵自成丁從軍六十而免其家又不免雜徭浸以貧弱逃亡略盡百姓苦之張說建諭請召募壯士充宿衛不問色役優爲之制逋逃者必爭出應募上從之旬日得精兵十三萬分隸諸衛更番上下兵農之分從此始矣（胡氏曰史言唐養兵之弊始於張說）

十二年初監察御史杜暹因按事至突騎施突騎施饋之金暹固辭左右曰君寄身異域不宜逆其情乃受之埋於幕下出境移牒令取之虜大驚度磧追之不及及安西都護闕或薦暹往使安西人服其清慎時暹自給事中居母憂春三月起爲安西副大都護磧西節度等使

以宇文融爲御史中丞融乘驛周流天下事無大小諸州先牒上勸農使後申中書省可亦待融指攜然後處決時上將大攘四夷急於用度州縣畏融多張虛數凡得客戶八十餘萬田亦稱是歲終增緡錢數百萬悉進入宮由是有寵議者多言煩擾不利百姓上亦令集百寮於尙書省議之公卿以下畏融恩勢不敢立異惟戶部侍郎

楊瑒獨抗議以爲括客免稅不利居人徵籍外田稅使百姓困弊所得不補所失未幾瑒出爲華州刺史

十四年 黑水靺鞨遣使入見上以其國爲黑水州仍爲置長史以鎮之渤海靺鞨王武藝遣其母弟門藝與其舅任雅將兵擊黑水門藝嘗爲質子於唐諫曰黑水請吏於唐而我擊之是叛唐也唐大國也昔高麗全盛之時強兵三十餘萬不遵唐命掃地無遺况我兵不及高麗什之一二一旦與唐爲怨此亡國之勢也武藝不從強遣之門藝棄衆開道來奔制以爲左驍衛將軍武藝遣使上表罪狀門藝請殺之上密遣門藝詣安西留其使者別遣報云已流門藝於嶺南武藝知之上表稱大國當示人以信豈得爲此欺誑固請殺門藝上以鴻臚少卿李道邃源復不能督察官屬致有泄漏皆坐左遷暫遣門藝詣嶺南以報之司馬光曰王者所以服四夷威信而已門藝以忠獲罪自歸天子天子當察其枉直賞門藝而罰武藝爲政之體也縱不能討猶當正以門藝之無罪告之今明皇威不能服武藝恩不能庇門藝顧效小人爲欺誑之語以取困於小國乃罪鴻臚之漏泄不亦可羞哉（黑水靺鞨今甯古塔北渤海靺鞨今吉林）

十五年 正月辛丑涼州都督王君奭破吐蕃於青海之西初吐蕃自恃其強致書用敵國禮辭指悖慢上意常怒之返自東封張說言於上曰吐蕃無禮誠宜誅夷但連兵十餘年甘涼河鄯不勝其弊雖師屢捷所得不償所亡聞其悔過求和願聽其款服以紓邊人上曰俟吾與王君奭議之說退謂源乾曜曰君奭勇而無謀常思僥幸若二國和親何以爲功吾言必不用矣及君奭入朝果請深入討之去冬吐蕃大將悉諾邏寇大斗谷進攻甘州

焚掠而去君奭度其兵疲勒兵蹙其後會大雪虜凍死者甚衆自積石軍西歸君奭先遣人開道入虜境燒道旁草悉諾邏至大非川欲休士馬而野草皆盡馬死過半君奭與秦州都督張景順追之及於青海之西乘冰而度悉諾邏已去破其後軍獲其輜重羊馬萬計而還上由是益事邊功（大斗谷在西甯縣積石軍在西甯南大非川在碾伯縣甘州在西甯西北青海在其西南）

九月吐蕃大將悉諾邏恭祿及罽龍莽布支攻陷瓜州執刺史田元獻及河西節度使王君奭之父進攻玉門軍縱所虜僧使歸涼州謂君奭曰將軍當以忠勇許國何不一戰君奭登城西望而泣竟不敢出兵莽布支別攻常樂縣縣令賈師順帥衆拒守及瓜州陷悉諾邏悉兵會攻之旬餘日吐蕃力盡不能克使人說降之不從吐蕃曰明府既不降宜斂城中財和贈吾當退師順請脫士卒悉諾邏知無財乃引去毀瓜州城師順遽開門收器械修守備虜果復遣精騎還視城中知有備乃去（胡氏曰田元獻不能守瓜州而賈師順能守常樂固圍固存乎其人也按瓜州在今安西州玉門縣在其西百五十里長樂在燉煌東南三危山東）

以朔方節度使齊嵩爲河西節度等詔大使時王君奭新敗河隴震駭嵩引刑部員外郎裴寬爲判官與君奭判官牛仙客俱掌軍政人心寢安嵩又奏以建康軍使河北張守珪爲瓜州刺史帥餘衆築故城板幹裁立吐蕃狡至城中相顧失色莫有異志守珪曰彼衆我寡又瘡痍之餘不可以矢刃相持當以奇計取勝乃於城上置酒作樂虜疑其有備不敢攻而退守珪縱兵擊之虜敗走守珪乃修復城市收合流散皆復舊業朝廷嘉其功以瓜州

爲都督府以守珪爲都督悉諾邏威名甚盛嵩縱反開於吐蕃云與中國通謀贊普召而誅之吐蕃由是少衰
(建康軍在甘州府西北百九十里)

十六年 秋七月吐蕃大將悉末朗寇瓜州都督張守珪擊走之乙巳河西節度使蕭嵩隴右節度使張忠亮大破吐蕃於渴波谷忠亮追之拔其大莫門城擒獲甚衆焚其駱駝橋而還八月辛卯左金吾將軍杜賓客破吐蕃於祁連城下時吐蕃復入寇嵩遣賓客將強弩四千擊之戰自辰至暮吐蕃大潰獲其大將一人虜散走投山哭聲四合(渴波谷胡氏曰在青海西大莫門在九曲則渴波谷在和碩特北前旂大莫門在察罕諾們罕喇麻地駱駝橋河橋也祁連城在甘州南)

十七年 春三月瓜州都督張守珪沙州刺史賈師順擊吐蕃大同軍大破之甲寅朔方節度使信安王禕攻吐蕃石堡城拔之初吐蕃陷石堡城留兵據之侵擾河右上命禕與河西隴右同議攻取諸將咸以爲石堡據險而道遠攻之不克將無以自還且宜按兵觀釁禕不聽引兵深入急攻拔之乃分兵據守要害令虜不得前自是河隴諸軍游奕拓境千餘里上聞大悅更命石堡城曰振武軍(沙州在瓜州西南二百六十里今嘉峪關外安西州則瓜州燉煌縣則沙州也石堡城在巴燕戎格廳)

十八年 以單于大都護忠王浚領河北道行軍元帥以御史大夫李朝隱京兆尹裴仲先副之帥十八總管以討奚契丹命浚與百官相見於光順門張說退謂學士孫逖韋述曰吾嘗觀太宗畫像雅類忠王此社稷之福也

可突干寇平盧先鋒使烏承晁破之於捺祿山（捺祿山在營州今土默特右翼旂界）

吐蕃兵數敗而懼乃求和親忠王友皇甫惟明因奏事從容言和親之利上曰贊普嘗遣吾書悖慢此何可捨對曰贊普當開元之初年尙幼穉安能爲此書殆邊將詐爲之欲以激怒陛下耳夫邊境有事則將吏得以因緣盜匿官物妄述功狀以取勳爵此皆姦人之利非國家之福也兵連不解日費千金河西隴右由茲困弊陛下誠命一使往視公主因與贊普面相約結使之稽顙稱臣永息邊患豈非御夷狄之長策乎上悅命惟明與內侍張元方便於吐蕃贊普大喜悉出貞觀以來所得敕書以示惟明遣其大臣論名悉獵隨惟明入朝自是吐蕃復款附二十年 信安王禕帥裴耀卿及幽州節度使趙含章分道擊契丹含章與虜遇虜望風遁去平盧先鋒將烏承晁言於含章曰二虜劇賊也前日遁去非畏我乃誘我也宜按兵以觀其變含章不從與虜戰於白山果大敗承晁別引兵出其右擊虜破之禕等大破奚契丹俘斬甚衆可突干帥麾下遠遁餘黨潛竄山谷夷酋李詩瑣高帥五千餘帳來降禕引兵還上命裴耀卿齎絹二十萬匹分賜立功奚官耀卿謂其徒曰戎狄貪婪今齎重貨深入其境不可不備乃命先期而往分道並進一日給之俱畢突厥室韋果發兵邀隘道欲掠之比至耀卿已還（白山在錦州府邊門外）

二十一年 關中久雨穀貴上將幸東都召京兆尹裴耀卿謀之對曰關中帝業所興當百代不易但以地狹穀少故乘輿時幸東都以寬之臣聞貞觀永徽之際祿廩不多歲漕關東一二十萬石足以周贍乘輿得以安居今

用度浸廣運數倍於前猶不能給故使陛下數冒寒暑以恤西人今若使司農租米悉輸東都自都轉漕稍實關中苟關中有數年之儲則不憂水旱矣且吳人不習河漕所在停留日月既久遂生隱盜臣請於河口置倉使吳船至彼卽輸米而去官自雇載分入河洛又於三門東西各置一倉至者儲納水險則止水通則下或開山路車運而過則無復留滯省費鉅萬矣河渭之濱皆有漢隋舊倉葺之非難也上深然其言（軍餉尤以糧運爲要）

二十二年 時可突干連年爲邊患趙含章薛楚玉皆不能討幽州節度使張守珪到官屢擊破之可突干困迫遣使詐降守珪使管記王悔就撫之悔至其牙帳察契丹上下殊無降意但稍徙營帳近西北密遣人引突厥謀殺悔以叛悔知之牙官李過折與可突干分典兵馬爭權不叶悔說過折使圖之過折夜勒兵斬契丹王屈烈及可突干盡誅其黨帥餘衆來降守珪出師紫蒙州大閱以鎮撫之梟屈烈可突干之首於天津之南（按紫蒙州卽老哈河在翁牛特旂東）

二十四年 張守珪使平盧討擊使左驍衛將軍安祿山討奚契丹叛者祿山恃勇輕進爲虜所敗夏四月辛亥守珪奏請斬之祿山臨刑呼曰大夫不欲滅奚契丹邪柰何殺祿山守珪亦惜其驍勇乃更執送京師張九齡批曰昔穰苴誅莊賈孫武斬宮嬪守珪軍令若行祿山不宜免死上惜其才敕令免官以白衣將領九齡固爭曰祿山失律喪師於法不可不誅且臣觀其貌有反相不殺必爲後患上曰卿勿以王夷甫識石勒枉害忠良竟赦之又有史宰干者嘗負官債亡入奚中爲奚游奕所得欲殺之宰干給曰我唐之和親使也汝殺我禍且及汝國游

奕信之送詣牙帳，羣干見奚王長揖不拜，奚王雖怒而畏唐，不敢殺，以客禮館之。使百人隨羣干入朝，羣干謂奚王曰：「王遣人雖多，觀其才皆不足以見天子。聞王有良將，瑣高者何不使之入朝？」奚王卽命瑣高與牙下三百人隨羣干入朝。羣干將至平盧，先使人謂軍使裴休子曰：「奚使瑣高與精銳俱來，聲云入朝，實欲襲軍城，宜謹爲之備。先事圖之，休子乃具軍容出迎，至館悉阮殺其從兵，執瑣高送幽州。張守珪以羣干爲有功，奏爲果毅，累遷將軍。後入奏事，上與語悅之，賜名思明。」

二十五年，河西節度使崔希逸襲吐蕃破之於青海西。初，希逸遣使謂吐蕃乞力徐曰：「兩國通好，今爲一家，何必更置兵守捉，妨人耕牧，請皆罷之。」乞力徐曰：「常侍忠厚言，必不欺。然朝廷未必重以邊事，相委萬一，有姦人交鬪，其閒掩吾不備，悔之何及？」希逸固請，乃刑白狗爲盟，各去守備。於是吐蕃畜牧被野，時吐蕃西擊勃律，勃律來告急，上命吐蕃罷兵，吐蕃不奉詔，遂破勃律。上甚怒，會希逸僱人孫誨入奏事，自欲求功，奏稱吐蕃無備，請掩擊，必大獲。上命內給事趙惠琮與誨偕往，審察事宜。惠琮等至，則矯詔令希逸襲之。希逸不得已，發兵自涼州南入吐蕃二千餘里，至青海西，與吐蕃戰，大破之，斬首二千餘級。乞力徐脫身走，惠琮誨皆受厚賞。自是吐蕃復絕朝貢（按此見唐之無信也，勃律今布魯特）。

先是西北邊數十州多宿重兵，地租營田皆不能贍，始用和籩之法。有彭果者，因牛仙客獻策，請行籩法於關中。九月，敕以歲稔穀賤，傷農命增時價，什二三。和籩東西畿粟各數百萬斛，停今年江淮所運，租自是關中畜積羨。

溢車駕不復幸東都矣癸巳敕河南北租應輸含嘉太原倉者（胡氏曰據李泌傳太原倉在陝州西）皆留輸本州

二十六年 杜希望將鄆州之衆奪吐蕃河橋築鹽泉城於河左吐蕃發兵三萬逆戰希望衆少不敵將卒皆懼左威衛郎將王忠嗣帥所部先犯其陳所向辟易殺數百人虜陳亂希望縱兵乘之虜遂大敗置鎮西軍於鹽泉忠嗣以功遷左金吾將軍（胡氏曰鎮西軍在河州西百八十里）

册南詔蒙歸義爲雲南王歸義之先本哀牢夷地居姚州之西東南接交趾西北接吐蕃蠻語謂王曰詔先有六詔曰蒙舍曰蒙越曰越析曰浪穹曰樣備曰越澹兵力相埒莫能相壹歷代因之以分其勢蒙舍最在南故謂之南詔皮邏閣浸強大而五詔微弱會有破泐河蠻之功乃賂王昱求合六詔爲一昱爲之奏請朝廷許之仍賜名歸義於是以兵威脅服羣蠻不從者滅之遂擊破吐蕃徙居大和城其後卒爲邊患（按蒙舍今蒙化廳蒙越今甯遠府越析今麗江府浪穹今浪穹縣樣備今鄧州越澹在今浪穹縣東泐河卽今西洱河也大和城卽今大理府城六詔之名各書不同而地不異）

二十八年 上嘉蓋嘉運之功以爲河西隴右節度使使之經略吐蕃嘉運恃恩流連不時發左丞相裴耀卿上疏以爲臣近與嘉運同班觀其舉措誠勇烈有餘然言氣矜誇恐難成事昔莫敖狃於蒲騷之役卒喪楚師今嘉運有驕敵之色臣竊憂之况防秋非遠未言發日若臨事始去則士卒尙未相識何以制敵且將軍受命鑿凶門

而出今乃酣飲朝夕殆非憂國愛人之心若不可改易宜速遣進途仍乞聖恩嚴加訓勸上乃趣嘉運行已而嘉運竟無功（胡氏曰蓋嘉運器小易盈志氣惰矣安能有功）

讀史兵略卷三十二

益陽胡林翼纂

通鑑

天寶四載 回紇懷仁可汗擊突厥白眉可汗殺之傳首京師突厥毗伽可敦帥衆來降於是北邊晏然烽燧無警矣回紇斥地愈廣東際室韋西抵金山南跨大漠盡有突厥故地（胡氏曰史言回紇至此疆盛）懷仁卒子磨延駿立號葛勒可汗二月己酉以朔方節度使王忠嗣兼河東節度使忠嗣少以勇敢自負及鎮方面專以持重安邊爲務常曰太平之將但當撫循訓練士卒而已不可疲中國之力以邀功名有漆弓百五十斤常儲之囊中以示不用軍中日夜思戰忠嗣多遺謀人伺其閒隙見可勝然後興師故出必有功旣兼兩道節制自朔方至雲中邊陲數千里要害之地悉列置城堡斥地各數百里邊人以爲自張仁奭之後將帥皆不及（按室韋今之黑龍江也金山今阿爾泰山也蓋盡有今外藩蒙古車臣等四部及科布多烏梁海等地矣）

五載 以王忠嗣爲河西隴右節度使兼知朔方河東節度事忠嗣始在朔方河東每互市高估馬價諸胡聞之爭賣馬於唐忠嗣皆買之由是胡馬少唐兵益壯及徙隴右河西復請分朔方河東馬九千匹以實之其軍亦壯忠嗣杖四節控制萬里天下勁兵重鎮皆在掌握與吐蕃戰於青海積石皆大捷又討吐谷渾於墨離軍虜其全

部而歸（墨離軍在安西州西北）

六載 冬十月河西隴右節度使王忠嗣以部將哥舒翰爲大斗軍副使李光弼爲河西兵馬使充赤水軍使翰父祖本突騎施別部酋長光弼契丹王楷洛之子也皆以勇略爲忠嗣所重忠嗣使翰擊吐蕃有同列爲之副倨慢不爲用翰槌殺之軍中股慄累功至隴右節度副使每歲積石軍麥熟吐蕃輒來穫之無能禦者邊人謂之吐蕃麥莊翰先伏兵於其側虜至斷其後夾擊之無一人得返者自是不敢復來上欲使王忠嗣攻吐蕃石堡城忠嗣上言石堡險固吐蕃舉國守之今頓兵其下非殺數萬人不能克臣恐所得不如所亡不如且厲兵秣馬俟其有釁然後取之上意不快將軍董延光自請將兵取石堡城上命忠嗣分兵助之忠嗣不得已奉詔而不盡副延光所欲延光怨之光弼言於忠嗣曰大夫以愛士卒之故不欲成延光之功雖迫於制書實奪其謀也何以知之今以數萬衆授之而不立重賞士卒安肯爲之盡力乎然此天子意也彼無功必歸罪於大夫大夫軍府充牣何愛數萬段帛不以杜其讒口乎忠嗣曰今以數萬之衆爭一城得之未足以制敵不得亦無害於國故忠嗣不欲爲之忠嗣今受責天子不過以金吾羽林一將軍歸宿衛其次不過黔中上佐（胡氏曰黔中一道皆溪峒蠻獠雜居貶謫而不過嶺者處之上佐長史司馬也）忠嗣豈以數萬人之命易一官乎李將軍子誠愛我矣然吾志決矣子勿復言光弼曰曷者恐爲大夫之累故不敢不言今大夫能行古人之事非光弼所及也遂趨出延光過期不克言忠嗣沮撓軍計上怒李林甫因使濟陽別駕魏林告忠嗣嘗自言我幼養宮中與忠王相愛狎欲擁兵

以尊奉太子敕徵忠嗣入朝委三司鞠之上聞哥舒翰名召見華清宮與語悅之十一月辛卯以翰判西平太守充隴右節度使以朔方節度使安思順判武威郡事充河西節度使三司按忠嗣上曰吾兒居深宮安得與外人通謀此必妄也但劾忠嗣沮撓軍功哥舒翰之入朝也或勸多齎金帛以救忠嗣翰曰若直道尙存王公不必冤死如其將喪多賂何爲遂單囊而行三司奏忠嗣罪當死翰始遇知於上力陳忠嗣之冤且請以己官爵贖忠嗣罪上起入禁中翰叩頭隨之言與淚俱上感寤己亥貶忠嗣漢陽太守（赤水軍在涼州城內大斗軍在其西二百餘里積石軍在西甯府西南大河岸側石堡城在巴燕戎格廳）

初將軍高仙芝本高麗人從軍安西仙芝驍勇善騎射節度使夫蒙靈嘗屢薦至安西副都護都知兵馬使充四鎮節度副使吐蕃以女妻小勃律王及其旁二十餘國皆附吐蕃貢獻不入前後節度使討之皆以能克制以仙芝爲行營節度使將萬騎討之自安西行百餘日乃至特勒滿川分軍爲三道期以七月十三日會吐蕃連雲堡下有兵近萬人意唐兵猝至大驚依山拒戰礮礮如雨仙芝以郎將高陵李嗣業爲陌刀將（胡氏曰礮卽砲石杜佑曰礮木長五尺徑一尺小至六七寸唐六典武庫令掌兵器辨其名數以備國用刀之制有四曰儀刀曰障刀曰橫刀曰陌刀儀刀蓋古斑劍之類宋晉以來謂之御刀後魏曰長刀以禦敵橫刀佩刀也兵士所佩名亦起於隋陌刀長刀也步兵所持蓋古之斬馬劍）令之曰不及日中決須破虜嗣業執一旗引陌刀緣險先登力戰自辰至巳大破之斬首五千級捕虜千餘人餘皆逃潰中使邊令誠以入虜境已深懼不敢進（胡氏

曰邊令誠時爲監軍）仙芝乃使令誠以羸弱三千守其城復進三日至坦駒嶺下峻阪四十餘里前有阿弩越城仙芝恐士卒憚險不肯下先令人胡詐爲阿弩越城守者迎降云阿弩越赤心歸唐娑夷水藤橋已斫斷矣娑夷水卽弱水也其水不能勝草芥藤橋者通吐蕃之路也仙芝陽喜士卒乃下又三日阿弩越城迎者果至明日仙芝入阿弩越城遣將軍席元慶將千騎前行謂曰小勃律聞大軍至其君臣百姓必走山谷第呼出取繒帛稱勅賜之大臣至盡縛之以待我元慶如其言悉縛諸大臣王及吐蕃公主逃入石窟取不可得仙芝至斬其附吐蕃者大臣數人藤橋去城猶六十里仙芝急遣元慶往斫之甫畢吐蕃兵大至已無及矣藤橋闕盡一矢力修之暮年乃成八月仙芝虜小勃律王及吐蕃公主而還九月至連雲堡與邊令誠俱月末至播密川遣使奏狀至河西夫蒙露警怒仙芝不先言已而遽發奏一不迎勞罵仙芝曰噉狗糞高麗奴汝官皆因誰得而不待我處分檀奏捷書高麗奴汝罪當斬但以汝新有功不忍耳仙芝但謝罪邊令誠奏仙芝深入萬里立奇功今且夕憂死十二月己巳上以仙芝爲安西四鎮節度使徵靈嘗入朝靈嘗大懼仙芝見靈嘗趨走如故靈嘗益懼副都護京兆程千里押牙畢思琛及行官王滔等皆平日構仙芝於靈嘗者也仙芝面責千里思琛曰公面如男子心如婦人何也又梓滔等欲笞之旣而皆釋之謂曰吾素所恨於汝者欲不言恐汝懷憂今旣言之則無事矣軍中乃安（小勃律今西布魯特也特勒滿川在齊齊克爾東連雲堡在特拉特山西坦駒嶺在羌呼爾南娑勒川在齊齊克爾西阿弩越城卽塞勒庫爾娑夷水在喀楚特東北皆在葱嶺中西南也播密川在英吉沙爾北）

初仙芝爲都知兵馬使猗氏人封常清少孤貧細瘦類目一足偏短求爲仙芝僚不納常清日候仙芝出入不離其門凡數十日仙芝不得已留之會達奚部叛夫蒙靈管使仙芝追之斬獲略盡常清私作捷書以示仙芝皆仙芝所欲言者由是一府奇之仙芝爲節度使卽署常清判官仙芝出征常爲留後仙芝乳母子鄭德詮爲郎將仙芝遇之如兄弟使典家事威行軍中常清嘗出德詮自後走馬突之而過常清至使院使召德詮每過一門輒闔之旣至常清離席曰常清本出寒微郎將所知今日中丞命爲留後郎將何得於衆中相陵突因叱之曰郎將須斃死以肅軍政遂杖之六十面仆地曳出仙芝妻及乳母於門外號哭救之不及因以狀白芝仙芝覽之驚曰已死邪及見常清遂不復言常清亦不之謝軍中畏之惕息（胡氏曰史言封常清能治軍政亦緣高仙芝不以私親撓法）自唐興以來邊帥皆用忠厚名臣不久任不遙領不兼統功名著者往往入爲宰相（胡氏曰如李靖李勣劉仁軌婁師德之類是也開元以來薛訥郭元振張嘉貞王峻張說杜暹蕭嵩李適之等亦皆自邊帥入相）其四夷之將雖才略阿如史那社爾契必何力猶不專大將之任皆以大臣爲使以制之及開元中天子有吞四夷之志爲邊將者十餘年不易始久任矣（胡氏曰王峻郭知運張守珪之類是也）皇子則慶忠諸王宰相則蕭嵩牛仙客始遙領矣蓋嘉運王忠嗣專制數道始兼統矣李林甫欲杜邊帥入相之路以胡人不知書乃奏言文臣爲將怯當矢石不若用寒峻胡人胡人則勇決習戰寒族則孤立無黨陛下誠以恩洽其心彼必能爲朝廷盡死上悅其言始用安祿山至是諸道節度盡用胡人（胡氏曰安祿山安思順哥舒翰高仙芝皆胡人

也）精兵咸戍北邊天下之勢偏重卒使祿山傾覆天下皆出於林甫專竈固位之謀也

八載哥舒翰築神威軍於青海上吐蕃至翰擊破之又築城於青海中龍駒島謂之應龍城吐蕃屏跡不敢近青海三月朔方節度等使張齊邱於中受降城西北五百餘里木刺山築橫塞軍以振遠軍使鄭人郭子儀爲橫塞軍使（神威軍未詳在青海東西橫塞軍在吳喇特旗界）

先是折衝府皆有木契銅魚朝廷徵發下勅書契魚（胡氏曰唐制銅魚符所以起軍旅王畿之內左三右一王畿之外左五右一左者在外行用之日從第一爲首後事須用二次發之周而復始木契之制若太子監國則王畿之內左右各三王書之外左右各五庶官鎮守則左右各十唐六典符寶郎掌符節曰木契者所以重鎮守慎出納車駕巡幸皇太子監國有兵馬受處分者爲木契并行軍所及領軍五百人馬五百匹以上征討皆給木契三公以下兩京留守及諸州有兵馬受處分亦給木契曰銅魚符者所以起軍旅易守長兩京留守若諸州諸軍折衝府諸處捉兵鎮守之所及官總監皆給魚符程大昌演繁露曰唐世左魚之外又有勅牒將之故兼名魚書）都督郡府參驗皆合然後遣之自募置彊驕府兵日益墮壞死及逃亡者有司不復點補其六馱馬牛器械糧糧耗散略盡府兵入宿衛者謂之侍官言其爲天子侍衛也其後本衛多以假人役使如奴隸長安人羞之至以相詬病其戍邊者又多爲邊將苦使利其死而沒其財由是應爲府兵者皆逃匿至是無兵可交五月癸酉李林甫奏停折衝府上下魚書是後府兵徒有官吏而已（胡氏曰唐府兵之制十人爲火火有長火備六馱馬凡火

具烏布幕鐵馬孟布槽鑿鑿確筐斧鉗鋸皆一甲狀二縑二五十人爲隊隊具火鑽一胷馬繩一首羈足絆皆三人具弓一矢三十胡祿橫刀礪石大觴氈帽氈裝行膝皆一麥飯九斗米二斗皆自備其介冑戎具藏於庫有所征行則視其入而出給之其番上宿衛者惟給弓矢橫刀而已今皆耗廢非其舊矣）其折衝果毅又歷年不遷士大夫亦恥爲之其疆騎之法天寶以後稍亦變廢應募者皆市井負販無賴子弟未嘗習兵時承平日久議者多謂中國兵可銷於是民間挾兵器者有禁子弟爲武官父兄擯不齒猛將精兵皆聚於西北中國無武備矣

上命隴右節度使哥舒翰帥隴右河西及突厥阿布思兵益以朔方河東兵凡六萬三千攻吐蕃石堡城其城三面險絕惟一徑可上吐蕃但以數百人守之多儲糧食積樁木及石唐兵前後屢攻之不能克翰進攻數日不拔召裨將高秀巖張守瑜欲斬之二人請三日期可克如期拔之獲吐蕃鐵刃悉諾羅等四百人唐士卒死者數萬果如王忠嗣之言頃之翰又遣兵於赤嶺西開屯田以謫卒二千戍龍駒島冬冰合吐蕃大集戍者盡沒（胡氏曰深入虜境聲援不接兵法曰遣人獲曰）閏月乙丑以石堡城爲神武軍又於劍南西山索磨川置保窟都護府（按石堡城吐蕃名曰鐵仞在巴燕戎格廳赤嶺在其西三十里山石正赤）

九載 冬十二月安西四鎮節度使高仙芝僞與石國約和引兵襲之虜其王及部衆以歸悉殺其老弱仙芝性貪掠得瑟瑟十餘斛黃金五六橐駝其餘口馬雜貨稱是皆入其家

楊國忠德鮮于仲通薦爲劍南節度使仲通性褊急失蠻夷心故事南詔常與妻子俱謁都督過雲南雲南太守張虔陀皆私之又多所徵求南詔王閣羅鳳不應虔陀遣人詈辱之仍密奏其罪閣羅鳳忿怨是歲發兵及攻陷雲南殺虔陀取夷州三十二(雲南郡注謂姚州是也)

十載安祿山既兼領三鎮賞刑已日益驕恣自以曩時不拜太子見上春秋高頗內懼又見武備墮弛有輕中國之心孔目官嚴莊掌書記高尙因爲之解圖讖勸之作亂祿山養同羅奚契丹降者八千餘人謂之曳落河曳落河者胡言壯士也及家僮百餘人皆驍勇善戰一可當百又畜戰馬數萬匹多聚兵仗分遣商胡詣諸道販鬻歲輸珍貨數百萬私作緋紫袍魚袋以百萬計以高尙嚴莊張通儒及將軍孫孝哲爲腹心史思明安守忠李歸仁蔡希德牛廷玠向潤容李庭望崔乾祐尹子奇何千年武令珣能元皓田承嗣田乾真阿史那承慶爲爪牙尙雍奴人本名不危頗有辭學薄游河朔貧困不得志常歎曰高不危當舉大事而死豈能齧草根求活邪祿山引置幕府出入臥內尙典牋奏莊治簿書承嗣世爲盧龍小校祿山以爲前鋒兵馬使嘗大雪祿山按行諸營至承嗣營寂若無人入閱士卒無一人不在者祿山以是重之(按三鎮范陽平盧河東也雍奴今武清縣)夏四月劍南節度使鮮于仲通討南詔蠻大敗於瀘南時仲通將兵八萬分二道出戎檣州至曲州靖州南詔王閣羅鳳謝罪請還所俘掠城雲南而去且曰今吐蕃大兵壓境若不許我我將歸命吐蕃雲南非唐有也仲通不許因其使進軍至西洱河與閣羅鳳戰軍大敗士卒死者六萬人仲通僅以身免楊國忠掩其敗狀仍敍其戰功

閣羅鳳斂戰尸築爲京觀遂北臣於吐蕃閣羅鳳刻碑於國門言已不得已而叛唐且曰我世世事唐受其封爵後世容復歸唐當指碑以示唐使者知吾之叛非本心也制大募兩京及河南北兵以擊南詔人聞雲南多瘴癘未戰士卒死者什八九莫肯應募國忠遣御史分道捕人連枷送詣軍所舊制百姓有勳者免征役時調兵旣多國忠奏先取高勳於是行者愁怨父母妻子送之所在哭聲振野（按瀘南廢縣在今姚州北戎今敘州府舊今甯遠府曲州靖州皆在今曲靖府東北曲州後移於慶符縣西進軍西洱河深入無援非軍之善政也此軍始由滇省東北入）

高仙芝之虜石國王也石國王子逃詣諸胡具告仙芝欺誘貪暴之狀諸胡皆怒潛引大食欲共攻四鎮仙芝聞之將蕃漢三萬衆擊大食深入七百餘里至恆羅斯城與大食遇相持五日葛羅祿部衆叛與大食夾攻唐軍仙芝大敗士卒死亡略盡所餘纔數千人右威將軍李嗣業勸仙芝宵遁道路阻隘拔汗那部衆在前人蓄塞路嗣業前驅奮大槌擊之人馬俱斃仙芝乃得過將士相失別將泚陽段秀實聞嗣業之聲詬曰避敵先奔無勇也全已棄衆不仁也幸而得達獨無愧乎嗣業執其手謝之留拒追兵收散卒得俱免還至安西言於仙芝以秀實兼都知兵馬使爲已判官（大食今科克倫恆羅斯城在特木爾泊西）

安祿山將三道兵六萬（胡氏曰幽州平盧河東三道）以討契丹以奚騎二千爲鄉導過平盧千餘里至土護真水遇雨祿山引兵晝夜兼行三百餘里至契丹牙帳契丹大駭時久雨弓弩筋膠皆弛大將何思德言於祿山

曰吾兵雖多遠來疲弊實不可用不如按甲息兵以臨之不過三日虜必降祿山怒欲斬之思德請前驅効死思德貌類祿山虜爭擊殺之以爲已得祿山勇氣百倍奚復叛與契丹合夾擊唐兵殺傷殆盡射祿山中鞍折冠簪失履獨與麾下二十騎走會夜追騎解得入師州歸罪於左賢王哥解河東兵馬使魚承仙而斬之平盧兵馬使史思明懼逃入山谷近二旬收散卒得七百人平盧守將史定方將精兵二千救祿山契丹引去祿山乃得免至平盧麾下皆亡不知所出思明出見祿山祿山喜起執其手曰吾得汝復何憂思明退謂人曰曷使早出已與哥解并斬矣契丹圍師州祿山使思明擊卻之（按土護真水卽老哈河一曰土河師州在土默特右翼旗北）

十二載隴右節度使哥舒翰擊吐蕃拔洪濟大漠門等城悉收九曲部落初高麗人王思禮與翰俱爲押牙事王忠嗣翰爲節度使思禮爲兵馬使兼河源軍使翰擊九曲思禮後期翰將斬之旣而復召釋之思禮徐曰斬則遂斬復召何爲楊國忠欲厚結翰共排安祿山奏以翰兼河西節度使秋八月戊戌賜翰爵西平郡王翰表侍御史裴冕爲河西行軍司馬是時中國盛強自安遠門西盡唐境萬二千里閭閻相望桑麻翳野天下稱富庶者無如隴右翰每遣使入奏常乘白橐駝日馳五百里是歲安西節度使封常清擊大勃律至菩薩勞城前鋒屢捷常清乘勝逐之斥候府果毅段秀實諫曰虜兵羸而屢北誘我也請搜左右山林常清從之果獲伏兵遂大破之受降而還（按洪濟河橋也在巴燕戎格廳城南大莫門城在其西今察罕諾門罕喇嘛游牧界九曲又在其西安遠門長安城西北頭第一門也大勃律卽東布魯特菩薩勞城在葱嶺中）

十三載 侍御史劍南留後李宓將兵七萬擊南詔閣羅鳳誘之深入至太和城閉壁不戰宓糧盡士卒罹瘴疫及饑死什七八乃引還蠻追擊之宓被擒全军皆沒楊國忠隱其敗更以捷聞益發中國兵討之前後死者幾二十萬人無敢言者上嘗謂高力士曰朕今老矣朝事付之宰相邊事付之諸將夫復何憂力士對曰臣聞雲南數喪師又邊將護兵太盛陛下將何以制之臣恐一旦禍發不可復救何得謂無憂也（胡氏曰高力士之言明皇豈無所動於其心哉禍機將發直付之無可奈何僥幸其身之不及見而已按太和城卽今大理府）

十四載 安祿山專制三道陰蓄異志殆將十年以上待之厚欲俟上晏駕然後作亂會楊國忠與祿山不相悅屢言祿山且反上不聽國忠數以事激之欲其速反以取信於上祿山由是決意遽反獨與嚴莊高尚阿史那承慶密謀自餘將佐皆莫之知但怪其自八月以來屢變士卒秣馬厲兵而已會有奏事官自京師還祿山詐爲敕書悉召諸將示之曰有密旨令祿山將兵入朝討楊國忠諸君宜卽從軍衆愕然相顧莫敢異言十一月甲子祿山發所部兵及同羅奚契丹室韋凡十五萬衆號二十萬反於范陽命范陽節度副使賈循守范陽平盧節度副使呂知誨守平盧別將高秀巖守大同諸將皆引兵夜發詰朝祿山出薊城南大閱誓衆以討楊國忠爲名榜軍中曰有異議扇動軍人者斬及三族於是引兵而南祿山乘鐵轡步騎精銳煙塵千里鼓譟震地時海內久承平百姓累世不識兵革猝聞范陽兵起遠近震駭河北皆祿山統內所過州縣望風瓦解守令或開門出迎或棄城竄匿或爲所擒戮無敢拒之者祿山先遣將軍何千年高邈將奚騎二十聲言獻射生手乘驛詣太原乙丑北京

副留守楊光勳出迎因劫之以去太原具言其狀東受降城亦奏祿山反上猶以爲惡祿山者詐爲之未之信也庚午上聞祿山定反乃召宰相謀之國忠揚揚有德色曰今反者獨祿山耳將士皆不欲也不過旬日必傳首詣行在上以爲然大臣相顧失色上遣特進畢思琛詣東京金吾將軍程千里詣河東各簡募數萬人隨便團結以拒之辛未安西節度使封常清入朝上問以討賊方略常清大言曰今太平積久故人望風憚賊然事有逆順勢有奇變臣請走馬詣東京開府庫募驍勇挑馬箠度河計日取逆胡之首獻闕下上悅壬申以常清爲范陽平盧節度使常清卽日乘驛詣東京募兵旬日得六萬人乃斷河陽橋爲守禦之備甲戌祿山至博陵南何千年等執楊光勳見祿山責光勳以附楊國忠斬之以徇祿山使其將安忠志將精兵軍士門忠志奚人祿山養爲假子又以張獻誠攝博陵太守獻誠守珪之子也（胡氏曰張守珪卯翼祿山實爲厲階）祿山至藁城常山太守顏杲卿力不能拒與長史袁履謙往迎之祿山輒賜杲卿金紫質其子弟使仍守常山又使其將李欽湊將兵數千人守井陘口以備西來諸軍（胡氏曰西來諸軍謂河東路兵東出井陘口者）杲卿途中指其衣謂履謙曰何爲著此履謙悟其意乃陰與杲卿謀起兵討祿山杲卿思魯之元孫也（胡氏曰顏思魯之推之子師古之父也）丙子上還宮斬太僕卿安慶宗賜榮義郡主白盡以朔方節度使安思順爲戶部尙書思順弟元貞爲太僕卿以朔方右廂兵馬使九原太守郭子儀爲朔方節度使右羽林大將軍王承業爲太原尹置河南節度使領陳留等十三郡以衛尉卿張介然爲之以程千里爲潞州長史諸郡當賊衝者始置防禦使丁丑以榮王琬爲元帥右金

吾大將軍高仙芝副之統諸軍東征出內府錢帛於京師募兵十一萬號曰天武軍旬日而集皆市井子弟也十二月丙戌高仙芝將飛騎驢騎及新募兵邊兵在京師者合五萬人發長安上遣宦者監門將軍邊令誠監其軍屯於陝丁亥安祿山自靈昌度河以緝約敗船及草木橫絕河流一夕冰合如浮梁遂陷靈昌郡祿山步騎散漫人莫知其數所過殘滅介然至陳留纔數日祿山至授兵登城衆恟懼不能守庚寅太守郭納以城降祿山入北郭聞安慶宗死慟哭曰我何罪而殺我子時陳留將士降者夾道近萬人祿山皆殺之以快其忿斬張介然於軍門以其將李庭望爲節度使守陳留（按此時范陽治順天府薊其首縣也北京卽太原今太原府東受降城在今托克托廳界東京今河南府河東節度治太原河陽橋在孟津縣博陵卽定州土門關在井陘縣東北卽今井陘關藁城縣屬正定府常山郡卽正定也朔方節度治靈州統兵六萬四千七百人河南節度治陳留郡今之開封府也潞州今潞安府胡氏曰陝在長安東四百九十里在河南洛陽西三百三十里靈昌今滑縣）上下制欲親征其朔方河西隴右兵留守城堡之外皆赴行營令節度自將之期二十日畢集初平原太守顏真卿知祿山且反因霖雨完城浚濠料丁壯實倉廩祿山以其書生易之及祿山反牒真卿以平原博平兵七千人防河津真卿遣平原司兵李平開道奏之上始聞祿山反河北郡縣皆風靡歎曰二十四郡曾無一人義士邪及平至大喜曰朕不識顏真卿作何狀乃能如是真卿遣親客密懷購賊牒詣諸郡由是諸郡多應者真卿呆卿之從弟也安祿山引兵向滎陽太守崔無誡拒之士卒乘城者聞鼓角聲自墜如雨癸巳祿山陷滎陽殺無誡以其

將武令珣守之祿山聲勢益張以其將田承嗣安忠志張孝忠爲前鋒封常清所募兵皆白徒未更訓練屯武牢以拒賊賊以鐵騎蹂之官軍大敗常清收餘衆戰於葵園又敗戰上東門內又敗丁酉祿山陷東京賊鼓譟自四門入縱兵殺掠常清戰於都亭驛又敗退守宣仁門又敗乃自苑西壞牆走河南尹達奚珣降於祿山留守李愬謂御史中丞盧奕曰吾曹荷國重任雖知力不敵必死之奕許諾愬收殘兵數百欲戰皆棄愬潰去愬獨坐府中奕先遣妻子懷印閒道走長安朝服坐臺中左右皆散祿山屯於閑廐使人執愬奕及采訪判官蔣清皆殺之奕罵祿山數其罪顧賊黨曰凡爲人當知道順我死不失節夫復何恨祿山以其黨張萬頃爲河南尹常清帥餘衆至陝陝郡太守竇廷芝已奔河東吏民皆散常清謂高仙芝曰常清連日血戰賊鋒不可當且潼關無兵若賊豕突入關則長安危矣陝不可守不如引兵先據潼關以拒之仙芝乃帥見兵西趣潼關賊尋至官軍狼狽走無復部伍士馬相騰踐死者甚衆至潼關修完守備賊至不得入而去祿山使其將崔乾祐屯陝臨汝宏農濟陰濮陽雲中郡皆降於祿山是時朝廷徵兵諸道皆未至關中怙懼會祿山方謀稱帝留東京不進故朝廷得爲之備兵亦稍集祿山以張通儒之弟通晤爲睢陽太守與陳留長史楊朝宗將胡騎千餘東略地郡縣官多望風降走惟東平太守嗣吳王祗濟南太守李隨起兵拒之祗緯之弟也郡縣之不從賊者皆倚吳王爲名單父尉賈贛帥吏民南擊睢陽斬張通晤李庭望引兵欲東徇地聞之不敢進而還顏真卿召募勇士旬日至萬餘人諭以擊兵討安祿山繼以涕泣士皆感憤祿山使其黨段子光齋李燈盧奕蔣清首徇河北諸郡至平原真卿執子光腰斬以

徇取三人首續以蒲身棺斂葬之祭哭受弔祿山以海運使劉道元攝景城太守清池尉賈載鹽山尉穆寧共斬道元得其甲仗五十餘船攜道元首謁長史李暉暉收嚴莊宗族悉誅之是日送道元首至平原真卿召載寧及清河尉張澹詣平原計事饒陽太守盧全誠據城不受代河間司法李奐殺祿山所署長史王懷忠李隨遣游奕將訾嗣賢濟河殺祿山所署博平太守守馬冀各有衆數千或萬人共推真卿爲盟主軍事皆稟焉祿山使張獻誠將上谷博陵常山趙郡文安五郡團結兵萬人圍饒陽（按平原郡治今陵縣博平郡今東昌府河津時大河在二郡界也胡氏曰滎陽至長安一千一百五十里按卽今鄆州也武牢卽汜水之虎牢唐人避諱也胡氏曰葵園在罍子谷南上東門卽洛陽上春門也在城東面都亭驛亦在京東宣仁門乃東京皇城東面門在東京城內也臨汝今汝州宏農今靈寶縣濟陰今曹縣濮陽今濮州雲中今大同府睢陽今歸德府東平今東平州濟南今濟南府單父今單縣景城今滄州清池縣所治也鹽山今鹽山縣皆屬天津府饒陽郡今深州河間今河間府上谷郡今易州博陵今定州常山今正定府趙郡今趙州文安今任邱縣北）

高仙芝之東征也監軍邊令誠數以事干之仙芝多不從令誠入奏事具言仙芝常清橈敗之狀且云常清以賊搖衆而仙芝棄陝地數百里又盜滅軍士糧賜上大怒遣令誠齎敕卽軍中斬仙芝及常清初常清旣敗三遣使奉表陳賊形勢上皆不之見常清乃自馳詣闕至渭南敕削其官爵令還仙芝軍白衣自效常清草遺表曰臣死之後望陛下不輕此賊無忘臣言時朝議皆以爲祿山狂悖不日授首故常清云然令誠至潼關先引常清宣敕

示之常清以表附令誠上之常清既死陳尸蘧蔭仙芝還自聽事令誠索陌刀手百餘人自隨乃謂仙芝曰大夫亦有恩命仙芝遽下令誠宣敕仙芝曰我遇敵而退死則宜矣今上戴天下履地謂我盜滅糧賜則誣也時士卒在前皆大呼稱枉其聲振地遂斬之（胡氏曰史言高仙芝由邊令誠而得節亦由邊令誠而喪元）以將軍李承光攝領其衆河西隴右節度使哥舒翰病廢在家上藉其威名且素與祿山不協召見拜兵馬副元帥將兵八萬以討祿山仍敕天下四面進兵會攻洛陽翰以病固辭上不許以田良邱爲御史中丞充行軍司馬起居郎蕭昕爲判官蕃將火拔歸仁等各將部落以從并仙芝舊卒號二十萬軍於潼關翰病不能治事悉以軍政委田良邱良邱復不敢專決使王思禮主騎李承光主步二人爭長無所統壹翰用法嚴而不恤士卒皆懈弛無鬪志祿山大同軍使高秀巖寇振武軍朔方節度使郭子儀擊敗之子儀乘勝拔靜邊軍大同兵馬使薛忠義寇靜邊軍子儀使左兵馬使李光弼右兵馬使高潞左武鋒使僕固懷恩右武鋒使渾釋之等逆擊大破之坑其騎七千進圍雲中使別將公孫瓊嚴將二千騎擊馬邑拔之開東陁關甲辰加子儀御史大夫懷恩哥濫拔延之曾孫也世爲金微都督釋之渾部酋長世爲皋蘭都督顏杲卿將起兵參軍馮虔前真定令賈深藁城尉崔安石郡人翟萬德內邱丞張通幽皆預其謀又遣人語太原尹王承業密與相應會顏真卿自平原遣杲卿甥盧洙潛告杲卿欲連兵斷祿山歸路以緩其西入之謀時祿山遣其金吾將軍高逸詣幽州徵兵未還杲卿以祿山命召李欽湊使帥衆詣郡受犒賚丙午薄暮欽湊至杲卿使袁履謙馮虔等攜酒食妓樂往勞之并其黨皆大醉乃斷欽湊首收其

甲兵盡縛其黨明日斬之悉散井陘之衆有頃高邈自幽州還且至薤城臬卿使馮虔往擒之南境又白何千年自東京來崔安石與翟萬德馳詣醴泉驛迎千年又擒之同日致於郡下千年謂臬卿曰今太守欲輸力王室旣善其始當慎其終此郡應募烏合難以臨敵宜深溝高壘勿與爭鋒俟朔方軍至併力齊進傳檄趙魏斷燕薊要脅今且宜聲云李光弼引步騎一萬出井陘使人說張獻誠云足下所將多團練之人無堅甲利兵難以當山西勁兵獻誠必解圍遁去此亦一奇也臬卿悅用其策獻誠果遁去其團練兵皆潰臬卿乃使人入饒陽城慰勞將士命崔安石等徇諸郡云大軍已下井陘朝夕當至先平河北諸郡先下者賞後至者誅於是河北諸郡嚮應凡十七郡皆歸朝廷兵合二十餘萬其附祿山者唯范陽盧龍密雲漁陽汲鄴六郡而已臬卿又密使人入范陽招賈循邲城人馬燧說循曰祿山負恩悖逆雖得洛陽終歸夷滅公若誅諸將之不從命者以范陽歸國傾其根柢此不世之功也循然之猶豫不時發別將牛潤容知之以告祿山祿山使其黨韓朝陽召循朝陽至范陽引循屏語使壯士縊殺之滅其族以別將牛廷珪知范陽軍事史思明李立節將蕃漢步騎萬人擊博陵常山馬燧亡入西山隱者徐遇匿之得免初祿山欲自將攻潼關至新安聞河北有變而還（振武軍在單于府今托克托城靜邊軍在其東北雲中今大同府馬邑今朔州東陘關在代州南三十里胡氏曰時河東太原閉關以拒秀巖至是始開關也內壘縣今屬順德府醴泉驛宜在欒城縣范陽今順天府盧龍今永平府密雲今密雲縣漁陽今薊州汲郡今衛輝府鄴郡今彰德府邲城今鄴縣西山今京師之西山也新安縣屬河南府）

十五載 春正月乙卯朔祿山自稱大燕皇帝改元聖武以達奚珣爲侍中張通儒爲中書令高尙嚴莊爲中書侍郎李隨至睢陽有衆數萬丙辰以隨爲河南節度使以前高要尉許遠爲睢陽太守兼防禦使濮陽客尙衡起兵討祿山以郡人王栖曜爲衙前總管攻拔濟陰殺祿山將刑超然顏杲卿使其子泉明賈深翟萬德獻李欽湊首及何千年高邈於京師張通幽泣請曰通幽兄陷賊乞與泉明偕行以救宗族杲卿哀而許之至太原通幽欲自託於王承業乃教之略泉明等更其表多自爲功毀短杲卿別遣使獻之杲卿起兵纔八日守備未完史思明蔡希德引兵皆至城下杲卿告急於承業承業既竊其功利於城陷遂擁兵不救杲卿晝夜拒戰糧盡矢竭壬戌城陷賊縱兵殺萬餘人執杲卿及袁履謙等送洛陽王承業使者至京師帝大喜拜承業羽林大將軍麾下受官爵者以百數徵顏杲卿爲衛尉卿朝命未至常山已陷杲卿至洛陽祿山數之曰汝自范陽戶曹我奏汝爲判官不數年起至太守何負於汝而反耶杲卿瞋目罵曰汝本營州牧羊羯奴天子擢汝爲三道節度使恩幸無比何負於汝而反我世爲唐臣祿位皆唐有雖爲汝所奏豈從汝反邪我爲國討賊恨不斬汝何謂反也臊羯狗何不速殺我祿山大怒并履謙等縛於中橋之柱而禹之杲卿履謙比死罵不虛口顏氏一門死於刀鋸者三十餘人史思明李立節蔡希德既克常山引兵擊諸郡之不從者所過殘滅於是鄴廣平鉅鹿趙上谷博陵文安魏信都等郡復爲賊守饒陽太守盧全誠獨不從思明等圍之河間司法李奐將七千人景城長史李暉遣其子祀將八千人救之皆爲思明所敗（濮陽今濮州濟陰今曹州府廣平今廣平府鉅鹿今順德府上谷今易州博陵今定

州文安郡今任邱縣北之鄭州集魏今大名府信都今冀州也

上命郭子儀罷圍雲中還朔方益發兵進取東京選良將一人分兵先出井陘定河北子儀薦李光弼癸亥以光弼爲河東節度使分朔方兵萬人與之甲子加哥舒翰左僕射同平章事餘如故置南陽節度使以南陽太守魯炆爲之將嶺南黔中襄陽子弟五萬人屯葉北以備安祿山炆表薛愿爲潁川太守兼防禦使龐堅爲副使乙丑祿山遣其子慶緒寇潼關翰擊卻之己巳加顏真卿戶部侍郎兼本部防禦使真卿以李暉爲副二月丙戌加李光弼魏郡太守河北道採訪使史思明等圍饒陽二十九日不下光弼將蕃漢步騎萬餘人太原弩手三千人出井陘己亥至常山常山團練兵三千人殺胡兵執安思義出降光弼謂思義曰汝自知當死否思義不應光弼曰汝久更陳行視吾此衆可敵思明否今爲我計當如何汝策可取當不殺汝思義曰大夫士馬遠來疲弊猝遇大敵恐未易當不如移軍入城早爲備禦先料勝負然後出兵胡騎雖銳不能持重苟不獲利氣沮心離於時乃可圖矣思明今在饒陽去此不二百里昨暮羽書已去計其先鋒來晨必至而大軍繼之不可不留意也光弼悅釋其縛卽移軍入城思明聞常山不守立解饒陽之圍明日未旦先鋒已至思明等繼之合二萬餘騎直抵城下光弼遣步卒五千自東門出戰賊守門不退光弼命五百弩於城上齊發射之賊稍卻乃出弩手千人分爲四隊使其矢發發相繼賊不能當斂軍道北光弼出兵五千爲槍城於道南夾呼沱水而陳賊數以騎兵搏戰光弼之兵射之人馬中矢者大半乃退小憩以俟步兵有村民告賊兵五千自饒陽來晝夜行百七十里至九門南逢壁度

憩息光弼遣步騎各二千匿旗鼓並水潛行至逢壁賊方飯縱兵掩擊殺之無遺思明聞之失勢退入九門時常山九縣七附官軍惟九門藁城爲賊所據光弼遣裨將張奉璋以兵五百戍石邑餘皆三百人戍之（按南陽今鄧州嶺南今兩廣黔中今貴州襄陽今襄陽府葉今葉縣潁川今許州胡氏曰九域志真定至饒陽二百卅五里思義據思明下營處言之故曰不二百里也滹沱水在正定府城南九門在藁城縣西北石邑在獲鹿縣西北）

賈賁前至雍邱有衆二千先是譙郡太守楊萬石以郡降安祿山逼真源令張巡使爲長史西迎賊巡至真源帥吏民哭於元元皇帝廟起兵討賊吏民樂從者數千人巡選精兵千人西至雍邱與賈賁合初雍邱令令狐潮以縣降賊賊以爲將使東擊淮陽救兵於襄邑破之俘百餘人拘於雍邱將殺之往見李庭望淮陽兵遂殺守者潮棄妻子走故賈賁得以其間入雍邱潮引賊精兵攻雍邱賁出戰敗死巡力戰卻賊因兼領賁衆自稱吳王先鋒使三月乙卯潮復與賊將李懷仙楊朝宗謝元同等四萬餘衆奄至城下衆懼莫有固志巡曰賊兵精銳有輕我心今出其不意擊之彼必驚潰賊勢小折然後城可守也乃使千人乘城自帥千人分數隊開門突出巡身先士卒直衝賊陳人馬辟易賊遂退明日復進攻城設百礮環城樓堞皆盡巡於城上立木柵以拒之賊蟻附而登巡束蒿灌脂焚而投之賊不得上時伺賊隙出兵擊之或夜絕斫營積六十餘日大小三百餘戰帶甲而食裹瘡復戰賊遂敗走巡乘勝追之獲胡兵二千人而還軍聲大振（按雍邱今杞縣譙郡今亳州真源今鹿邑縣淮陽今陳州襄邑在今睢州西）

加顏真卿河北采訪使真卿以張澹爲支使先是清河客李萼年二十餘爲郡人乞師於真卿曰公首唱大義河北諸郡恃公以爲長城今清河公之西鄰國家平日聚江淮河南錢帛於彼以贍北軍謂之天下北庫今有布三百餘萬匹帛八十餘萬匹錢三十餘萬緡糧三十餘萬斛昔討默啜甲兵皆儲清河庫今有五十餘萬事戶七萬口十餘萬竊計財足以三平原之富兵足以倍平原之彊公誠資以士卒撫而有之以二郡爲腹心則餘郡如四支無不隨所使矣真卿曰平原兵新集尙未訓練自保恐不足何暇及鄰雖然借若諾子之請則將何爲乎萼曰清河遣僕銜命於公者非力不足而借公之師以嘗寇也亦欲觀大賢之明義耳今仰瞻高意未有決辭定色僕何敢遽言所爲哉真卿奇之欲與之兵衆以爲萼年少輕虜徒分兵力必無所成真卿不得已辭之萼就館復爲書說真卿以爲清河去逆効順奉粟帛器械以資軍公乃不納而疑之僕回轅之後清河不能孤立必有所繫託將爲公西面之彊敵公能無悔乎真卿大驚遽詣其館以兵六千借之送至境執手別真卿問曰兵已行矣可以言子之所爲乎萼曰聞朝廷遣程千里將精兵十萬出崞口討賊賊據險拒之不得前今當引兵先擊魏郡執祿山所署太守袁知泰納舊太守司馬垂使爲西南主人分兵開崞口出千里之師因討汲鄴以北至於幽陵郡縣之未下者平原清河帥諸同盟合兵十萬南臨孟津分兵循河據守要害制其北走之路計官軍東討者不下二十萬河南義兵西向者亦不減十萬公但常表朝廷堅壁勿戰不過月餘賊必有內潰相圖之變矣真卿曰善命錄事參軍李擇交及平原令范冬馥將其兵會清河兵四千及博平兵千人軍於堂邑西南袁知泰遣其將白嗣

恭等將二萬餘人來逆戰三郡兵力戰盡日魏兵大敗斬首萬餘級捕虜千餘人得馬千匹軍資甚衆知秦奔汲郡遂克魏郡軍聲大振時北海太守賀蘭進明亦起兵真卿以書召之并力進明將步騎五千度河真卿陳兵逆之相揖哭於馬上哀動行伍進明屯平原城南休養士馬真卿每事咨之由是軍權稍移於進明矣真卿不以爲嫌真卿以堂邑之功讓進明進明奏其狀取捨任意敕加進明河北招討使（按清河今屬廣平府崞口在邯鄲西南黎城涉縣磁州彰德四交之衝也幽陵卽范陽堂邑縣屬東昌府北海郡今青州府）

李光弼與史思明相守四十餘日思明絕常山糧道城中乏草馬食薦藉光弼以車五百乘之石邑取草將車者皆衣甲弩手千人衛之爲方陳而行賊不能奪蔡希德引兵攻石邑張奉璋拒卻之光弼遣使告急於郭子儀子儀引兵自井陘出夏四月壬辰至常山與光弼合蕃漢步騎共十餘萬甲午子儀光弼與史思明等戰於九門城南思明大敗中郎將渾瑊射李立節殺之瑊釋之之子也思明收餘衆奔趙郡希德奔鉅鹿思明自趙郡如博陵時博陵已降官軍思明盡殺郡官河朔之民苦賊殘暴所至屯結多至二萬人少者萬人各爲營以拒賊及郭李軍至爭出自效庚子攻趙郡一日城降士卒多虜掠光弼坐城門收所獲悉歸之民大悅子儀生擒四千人皆捨之斬祿山太守郭獻璆光弼進圍博陵十日不拔引兵還恆陽就食（按恆陽今曲陽縣在定州西北六十里注云在博陵西十里有脫字）

楊國忠問士之可爲將者於左拾遺張鎰及蕭昕鎰昕薦左贊善大夫永壽來瑱丙午以瑒爲潁川太守賊屢攻

之填前後破賊甚衆加本郡防禦使人謂之來嚼鐵安祿山使平盧節度使呂知誨誘安東副大都護馬靈晉殺之平盧游奕使劉客奴先鋒使董秦及安東將王元志同謀誅知誨遣使踰海與顏真卿相聞請取范陽自效真卿遣判官賈載齎糧及戰士衣助之真卿時惟一子頗纔十餘歲使詣客奴爲質朝廷聞之以客奴爲平盧節度使賜名正臣元志爲安東副大都護董秦爲平盧兵馬使（按安東在永平府）

五月令狐潮復引兵攻雍邱潮與張巡有舊於城下相勞苦如平生潮因說巡曰天下事去矣足下堅守危城欲誰爲乎巡曰足下平生以忠義自許今日之舉忠義何在潮慚而退（雍邱今杞縣）郭子儀季光弼還常山史思明收散卒數萬踵其後子儀選驍騎更挑戰三日至行唐賊疲乃退子儀乘之又敗之於沙河蔡希德至洛陽安祿山復使將步騎二萬人北就思明又使牛廷珣發范陽等郡兵萬餘人助思明合五萬餘人而同羅曳落河居五分之一子儀至恆陽思明隨至子儀深溝高壘以待之賊來則守去則追之晝則耀兵夜斫其營賊不得休息數日子儀光弼議曰賊倦矣可以出戰壬午戰於嘉山大破之斬首四萬級捕虜千餘人思明墜馬露髻跣足步走至暮杖折槍歸營奔於博陵光弼就圍之軍聲大振於是河北十餘郡皆殺賊守將而降漁陽路再絕賊往來者皆輕騎竊過多爲官軍所獲將士家在漁陽者無不搖心祿山大懼召高尙嚴莊詬之曰汝數年教我反以爲萬全今守潼關數月不能進北路已絕諸軍四合吾所有者止汴鄭數州而已萬全河在汝自今勿來見我尙莊懼數日不敢見田乾真自關下來爲尙莊說祿山曰自古帝王經營大業皆有勝敗豈能一舉而成今四方軍

壘雖多皆新募烏合之衆未更行陳豈能敵我薊北勁銳之兵何足深憂尙莊皆佐命元勳陛下一旦絕之使諸將聞之誰不內懼若上下離心臣竊爲陛下危之祿山喜曰阿浩汝能豁我心事卽召尙莊置酒酣宴自爲之歌以侑酒待之如初阿浩乾真小字也祿山議棄洛陽走歸范陽計未決是時天下以楊國忠驕縱召亂莫不切齒又祿山起兵以誅國忠爲名王思禮密說哥舒翰使抗表請誅國忠翰不應會有告崔乾祐在陝兵不滿四千皆羸弱無備（胡氏曰此祿山之用閒也）上遣使趣翰進兵復陝洛翰奏曰祿山久習用兵今始爲逆豈肯無備是必羸師以誘我若往正墮其計中且賊遠來利在速戰官軍據險以扼之利在堅守况賊殘虐失衆兵勢日蹙將有內變因而乘之可不戰擒也要在成功何必務速今諸道徵兵尙多未集請且待之郭子儀李光弼亦上言請引兵北取范陽覆其巢穴質賊黨妻子以招之賊必內潰潼關大軍唯應固守以弊之不可輕出國忠疑翰謀已言於上以賊方無備而翰逗留將失機會上以爲然繼遣中使趣之項背相望翰不得已撫膺慟哭六月丙戌引兵出關已丑遇崔乾祐之軍於靈寶西原乾祐據險以待之南薄山北阻河隘道七十里庚寅官軍與乾祐會戰乾祐伏兵於險翰與田良邱浮舟中流以觀軍勢見乾祐兵少趣諸軍使進王思禮等將精兵五萬居前龐忠等將餘兵十萬繼之翰以兵三萬登河北阜望之鳴鼓以助其勢乾祐所出兵不過萬人什伍伍散如列星或疎或密或前或卻官軍望而笑之乾祐嚴精兵陳於其後兵旣交賊偃旗如欲遁者官軍懈不爲備須臾伏兵發賊乘高下木石擊殺士卒甚衆道隘士卒如束槍槩不得用翰以輜車駕馬爲前驅欲以衝賊日過中東風暴急

乾祐以草車數十乘塞糧車之前縱火焚之煙焰所被官軍不能開日妄自相殺謂賊在煙中聚弓弩而射之日暮矢盡乃知無賊乾祐遣同羅精騎自南山過出官軍之後擊之官軍首尾駭亂不知所備於是大敗或棄甲竄匿山谷或相擠排入河溺死囂聲振天地賊乘勝蹙之後軍見前軍敗皆自潰河北軍望之亦潰翰獨與麾下數百騎走自首陽山西度河入關關外先爲三壑皆廣二丈深丈人馬墜其中須臾而滿餘衆踐之以度士卒得入關者纔八千餘人（按行唐縣在今正定府北七十里沙河在行唐新樂之間與木刀溝相通嘉山在曲陽縣東五里博陵郡定州也首陽山在永濟縣卽雷首山也）

上意在入蜀父老皆遮道請留曰宮闕陛下家居陵寢陛下墳墓今捨此欲何之上爲之按轡久之乃令太子於後宣慰父老父老因曰至尊旣不肯留某等願帥子從殿下東破賊取長安若殿下與至尊皆入蜀使中原百姓誰爲之主須臾衆至數千人太子不可曰至尊遠冒險阻吾豈忍朝夕離左右且吾尙未面辭當還白至尊更稟進止涕泣跋馬欲西建寧王倓與李輔國執鞶諫曰逆胡犯闕四海分崩不因人情何以興復今殿下從至尊入蜀若賊兵燒絕棧道則中原之地拱手授賊矣人情旣離不可復合雖欲復至此其可得乎不如收西北守邊之兵召郭李於河北與之併力東討逆賊克復兩京削平四海使社稷危而復安宗廟毀而更存掃除宮禁以迎至尊豈非孝之大者乎何必區區溫清爲兒女之戀乎廣平王俶亦勸太子留父老共擁太子馬不得行太子乃使俶馳白上上總轡待太子久不至使人偵之還白狀上曰天也乃分後軍二千人及飛龍廐馬從太子且諭將士

曰太子仁孝可奉宗廟汝曹善輔佐之又諭太子曰汝勉之勿以吾爲念西北諸胡吾撫之素厚汝必得其用太子南向號泣而已又使送東宮內人於太子且宣旨欲傳位太子不受俶倓皆太子之子也上至岐山或言賊前鋒且至上遽過宿扶風郡士卒潛懷去就往往流言不遜陳元禮不能制上患之會成都貢春綵十餘萬匹至扶風上命悉陳之於庭召將士入臨軒諭之曰朕比來衰老託任失人致逆胡亂常須遠避其鋒知卿等皆蒼猝從朕不得別父母妻子芟涉至此勞苦至矣朕甚愧之蜀路阻長郡縣褊小人馬衆多或不能供今聽卿等各還家朕獨與子孫中官前行入蜀亦足自達今日與卿等訣別可共分此綵以備資糧若歸見父母及長安父老爲朕致意各好自愛也因泣下密襟衆皆哭曰臣等死生從陛下不敢有貳上良久曰去留聽卿自是流言始息（胡氏曰元宗於此有楚昭王去國諭父老之意然元宗之爲是言也出於不得已）太子旣留莫知所適廣平王儼曰日漸晏此不可駐衆欲何之皆莫對建甯王倓曰殿下昔嘗爲朔方節度大使將吏歲時致啓倓略識其姓名今河西隴右之衆皆敗降賊父兄子弟多在賊中或生異圖朔方道近士馬全盛裘冕衣冠名族必無貳心賊入長安方虜掠未暇徇地乘此速往就之徐圖大舉此上策也衆皆曰善至渭濱遇潼關敗卒誤與之戰死傷甚衆已乃收餘卒擇渭水淺處乘馬涉度無馬者涕泣而返太子自奉天北上比至新平通夜馳三百里士卒器械失亡過半所存之衆不過數百新平太守薛羽棄郡走太子斬之是日至安定太守徐毅亦走又斬之太子至烏氏彭原太守李遵出迎獻衣及糗糧至彭原募士得數百人是日至平涼閱監牧馬得數萬匹又募士得五百餘人

軍勢稍振風今鳳翔岐山縣在其東五十里奉天今乾州新平今邠州安定今涇州烏氏驛在甯州東南彭原卽甯州也年涼今平涼府）

王思禮至平涼聞河西諸胡亂還詣行在初河西諸胡部落聞其都護皆從哥舒翰沒於潼關故爭自立相攻擊而都護實從翰在北岸不死又不與火拔歸仁俱降賊上乃以河西兵馬使周泌爲河西節度使隴右兵馬使彭元耀爲隴右節度使與都護思結進明等俱之鎮招其都落以思禮爲行在都知兵馬使（河西治涼州府隴右治今西甯府）

安祿山不意上遽西幸遣使止崔乾祐兵留潼關凡十日乃遣孫孝哲將兵入長安以張通儒爲西京留守崔光遠爲京兆尹使安忠順將兵屯范中以鎮關中孝哲爲祿山所寵任尤用事常與嚴莊爭權祿山使監關中諸將通儒等皆受制於孝哲孝哲豪侈果於殺戮賊黨畏之祿山命搜捕百官宦者宮女等每獲數百人輒以兵衛送洛陽王侯將相扈從車駕家留長安者誅及嬰孩陳希烈以晚節失恩怨上與張均張垙等皆降於賊祿山以希烈垙爲相自餘朝士皆授以官於是賊勢大熾西脅汧隴南侵江漢北割河東之半（胡氏曰得扶風則西脅汧隴南陽則南侵江漢崔乾祐乘潼關之捷北取河東）然賊將皆羸猛無遠略旣克長安以爲得志日夜縱酒專以聲色寶賄爲事無復西出之意故上得安行入蜀太子北行亦無追迫之患

李光弼圍博陵未下聞潼關不守解圍而南史思明踵其後光弼擊卻之與郭子儀皆引兵入井陘留常山太守

王備將景城河間團練兵守常山平盧節度使劉正臣將襲范陽未至思明引兵逆擊之正臣大敗棄妻子走士卒死者七千餘人初顏真卿聞河北節度使李光弼出井陘卽斂軍還平原以待光弼之命聞郭李西入井陘真卿始復區處河北軍事（常山今正定府按魯公於光弼出井陘當疾躋賊後斂軍還平原非也）

太子至平涼數日朔方留後杜鴻漸六城水陸運使魏少遊節度判官崔漪支度判官盧簡金鹽池判官李涵相與謀曰平涼散地非屯兵之所靈武兵食完富若迎太子至此北收諸城兵西發河隴勁騎南向以定中原此萬世一時也乃使涵奉牋於太子且籍朔方士馬甲兵糧帛軍須之數以獻之涵至平涼太子大悅會河西司馬裴冕入爲御史中丞至平涼見太子亦勸太子之朔方太子從之鴻漸漪使少遊居後喜次舍庀資儲自迎太子於平涼北境說太子曰朔方天下勁兵處也今吐蕃請和回紇內附四方郡縣大抵堅守拒賊以俟興復殿下今理分靈武按轡長驅移檄四方收攬忠義則逆賊不足屠也少遊盛治宮室帷帳皆倣禁中飲膳備水陸秋七月辛酉太子至靈武悉命撤之（史言肅宗以此成興復之功按朔方治靈州六城胡氏曰三受降城及豐安定遠振武也靈武郡卽靈州）裴冕杜鴻漸等上太子牋請遵馬嵬之命卽皇帝位太子不許冕等言曰將士皆關中人日夜思歸所以崎嶇從殿下遠涉沙塞者冀尺寸之功若一朝離散不可復集願殿下勉徇衆心爲社稷計牋五上太子乃許之是日肅宗卽位於靈武城南樓羣臣舞蹈上流涕歔歔尊元宗爲上皇天帝赦天下改元時塞上精兵皆選入討賊惟餘老弱守邊文武官不滿三十人披草萊立朝廷制度草創武人驕慢大將管崇嗣在朝堂

背闕而坐言笑自若監察御史李勉奏彈之繫於有司上特原之歎曰吾有李勉朝廷始尊

上命河西節度副使李嗣業將兵五千赴行在嗣業與節度使梁宰謀且緩師以觀變綏德府折衝段秀實讓嗣業曰豈有君父告急而臣子晏然不赴者乎特進常自謂大丈夫今日視之乃兒女子耳嗣業大慚卽白宰如數發兵以秀實自副將之詣行在上又徵兵於安西行軍司馬李栖筠發精兵七千人勵以忠義而遣之（安西治龜茲）

令狐潮圍張巡於雍邱相守四十餘日朝廷聲問不通潮聞元宗已幸蜀復以書招巡有大將六人白巡以兵勢不敵且上存亡不可知不如降賊巡陽許諾明日堂上設天子畫像帥將士朝之人人皆泣巡引六將於前責以大義斬之士心益勸城中矢盡巡縛藁爲人千餘被以黑衣夜縋城下潮兵爭射之久乃知其藁人得矢數十萬其得復夜縋人賊笑不設備乃以死士五百斫潮營潮軍大亂焚壘而遁追奔十餘里潮慚益兵圍之巡使郎將雷萬春於城上與潮相聞賊弩射之面中六矢而不動潮疑其木人使諜問之乃大驚遙謂巡曰向見雷將軍方知足下軍令矣然其如天道何巡謂之曰君未識人倫焉知天道未幾出戰擒賊將十四人斬首百餘級賊乃夜遁收兵入陳留不敢復出頃之賊步騎七千餘衆屯白沙渦巡夜襲擊大破之還至桃陵遇賊救兵四百餘人悉擒之分別其衆媯檀及胡兵悉斬之滎陽陳留脅從兵皆散令歸業旬日間民去賊來歸者萬餘戶（白沙渦在中牟縣桃陵在杞縣媯州今保安州檀州今密雲縣滎陽陳留皆在杞縣西）

河北諸郡猶爲唐守常山太守王輔欲降賊諸將怒因擊毬蹤馬踐殺之時信都太守烏承恩麾下朔方兵三千人諸將遣使者宗仙運帥父老詣信都迎承恩鎮常山承恩辭以無詔命仙運說承恩曰常山地控燕薊路通河洛有井陘之險足以扼其咽喉頃屬車駕南遷李大夫收軍退守晉陽王太守權統後軍欲舉城降賊衆心不從身首異處大將軍兵精氣肅遠近莫敵若以國家爲念移據常山與大夫首尾相應則洪勳盛烈孰與爲比若疑而不行又不設備常山旣陷信都豈能獨全承恩不從仙運又曰將軍不納鄙夫之言必懼兵少故也今人不聊生咸思報國競相結聚屯據鄉村若懸賞招之不旬日十萬可致與朔方甲士三千餘人相參用之足成王事若捨要害以授人居四通而自安譬如倒持劍戟取敗之道也承恩竟疑不決承恩承玘之族兄也是月史思明蔡希德將兵馬萬人南攻九門旬日九門僞降伏甲於城上思明墜城鹿角傷其左脅夜奔博陵（信都今冀州九門今薊城西博陵今定州）

郭子儀等將兵五萬自河北至靈武靈武軍威始盛人有興復之望矣八月壬午朔以子儀爲武部尙書靈武長史以李光弼爲戶部尙書北都留守並同平章事餘如故光弼以景城河開兵五千赴太原先是河東節度使王承業軍政不修朝廷遣侍御史崔衆交其兵尋遣中使誅之衆侮易承業光弼素不平至是敕交兵於光弼衆見光弼不爲禮又不時交兵光弼怒收斬之軍中股栗（景城今滄州河開今河開府光弼有此兵自隨故能行其志）

上皇下制赦天下北海太守賀蘭進明遺錄事參軍第五琦入蜀奏事琦言於上皇以爲今方用兵財賦爲急財賦所產江淮居多乞假臣一職可使軍無乏用上皇悅卽以琦爲監察御史江淮租庸使

李庭望將蕃漢二萬餘人東襲甯陵襄邑夜去雍邱城三十里置營張巡帥短兵三千掩擊大破之殺獲大半庭望收軍夜遁安祿山聞嚮日百姓乘亂多盜庫物旣得長安命大索三日并其私財盡掠之又令府縣推按銖兩之物無不窮治連引搜捕支蔓無窮民閒騷然益思唐室自上離馬嵬北行民間相傳太子北收兵來取長安長安民日夜望之或時相驚曰太子大軍至矣則皆走市里爲空賊望見北方塵起輒驚欲走京畿豪傑往往殺賊官吏遙應官軍誅而復起相繼不絕賊不能制其始自京畿鄜坊至歧隴皆附之至是西門之外率爲敵壘賊兵力所及者南不出武關北不過雲陽西不過武功江淮奏請貢獻之蜀之靈武者皆自襄陽取上津路抵扶風道路無壅皆薛景仙之功也（鄜今鄜州坊今中部縣岐今鳳翔隴今隴州武關在商州雲陽在淳化縣武功在乾川西南六十五里上津今鄖西縣言取此路由漢水上也）

建寧王倓性英果有才略從上自馬嵬北行兵衆寡弱屢逢寇盜倓自選驍勇居上前後血戰以衛上上或過時未食倓悲泣不自勝軍中皆屬目向之九月上欲以倓爲天下兵馬元帥使統諸將東征李泌曰建甯誠元帥才然廣平兄也若建甯功成豈可使廣平爲吳太伯乎上曰廣平冢嗣也何必以元帥爲重泌曰廣平未正位東宮今天下艱難衆心所屬在於元帥若建甯大功旣成陛下雖欲不以爲儲副同立功者其肯已乎太宗上皇卽其

事也上乃以廣平王俶爲天下兵馬元帥諸將皆以屬焉置元帥府於禁中俶入則泌在府泌入俶亦如之泌又言於上曰諸將畏憚天威在陛下前敷陳軍事或不能盡所懷萬一小差爲害甚大乞先令與臣及廣平熟議臣與廣平從容奏聞可者行之不可者已之上許之時軍旅務繁四方奏報自昏至曉無虛刻上悉使送府泌先開視有急切者及烽火重封隔門通進餘則待明禁門鑰契悉委俶與泌掌之

阿史那從禮說誘九姓府六胡州諸胡數萬衆聚於經略軍北將寇朔方上命郭子儀詣天德軍發兵討之左武烽使僕固懷恩之子玢別將兵與虜戰兵敗降之旣而復逃歸懷恩叱而斬之將士股栗無不一當百遂破同羅上雖用朔方之衆欲借兵於外夷以張軍勢以爾王守禮之子承案爲敦煌王與僕固懷恩使於回紇以請兵又發拔汗那兵且使轉諭城郭諸國許以厚賞使從安西兵入援李泌勸上且幸彭原俟西北兵將至進幸扶風以應之於時庸調亦集可以贍軍上從之戊辰發靈武（經略軍在鄂爾多斯右翼前末旂之北天德軍在吳喇特旂西撥汗那在那林河南之孟科爾彭原今寧州）

第五琦見上於彭原請以江淮租庸市輕貨泝江漢而上至洋川令漢中王瑁陸運至扶風以助軍上從之尋加琦山南等五道度支使琦作權鹽法用以饒（按洋川今洋縣在漢水北由此入駱谷也）

房琯上疏請自將兵復兩京上許之加持節招討西京兼防禦蒲漳兩關兵馬節度等使琯請自選參佐以御史中丞鄧景山爲副戶部侍郎李揖爲行軍司馬給事中劉秩爲參謀旣行又令兵部尚書王思禮副之琯悉以戎

務委李揖劉秩二人皆書生不閑軍旅瑄謂人曰賊曳落河雖多安能敵我劉秩瑄分爲三軍使裨將楊希文將南軍自宜壽入劉貴哲將中軍自武功入李光進將北軍自奉天入光進光弼之弟也（宜壽今盩厔縣奉天今乾州）

房瑄以中軍北軍爲前鋒冬十月庚子至便橋辛丑二軍遇賊將安守忠於咸陽之陳濤斜瑄效古法用車戰以牛車二千乘馬步夾之賊順風鼓譟牛皆震駭賊縱火焚之人畜大亂官軍死傷者四萬餘人存者數千而已癸卯瑄自以南軍戰又敗楊希文劉貴哲皆降於賊上聞瑄敗大怒李泌爲之營救上乃宥之待瑄如初（按便橋卽咸陽緣之西渭橋陳濤斜在咸陽縣東）

上問李泌曰今敵彊如此何時可定對曰臣觀賊所獲子女金帛皆輸之范陽此豈有雄據四海之志耶今獨虜將或爲之用中國之人惟高尚等數人自餘皆脅從耳以臣料之不過二年天下無寇矣上曰何故對曰賊之驍將不過吏思明安守忠田乾真張忠志阿史那承慶等數人而已今若令李光弼自太原出井陘郭子儀自馮翊入河東則思明忠志不敢離范陽常山守忠乾真不敢離長安是以兩軍繫其四將也從祿山者獨承慶耳願敕子儀勿取華陰使兩京之道常通陛下以所徵之兵軍於扶風與子儀光弼互出擊之彼救首則擊其尾救尾則擊其首使賊往來數千里疲於奔命我常以逸待勞賊至則避其鋒去則乘其弊不攻城不過路來春復命建甯爲范陽節度大使並塞北出與光弼南北犄角以取范陽（胡氏曰泌欲使建甯自靈夏並豐勝雲朔之塞直擣

媯檀攻范陽之北光弼自太原取恆定以攻范陽之南覆其巢穴賊退則無所歸留則不獲安然後大軍四合而攻之必成擒矣（按胡氏曰使肅宗用泌策史思明豈能再爲關洛之患乎）

十二月永王璘擅引兵東巡沿江而下軍容甚盛然猶未露割據之謀吳郡太守兼江南東路採訪使李希言平牒璘詰其擅引兵東下之意璘怒分兵遣其將渾惟明襲希言於吳郡季廣琛襲廣陵長史淮南採訪使李成式於廣陵璘進至當塗希言遣其將元景曜及丹徒太守閻敬之將兵拒之成式亦遣其將李承慶拒之璘擊斬敬之以徇景曜承慶皆降於璘江淮大震高適與來瑱韋陟會於安陸結盟誓衆以討之（吳郡今蘇州府廣陵今揚州府當塗縣今太平府治丹徒今鎮江府安陸今德安府）

令狐潮李庭望攻雍邱數月不下乃置杞州築城於雍邱之北以絕其糧援賊常數萬人而張巡衆纔千餘每戰輒克河南節度使虢王巨屯彭城假巡先鋒使是月魯東平濟陰陷於賊賊將楊朝宗帥馬步二萬將襲甯陵斷巡後巡遂拔雍邱東守甯陵以待之始與睢陽太守許遠相見是日楊朝宗至寧陵城西北巡遠與戰晝夜數十合大破之斬首萬餘級流尸塞汴而下賊收兵夜遁敕以巡爲河南節度副使巡以將士有功遣使詣虢王巨請空名告身及賜物巨唯與折衝果毅告身三十通不與賜物巡移書責巨巨竟不應（按彭城今徐州府魯今兗州府東平今東平州濟陰今曹州府甯陵縣在歸德府西六十里）

讀史兵略卷三十三

益陽岳林翼纂

通鑑

肅宗至德二載 春正月史思明自博陵蔡希德自太行高秀巖自大同牛廷介自范陽引兵共十萬寇太原李光弼麾下精兵皆赴朔方餘團練烏合之衆不滿萬人思明以爲太原指掌可取旣得之當遂長驅取朔方河隴太原諸將皆懼議修城以待之光弼曰太原城周四十里賊垂至而興役是未見敵先自困也乃帥士卒及民於城外鑿壕以自固作壘數十萬衆莫知所用及賊攻城於外光弼用之增壘於內壞輒補之思明使人取攻具於山東以胡兵三千衛送之至廣陽別將慕容溢張奉璋邀擊盡殺之思明圍太原月餘不下乃選驍銳爲遊兵戒之曰我攻其北則汝潛趣其南攻東則趣西有隙則乘之而光弼軍令嚴整雖寇所不至警邏未嘗少懈賊不得入光弼購募軍中苟有小技皆取之隨能使人盡其用得安邊軍錢工三善穿地道賊於城下仰而侮詈光弼遣人從地道中曳其足而入臨城斬之自是賊行皆視地賊爲梯衝土山以攻城光弼爲地道以迎之近城輒陷賊初逼城急光弼作大礮飛巨石一發輒斃二十餘人賊死者什二三乃退營於數十步外圍守益固光弼遣人詐與賊約刻日出降賊喜不爲備光弼使穿地道周賊營中搯之以木至期光弼勒兵在城上遣裨將將數千人

出如降狀賊皆屬目俄而營中地陷死者千餘人賊衆驚亂官軍鼓譟乘之俘斬萬計會安祿山死慶緒使思明歸守范陽留蔡希德等圍太原（博陵今定州太行今潞安府大同今大同府范陽今順天府朔方治靈武今靈州河河西今涼州府隴隴右今西甯府廣陽今平定州安邊今蔚州）

安慶緒以尹子奇爲汴州刺史河南節度使甲戌子奇以歸檀及同羅奚兵十三萬趣睢陽許遠告急於張巡巡自甯陵引兵入睢陽巡有兵三千人與遠兵合六千八百人賊悉衆逼城巡督勵將士晝夜苦戰或一日至二十合凡十六日擒賊將六十餘人殺士卒二萬餘衆氣自倍遠謂巡曰遠懦不習兵公智勇兼濟遠請爲公守公請爲遠戰自是之後遠但調軍糧修戰具居中應接而已戰鬪籌畫一出於巡賊遂夜遁

郭子儀以河東居兩京之間得河東則兩京可圖時賊將崔乾祐守河東子儀潛遣人入河東與唐官陷賊者謀俟官軍至爲內應二月子儀引兵趣河東城中人翻城迎官軍乾祐走子儀追擊之斬首四千級遂平河東

上至鳳翔旬日隴右河西安西西域之兵皆會江淮庸調亦至洋川漢中上自散關通表成都信使駱驛長安人聞車駕至從賊中自拔而來者日夜不絕西師憩息既定李泌請遣安西及西域之衆如前策並塞東北自歸檀南取范陽上曰今大衆已集庸調亦至當乘兵鋒擣其腹心而更引兵東北數千里先取范陽不亦迂乎對曰今以此衆直取兩京必得之然賊必再彊我必又困非久安之策上曰何也對曰今所恃者皆西北守塞及諸胡之兵性耐寒而畏暑若乘其新至之銳攻祿山已老之師其勢必克兩京春氣已深賊收其餘衆遁歸巢穴關東地

熱官軍必困而思歸不可留也賊休兵秣馬伺官軍之去必復南來然則征戰之勢未有涯也（胡氏曰後果如泌所料）不若先用之於寒鄉除其巢穴則賊無所歸根本永絕矣上曰朕切於晨昏之戀不能待此決矣（庸調由漢中府洋縣而至餉已足也散關在今寶雞縣）

永王璘敗死其黨薛繆皆伏誅時李成式與河北招討判官李銑合兵討璘銑兵數千軍於楊子成式使判官裴茂將兵三千軍於瓜步廣張旗幟列於江津璘與其子瑒登城望之始有懼色季廣琛召諸將謂曰吾屬從王至此天命未集人謀已隳不如及兵鋒未交早圖去就死於鋒鏑永爲逆臣矣諸將皆然之於是廣琛以麾下奔廣陵渾惟明奔江甯馮季康奔白沙璘憂懼不知所出其夕江北之軍多列炬光照水中一皆爲兩璘軍又以火應之璘以爲官軍已濟江邊挈家屬與麾下潛遁及明不見濟者乃復入城收兵具舟楫而去成式將趙侃等濟江至新豐璘使瑒及其將高仙琦將兵擊之侃等逆戰射瑒中肩璘兵遂潰璘與仙琦收餘衆南奔鄱陽收庫物甲兵欲南奔嶺表江西采訪使皇甫侁遣兵追討擒之潛殺之於傅舍瑒亦死於亂兵侁使人送璘家屬還蜀上曰侁旣生得吾弟何不送之於蜀而擅殺之耶遂廢侁不用（揚子縣今儀徵縣也瓜步鎮在六合縣白沙鎮卽儀徵也新豐鎮在丹徒縣鄱陽縣屬饒州府）

三月尹子奇復引大兵攻睢陽張巡謂將士曰吾受國恩所守正死耳但念諸君捐軀命膏草野而賞不酬勳（胡氏曰以統王巨靳告身不與賜物恐將士怨望而不力戰故先以此言尉撫之）以此痛心耳將士皆激勵請

奮巡遂椎牛大饗士卒盡軍出戰賊望見兵少笑之巡執旗帥諸將直衝賊陳賊乃大潰斬將三十餘人殺士卒三千餘人逐之數十里明日賊又合軍至城下巡出戰晝夜數十合屢摧其鋒而賊攻圍不輟

夏四月上以郭子儀爲司空天下兵馬副元帥使將兵赴鳳翔李歸仁以鐵騎五千邀之於三原北子儀使其將僕固懷恩王仲昇渾釋之李若幽伏兵擊之於白渠留運橋殺傷略盡歸仁游水而逸子儀與王思禮軍合於西渭橋進屯潘西安守忠李歸仁軍於京城西清渠相守七日官軍不進五月癸丑守忠僞退子儀悉師逐之賊以驍騎九千爲長蛇陳官軍擊之首尾爲兩翼夾擊官軍官軍大潰判官韓液監軍孫知古皆爲賊所擒軍資器械盡棄之子儀退保武功中外戒嚴是時府庫無蓄積朝廷專以官爵賞功諸將出征皆給空名告身自開府特進列卿大將軍下至中郎郎將聽臨事注名其後又聽以信牒授人官爵有至異姓王者諸軍但以職任相統攝不復計官爵高下及清渠之敗復以官爵收散卒由是官爵輕而貨重大將軍告身一通纔易一醉凡應募入軍者一切衣金紫至有朝士僮僕衣金柴稱大官而執賤役者名器之濫至是而極焉（三原在西安北九十里白渠在涇陽縣西渭橋在咸陽縣西潘水在長安縣西清渠在其東）

山南東道節度使魯旻守南陽賊將武令珣田承嗣相繼攻之城巾食盡一鼠直錢數百餓死者相枕籍上遣宦官將軍曹日昇往宣慰圍急不得入日昇請單騎入致命襄陽太守魏仲犀不許會顏真卿自河北至曰曹將軍不顧萬死以致帝命何爲沮之借使不達不過亡一使者達則一城之心固矣日昇與十騎偕往賊畏其銳不敢

逼城中自謂望絕及見日昇大喜日昇復爲之至襄陽取糧以千人運糧而入賊不能遏吳在圍中凡周歲晝夜苦戰力竭不能支壬戌夜開城帥餘兵數千突圍而出奔襄陽承嗣追之轉戰二日不能克而還時賊款南侵江漢賴吳扼其衝要南夏得全（南陽今南陽府襄陽今襄陽府時至南陽必由之以東北路阻也）

尹子奇益兵圍睢陽益急張巡於城中夜鳴鼓嚴隊若將出擊者賊聞之達旦儆備旣明巡乃寢兵絕鼓賊以飛樓瞰城中無所見遂解甲休息巡與將軍南霽雲郎將雷萬春等十餘將各將五十騎開門突出直衝賊營至子奇麾下營中大亂斬賊將五十餘人殺士卒五千餘人巡欲射子奇而不識乃剡蒿爲矢中者喜謂巡矢盡走白子奇乃得其狀使霽雲射之喪其左目幾獲之子奇乃收軍退還

六月將軍王去榮以私怨殺本縣令當死上以其善用礮赦免死以白衣於陝郡効力（胡氏曰時陝郡新復介居兩京之間賊所必攻也上欲免去榮之死而收其力用而不計其隳國法也）中書舍人賈至不卽行下表以爲去榮無狀殺本縣之君易曰臣弑其君子弑其父非一朝一夕之故其所由來者漸矣若縱去榮可謂生漸矣議者謂陝郡初復非其人不可守然則他無去榮者何以亦能堅守乎陛下若以礮石一能卽免殊死今諸軍技藝絕倫者其徒實繁必恃其能所在犯上復何以止之若止捨去榮而誅其餘者則是法令不一而誘人觸罪也今惜一去榮之材而不殺必殺十如去榮之材者不亦其傷益多乎夫去榮逆亂之人也焉有逆於此而順於彼亂於富平而治於陝郡悖於縣君而不悖於大君歟伏惟明主全其遠者大者則禍亂不日而定矣上下其事

令百官議之太子太師韋見素等議以爲法者天地大典帝王猶不敢擅殺是臣下之權過於人主也去榮旣殺人不死則軍中凡有技能者亦自謂無憂所在暴橫爲郡縣者不亦難乎陛下爲天下主愛無親疎得一去榮而失萬姓何利之有於律殺本縣令列於十惡而陛下寬之王法不行人倫道屈臣等奉詔不知所從夫國以法理軍以法勝有恩無威慈母不能使其子陛下厚養戰士而每戰少利豈非無法耶今陝郡雖要不急於法也有法則海內無憂不克况陝郡乎無法則陝郡亦不可守得之何益而去榮末技陝郡不以之存亡王法有無國家乃爲之輕重此臣等所以區區願陛下守貞觀之法上竟捨之（陝郡今陝州）

秋七月尹子奇復徵兵數萬攻睢陽先是許遠於城中積糧至六萬號王巨以其半給濮陽濟陰一郡遠固爭之不能得旣而濟陰得糧遂以城叛而睢陽城至是食盡將士人廩米日一合雜以茶紙樹皮爲食而賊糧運通兵敗復徵睢陽將士死不加益諸軍餉救不至士卒消耗至一千六百人皆飢病不堪鬪遂爲賊所圍張巡乃修守具以拒之賊爲雲梯勢如半虹（杜佑曰以大木爲牀下置六輪上立雙牙牙有檢梯節長丈二尺有四桄桄相去四尺勢微回遞互相檢飛於雲間以窺城中有上城梯首冠雙轆轤枕城而上謂之飛雲梯）置精卒二百於其上推之臨城欲令騰入巡豫於城鑿三穴候梯將至於一穴中出大木末置鐵鉤鉤之使不得退一穴中出一木柱之使不得進穴中出一木末置鐵籠盛火焚之其梯中折梯上卒盡燒死賊又以鉤車鉤城上棚閣（胡氏曰棚閣者於城上架木爲棚跳出城外四五尺許上有屋宇以蔽風雨士居之以臨禦外敵今人謂之敵樓

（）鉤之所及莫不崩陷巡以大木末置連鑣鑣末置大鑿搗其鉤頭以革車拔之入城截其鉤頭而縱車令去賊又造木驢攻城巡鎔金汁灌之應投銷鑠賊又於城西北隅以土囊積柴爲磴道欲登城巡不與爭利每夜潛以松明乾蒿投之於中積十餘日賊不之覺因出軍大戰使人順風持火焚之賊不能救經二十餘日火方滅巡之所爲皆應機立辦賊服其智不敢復攻遂於城外穿三重壕立木棚以守巡亦於內作壕以拒之

睢陽士卒死傷之餘纔六百人張巡許遠分城而守之巡守東北遠守西南與士卒同食茶紙不復下城賊士攻城者巡以逆順說之往往棄賊來降爲巡死戰前後二百餘人是時許叔冀在譙郡尙衡在彭城賀蘭進明在臨淮皆擁兵不救城中日蹙巡乃令南霽雲將三十騎犯圍而出告急於臨淮霽雲出城賊衆數萬遮之霽雲直衝其衆左右馳射賊衆披靡止亡兩騎既至臨淮見進明曰今日睢陽不知存亡兵去何益霽雲曰睢陽若陷霽雲請以死謝大夫且睢陽旣拔卽及臨淮譬如皮毛相依安得不救進明愛霽雲勇壯不聽其語強留之具食與樂延霽雲坐霽雲慷慨泣且語曰霽雲來睢陽之人不食月餘矣霽雲雖欲獨食且不下咽大夫坐擁彊兵觀睢陽陷沒曾無分災救患之意豈忠臣義士之所爲乎因齧落一指以示進明曰霽雲旣不能達主將之意請留一指以示信歸報座中往往爲泣下霽雲察進明終無出師意遂去至甯陵與城使廉坦同將步騎三千人閏月戊申夜冒圍且戰且行至城下大戰壞賊營死傷之外僅得千人入城中將吏知無救皆慟哭賊知援絕圍之益急初房瑄爲相惡賀蘭進明以爲河南節度使以許叔冀爲進明都知兵馬使俱兼御史大夫叔冀自恃麾下

精銳且官與進明等不受其節制故進明不敢分兵非惟疾巡遠功名亦懼爲叔冀所襲也（胡氏曰史言房琯以私憾進明用許叔冀以制其肘腋使不敢分兵救巡遠然以進明之才借使出兵亦未必能制勝）

賊屢攻上黨常爲節度使程千里所敗蔡希德復引兵圍上黨九月丁丑希德以輕騎至城下挑戰千里帥百騎開門突出欲擒之會救至收騎退還橋壞墜塹中反爲希德所擒（胡氏曰爲將者不可恃勇輕脫程千里欲擒蔡希德反爲希德所擒恃勇輕脫之禍也）仰謂從騎曰吾不幸至此天也歸語諸將善爲守備甯失帥不可失城希德攻城竟不克送千里於洛陽安慶緒以爲特進囚之客省（上黨今潞安府）

郭子儀以回紇兵精勸上益徵其兵以擊賊懷仁可汗遣其子葉護等將精兵四千餘人來至鳳翔上引見葉護宴勞賜賚惟其所欲丁亥元帥廣平王俶將朔方等軍及回紇西域之衆十五萬號二十萬發鳳翔俶見葉護約爲兄弟葉護大喜謂俶爲兄回紇至扶風郭子儀留宴三日葉護曰國家有急遠來相助何以食爲宴畢卽行日給其軍羊二百口牛二十頭米四十斛庚子諸軍俱發壬寅至長安西陳於香積寺北澧水之東（胡氏曰子儀先敗於清渠至此則循南山出都城後據地勢以待之也）李嗣業爲前軍郭子儀爲中軍王思禮爲後軍賊衆十萬陳於其北李歸仁出挑戰官軍逐之逼於其陳賊軍齊進官軍卻爲賊所乘軍中驚亂賊爭趣輜重李嗣業曰今日不以身餌賊軍無子遺矣乃肉袒執長刀立於陳前大呼奮擊當其刀者人馬俱碎殺數十人陳乃稍定於是嗣業帥前軍各執長刀如牆而進身先士卒所向摧靡都知兵馬使王難得救其裨將賊射之中眉皮垂郭

目難得自拔箭墜云其皮血流被面前戰不已賊伏精騎於陳東欲襲官軍之後偵者知之朔方左廂兵馬使僕固懷恩引回紇就擊之翦滅殆盡賊由是氣索李嗣業又與回紇出賊陳後與大軍夾擊自午及酉斬首六萬級填溝塹死者甚衆賊遂大潰餘衆走入城迨夜囂聲不止僕固懷恩言於廣平王俶曰賊棄城走矣請以二百騎追之縛取安守忠李歸仁等俶曰將軍戰亦疲矣且休息俟明日圖之懷恩曰歸仁守忠賊之驍將驟勝而敗此天賜我也奈何縱之使復得衆還爲我患悔之無及戰尙神速何明且也俶固止之使還營懷恩固請往而復反一夕四五起遲明諜至守忠歸仁與張通儒田乾真皆已遁矣（胡氏曰廣平王若用僕固懷恩之言固不假新店之戰可以徑取東京矣）癸卯大軍入西京初上欲速得京師與回紇約曰克城之日土地士庶歸唐金帛子女皆歸回紇至是葉護欲如約廣平王俶拜於葉護馬前曰今始得西京若遽俘掠則東京之人皆爲賊固守不可復取矣願至東京乃如約葉護驚躍下馬答拜跪捧王足曰當爲殿下徑往東京卽與僕固懷恩引回紇西域之兵自城南過營於澇水之東百姓軍士胡虜見俶拜皆泣曰廣平王眞華夷之主上聞之喜曰朕不及也俶整衆入城百姓老幼夾道歡呼悲泣俶留長安鎮撫三日引大軍東出以太子少傅號王巨爲西京留守甲辰捷書至鳳翔百寮入賀上涕泗交頤卽日遣中使啖庭瑤入蜀奏上皇命左僕射裴冕入京師告郊廟及宣慰百姓（香積寺在長安城南澇水在長安東）

尹子奇久圍睢陽城中食盡議棄城東走張巡許遠謀以爲睢陽江淮之保障若棄之去賊必乘勝長驅是無江

淮也（胡氏曰考異言唐人皆以全江淮爲巡遠功按睢陽雖當江淮之路城旣被圍賊若欲取江淮繞出其外睢陽讀能障之哉蓋巡善用兵賊畏巡爲後患不滅巡則不敢越過其南耳）且我衆飢羸走必不達古者戰國諸侯尙相救恤况密邇羣帥乎不如堅守以待之茶紙旣盡遂食馬馬盡羅雀掘鼠又盡巡出愛妾殺以食士遠亦殺其奴然後括城中婦人食之繼以男子老弱人知必死莫有叛者所餘纔四百人冬十月癸丑賊登城將士病不能戰城遂陷巡遠俱被執尹子奇問巡曰聞君每戰皆裂齒碎何也巡曰吾志吞逆賊但力不能耳子奇以刀抉其口視之所餘纔三四子奇義其所爲欲活之其徒曰彼守節者也終不爲用且得士心存之將爲後患乃并南霽雲雷萬春等三十六人皆斬之巡且死顏色不亂揚揚如常生致許遠於洛陽初巡守睢陽時卒僅萬人城中居人亦且數萬巡一見問姓名其後無不識者前後大小戰凡四百餘殺賊卒十二萬人巡行兵不依古法教戰陳令本將各以其意教之人或問其故巡曰今與胡虜戰雲合鳥散穆能不恆數步之間勢有同異臨機應猝在於呼吸之間而動詢大將事不相及非知兵之變者也故吾使兵識將意將識士情投之而往如手之使指兵將相習人自爲戰不亦可乎自興兵器械甲仗皆取之於敵未嘗自修每戰將士或退散巡立於戰所謂將士曰我不離此汝爲我還決之將士莫敢不還死戰卒破敵又推誠待人無所疑隱臨敵應變出奇無窮號令明賞罰信與衆共甘苦寒暑故下爭致死力張鎬聞睢陽圍急倍道而進檄浙東浙西淮南北海諸節度及譙郡太守閻邱曉使其救之曉素傲很不受鎬命比鎬至睢陽城已陷三日鎬召曉杖殺之

張通儒等收餘衆走保陝安慶緒悉發洛陽兵使其御史大夫嚴莊將之就通儒以拒官軍并舊兵步騎猶十五萬己未廣平王至曲沃回紇葉護使其將軍鼻施吐撥裴羅等引軍旁南山搜伏因駐軍嶺北郭子儀等與賊遇於新店賊依山而陳子儀等初與之戰不利賊逐之下山回紇自南山襲其背於黃埃中發十餘矢賊驚顧曰回紇至矣遂潰官軍與回紇夾擊之賊大敗僵尸蔽野嚴莊張通儒等棄陝東走廣平王俶郭子儀入陝城僕固懷恩等分道追之嚴莊先入洛陽告安慶緒慶緒帥其黨自苑門出走河北壬戌廣平王俶入東京回紇縱兵大掠意猶未厭俶患之父老請率羅錦萬匹以賂回紇回紇乃止（曲沃城在靈寶縣蓆水之東新店在陝州西偃師縣屬河南府）

郭子儀遣左兵馬使張用濟右武鋒使渾釋之將兵取河陽及河內嚴莊來降陳留人殺尹子奇舉郡降田承嗣圍來瑱於潁川亦遣使來降郭子儀應之緩承嗣復叛與武令珣皆走河北制以瑒爲河南節度使安慶緒走保鄴郡改鄴郡爲安成府改元天成從騎不過三百步卒不過千人諸將阿史那承慶等散投常山趙郡范陽旬日間蔡希德自上黨田承嗣自潁川武令珣自南陽各帥所部兵歸之又召募河北諸郡人衆至六萬軍聲復振（河陽今孟縣也河內今懷慶府陳留縣屬開封府潁川卽許州田承嗣應之一緩卽爲大患故兵機貴拙速鄴郡今彰德府）

安慶緒之北走也其大將北平王李歸仁及精兵曳落河同羅六州胡數萬人皆潰歸范陽所過俘掠人物無遺

史思明厚爲之備且遣使逆招之范陽境曳落河六州胡皆降同羅不從思明縱兵擊之同羅大敗悉奪其所掠餘衆走歸其國慶緒忌思明之彊遣阿史那承慶安守忠往徵兵因密圖之判官耿仁智說思明曰大夫崇重人莫敢言仁智願一言而死思明曰何也仁智曰大夫所以盡力於安氏者迫於凶威耳今唐室中興天子仁聖大夫誠帥所部歸之此轉禍爲福之計也裨將烏承玘亦說思明曰今唐室再造慶緒葉上露耳大夫奈何與之俱亡若歸款朝廷以自湔洗易於反掌耳思明以爲然承慶守忠以五千勁騎自隨至范陽思明悉衆數萬逆之相距一里所使人謂承慶等曰相公及王遠至將士不勝其喜然邊兵怯懼相公之衆不敢進願弛弓以安之承慶等從之思明引承慶入內廳樂飲別遣人收其甲兵諸郡兵皆給糧縱遣之願留者厚賜分隸諸營明日囚承慶等遣其將竇子昂奉表以所部十三郡及兵八萬來降并帥其河東節度使高秀巖亦以所部來降子昂至京師上大喜以思明爲歸義王范陽節度使子七人皆除顯官遣內侍李思敬與烏承恩往宣慰使將所部兵討慶緒先是慶緒以張忠志爲常山太守思明召忠還范陽以其將薛寧攝恆州刺史開井陘路招趙郡太守陸濟降之命其子朝義將兵五千人攝冀州刺史以其將令狐彰爲博州刺史烏承恩所至宣布詔旨滄瀛安深德棣等州皆降雖相州未下河北率爲唐有矣（胡注所疏十三郡范陽今順天府北平今永平府媯川今保安州密雲今密雲縣漁陽今薊州柳城今上默特右翼旗文安今任邱縣北河開今河開府上谷今易州博陵今定州勃海今滄州饒陽今饒陽縣常山今正定府也河東太原府也恆州常山也井陘路井陘關路也趙郡今趙州冀州今

仍曰冀州博州今東昌府瀛卽河間深州德州今不改隸今武定府相州今彰德府安慶緒所據也

乾元元年 張鎬性簡澹不事中要聞史思明請降上言思明凶險因亂竊位力疆則衆附勢奪則人離彼雖人面心如野獸難以德懷願勿假以威權又言滑防禦使許叔冀狡滑多詐臨難必變請徵入宿衝（胡氏曰思明叔冀後皆如鎬言）時上已寵納思明會中使白范陽及白馬來皆言思明叔冀忠懇可信上以鎬爲不切事機夏五月戊子罷爲荊州防禦使以禮部尙書崔光遠爲河南節度使（范陽思明所據今順天白馬卽滑州今滑縣）

初史思明以列將事平盧軍使烏知義知義善待之知義子承恩爲信都太守以郡降思明思明恩舊恩而全之及安慶緒敗承恩勸思明降唐李光弼以思明終當叛亂而承恩爲思明所親信陰使圖之又勸上以承恩爲范陽節度副使賜阿史那承慶鐵券令共圖思明上從之承恩多以私財募部曲又數衣婦人服詣諸將營說誘之諸將以白思明思明疑未察會承恩入京師上使內侍李思敬與之俱至范陽宣慰承恩旣宣旨思明留承恩館於府中帷其牀伏二人於牀下承恩少子在范陽思明使省其父夜中承恩密謂其子曰吾受命除此逆胡當以吾爲節度使二人於牀下大呼而出思明乃執承恩索其裝囊得鐵券及光弼牒牒云承慶事成則付鐵券不然不可付也又得簿書數百紙皆先從思明反者將士名（胡氏曰烏承恩持鐵券入不測之虜使阿史那承慶之事不成承恩其能奉鐵券以還天子乎使思明果授首則宜宥其同惡而先籍其姓名果能悉誅之乎余謂李光

弼之明智必不爲此蓋思明因承恩言僞爲此牒抗表以罪狀光弼又僞爲簿書籍將士姓名以激怒之使與已同反而無他志）思明責之曰我何負於汝而爲此承恩謝曰死罪此皆李光弼之謀也思明乃集將佐吏民西向大哭曰臣以十三萬衆降朝廷何負陛下而欲殺臣遂榜殺承恩父子連坐死者二百餘人承恩弟承瓚走免思明囚思敬表上其狀上遣中使慰諭思明曰此非朝廷與光弼之意皆承恩所爲殺之甚善會三司議陷賊官罪狀至范陽思明謂諸將曰陳希烈輩皆朝廷大臣上皇自棄之幸蜀今猶不免於死况吾屬本從安祿山反乎（胡氏曰思明又以此激怒其將士）諸將請思明表求誅光弼思明從之命判官耿仁智與其僚張不矜爲表云陛下不爲臣誅光弼臣當自引兵就太原誅之不矜草表以示思明及將入函仁智悉削去之寫表者以白思明思明命執二人斬之仁智事思明久思明憐欲活之復召入謂曰我任使汝垂三十年今日非我負汝仁智大呼曰人生會有一死得盡忠義死之善者也今從大夫反不過延歲月豈若速死之愈乎思明怒亂捶之腦流於地烏承瓚奔太原光弼表爲昌化郡王充石嶺軍使（此見受降難待之愈難非開誠心布公道不可）

安慶緒之初至鄴也雖枝黨離析猶據七郡六十餘城甲兵資糧豐備慶緒不親政事專以繕臺沼樓船酣飲爲事其大臣高尙張通儒等爭權不叶無復綱紀蔡希德有才略部兵精銳而性剛好直言通儒譖而殺之麾下數千人皆逃散諸將怨怒不爲用以崔乾祐爲天下兵馬使總中外兵乾祐復戾好殺士卒不附九月庚寅命朔方郭子儀淮西魯吳興平李旻滑濮許叔冀鎮西北庭李嗣業鄭蔡季廣琛河南崔光遠七節度使及平盧兵馬使

董秦將步騎二十萬討慶緒又命河東李光弼關內澤潞王思禮二節度使將所部兵助之上以子儀光弼皆元勳難相統屬故不置元帥（胡氏曰諸軍並行步騎數十萬而不置元帥號令不一所以有安陽之敗）但以宦官開府儀同三司魚朝恩爲觀軍容宣慰處置使觀軍容之名自此始（胡疏七郡云汲者今衛輝府鄴今彰德府趙今趙州魏今大名府平原今陵縣清河今清河縣博平今東昌府朔方軍今甯夏府河東北諸地淮西今汝甯光州興平今渭水以北鄜州中部等地滑濮今滑縣開州等地鎮西北庭今回疆地鄭蔡今鄭州上蔡新蔡等地平盧謂土默特右翼地河東今太原澤潞今澤州潞安二府）

郭子儀引卒自杏園濟河東至獲嘉破安太清斬首四千級捕虜五百人太清走保衛州子儀進圍之冬十月丙午遣使告捷魯吳自陽武濟季廣琛崔光遠自酸棗濟與李嗣業兵皆會子儀於衛州慶緒悉舉鄴中之衆七萬救衛州分三軍以崔乾祐將上軍田承嗣將下軍慶緒自將中軍子儀使善射者三千人伏於壘垣之內令曰我退賊必逐我汝乃登壘鼓譟而射之旣而與慶緒戰僞退賊逐之至壘下伏兵起射之矢如雨注賊還走子儀復引兵逐之慶緒大敗獲其弟慶和殺之遂拔衛州慶緒走子儀等追之至鄴許叔冀董秦王思禮及河東兵馬使薛兼訓皆引兵繼至慶緒收餘兵拒戰於愁思岡又敗前後斬首三萬級捕虜千人慶緒乃入城固守子儀等圍之慶緒窘急遣薛嵩求救於史思明且請以位讓之思明發范陽兵十三萬欲救鄴觀望未敢進先遣李歸仁將步騎一萬軍於滏陽遙爲慶緒聲勢（杏園在汲縣東南獲嘉縣在其西南九十里衛州治汲縣陽武屬懷慶府

酸棗今延津縣愁思岡在彰德府西南十五里滏陽今磁州）

十一月崔光遠拔魏州丙戌以前兵部侍郎蕭華爲魏州防禦使會史思明分軍爲三一出邢洛一出冀貝一自洹水趣魏州郭子儀奏以崔光遠代華十二月癸卯敕以光遠領魏州刺史史思明乘崔光遠初至引兵大下光遠使將軍李處崟拒之賊勢盛處崟連戰不利還趣城賊追至城下揚言曰處崟召我來何爲不出光遠信之腰斬處崟處崟驍將衆所恃旣死衆無鬪志（胡氏曰姚聳夫若在未必能爲宋保守河南而聳夫之死宋人惜之李處崟若在未必能爲唐保守魏州而處崟之死唐人惜之以兩敵相持而自戮鬪將乃自翦其手足也）光遠脫身走還汴州丁卯思明陷魏州所殺三萬人（魏州今大名府邢洛今順德廣平二府冀貝今冀州清河洹水今臨漳縣東北）

二年春正月史思明築壇於魏州城北自稱大聖燕王以周摯爲行軍司馬李光弼曰思明得魏州而按兵不進此欲使我懈惰而以精銳掩吾不備也請與朔方軍同逼魏城求與之戰彼懲嘉山之敗必不敢輕出得曠日引久則鄴城必拔矣慶緒已死彼則無辭以用其衆也魚朝恩以爲不可乃止（胡氏曰使用光弼之計安有滏水之潰乎）

鎮西節度使李嗣業攻鄴城爲流矢所中丙申卒兵馬使荔非元禮代將其衆初嗣業表段秀實爲懷州長史知留後事時諸軍屯戍日久財竭糧盡秀實獨運芻粟募兵市馬以奉鎮西行營相繼於道

郭子儀等九節度使圍鄴城築壘三重穿塹三重壅漳水灌之城中井泉皆溢構棧而居自冬涉春安慶緒堅守以待史思明食盡一鼠直錢四十洵齷齪及馬矢以食馬人皆以爲克在朝夕而諸軍旣無統帥進退無所稟城中人欲降者礙水深不得出城久不下上下解體（胡氏曰師老勢屈故解體）思明乃自魏州引兵趨鄴（胡氏曰果如李光弼之言）使諸將去城各五十里爲營每營擊鼓三百面遙脇之又每營選精騎五百日於城下鈔掠官軍出輒散歸其營諸軍人馬牛車日有所失樵採甚艱晝備之則夜至夜備之則晝至時天下饑饉轉餉者南自江淮西自并汾舟車相繼思明多遣壯士竊官軍裝號督趣運者責其稽緩妄殺戮人運者駭懼舟車所聚則密縱火焚之往復聚散自相辨識而官軍邏捕不能察也由是諸軍乏食人思自潰思明乃引大軍直抵城下官軍與之刻日決戰三月壬申官軍步騎六十萬陳於安陽河北思明自將精兵五萬敵之諸軍望之以爲遊軍未介意思明直前奮擊李光弼王思禮許叔冀魯炆先與之戰殺傷相半魯炆中流矢郭子儀承其後未及布陳大風忽起吹沙拔木天地晝晦咫尺不相辨兩軍大驚官軍潰而南賊潰而北棄甲仗輜重委積於路（胡氏曰史言溢水之戰天未悔禍非戰之罪使皆如李光弼王思禮在亂能整則其死亡不至於甚）子儀以朔方軍斷河橋保東京戰馬萬匹惟存三千甲仗十萬遺棄殆盡東京士民驚駭散奔山谷留守崔圓河南尹蘇震等官吏南奔襄鄧諸節度各潰歸本鎮士卒所過剽掠吏不能止旬日方定惟李光弼王思禮整勒部伍全軍以歸子儀至河陽將謀城守師人相驚又奔缺門諸將繼至衆及數萬議捐東京退保蒲陝（胡氏曰蒲陝二州夾河潼

關控其險可以禦敵故議退保之）都虞候張用濟曰蒲陝薦饑不如守河陽賊至併力拒之子儀從之使都遊奕使靈武韓遊瓌將五百騎前趣河陽用濟以步卒五千繼之周摯引兵爭河陽後至不得入而去用濟役所部兵築南北兩城而守之段秀實帥將士妻子及公私輜重自野戍渡河待命於河清之南岸荔非元禮至而軍焉諸將各上表謝罪上皆不問惟削崔圓階封貶蘇震爲濟王府長史削銀青階史思明審知官軍潰去自沙河收整士衆還屯鄴城南（胡氏曰史思明之兵潰而北去至沙河知官軍的去乃收整其衆而南使官軍於滏水驚潰之後各能收兵還營堅壁而圍守鄴城思明未敢南也）安慶緒收子儀營中糧得六七萬石慶緒以三百騎詣思明營思明令軍士擐甲執兵以待之慶緒及諸弟入至庭下思明命左右牽慶緒出并其四弟及高尙孫孝哲崔乾祐皆殺之張通儒李庭望等悉授以官思明勒兵入鄴城收其士馬以府庫賞將士慶緒先所有州縣及兵皆歸於思明遣安太清將兵五千取懷州因留鎮之思明欲遂西略盧根本未固乃留其子朝義守相州引兵還范陽（安陽河安陽城之滏水也斷河陽橋保東京者鄴在河北由盟津河橋南至河南府也缺門山在新安縣河陽城在河北野水戍當在今孟縣南河清縣在孟津縣沙河縣今屬順德府）觀軍容使魚朝恩惡郭子儀因其敗短之於上秋七月上召子儀還京師以李光弼代爲朔方節度使兵馬元帥士卒涕泣遮中使請留子儀子儀給之曰我餞中使耳未行也因躍馬而去光弼願得親王爲之副幸已以趙王係爲天下兵馬元帥光弼副之仍以光弼知諸節度行營光弼以河東騎五百馳赴東都夜入其軍光弼治軍嚴

整始至號令一施士卒壁壘旌旗精采皆變是時朔方將士樂子儀之寬憚光弼之嚴左廂兵馬使張用濟屯河陽光弼以檄召之用濟自朔方北叛軍也乘夜而入何見疑之甚邪與諸將謀以精銳突入東京遂光弼請子儀命其士皆被甲上馬銜枚以待都知兵馬使僕固懷恩曰鄴城之潰郭公先去朝廷責帥故罷其兵柄今遂李公而彊請之是反也其可乎右武鋒使康元寶曰君以兵請郭公朝廷必疑郭公諷君爲之是破其家也郭公百口何負於君乎用濟乃止光弼以數千騎東出汜水用濟單騎來謁光弼責用濟召不時至斬之命部將辛京杲代領其衆僕固懷恩繼至光弼引坐與語須臾闈者自蕃渾五百騎至矣光弼變色懷恩走出召麾下將陽責之曰語汝勿來何得固違光弼曰士卒隨將亦復何罪命給牛酒

九月史思明使其子朝清守范陽命諸郡太守各將兵三千從已同河南分爲四道使其將令狐彰將兵五千自黎陽濟河取滑州思明自濮陽史朝義自白皋周摯自胡良濟河會於汴州李光弼方巡河上諸營聞之還入汴州謂汴滑節度使許叔冀曰大夫能守汴州十五日我則將兵來救叔冀許諾光弼還東京思明至汴州叔冀與戰不勝遂與濮州刺史董秦及其將梁浦劉從諫田神功等降之思明以叔冀爲中書令與其將李詳守汴州厚待董秦收其妻子置長蘆爲質使其將南德信與梁浦劉從諫田神功等數十人徇江淮神功南宮人也思明以爲平盧兵馬使頃之神功襲德信斬之從諫脫身走神功將其衆來降思明乘勝西攻鄭州光弼整衆徐行至洛陽謂留守韋陟曰賊乘勝而來利在按兵不利速戰洛城不可守公計何如陟請留兵於陝退守潼關據險以挫

其銳光弼曰兩敵相當貴進忌退今無故棄五百里地則賊勢益張矣若移軍河陽北連澤潞利則進取不利則退守表裏相應使賊不敢西侵此猿臂之勢也（胡氏曰猿臂可伸而長可縮而短故以爲喻）夫辨朝廷之禮光弼不如公論軍旅之事公不如光弼陟無以應判官韋損曰東京帝宅侍中奈何不守光弼曰守之則汜水崆嶺龍門皆應置兵子爲兵馬判官能守之乎遂移牒留守韋陟使帥東京官屬西入關牒河南尹李若幽使帥吏民出城避賊空其城光弼帥軍士運油鐵諸物詣河陽爲守備光弼以五百騎殿時思明遊兵已至石橋諸將請曰今自洛城而北乎當石橋而進乎光弼曰當石橋而進及日暮光弼秉炬徐行部曲堅重賊引兵躡之不敢逼（胡氏曰躡之者欲其兇懼而自潰不敢逼者以其嚴整而難犯）光弼夜至河陽有兵二萬（胡氏曰郭子儀自澄水退守河陽衆及數萬及李光弼至河陽有兵二萬何衆寡之相懸乎蓋張用濟之死朔方士卒畏威而逃散者多也）糧纔支十日光弼按閱守備部分士卒無不嚴辦庚寅思明入洛陽城空無所得畏光弼捨其後不敢入宮退屯白馬寺南築月城於河陽以拒光弼（胡氏曰史思明乘鏡勝以攻河陽乃先築月城者恐戰有邂逅也）於是鄭滑等州相繼陷沒韋陟李若幽皆寓治於陝（黎陽最在西南自臬胡良次之濮陽在東北皆今濬縣滑縣開州界內長蘆今天津府青縣胡氏曰汜水有成皋之險崆嶺在登封縣龍門則伊闕按光弼以兵少不能分也石橋在洛城東參觀鄴城之潰河陽之保可見治軍寬嚴之效異）

冬十月史思明引兵攻河陽使驍將劉龍仙詣城下挑戰龍仙恃勇舉右足加馬鬣上慢罵光弼光弼顧諸將曰

誰能取彼者僕固懷恩請行光弼曰此非大將所爲左右言裨將白孝德可往光弼召問之孝德請行光弼問須幾何兵對曰請挺身取之光弼壯其志然固問所須對曰願選五十騎出壘門爲後繼兼請大軍助鼓譟以增氣光弼撫其背而遣之（胡氏曰旣賞其勇而尤賞其有取敵之方略）孝德挾二矛策馬亂流而進半涉懷恩賀曰克矣光弼曰鋒未交何以知之懷恩曰觀其攬轡安閑知其萬全龍仙見其獨來甚易之稍近將動孝德搖手示之若非來爲敵者龍仙不測而止去之十步乃與之言龍仙慢罵如初孝德息馬良久因瞋目謂曰賊識我乎龍仙曰誰也曰我白孝德也龍仙曰是何狗彘孝德大呼運矛躍馬搏之城上鼓譟五十騎繼進龍仙矢不及發環走隄上孝德追及斬首攜之以歸（胡氏曰龍仙恃勇輕敵而孝德出其不意搏之故勝）賊衆大駭孝德本安西胡人也思明有良馬千餘匹每日出於河南洛洛之循環不休以示多光弼命索軍中牝馬得五百匹繫其駒於城內俟思明馬至水際盡出之馬嘶不已思明馬悉浮渡河一時驅之入城（胡氏曰牡馬慕牝一時渡河此小術耳思明不能制阻河水也）思明怒列戰船數百艘泛火船於前而隨之欲乘流燒浮橋光弼先貯百尺長竿數百枚以巨木承其根氈裹鐵又置其首以迎火船而叉之船不得進須臾自焚盡又以叉拒船於橋上發礮石擊之中者皆沈沒賊不勝而去思明見兵於河清欲絕光弼糧道光弼軍於野水渡以備之旣夕還河陽留兵千人使部將雍希顥守其柵曰賊將高庭暉李日越喻文景皆萬人敵也思明必使一人來劫我我且去之汝待於此若賊至勿與之戰降則與之俱來諸將莫諭其意皆竊笑之旣而思明果謂李日越曰李光弼長於憑城今出

在野此成擒矣汝以鐵騎宵濟爲我取之不得則勿返日越將五百騎晨至柵下希顓阻壕休卒吟嘯相視日越怪之問曰司空在乎曰夜去矣兵幾何曰千人將誰曰雍希顓日越默計久之謂其下曰今失李光弼得希顓而歸吾死必矣不如降也遂請降希顓與之俱見光弼光弼厚待之任以心腹高庭暉聞之亦降或問光弼曰降二將何易也光弼曰此人情耳思明常恨不得野戰聞我在外以爲必可取日越不獲我勢不敢歸庭暉才勇過於日越聞日越被寵任必思奪之矣（胡氏曰此謂之善用兵其所短孫臆有言善戰者因其勢而利導之）庭暉時爲五臺府果毅已亥以庭暉爲右武衛大將軍思明復攻河陽光弼謂鄭陳節度使李抱玉曰將軍能爲我守南城二日乎抱玉曰過期何如光弼曰過期救不至任棄之抱玉許諾勒兵拒守城且陷抱玉給之曰吾糧盡明日當降賊喜斂軍以待之抱玉繕完城備明日復請戰賊怒急攻之抱玉出奇兵表裏夾擊殺傷甚衆董秦從思明寇河陽夜帥其衆五百拔柵突圍降於光弼時光弼日將屯中潭城外置柵柵外穿塹深廣二丈（胡氏曰中河起石潭築城以衛河橋）乙巳賊將周摯捨南城併力攻中潭光弼命荔非元禮出勁卒於羊馬城以拒賊（胡氏曰城外別築短垣高纔及肩謂之羊馬城）光弼自於東北隅建小朱旗以望賊賊恃其衆直進逼城以車載攻具自隨督衆填塹三面各八道以過兵又開柵爲門光弼望賊逼城使問元禮曰中丞視賊填塹開柵過兵晏然不動何也元禮曰司空欲守乎戰乎光弼曰欲戰元禮曰欲戰則賊爲吾填塹何爲禁之光弼曰善吾所不及勉之（胡氏曰雖賞其敢戰而戰危事也故曰勉之）元禮俟柵開帥敢死士突出擊賊卻走數百步元禮度

賊陳堅未易摧陷乃復引退須其怠而擊之光弼望元禮退怒遣左右召欲斬之元禮曰戰正急召何爲乃退入柵中賊亦不敢逼良久鼓譟出柵門奮擊破之周摯復收兵趣北城光弼遽帥衆入北城登城望賊曰賊兵雖多翼而不整不足畏也不過日中保爲諸君破之乃命諸將出戰及期不決召諸將問曰向來賊陳何方最堅曰西北隅光弼命其將郝廷玉當之廷玉請騎兵五百與之三百又問其次堅者曰東南隅光弼命其將論惟貞當之惟貞請鐵騎三百與之二百光弼令諸將曰爾曹望吾旗而戰吾麾旗緩任爾擇利而戰吾急麾旗三至地則萬衆齊入死生以之少退者斬又以短刀置韉中曰戰危事吾國之三公不可死賊手萬一戰不利諸君前死於敵我自剄於此不令諸君獨死也諸將出戰頃之廷玉奔還光弼望之驚曰廷玉退吾事危矣命左右取廷玉首廷玉曰馬中箭非敢退也使者馳報光弼令易馬遣之僕固懷恩及其子瑒戰小卻光弼又命取其首懷恩父子顧見使者提刀馳來更前決戰光弼連颺其旗諸將齊進致死呼聲動天地賊衆大潰（胡氏曰史言河陽之戰眞爲確鬪非李光弼督諸將致死不足以決勝）斬首千餘級捕虜五百人溺死者千餘人周摯以數騎遁去擒其大將徐璜玉李秦授其河南節度使安太清走保懷州思明不知摯敗尙攻南城光弼驅俘囚臨河示之乃遁丁巳以李日越爲右金吾大將軍（野水渡在孟縣東南河清縣在其西皆南臨大河南城河陽有三城此在南也中潭城在河之中渚北城在其北河陽三城所以禦兵之北來攻洛陽者也皆在今孟縣）

襄州將康楚元等據州作亂衆至萬餘人十一月商州刺史韋倫發兵討之駐於鄧州之境招諭降者厚撫之伺

其稍怠進軍擊之生擒楚元其衆遂潰得其所掠租庸二百萬緡荆襄皆平

上元元年 九月甲午置南都於荊州以荊州爲江陵府仍置永平軍團練兵三千人以扼吳蜀之衝從節度使

呂誼之請也或上言天下未平不宜置郭子儀於散地乙未命子儀出鎮邠州党項遁去戊申制子儀統諸道兵

自朔方直取范陽還定河北發射生英武等禁軍及朔方鄜坊邠涇原諸道蕃漢兵共七萬人皆受子儀節度

制下旬日復爲魚朝恩所沮事竟不行（胡氏曰使郭子儀果總兵向范陽則史思明有內顧之憂李光弼成夾

攻之勢必無邠山之敗矣郭李成功則又必無樹置河北諸帥之禍矣按射生手如今十五善射英武其軍號也

朔方鄜坊邠涇原四道也自朔方緣邊外至范陽自屬兵家正法當時不行則宦官之爲也）

御史中丞李銑宋州刺史劉展皆領淮西節度副使銑貪暴不法展剛彊自用故爲其上者多惡之節度使王仲

昇先奏銑罪而誅之時有謠言曰手執金刀起東方仲昇使監軍使邢延恩入奏展偏彊不受命姓名應謠讖請

除之延恩因說上曰展與李銑一體之人今銑誅展不自安苟不去之恐其爲亂然展方握彊兵宜以計去之請

除展江淮都統代李暉俟其釋兵赴鎮中道執之此一夫力耳上從之冬十一月以展爲都統淮南東江南西浙

西三道節度使密勅舊都李暉及淮南東道節度使鄧景山圖之延恩以制書授展展疑之曰展自陳留參軍數

年至刺史可謂暴貴矣江淮租賦所出今之重任展無勳勞又非親賢一旦恩命寵擢如此得非有讒人間之乎

因泣下延恩懼曰公素有才望主上以江淮爲憂故不次用公公反以爲疑何哉展曰事苟不歎印節可先得乎

延恩曰可乃馳詣廣陵與暉謀解暉印節以授展展得印節乃上表謝恩牒追江淮親舊置之心膂三道官屬遣使迎賀申圖籍相望於道展悉舉宋州兵七千趣廣陵延恩知展已得其情還奔廣陵與李暉鄧景山發兵拒之移檄州縣言展反展亦移檄言暉反州縣莫知所從暉引兵度江與副使潤州刺史韋儼浙西節度使侯令儀屯京口鄧景山將萬人屯徐城展素有威名御軍嚴整江淮人望風畏之展倍道先期至使人問景山曰吾奉詔書赴鎮此何兵也景山不應展使人呼於陳前曰汝曹皆吾民也勿干吾旗鼓使其將孫待封張法雷擊之景山衆潰與延恩奔壽州展引兵入廣陵遣其將屈突孝標將兵三千徇濠楚王暉將兵四千略淮西李暉闢北固爲兵場插木以塞江口展軍於白沙設疑兵於瓜洲多張火鼓若將趣北固者如是累日暉悉銳兵守京口以待之展乃自上流濟襲下蜀暉軍聞之自潰暉奔宣城展陷潤州昇州軍士萬五千人謀應展攻金陵城不克而遁侯令儀懼以後事授兵馬使姜昌羣棄城走昌羣遣其將宗犀詣展降展陷昇州以宗犀爲潤州司馬丹陽軍使使昌羣領昇州以從子伯瑛佐之（宋州今歸德府廣陵今揚州府潤州今鎮江府卽京口也徐城今泗州壽州屬鳳陽府鳳陽卽濠州楚卽淮安府淮西潁州宿州也北固山在鎮江北對岸江北卽瓜洲瓜洲西則白沙今儀徵縣也又其上流則從黃天蕩至今句容縣北卽下蜀也宣城今甯國府昇州今江甯府）

李暉之去潤州也副使李藏用謂暉曰處人尊位食人重祿臨難而逃之非忠也以數十州之兵食三江五湖之險固不發一矢而棄之非勇也失忠與勇何以事君藏用請收餘兵竭力以拒之暉乃悉以後事授藏用十二月

藏用收散卒得七百人東至蘇州募壯士得二千人立柵以拒劉展展遣其將傅子昂宗犀攻宣州宣歙節度使鄭昊之棄城走李暉奔洪州李藏用與展將張景超孫待封戰於郁墅兵敗奔杭州景超遂據蘇州待封進陷湖州展以其將許驤爲潤州刺史李可封爲常州刺史楊持璧蘇州刺史待封領湖州事景超進逼杭州藏用使其將溫晁屯餘杭展以李晁爲泗州刺史宗犀爲宣州刺史傅子昂屯南陵將下江州徇江西於是屈突孝標陷濠楚州王暉陷舒和滁廬等州所向無不摧靡聚兵萬人騎三千橫行江淮開壽州刺史崔昭發兵拒之由是暉不得西止屯廬州初上命平廬兵馬使田神功將所部精兵五千屯任城鄧景山旣敗與邢延恩奏乞勅神功救淮南未報景山遣人趣之且許以淮南金帛子女爲賂神功及所部皆喜悉衆南下及彭城勅神功討展展聞之始有懼色自廣陵將兵八千拒之選精兵二千度淮擊神功於都梁山展敗走至天長以五百騎據橋拒戰又敗展獨與一騎亡度江神功入廣陵及楚州大掠殺商胡以千數城中地穿掘略徧（洪州今江西南昌府郁墅未詳疑澚墅之誤澚墅在蘇州西北蘇州杭州皆今府名餘杭在杭州西北四十五里泗州今直隸州南陵縣屬甯國府舒今安慶府和滁廬皆今州府名任城今濟甯州都梁山在盱眙縣天長縣在其南）

二年春正月張景超引兵攻杭州敗李藏用將李彊於石夷門孫待封自武康南出將會景超攻杭州溫晁據險擊敗之待封脫身奔烏程李可封以常州降丁未田神功使特進楊惠元等將千五人西擊王暉辛亥夜神功先遣特進范知新等將四千人自白沙濟西趣下蜀鄧景山將千人自海陵濟東趣常州神功與邢延恩將三千

人軍於瓜洲壬子濟江展將步騎萬餘陳於蒜山神功以舟載兵趣金山軍大風五舟飄抵金山下展屠其二舟沈其三舟神功不得度還軍瓜洲而范知新等兵已至下蜀展擊之不勝弟殷勸展引兵逃入海可延歲月展曰若事不濟何用多殺人父子乎死早晚等耳遂更率衆力戰將軍賈隱林射展中目而仆遂斬之劉殷許嶸等皆死楊惠元等擊破王暉於淮南虜引兵東走至常熟乃降孫待封詣李藏用降張景超聚兵至七千餘人聞展死悉以兵授張法雷使攻杭州景超逃入海法雷至杭州李藏用擊破之餘黨皆平平盧軍大掠十餘日安史之亂亂兵不及江淮至是其民始罹荼毒矣（石夷門疑卽餘杭縣之石澗鎮在杭州城西北也武康烏程常熟皆今縣名海陵今泰州蒜山鎮江府城西三里之銀山其北七里曰金山在江中平盧軍乃神功所將也江淮之禍邢延恩貽之）

或言洛中將士皆燕人久戍思歸上下離心擊之可破也陝州觀軍容使魚朝恩以爲信然屢言於上二月上勅李光弼等進取東京光弼奏稱賊鋒尙銳未可輕進朔方節度使僕固懷恩勇而復麾下皆蕃漢勁卒恃功多不法郭子儀寬厚曲容之每用兵臨敵倚以集事李光弼性嚴一裁之以法無所假貸懷恩憚光弼而心惡之乃附朝恩言東都可取由是中使相繼督光弼使出師光弼不得已使鄭陳節度使李抱玉守河陽與懷恩將兵會朝恩及神策節度使衛伯玉攻洛陽戊寅陳於邙山光弼命依險而陳懷恩陳於平原光弼曰依險則可以進可以退若平原戰而不利則盡矣思明不可忽也命移於險懷恩復止之史思明乘其陳未定進兵薄之官軍大敗死

者數千人軍資器械盡棄之光弼懷恩度河走保聞喜朝恩伯玉奔還陝抱玉亦棄河陽走河陽懷州皆沒於賊朝廷聞之大懼益兵屯陝（胡氏曰相州之敗邙山之敗皆魚朝恩爲之也唐不以覆軍之罪罪朝恩而罷郭李兵柄失刑甚矣按聞喜屬絳州光弼懷恩遠退至此何也）

寶應元年 絳州諸軍以糧賜不充剽掠不已朝廷憂其與太原亂軍合從連賊非新進諸將所能鎮服以郭子儀爲汾陽王知朔方河中北庭潞澤節度行營兼興平定國等軍副元帥發京師絹四萬匹布五萬端米六萬石以給絳軍子儀將行時上不豫羣臣莫得進見子儀請曰老臣受命將死於外不見陛下目不瞑矣上召入臥內謂曰河東之事一以委卿史朝義遣兵圍李抱玉於澤州子儀發定國軍救之乃去（太原以撫馭失所絳州以糧賜不充而亂）

初李國真治軍嚴朔方將士不樂皆思郭子儀故王元振因之作亂子儀至軍元振自以爲功子儀曰汝臨賊境輒害主將若賊乘其釁無絳州矣吾爲宰相豈受一卒之私耶五月庚辰收元振及其同謀四十人皆殺之辛雲京聞之亦推按殺鄧景山者數十人誅之由是河東諸鎮率皆奉法（胡氏曰郭子儀誅王元振而河東諸鎮皆奉法僕固懷恩分河北諸州授田承嗣等以成藩鎮之禍用人可不謹哉）

史朝義自圍宋州數月城中食盡將陷刺史李岑不知所爲遂城果毅開封劉昌曰倉中猶有麴數千斤請屑食之不過二十日李太尉必救我城東南隅最危昌請守之李光弼至臨淮諸將以朝義兵尙彊請南保揚州光弼

曰朝廷倚我以為安危我復退縮朝廷何望且吾出其不意賊安知吾之衆寡遂徑趣徐州使兗鄆節度使田神功進擊朝義大破之先是田神功既克劉展留連揚州未還太子賓客尙衡與左羽林大將軍殷仲卿相攻於兗鄆聞光弼至憚其威名神功遽還河南衡仲卿相繼入朝光弼在徐州惟軍旅之事自決之自餘衆務悉委判官張慘慘吏事精敏區處如流諸將白事光弼多令與慘議之諸將事慘如光弼由是軍中肅然東夏以甯先是田神功起偏裨爲節度使留前使判官劉位等於幕府神功皆平受其拜及見光弼與慘抗禮乃大驚徧拜位等曰神功出於行伍不知禮儀諸君亦胡爲不言成神功之過乎（胡氏曰史言武夫悍將可以禮化居其上者當以身作則按兗鄆州府鄆今東平州）

冬十月諸軍發陝州僕固懷恩與回紇左殺爲前鋒陝西節度使郭英乂神策觀軍容使魚朝恩爲殿自澠池入潞澤節度使李抱玉自河陽入河南等道副元帥李光弼自陳留入時雍王适爲天下兵馬元帥留陝州辛未懷恩等軍於同軌史朝義聞官軍將至謀於諸將阿史那承慶曰唐若獨與漢兵來宜悉衆與戰若與回紇俱來其鋒不可當宜退守河陽以避之朝義不從壬申官軍至洛陽北郊分兵取懷州癸酉拔之乙亥官軍陳於橫水賊衆數萬立柵自固懷恩陳於西原以當之遣驍騎及回紇並南山出柵東北表裏合擊大破之朝義悉其精兵十萬救之陳於昭覺寺官軍驟擊之殺傷甚衆而賊陳不動魚朝恩遣射生五曰人力戰賊雖多死者陳亦如初鎮西節度使馬璘曰事急矣（胡氏曰犯陳而不能陷引退必敗故曰事急）遂單騎奮擊奪賊兩牌（胡氏曰牌古

謂之楯晉宋閒謂之彭排南方以皮編竹爲之以捍敵北人以木爲之左傳樂祁以揚楯賈禍蓋北方以用木也尙矣）突入萬衆中賊左右披靡大軍乘之而入賊衆大敗轉戰於石榴園老君廟賊又敗人馬相蹂踐填尙書谷斬首六萬級捕虜二萬人朝義將輕騎數百東走懷恩進克東京及河陽城獲其中書令許叔冀王仲等承制釋之懷恩留回紇可汗營於河陽使其子右廂兵馬使瑒及朔方兵馬使高輔成帥步騎萬餘乘勝逐朝義至鄭州再戰皆捷朝義至汴州其陳留節度使張獻閉門拒之朝義奔濮州獻開門出降回紇入東京肆行殺略死者萬計火累旬不滅朔方神策軍亦以東京鄭汴汝州皆爲賊境所過虜掠三月乃已（胡氏曰使郭李爲帥安有是禍耶）比屋蕩盡士民皆衣紙回紇悉置所掠寶貨於河陽留其將安恪守之十一月丁丑露布至京師朝義自濮州北度河懷恩進攻滑州拔之追敗朝義於衛州朝義睢陽節度使田承嗣等將兵四萬餘人與朝義合復來拒戰僕固瑒擊破之長驅至昌樂東朝義帥魏州兵來戰又敗走於是鄴郡節度使薛嵩以相衛洛邢四州降於陳鄭澤潞節度使李抱玉恆陽節度使張忠志以趙恆深定易五州降於河東節度使辛雲京抱玉等已進軍入其營按其部伍嵩等皆受代居無何僕固懷恩皆令復位由時抱玉雲京疑懷恩有貳心各表言之朝廷密爲之備懷恩亦上疏自理上慰勉之辛已制東京及河南北受僞官者一切不問（澠池在洛陽西河陽在其北陳留在其東同軌今永甯縣東距洛陽百九十里橫水在洛陽城北汴州今開封府鄭濮汝皆今州名滑滑縣衛衛輝昌樂今日南樂屬大名府相今彰德府洛今廣平府邢今順德府陳今陳州府澤今澤州府潞今潞安府

恆陽正定府趙州恆卽正定也深定易皆今州名河東今太原府此懷恩處置之大誤也其禍巨矣

以張忠志爲成德軍節度使統恆趙深定易五州賜姓李名寶臣初辛雲京引兵將出井陘常山裨將王武俊說寶臣曰今河東兵精銳出境遠鬪不可敵也且吾以寡當衆以曲遇直戰則必離守則必潰公其圖之寶臣乃撤守備舉五州來降及復爲節度使以武侯之策爲善擢爲先鋒兵馬使武俊本契丹也初名沒諾干郭子儀以僕固懷恩有平河朔功請以副元帥讓之己亥以懷恩爲河北副元帥加左僕射兼中書令單于鎮北大都護朔方節度使史朝義走至貝州與其大將薛忠義等兩節度合僕固瑒追之至臨清朝義自衡水引兵三萬還攻之瑒設伏擊走之回紇又至官軍益振遂逐之大戰於下博東南賊大敗積尸擁流而下朝義奔莫州懷恩都知兵馬使薛兼訓兵馬使郝庭玉與田神功辛雲京會於下博進圍朝義於莫州青淄節度使侯希逸繼至（貝州今清河縣臨青今臨清州衡水縣屬冀州下博今深州莫州在任邱北）

讀史兵略卷三唐

讀史兵略卷三十四

益陽胡林翼纂

通鑑

代宗廣德元年 春正月史朝義屢出戰皆敗田承嗣說朝義令親往幽州發兵還救莫州承嗣自請留守莫州朝義從之選精騎五千自北門犯圍而出朝義既出承嗣卽以城降送朝義母妻子於官軍於是僕固瑒侯希逸薛兼訓等帥衆三萬追之及於歸義與戰朝義敗走時朝義范陽節度使李懷仙已因中使駱奉仙請降遣兵馬使李抱忠將兵三千鎮范陽縣朝義至范陽不得入官軍將至朝義遣人諭抱忠以大軍留莫州輕騎來發兵救援之意因責以君臣之義抱忠對曰天不祚燕唐室復興今既歸唐矣豈可更爲反覆獨不愧三軍耶大丈夫恥以詭計相圖願早擇去就以謀自全且田承嗣必已叛矣不然官軍何以得至此朝義大懼曰吾朝來未食獨不能以一餐相餉乎抱忠乃令人設食於城東於是范陽人在朝義麾下者並拜辭而去朝義涕泣而已獨與胡騎數百既食而去東奔廣陽廣陽不受欲北入奚契丹至溫泉柵李懷仙遣兵追及之朝義窮蹙縊於林中懷仙取其首以獻僕固懷恩與諸軍皆還甲辰朝義首至京師（歸義今雄縣范陽縣今涿州廣陽今良鄉縣溫泉柵在今樂亭縣僕固懷恩之功固不在李郭下）以史朝義降將薛嵩爲相衛邢洛貝磁六州節度使田承嗣爲魏博

德滄瀛五州都防禦使李懷仙仍故地爲幽州盧龍節度使時河北諸州皆已降嵩等迎僕固懷恩拜於馬首乞行開自效懷恩亦恐賊平寵衰故奏留嵩等及李寶臣分帥河北自爲黨援朝廷亦厭苦兵革苟冀無事因而授之（胡氏曰河北藩鎮自此強傲不可制矣）

回紇登里可汗歸國其部衆所過抄掠廩給小不如意輒殺人無所忌憚陳鄭澤潞節度使李抱玉欲遣官屬置頓人人辭憚趙城尉馬燧獨請行比回紇將至燧先遣人賂其渠帥約毋暴掠帥遣之旗曰有犯令者君自戮之燧取死因爲左右小有違令立斬之回紇相顧失色涉其境者皆拱手遵約束抱玉奇之燧因說抱玉曰燧與回紇言頗得其情僕固懷恩恃功驕蹇其子瑒好勇而輕今內樹四帥（胡氏曰四帥謂田承嗣李寶臣李懷仙薛嵩）外交回紇必有窺河東澤潞之志宜深備之抱玉然之

郭子儀數上言吐蕃黨項不可忽宜早爲之備（胡氏曰不能用郭子儀之言爲二虜入京師張本）

六月以魏博都防禦使田承嗣爲節度使承嗣舉管內戶口壯者皆籍爲兵惟使老弱者耕稼數年間有衆十萬又選其驍健者萬人自衛謂之牙兵（胡氏曰魏牙兵始此迄於梁唐魏以之彊亦以之亡）

秋七月吐蕃入大震關陷蘭廓河鄯洮岷秦成渭等州盡取河西隴右之地唐自武德以來開拓邊境地連西域皆置都督府州縣開元中置朔方隴右河西安西北庭諸節度使以統之歲發山東丁壯爲戍卒繒帛爲軍資開屯固供糗糧設監牧畜馬牛軍城戍邏萬里相望及安祿山反邊兵精銳者皆徵發入援謂之行營所留兵單弱

胡虜稍蠶食之數年閒西北數十州相繼淪沒自鳳翔以西邠州以北皆爲左衽矣（胡氏曰史言唐所以失河隴按大震關在隴州廓州在西甯府南西寧卽鄯州渭今鞏昌府成今成縣餘俱今府州名）

吐蕃之入寇也邊將告急程元振皆不以聞冬十月吐蕃寇涇州刺史高暉以城降之遂爲之鄉導引吐蕃深入過邠州上始聞之辛未寇奉天武功京師震駭詔以雍王适爲關內元帥郭子儀爲副元帥出鎮咸陽以禦之子儀閑廢日久部曲離散至是召募得二十騎而行至咸陽吐蕃帥吐谷渾黨項氏羌二十餘萬衆彌漫數十里已自司竹園度渭循山而東子儀使判官中書舍人王延昌入奏請益兵程元振遏之竟不召見癸酉渭北行營兵馬使呂月將將精卒二千破吐蕃於盩厔之西乙亥吐蕃寇盩厔月將復與力戰兵盡爲虜所擒上方治兵而吐蕃已度使橋倉猝不知所爲丙子出幸陝州官吏藏竄六軍逃散郭子儀聞之遽自咸陽歸長安比至車駕已去上纔出苑門度涇水射生將王獻忠擁四百騎叛還長安脅豐王珙等十王西迎吐蕃遇子儀於開遠門內子儀叱之獻忠下馬謂子儀曰今主上東遷社稷無主令公身爲元帥廢立在一言耳子儀未應珙越次言曰公何不言子儀責讓之以兵援送行在丁丑車駕至華州官吏奔散無復供擬扈從將士不免凍餒會觀軍容使魚朝恩將神策軍自陝來迎上乃幸朝恩營豐王珙見上於潼關上之不責退至幕中有不遜語羣臣奏議誅之乃賜死戊寅吐蕃入長安高暉與吐蕃大將馬重英等立故邠王守禮之孫承宏爲帝改元置百官以前翰林學士于可封等爲相吐蕃剽掠府庫市里焚閭舍長安中蕭然一空苗晉卿病臥家遣人輿入迫脅之晉卿閉口不言虜不

敢殺於是六軍散者所在剽掠士民避亂皆入山谷辛巳上至陝百官稍有至者郭子儀引三十騎自御宿川循山而東謂王延昌曰六軍將士逃潰者多在商州今速往收之并發武關防兵數日開北出藍田以向長安吐蕃必遁過藍田遇元帥都虞候臧希讓鳳翔節度使高昇得兵近千人子儀與延昌謀曰潰兵至商州官吏必逃匿而人亂使延昌有直徑入商州撫諭之諸將方縱兵暴掠聞子儀至皆大喜聽命子儀恐吐蕃逼乘輿留軍七盤三日乃行比至商州行收兵并武關防兵合四千人軍勢稍振子儀乃泣諭將士以共雪國恥取長安皆感激受約束子儀請太子賓客第五琦爲糧料使給軍食上賜子儀詔恐吐蕃東出潼關徵子儀詣行在子儀表稱臣不收京城無以見陛下若出兵藍田虜必不敢東向上許之鄜延節度判官段秀實說節度使白孝德引兵赴難孝德卽日大舉南趣京畿與蒲陝商華合勢進擊吐蕃旣立廣武王承宏欲掠城中士女百工整衆歸國子儀使左羽林大將軍長孫全緒將二百騎出藍觀虜勢令第五琦攝京兆尹與之偕行又令寶應軍使張知節將兵繼之全緒至韓公堆晝則擊鼓張旗幟夜則多然火以疑吐蕃前光祿卿殷仲卿聚衆近千人保藍田與全緒相表裏帥二百餘騎直度滻水吐蕃懼百姓又給之曰郭令公自商州將大軍不知其數至矣虜以爲然稍稍引軍去全緒又使射生將王甫入城陰結少年數百夜擊鼓大呼於朱雀街吐蕃惶駭庚寅悉衆遁去高暉聞之帥麾下三百餘騎東走至潼關守將李日越擒而殺之王甫自稱京兆尹聚衆二千餘人署置官屬橫暴長安中十一月壬寅郭子儀至滻水西甫按兵不出或謂子儀城不可入子儀不聽引三十騎徐進使人傳呼召甫甫失據出迎拜

伏子儀斬之其兵盡散白孝德與邠甯節度使張蘊琦將兵屯畿縣子儀召之入城京畿遂安（奉天今乾州司竹監在盩厔縣便橋在咸陽縣西渭橋也涇水在長安東開遠門長安西門御宿川在長安城南七盤在商州東鄜坊丹延節度統今鄜州中部宜川延安也蒲陝商華皆今府州名寶應軍卽射生手漢唐明人之重宦官猶今士大夫之重家丁溺於官氣者不察爾）

吐蕃還至鳳翔節度使孫志直閉城拒守吐蕃圍之數日鎮西節度使馬璘開車駕幸陝將精騎千餘自河西入赴難轉鬪至鳳翔值吐蕃圍城璘帥衆持滿外向突入城中不解甲背城出戰單騎先士卒奮擊俘斬千計而歸明日虜復逼城請戰璘開懸門以待之（胡氏曰杜預曰懸門施於內城門按今邊城之門設扉以啓閉而懸門者設於門闌之外常懸而不下寇至則下之以塞門以爲重閉之固）虜引退曰此將軍不惜死宜避之遂去居於原會成渭之地（會州會甯郡在今中衛縣南）

二年 春正月遣檢校刑部尙書顏真卿宣慰朔方行營上之在陝也顏真卿請奉詔召僕固懷恩上不許至是上命真卿說諭懷恩入朝對曰陛下在陝臣往以忠義責之使之赴難彼猶有可來之理今陛下還宮彼進不成勤王退不能釋衆召之庸肯至乎且言懷恩反者獨辛雲京駱奉仙李抱玉魚朝恩四人耳自餘羣臣皆言其枉陛下不若以郭子儀代懷恩可不戰而服也時汾州別駕李抱真抱玉之從父弟也知懷恩有異志脫身歸京師上方以懷恩爲憂召見抱真問計對曰此不足憂也朔方將士思郭子儀如子弟之思父兄懷恩欺其衆云郭子

儀已爲魚朝恩所殺衆信之故爲其用耳陛下誠以子儀領朔方彼皆不召而來耳上然之

僕固懷恩既不朝廷所用遂與河東都將李錫誠潛謀取太原辛雲京覺之殺錫誠乘城設備儀恩使其子瑒將兵攻之雲京出與戰場大敗而還遂引兵圍榆次上謂郭子儀曰懷恩父子負朕實深聞朔方將士思公如枯旱之望雨公爲朕鎮撫河東汾上之師必不爲變戊午以子儀爲關內河東副元帥河中節度等使懷恩將士聞之皆曰吾輩從懷恩爲不義何面目見汾陽王（榆次在太原東南六十里在祁縣東北約百二十里）

以郭子儀爲朔方節度大使二月子儀至河中雲南子弟萬人戍河中將貪卒暴爲一府患子儀斬十四人杖三十人府中遂安

僕固瑒圍榆次旬餘不拔遣使急發祁縣兵李光逸盡與之士卒未食行不能前十將白玉焦暉以鳴鏑射其後者軍士曰將軍何乃射人玉曰今從人反終不免死死一也射之何傷至榆次瑒責其遲胡人曰我乘馬乃漢卒不行耳瑒捶漢卒皆怨怒曰節度使黨胡人其夕焦暉白玉率衆攻瑒殺之僕固懷恩聞之入告其母母曰吾語汝勿反國家待汝不薄今衆心旣變禍必及我將如之何懷恩不對再拜而出母提刀逐之曰吾爲國家殺此賊取其心以謝三軍懷恩疾走得免遂與麾下三百度河北走時朔方將渾釋之守靈州懷恩檄至云全軍歸鎮釋之曰不然此必衆潰矣將拒之其甥張詔曰彼或翻然改圖以衆歸鎮何可不納也釋之疑未決懷恩行速先候者而至釋之不得已納之張詔以其謀告懷恩懷恩以詔爲閒殺釋之而收其軍（胡氏曰史言渾釋之以臨

事不決自禍）使詔主之既而曰釋之見也彼尙負之安有忠於我哉他日以事杖之折其脛寘於彌峨城而死都虞候張維嶽在沁州聞懷恩去乘傳至汾州撫定其衆殺焦暉白玉而竊其功以告郭子儀子儀使牙官廬諒至汾州維嶽賂諒使實其言子儀奏維嶽殺瑒傳首詣闕羣臣入賀上慘然不悅曰朕信不及人致勳臣顛越深用爲愧又何賀焉命輦懷恩母至長安給優侍厚月餘以壽終以禮葬之功臣皆感歎戊寅郭子儀如汾州懷恩之衆悉歸之咸鼓舞涕泣喜其來而悲其晚也（胡氏曰卒如顏真卿李抱真之言）子儀知廬諒之詐杖殺之上以李抱真言有驗遷殿中少監（祁沁汾皆今州縣名彌峨城在靈州）

三月党項寇同州郭子儀使開府儀同三司李國臣擊之曰虜得閒則出掠官軍至則逃入山宜使羸師居前以誘之勁騎居後以覆之國臣戰於澄城北大破之斬首捕虜千餘人（澄城縣在同州府北百里）

郭子儀以安史昔據洛陽故諸道置節度使以制其要衝今大盜已平而所在聚兵耗蠹百姓表請罷之仍自河中爲始六月勅罷河中節度及耀德軍子儀復請罷關內副元帥不許

河南副元帥臨淮王李光弼治軍嚴整指顧號令諸將莫敢仰視謀定而後戰能以少制衆與郭子儀齊名及在徐州擁兵不朝諸將田神功等不復稟畏（胡氏曰李光弼處危疑之地其迹若無君者而諸將亦不復稟畏光弼節義天下之大義非虛語也）光弼愧恨成疾秋七月己酉卒（胡氏曰史言李光弼不能以功名自終）

八月郭子儀自河中入朝會涇原奏僕固懷恩引回紇吐蕃十萬衆將入寇京師震駭詔子儀帥諸將出鎮奉天

上召問方略對曰懷恩無能爲也上曰何故對曰懷恩勇而少恩士心不附所以能入寇者因思歸之士耳懷恩本臣偏裨其麾下皆臣部曲必不忍以鋒刃相向以此知其無能爲也辛巳子儀發赴奉天（奉天今乾州在長安西北百五十里）

河中尹兼節度副使崔勗發鎮兵西禦吐蕃爲法不一九月丙申鎮兵作亂掠官府及居民終夕乃定

僕固懷恩前軍至宜祿郭子儀使右兵馬使李國臣將兵爲郭晞後繼邠甯節度使白孝德敗吐蕃於宜祿冬十月懷恩引回紇吐蕃至邠州白孝德郭晞閉城拒守懷恩與回紇吐蕃進逼奉天京師戒嚴諸將請戰郭子儀不許曰虜深入吾地利於速戰吾堅壁以待之彼以吾爲怯必不戒乃可破也若遽戰而不利則衆心離矣敢言戰者斬辛未夜子儀出陳於乾陵之南壬申未明虜衆大至虜始以子儀爲無備欲襲之忽見大軍驚愕遂不戰而退子儀使裨將李懷光等將五千騎追虜至麻亭而還虜至邠州丁丑攻之不克乙酉虜涉涇而遁懷恩之南寇也河西節度使楊志烈發卒五千謂監軍柏文達曰河西銳卒盡於此矣君將之以攻靈武則懷恩有返顧之慮此亦救京師之一奇也文達遂將衆擊摧砂堡靈武縣皆下之進攻靈州懷恩聞之自永壽還歸使蕃渾二千騎夜襲文達大破之士卒死者殆半文達將餘衆歸涼州哭而入志烈迎之曰此行有安京室之功卒死何傷士卒怨其言未幾吐蕃圍涼州士卒不爲用志烈奔甘州爲沙陀所殺（宜祿今長武縣邠州在其東南八十里唐高宗乾陵在乾州西北又西北則麻亭又西北則邠州涇水在其北摧砂堡在固原州西北靈武縣今靈州南永壽

縣屬乾州涼州甘州皆今府)

十一月丁未郭子儀自行營入朝郭晞在邠州縱士卒爲暴節度使白孝德患之以子儀故不敢言涇州刺史段秀實自請補都虞候孝德從之既署一月晞軍士十七人入市取酒以刀刺酒翁壞釀器秀實列卒取十七人首注槩上植市門晞一營大譟盡甲孝德震恐召秀實曰奈何秀實曰無傷也請往解之孝德使數十人從行秀實盡辭去選老嫠者一人持馬至晞門下甲者出秀實笑且入曰殺一老卒何甲也吾戴吾頭來矣甲者愕因諭曰常侍負若屬邪副元帥負若屬耶奈何欲以亂敗郭氏晞出秀實讓之曰副元帥勳塞天地當念始終今常侍恣卒爲暴行且致亂亂則罪及副元帥亂由常侍出然則郭氏功名其存者幾何言未畢晞再拜曰公幸教晞以道恩甚大敗不從命願叱左右皆解甲散還火伍中敢譁者死秀實因留宿軍中晞通夕不解衣戒候卒擊柝衛秀實旦俱至孝德所謝不能請改邠州由是無患(邠州西至涇州百一十里)

永泰元年 春正月加陳鄭澤潞節度使李抱玉鳳翔隴右節度使以其從弟殿中少監抱真爲澤潞節度副使抱真以山東有變上黨爲兵衝而荒亂之餘土瘠民困無以贍軍乃籍民每三丁選一壯者免其租徭給弓矢使農隙習射歲暮都試行其賞罰比三年得精兵二萬旣不費廩給府庫充實遂雜視山東由是天下稱澤潞步兵爲諸道最(兵單餉絀救敵之術莫善於此)

三月壬辰朔命左僕射裴冕右僕射郭英乂等文武之臣十三人於集賢殿待制左拾遺洛陽獨孤及上疏曰陛

下召冕等待制以備詢問此五帝盛德也頃者陛下雖容其直而不錄其言有容下之名無聽諫之實遂使諫者稍稍鉗口鮑食相招爲祿仕此忠鯁之人所以竊歎而臣亦恥之今師興不息十年矣人之生產空於杼軸擁兵者第館亘街陌奴婢厭酒肉而貧人羸餓就役剝膚及髓長安城中白晝椎剽吏不敢詰官亂職廢將隋卒暴百揆墮刺如沸粥紛麻民不敢訴於有司有司不敢聞於陛下茹毒飲痛窮而無告陛下不以此時思所以救之之術臣實懼焉今天下惟朔方隴西有吐蕃僕固之虞邠涇鳳翔之兵足以當之矣自此而往東泊海南至番禺西盡巴蜀無鼠竊之盜而兵不爲解傾天下之貨竭天下之穀以給不用之軍臣不知其故假令居安思危自可扼要害之地俾置屯禦悉休其餘以糧儲靡屨之資充疲人貢賦歲可減國租之半陛下豈可持疑於改作使率士之患日甚一日乎上不能用

吐蕃遣使請和詔元載杜鴻漸與盟於興唐寺上問郭子儀吐蕃請盟何如對曰吐蕃利我不虞若不虞而來國不可守矣乃相繼遣河中兵戍奉天又遣兵巡涇原以覘之（興唐寺在朱雀街東第四坊南）平盧節度使侯希逸淄青好遊畋營塔寺軍州苦之兵馬使李懷玉得衆心希逸忌之因事解其軍職希逸與巫宿於城外軍士閉門不納奉懷玉爲帥希逸奔滑州上表待罪詔赦之召還京師秋七月壬辰以鄭王邕爲平盧淄青節度大使以懷玉知留後賜名正己時成德節度使李寶臣魏博節度使田承嗣相衛節度使薛嵩盧龍節度使李懷仙收安史餘黨各擁勁卒數萬治兵完城自署文武將吏不供貢賦與山南東道節度使梁崇義及正己皆結爲昏姻互

相表裏朝廷專事姑息不能復制雖名藩臣羈縻而已（胡氏曰史因李正己遂侯希逸究言藩鎮之橫按侯希逸以平盧之節鎮淄青平盧既陷故淄青兼其號統淄今淄川縣青今青州府齊今濟南府沂今沂州府密今諸城縣海今海州六州之地山南東道治襄陽此著藩鎮之害）

九月僕固懷恩誘回紇吐蕃吐谷渾黨項奴刺數十萬衆俱入寇令吐蕃大將尙結悉贊摩馬重英等自北道趣奉天党項帥任敷鄭庭郝德等自東道趣同州吐谷渾奴刺之衆自西道趣盩厔回紇繼吐蕃之後懷恩又以朔方兵繼之郭子儀使行軍司馬趙復入奏曰虜皆騎兵其來如飛不可易也請使諸道節度使鳳翔李抱玉滑濮李光庭邠甯白孝德鎮西馬璘河南郝庭玉淮西李忠臣各出兵以扼其衝要上從之諸道多不時出兵李忠臣方與諸將擊稜得詔亟命治行諸將及監軍皆曰師行必擇日忠臣怒曰父母有急豈可擇日而後救邪即日勒兵就道懷恩中途遇暴疾而歸丁酉死於鳴沙大將張詔代領其衆別將徐璜玉殺之范志誠又殺璜玉而領其衆懷恩拒命三年再引胡寇爲國大患上猶爲之隱前後勅制未嘗言其反及聞其死惘然曰懷恩不反爲左右所誤耳吐蕃至邠州白孝德嬰城自守甲辰上命宰相及諸司長官於西明寺行香設素饌奏樂是日吐蕃十萬衆至奉天京師震恐朔方兵馬使渾瑊討擊使白元光先戍奉天虜始列營瑊帥驍騎二百衝之身先士卒虜衆披靡城挾虜將一人躍馬而還從騎無中鋒鏑者城上士卒望之勇氣始振乙巳吐蕃進攻之虜死傷甚衆數日斂衆還營瑊夜引兵襲之殺千餘人前後與虜戰二百餘合斬首五千級丙午召郭子儀於河中使屯涇陽已

西命李忠臣屯東渭橋李光進屯雲陽馬璘郝庭玉屯便橋李抱玉屯鳳翔內侍駱奉仙將軍李日越屯靈屋同華節度使周智光屯同州鄜坊節度使杜冕屯坊州上自將六軍屯苑中庚戌下制親征辛亥魚朝恩請索城中括士民私馬令城中男子皆衣阜圍結爲兵城門皆塞二開一士民大駭踰垣鑿竇而逃者甚衆吏不能禁朝恩欲奉上幸河中以避吐蕃恐羣臣議論不一一旦百官入朝立班久之閣門不開朝恩忽從禁軍十餘人操白刃而出宣言吐蕃數犯郊畿車駕欲幸河中何如公卿皆錯愕不知所對有劉給事者獨出班抗聲曰勅使反邪今屯軍如雲不勦力扞寇而遽欲脅天子棄宗廟社稷而去非反而何朝恩驚沮而退事遂寢自丙午至甲寅大雨不止故虜不能進吐蕃移兵攻醴泉黨項西掠白水東侵蒲津丁巳吐蕃大掠男女數萬而去所過焚廬舍蹂禾稼殆盡周智光引兵邀擊破之於澄城北因逐北至鄜州智光素與杜冕不協遂殺鄜州刺史張麟阮冕家屬八十一人焚坊州廬舍三千餘家冬十月己未復講經於資聖寺吐蕃退至邠州遇回紇復相與入寇辛酉至奉天癸亥黨項焚同州官廨民居而去丙寅回紇吐蕃合兵圍涇陽子儀命諸將嚴設守備而不戰及暮二虜退屯北原丁卯復至城下是時回紇與吐蕃聞僕固懷恩死已爭長不相睦分營而居子儀知之回紇在城西子儀使牙將李光瓚等往說之欲與之共擊吐蕃回紇不信曰郭公固在此乎汝給我耳若果在此可得見乎光瓚還報子儀曰今衆寡不敵難以力勝昔與回紇契約甚厚不若挺身往說之可不戰而下也諸將請選鐵騎五百爲衛從子儀曰此適足爲害也郭晞扣馬諫曰彼虎狼也大人國之元帥奈何以身爲虜餌子儀曰今戰則父子俱死而

國家危往以至誠與之言或幸而見從則四海之福也不然則身沒而家全（胡氏曰子儀之審處利害而權其輕重者如此）以鞭擊其手曰去遂與數騎開門而出使人傳呼曰令公來回紇大驚其大帥合胡祿都督藥葛羅可汗之弟也執弓注矢立於陣前子儀免冠釋甲投槍而進回紇諸酋長相顧曰是也皆下馬羅拜子儀亦下馬前執藥葛羅手讓之曰汝回紇有大功於唐唐之報汝亦不薄奈何負約深入吾地侵逼畿縣棄前功結怨仇背恩德而助叛臣何其愚也且懷恩叛君棄母於汝國何有今吾挺身而來聽汝執我殺之我之將士必致死與汝戰矣藥葛羅曰懷恩欺我言天可汗已晏駕令公亦捐館中國無主我是以敢與之來今知天可汗在上都令公復總兵於此懷恩又爲天所殺我曹豈肯與令公戰乎子儀因說之曰吐蕃無道乘我國有亂不顧舅甥之親吞噬我邊鄙焚蕩我畿甸其所掠之財不可勝載馬牛雜畜長數百里彌漫在野此天以賜汝也全師而繼好破敵以取富爲汝計孰便於此不可失也藥葛羅曰吾爲懷恩所誤負公誠深今請爲公盡力擊吐蕃以謝過然懷恩之子可敦兄弟也願捨之勿殺子儀許之回紇觀者爲兩翼稍前子儀麾下亦進子儀揮手卻之因取酒與其酋長共飲藥葛羅使子儀先執酒爲誓子儀酌地曰大唐天子萬歲回紇可汗亦萬歲兩國將相亦萬歲有負約者身隕陳前家族滅絕杯至藥葛羅亦酌地曰如令公誓於是諸酋長皆大喜曰曷以二巫師從軍巫言此行甚安穩不與唐戰見一大人而還今果然矣子儀遺之綵三千匹酋長分以賞巫子儀竟與定約而還吐蕃聞之夜引兵遁去回紇遣其酋長石野那等六人入見天子藥葛羅帥衆追吐蕃子儀使白元光帥精騎與之俱癸酉戰

於靈臺西原大破之殺吐蕃萬計得所掠士女四千人丙子又破之於涇州東丁丑僕固懷恩將張休藏等降辛巳詔罷親征京城解嚴（光庭當依註作光進鳴沙在今靈州東渭橋在咸甯東北雲陽今淳化縣便橋卽西渭橋在咸陽縣坊州今中部縣蒲津在朝邑縣餘俱今州縣名）

郭子儀以僕固名臣李建忠等皆懷恩驍將恐逃入外夷請招之名臣懷恩之姪也時在回紇營上勅并舊將有功者皆赦其罪令回紇送之壬午名臣以千餘騎來降子儀使開府儀同三司慕容休貞以書諭黨項帥鄭庭郝德等皆詣鳳翔降

大曆元年 以四鎮北庭行營節度使馬璘兼邠甯節度使璘以段秀實爲三使都虞候卒有能引弓重二百四十斤者犯盜當死璘欲生之秀實曰將有愛憎而法不一雖韓彭不能爲理璘善其議竟殺之璘處事或不中理秀實力爭之璘有時怒甚左右戰栗秀實曰秀實罪若可殺何以怒爲無罪殺人恐涉非道璘拂衣起秀實徐步而出良久置酒召秀實謝之自是軍州事皆咨秀實而後行其由是在邠寧聲稱殊美

郭子儀以河中軍食常乏乃自耕百畝將校以是爲羞於是士卒皆不勸而耕是歲河中野無曠土軍有餘糧三年 郭子儀禁無故軍中走馬南陽夫人乳母之子犯禁都虞候杖殺之諸子泣訴於子儀且言都虞候之橫子儀叱遣之明日以事語僚佐而歎息曰子儀諸子皆奴材也不賞父之都虞候而惜母之乳母子非奴材而何崔寬與楊子琳戰數不利秋七月崔甯妾任氏出家財數十萬募兵得數千人帥以擊子琳破之子琳走（崔甯

入朝以弟寬爲留後瀘州刺史楊子琳帥精騎突入成都故朝廷遣甯遠鎮也

八月壬戌吐蕃十萬衆寇靈武丁卯吐蕃尙贊摩二萬衆寇邠州京師戒嚴邠寧節度使馬璘擊破之九月壬申命郭子儀將兵五萬屯奉天以備吐蕃壬午朔方騎將白元光擊吐蕃破之壬辰元光又破吐蕃二萬衆於靈武鳳翔節度使李抱玉使右軍都將臨洮李晟將兵五千擊吐蕃晟曰以力則五千不足用以謀則太多乃將千人出大震關至臨洮屠吐蕃定秦堡焚其積聚虜堡帥慕容谷種而還吐蕃聞之釋靈州之圍而去戊戌京師解嚴

（大震關在隴州臨洮今洮州廳定秦堡在其境）

郭子儀還河中元載以吐蕃連歲入寇馬璘以四鎮兵屯邠甯力不能拒而郭子儀以朔方重兵鎮河中深居腹中無事之地乃與子儀及諸將議徙瑯鎮涇州而使子儀以朔方兵鎮邠州曰若以邊土荒殘軍費不給則以內地租稅及運金帛以助之諸將皆以爲然十二月己酉徙馬璘爲涇原節度使以邠甯慶三州隸朔方璘先往城涇州以都虞候段秀實知邠州留後初四鎮北庭兵遠赴中原之難久羈旅數遷徙四鎮歷汴魏鳳翔北庭歷懷絳鄜然後至邠頗積勞弊及徙涇州衆皆怨誹刀斧兵馬使王童之謀作亂期以辛酉旦警嚴而發前夕有告之者秀實陽召掌漏者怒之以其失節令每更來白輒延之數刻遂四更而曙童之不果發秀實欲討之而亂迹未露恐軍中疑其冤告者又云今夕欲焚馬坊草因救火謀作亂中夕火果起秀實命軍中行者皆止坐者勿起各整部伍嚴守要害童之白請救火不許及旦捕童之及其黨八人皆斬之下令曰後徙者族流言者刑遂徙於涇

(胡氏曰史言段秀實能弭亂)

平廬行軍司馬許杲將卒三千人駐濠州不去有窺淮南意淮南節度使崔圓令副使元城張萬福攝濠州刺史杲聞卽提卒去止常塗是歲上召萬福以爲和州刺史行營防禦使討杲萬福至州杲懼移軍上元又北至楚州大掠淮南節度使韋元甫命萬福追討之未至淮陰杲爲其將康自勸所逐自勸擁兵繼掠循淮而東萬福倍道追而殺之免者什二三元甫將厚賞將士萬福曰官健常虛費衣糧無所事(胡氏曰兵農旣分縣官費衣糧以養軍謂之官健猶言官所養健兒也按唐六典衛士之外天下諸軍有健兒舊健兒在軍皆有年限更來往頗爲勞弊開元十五年勅以天下無虞宜與人休息自今以後諸軍鎮量閑劇利害置兵防健兒於諸色征行人內及客戶中召募取丁壯情願充健兒長住邊軍者每年加常例給賜兼給永年優復其家口情願同者聽至軍州各給田地屋宅人賴其利中外獲安永無徵發之役此當時言兵農已分之利而養兵之害卒不可救以至於今)今方立小功不足過賞請用三分之一(濠州今鳳陽府當塗縣屬今太平府楚州今淮安府和州上元今州縣名)

六八 春二月河西隴右山南西道副元帥兼澤潞山南西道節度使李抱玉上言凡所掌之兵當自訓練今自河隴遠於伏文綿亘二千餘里撫御至難若吐蕃道岷隴俱下臣保固汧隴則不救梁岷進兵扶文則寇逼關輔首尾不贍進退無從願更擇能臣委以山南使臣得專備隴坻詔許之(河大河今蘭州府隴隴西今鞏昌府扶

州在文縣西文州今文縣岷岷州汧汧陽縣隴州言寇從洮岷而入扶文則可由陰平入蜀而梁州危故東保汧隴爲非計寇從汧隴則由邠乾而震三輔故西保河岷亦非計山南扶文也

嶺南蠻酋梁崇牽自稱平南十道大都統據容州與西原蠻張侯夏永等連兵攻陷城邑前容管經略使元結等皆寄治蒼梧經略使王翊至藤州以私財募兵不數月斬賊帥歐陽珪馳詣廣州見節度使李勉請兵以復容州勉以爲難翊曰大夫如未暇出兵但乞移牒諸州揚言出千兵爲援冀藉聲勢亦可成功勉從之翊乃與義州刺史陳仁璀藤州刺史李曉庭等結盟討賊翊募得三千餘人破賊數萬衆攻容州拔之擒梁崇牽前後大小百餘戰盡復容州故地分命諸將襲西原蠻復鬱林等諸州先是番禺賊帥馮崇道桂州叛將朱濟時皆據險爲亂陷十餘州官軍討之連年不克李勉遣其將李觀與翊併力攻討悉斬之三月五嶺皆平（容州今北流縣西原蠻今慶遠鎮安諸府地蒼梧今梧州府藤州今藤縣義州在蒼梧縣西南鬱林州今興業縣番禺縣附廣州府桂州今桂林府）

是歲以尚書右丞韓滉爲戶部侍郎判度支自兵興以來所在賊斂無度倉庫出入無法國用虛耗滉爲人廉勤精於簿領作賦斂其入之法御下嚴急吏不敢欺亦值連歲豐穰邊境無寇自是倉庫蓄積始充

八年 春二月永平節度使令狐彰卒彰承滑毫離亂之後治軍勸農府廩充實時藩鎮率皆跋扈獨彰貢賦未嘗闕歲遣兵三千詣京西防秋自齎糧食道路供饋皆不受所過秋毫不犯疾亟召掌書記高陽齊映與謀後事

映勸彰請代人遣子歸私第彰從之遺表稱昔魚朝恩破史朝義欲掠滑州臣不聽由是有隙及朝恩誅值臣寢疾以是未得入朝生死愧負臣今必不起倉庫畜牧先已封籍軍中將士州縣官吏按堵待命伏見吏部尚書劉晏工部尚書李勉可委大事願速以代臣臣男建等今勒歸東都私第彰卒將士欲立建誓死不從舉家西歸三月丙子以李勉爲永平節度使（永平滑鄆二州軍名此著帥臣之節也）

冬十月靈州破吐蕃萬餘衆吐蕃衆十萬寇涇邠郭子儀遣朔方兵馬使渾瑊將步騎五千拒之庚申戰於宜祿瑊登黃蘆原望虜命據險布拒馬以備其馳突宿將史抗溫儒雅等意輕瑊不用其命瑊召使擊虜則已醉矣見拒馬曰野戰烏用此爲命撤之叱騎兵衝虜陳不能入而返虜躡而乘之官軍大敗士卒死者什七八居民爲吐蕃所掠千餘人甲子馬瑊與吐蕃戰於鹽倉又敗瑊爲虜所隔逮暮未還涇原兵馬使焦令謨等與敗卒爭門而入或勸行軍司馬段秀實乘城拒守秀實曰大帥未知所在當前擊虜豈得苟自全乎召令謨等讓之曰軍法失大將麾下相死諸君忘其死邪令謨等惶懼拜請命秀實乃發城中兵未戰者悉出陳於東原且收散兵爲將力戰狀吐蕃畏之稍卻旣夜瑊乃得還郭子儀召諸將謀曰敗軍之罪在我不在諸將然朔方兵精聞天下今爲虜敗何策可以雪恥莫對渾瑊曰敗軍之將不當復預議然願一言今日之事惟理瑊罪否則再見任子儀赦其罪使將兵趣朝那虜旣破官軍欲掠汧隴鹽州刺史李國臣曰虜乘勝必犯郊畿我掎其後虜必返顧乃引兵趣秦原鳴鼓而西虜聞之至百城返渾瑊邀之於隘蓋復得其所掠馬瑊亦出精兵襲虜輜重於潘原殺數千人虜遂

遁去（宜祿今長武縣黃蘆原在縣北鹽倉在涇州西朝那在固原州西南秦原在清水縣百城卽百里城在靈臺縣潘原在平涼府東）

初元載嘗爲西州刺史知河西隴右山川形勢是時吐蕃數爲寇載言於上曰四鎮北庭旣治涇州無險要可守隴山高峻南連秦嶺北抵大河今國家西境盡潘原而吐蕃戍摧沙堡原州居其中開當隴山之口其西皆豎牧故地草肥水美平涼在其東獨耕一縣可給軍食故壘尙存吐蕃棄而不居每歲盛夏吐蕃畜牧青海去塞甚遠若乘閒築之二旬可畢移京西軍戍原州移郭子儀軍戍涇州爲之根本分兵守石門木峽漸開隴右進達安西據吐蕃腹心則朝廷可高枕矣并圖地形獻之密遣人出隴山商度功用會汴宋節度使田神功入朝上問之對曰行軍料敵宿將所難陛下奈何用一書生語欲舉國從之乎載尋得罪事遂寢（胡氏曰爲後楊炎復議城原州張本按原州今固原州東則潘原西北則摧沙堡北則石門關西南則木峽關胡氏曰唐原州治古高平當隴道之要漢光武取隴右先取之始可蹙氐蠶赫連勃勃據高平乘高以窺隴東嶺北始可以病姚興誠要害之地也）

九年 郭子儀人朝上言朔方國之北門中閒戰士耗散什纔有一今吐蕃兼河隴之地雜羌渾之衆勢強十倍願更於諸道各發精卒成四五萬人則制勝之道必矣

十年 三月甲午陝州軍亂逐兵馬使趙令珍觀察使李國清不能禁卑辭徧拜將士乃得脫去軍士大掠庫物

會淮西節度使李忠臣入朝過陝上命忠臣按之將士畏忠臣兵威不敢動忠臣設棘圍令軍士匿名投庫物一日獲萬緡盡以給其從兵爲賞

十一月嶺南節度使路嗣恭擢流人孟瑤敬冕爲將討哥舒晁瑤以大軍當其衝冕自開道輕入丁未克廣州斬晁及其黨萬餘人嗣恭之討晁也容管經略使王元遣將將兵助之西原賊帥覃問乘虛襲容州嗣伏兵擊擒之（容管治北流縣西原蠻今慶遠鎮安等地）

十一年夏五月汴宋留後田神玉卒以都虞候李靈曜爲留後靈曜驕慢悉以其黨爲管內八州刺史縣令欲效河北諸鎮秋八月甲申詔淮西節度使李忠臣永平節度使李勉河陽三城使馬燧討之淮南節度使陳少遊淄青節度使李正己皆進兵擊靈曜汴宋兵馬使攝節度副使李僧惠靈曜之謀主也宋州牙門將劉昌遣僧神表潛說僧惠僧惠召問計昌爲之泣陳逆順僧惠乃與汴宋牙將高憑石隱金遣神表奉表詣京師請討靈曜九月壬戌以僧惠宋州刺史憑爲曹州刺史隱金爲鄆州刺史乙丑李忠臣馬燧軍於鄭州靈曜引兵逆戰兩軍不意其至退軍滎澤淮西軍士潰去者什五六鄭州士民皆驚走入東都忠臣將歸淮西燧固執不可曰以順討逆何憂不克奈何自棄功名堅壁不動忠臣聞之稍收散卒數日皆集軍勢復振戊辰李正己奏克鄆濮二州壬申李僧惠敗靈曜兵於雍邱冬十月李忠臣馬燧進擊靈曜忠臣行汴南燧行汴北屢破靈曜兵壬寅與陳少遊前軍合與靈曜大戰於汴州城西靈曜敗入城固守癸卯忠臣等圍之田承嗣遣田悅將兵救靈曜敗永平淄青兵

於匡城乘勝進軍汴州營於城北數里丙午忠臣遺裨將李重倩將輕騎數百夜入其營縱橫貫穿斬數十人而還營中大駭忠臣燧因以大軍乘之鼓譟而入悅衆不戰而潰悅脫身北走將士死者相枕藉不可勝數靈曜聞之開門夜遁汴州平重倩本奚也丁未靈曜至韋城永平將杜如江擒之燧知忠臣暴戾以己功讓之不入汴城引軍西屯板橋忠臣入城果專其功宋州刺史李僧惠與之爭功忠臣因會擊殺之又欲殺劉昌昌遁逃得免甲寅李勉械送李靈曜至京師斬之（唐節度所統初無一定此時汴宋統八州則汴宋曹濮兗鄆徐泗今開封歸德曹州濮州兗州東平徐州泗州也治開封府淮西今汝甯光州也永平鄭州北至滑縣也河陽三城孟縣也淮南淮揚通安慶廬鳳滁和也淄青濟南青州沂州泰安登州萊州海州也胡氏曰九域志云滎澤在鄭州西北四十五里雍邱杞縣也匡城在長垣縣韋城在滑縣板橋在開封西）

十二月涇源節度使馬瑊疾亟以行軍司馬段秀實知節度事付以後事秀實嚴兵以備非常丙申瑊卒軍中奔哭者數千人喧咽門扉秀實悉不聽入命押牙馬頤治喪事於內李漢惠接賓客於外妻妾子孫位於堂宗族位於庭將佐位於前牙士卒哭於營伍百姓各守其家有離立偶語於衢路輒執而囚之非護喪從行者無得遠送致祭拜哭皆有儀節送喪近遠皆有定處違者以軍法從事都虞候史廷幹兵馬使崔珍十將張景華謀因喪作亂秀實知之奏廷幹入宿衛徙珍屯靈臺補景華外職不戮一人軍府晏然（胡氏曰自高仙芝喪師於大食段秀實始見於史其後責李嗣業不赴難淦水之潰保河清以濟歸師在邠州誅郭晞暴橫之卒與馬瑊議論不阿

及治喪曲防周慮以安軍府最後笏擊朱泚以身殉國其事業風節卓然表出於唐諸將中（璠家富有無算治第京師甲於勳貴中堂費二十萬緡他室所減無幾其子孫無行家貲尋盡（胡氏曰史言殖貨無厭者適以爲不肖子孫之貲按處事之法用知曲折豫爲籌備而已）

十二年 五月辛亥昭自都團練使外悉罷諸州團練守捉使又令諸使非軍事要急無得擅召刺史及停其職務差人權攝又定諸州兵皆有常數其召募給家糧春冬衣者謂之官健差點士人春夏歸農秋冬追集給身糧醬菜者謂之團結自兵興以來州縣官俸給不一重以元載王縉隨情徇私刺私月給或至千緡或數十緡至是始定節度使以下至主簿尉俸祿措多益寡上下有敍法制粗立

平盧節度使李正己先有淄青齊海登萊沂密德棣十州之地及李靈曜之亂諸道合兵攻之所得之地各爲己有正己又得曹濮徐兗鄆五州因自青州徙治鄆州使其子前淄州刺史納守青州正己用刑嚴峻所在不敢偶語然法令齊一賦均而輕擁兵十萬雄據東方鄰藩皆畏之是時田承嗣據魏博相衛洛貝澶七州李寶臣據恆易趙定深冀滄七州各擁衆五萬梁崇義據襄鄧均房復鄧六州有衆二萬相與根據蟠結雖奉事朝廷而不用其法令官爵甲兵租賦刑殺皆自專之上寬仁一聽其所爲朝廷或完一城增一兵輒有怨言以爲猜貳常爲之罷役而自於境內築壘繕兵無虛日以是雖在中國名藩臣而實如蠻貊異域焉（按李正己時據山東全省及徐州海州田承嗣據大名東昌彭德衛輝廣平李寶臣據正定易趙定深冀滄等州梁崇義據襄陽德安安陸）

十三年 春正月回紇寇太原河東押牙泗水李自良曰回紇精銳遠來求鬪難與爭鋒不如築二壘於歸路以兵戍之虜至堅壁勿與戰彼師老自歸乃出軍乘之二壘抗其前大軍蹙其後無不捷矣留後鮑防不從遣大將焦伯瑜等逆戰癸酉遇虜於陽曲大敗而還死者萬餘人回紇縱兵大掠二月代州都督張光晟擊破之於羊武谷乃引去上亦不問回紇入寇之故侍之如初（按羊武谷羊當作揚在崞縣氣餒則不問而姑息）

郭子儀以朔方節度副使張曇性剛率謂其以武人輕己銜之孔目官吳曜爲子儀所任因而構之子儀怒誣奏曇扇動軍衆誅之掌書記高郢力爭之子儀不聽奏貶郢猗氏丞旣而僚佐多以病求去子儀悔之悉薦之於朝曰吳曜誤我遂逐之（胡氏曰史言郭子儀過而能改按猗氏縣屬蒲州府）

十四年 三月以容管經略使王翊爲河中少尹知府事河東副元帥留後部將凌正暴橫翊抑之正與其徒乘夜作亂翊知之故縮漏水數刻以差其期賊驚潰走擒正誅之軍府乃安

五月以河陽鎮遏使馬燧爲河東節度使河東承百井之敗騎士單弱燧悉召牧馬廝役得數千人教之數月皆爲精騎造甲必爲長短三等稱其所衣以便進趨又造戰車行則載兵甲止則爲營陳或塞險以遏奔衝器械無不精利居一年得選兵三萬辟兖州人張建封爲判官署李自良代州刺史委任之（百井在太原北四十里）

李正已畏上威名表獻錢三十萬繕上欲受之恐見欺卻之則無辭崔祐甫請遣使慰勞淄青將士因以正已所獻錢賜之使將士人人戴上恩又諸道聞之知朝廷不重貨財上悅從之正已大慚服天下以爲太平之治庶幾

可望焉

西川節度度崔甯在蜀十餘年恃地險兵強恣爲淫侈朝廷患之而不能易至是入朝加司空兼山陵使南詔王閣羅鳳卒子鳳迦異前死孫異牟尋立冬十月丁酉朔吐蕃與南詔合兵十萬三道入寇一出茂州一出扶文一出黎雅曰吾欲取蜀以爲東府崔甯在京師所留諸將不能禦虜連陷州縣刺史棄城走士民竄匿山谷上憂之趣甯歸鎮寧已辭楊炎言於上曰蜀地富饒甯據有之朝廷失其外府十四年矣甯雖入朝全師尙守其後貢賦不入與無蜀同且甯本與諸將等夷因亂得位威令不行今雖遣之必恐無功若其有功則義不可奪是蜀地敗固失之勝亦不得也願陛下熟察上曰然則奈何對曰請留甯發朱泚所領范陽兵數千人雜禁兵往擊之何憂不克因而得內親兵於其腹中蜀將必不敢動然後更授他帥使千里沃壤復爲國有是因小害而收大利也上曰善遂留寧初馬勣原都知兵馬使李晟功名遣入宿衛爲右神策都將上發禁兵四千人使晟將之發邠隴范陽兵五千沐金吾大將軍安邑曲環將之以救蜀東川出兵自江油趨白湏與山南兵合擊吐蕃南詔破之范陽兵追及于七盤又破之遂克維茂二州李晟追擊於大度河外又破之吐蕃南詔飢寒隕於崖谷死者八九萬人吐蕃悔怒殺誘導使之來者異牟尋懼築苴畔城延袤十五里徙居之吐蕃封之爲日東王（茂今茂州扶州在文縣西黎今清溪雅今雅州邠隴注言邠寧隴右二鎮是也江油縣卽龍安府白湏在昭化縣西北七盤縣在巴州西北維州在雜谷龐大度河自打箭爐清溪峨眉入青衣江河外今越巂廳也苴畔城卽大理府太和縣）

讀史兵略卷之三十五

益陽胡林翼纂

通鑑

德宗建中元年 春二月楊炎欲城原州以復秦原命李懷光居前督作朱泚崔甯各將萬人翼其後詔下涇州爲城具涇之將士怒曰吾屬爲國家西門之屏十餘年矣始居邠州甫營耕桑有地著之安徙屯涇州披荆榛立軍府坐席未暖又投之塞外吾屬何罪而至此乎李懷光始爲邠甯帥卽誅溫儒雅等軍令嚴峻及兼涇原諸將皆懼曰彼五將何罪而爲戮今又來此吾屬能無憂乎劉文喜因衆心不安據涇州不受詔上疏復求段秀實爲帥不則朱泚癸亥以朱泚兼四鎮北庭行營涇原節度使代懷光劉文喜又不受詔欲自邀旌節夏四月乙未朔據涇州叛遣其子質於吐蕃以求援上命朱泚李懷光討之又命神策軍使張巨濟將禁兵二千助之吐蕃始聞韋倫歸其俘不之信及俘入境各還部落稱新天子出宮人放禽獸英威聖德洽於中國吐蕃大悅除道迎倫贊普卽發使隨倫入貢且致賻贈癸卯至京師上禮接之旣而蜀將上言吐蕃豺狼所獲俘不可歸上曰戎狄犯塞則擊之服則歸之擊以示威歸以示信威信不立何以懷遠悉命歸之五月朱泚等圍劉文喜於涇州杜其出入而閉壁不與戰久之不拔天方旱徵發餽運內外騷然朝臣上書請赦

文喜以蘇疲人者不可勝紀上皆不聽曰微孽不除何以令天下文喜使其將劉海賓入奏海賓言於上曰臣乃陛下藩邸部曲豈有附叛臣必爲陛下梟其首以獻但文喜今所求者節而已願陛下姑與之文喜必怠則臣計得施矣上曰名器不可假人爾能立効固善我節不可得也使海賓歸以告文喜而攻之如初減御膳以給軍士城中將士當受春服者賜予如故於是衆知上意不可移時吐蕃方睦於唐不爲發兵城中勢窮庚寅海賓與諸將共殺文喜傳首而原州竟不果城自上卽位李正己內不自安遣參佐入奏事會涇州捷奏至上使觀文喜之首而歸正己益懼

秋七月丙寅邵州賊帥王國良降國良本湖南牙將觀察使辛京杲使戍武岡以扞西原蠻京杲貪暴國良家富京杲以死罪加之國良懼據縣叛與西原蠻合聚衆千人侵掠州縣瀕湖千里咸被其害詔荆黔洪桂諸道合兵討之連年不能克及曹王皋爲湖南觀察使曰驅疲氓誅反仄非策之得者也乃遣國良書言將軍非敢爲逆欲救死耳我與將軍俱爲辛京杲所構我已蒙聖朝滌洗何心復加兵刃於將軍乎將軍遇我不速降後悔無及國良且喜且懼遣使乞降猶疑未決杲乃假爲使者從一騎越五百里抵國良壁鞭其門大呼曰我曹王也來受降舉軍大驚國良趨出迎拜請罪杲執其手約爲兄弟盡焚攻守之具散其衆使還農詔赦國良罪賜名惟新（邵州今寶慶府武岡州在其西南二百八十里胡氏曰荆南節度治荊州黔中節度治黔州江南西道觀察治洪州

桂管經略治桂州）

二年 正月戊辰成德節度使李寶臣卒其子惟岳匿喪二十餘日詐爲寶臣表求令惟岳繼襲上不許惟岳乃發喪自爲留後使將佐共奏求旌節上不許初寶臣與李正己田承嗣梁崇義相結期以土地傳之子孫故承嗣之死寶臣力爲之請於朝使以節授田悅代宗從之悅初襲位事朝廷禮甚恭河東節度使馬燧表其必反請先爲備至是悅屢爲惟岳請繼襲上欲革前弊不許或諫曰惟岳已據父業不因而命之必爲亂上曰賊本無資以爲亂皆藉我土地假我位號以聚其衆耳曷日因其所欲而命之多矣而亂日益滋是爵命不足以已亂而適足以長亂也然則惟岳必爲亂命與不命等耳竟不許悅乃與李正己各遣使詣惟岳潛謀勒兵拒命五月悅遣兵馬使孟祐將步騎五千北助惟岳薛嵩之死也田承嗣盜據洛相二州朝廷獨得邢磁二州及臨洛縣悅欲阻山爲境日邢磁如兩眼在吾腹中不可不取乃遣兵馬使康愔將八千人圍邢州別將楊朝光將五千人柵於邯鄲西北以斷昭義救兵悅自將兵數萬圍臨洛邢州刺史李共臨洛將張仵堅壁拒守貝州刺史邢曹俊田承嗣舊將也老而有謀悅寵信牙官扈鵬而疎之及攻臨洛召曹俊問計曹俊曰兵法十圍五攻尙書以逆犯順勢更不侔今頓兵堅城之下糧竭卒盡自亡之道也不若置萬兵於崞口以遏西師則河北二十四州皆爲尙書有矣諸將惡其異己共毀之悅不用其策（邢今順德府磁今磁州臨洛今永年縣西邯鄲在永年西南五十里昭義澤潞也崞口在邯鄲西南磁州之西壺關之險也）

秋七月河東節度使馬燧昭義節度使李抱真神策先鋒都知兵馬使李晟大破田悅於臨洛時悅攻臨洛累月

不拔城中食且盡府庫竭士卒多死傷張仵飾其愛女使出拜將士曰諸君守戰甚苦仵家無他物請鬻此女爲將士一日之費衆皆哭曰願盡死力不敢言賞李抱真告急於朝詔馬燧將步騎二萬與抱真討悅又遣李晟將神策兵與之俱又詔幽州留後朱滔討惟岳燧等軍未出險先遣使持書諭悅爲好語悅謂燧畏之不設備燧與抱真合兵八萬東下壺關軍於邯鄲擊悅支軍破之悅方急攻臨洛分李惟岳兵五千助楊朝光明日燧等進攻朝光柵悅將萬餘人救之燧命大將李自良等禦之於雙岡令之曰悅得道必斬爾自良等力戰悅軍卻燧推火車焚朝光柵斬朝光獲首虜五千餘級居五日燧等進軍至臨洛悅悉衆力戰凡百餘合悅兵大敗斬首萬餘級悅引兵夜遁邢州圍亦解時平盧節度使李正己已卒子納祕之擅領軍務悅求救於納及李惟岳納遣大將衛俊將兵萬人惟岳遣兵三千人救之悅收合散卒得二萬餘人軍於洹水淄青軍其東成德軍其西首尾相應馬燧帥諸軍進屯鄴奏求河陽兵自助詔河陽節度使李芄將兵會之（壺關屬潞安府在臨洛之西邯鄲在臨洛西南約四十里雙岡在臨洛西壺關東洹水縣在今大名縣西臨洛東南鄴今臨漳縣在其西）

八月范陽節度使朱滔將討李惟岳軍於莫州張孝忠將精兵八千守易州滔遣判官蔡雄說孝忠曰惟岳乳臭兒敢拒朝命今昭義河東軍已破田悅淮南李僕射克襄陽計河南諸軍朝夕北向恆魏之亡可俛足而須也使君誠能首舉易州以歸朝廷則破惟岳之功自使君始此轉禍爲福之策也孝忠然之遣牙官程華詣滔遺錄事參軍董稹奉表詣闕滔又上表薦之上悅九月辛酉以孝忠爲成德節度使命惟岳護喪歸朝惟岳不從孝忠德

滔爲子茂和娶滔女深相結（胡氏曰范陽治幽州莫州在其南三百八十里易州屬成德在幽州西二百十四里）十一月宣武節度使劉洽神策都知兵馬使曲瓌滑州刺史襄平李澄朔方大將唐朝臣大破淄青魏博之兵於徐州先是李納遣其將王溫會魏博將信都崇慶共攻徐州刺史李洧遣牙官溫人王智與詣闕告急智與善走不五日而至上爲之發朔方兵五千人以朝臣將之與洽環澄共救之時朔方軍資裝不至旗服弊惡宣武人嗤之曰乞子能破賊乎朝臣以其言激怒士卒且曰都統有令先破賊營者營中物悉與之士皆憤怒爭奪崇慶溫攻彭城二旬不能下請益兵於李納遣其將石隱金將萬人助之與劉洽等相拒於七里溝日向暮洽引軍稍卻朔方馬軍使楊朝晟言於唐朝臣曰公以步兵負山而陳以待兩軍我以騎兵伏於山曲賊見懸軍勢孤必搏之我以伏兵絕其腰必敗之朝臣從之崇慶等果將騎二千踰橋而西追擊官軍伏兵發橫擊之崇慶等兵中斷狼狽而返阻橋以拒官軍其兵有爭橋不得涉水而度者朝晟指之曰彼可涉吾何爲不涉遂涉水擊據橋者皆走崇慶等兵大潰洽等乘之斬首八千級溺死過半朔方軍盡得其輜重旗服鮮華乃謂宣武人曰乞子之功孰與宋多宣武人皆慙官軍乘勝逐北至徐州城下魏博淄青軍解圍走江淮漕運始通（李正己乘亂以兵扼徐州南之甬橋及渦口以阻漕運昨正己死而子納盜據之魏博田悅也宣武軍汴宋也七里溝在徐州西橋在溝上）

三年 春正月馬燧等諸軍屯於漳濱田悅遣其將王光進築月城以守長橋諸軍不得度燧以鐵鎖連車數百

實以士囊塞其下流水淺諸軍涉度時軍中乏糧悅等深壁不戰燧命諸軍持十日糧進屯倉口與悅夾洹水而軍李抱真李芃問曰糧少而深入何也燧曰糧少則利速戰今三鎮連兵不戰欲以老我師我若分軍擊其左右悅必救之則我腹背受敵戰必不利故進軍逼悅所謂攻其所必救也彼苟出戰必爲諸君破之乃爲三橋踰洹水日往挑戰悅不出燧令諸軍夜半起食潛師循洹水直趨魏州令曰賊至則止爲陳留百騎擊鼓鳴角於營中仍抱薪持火俟諸軍畢發則止鼓角匿其旁俟悅軍畢度焚其橋軍行十里所悅聞之帥淄青成德步騎四萬踰橋掩其後乘風縱火鼓譟而進燧按兵不動先除其前草莽百步爲戰場結陳以待之募勇士五千餘人爲前列悅軍至火止氣衰燧縱兵擊之悅軍大敗神策昭義河陽軍小卻見河東軍捷還門又破之追奔至三橋已焚悅軍亂赴水溺死不可勝紀斬首二萬餘級捕虜三千餘人尸相枕藉三十餘里悅收餘兵千餘人走魏州馬燧與李抱真不協頓兵平邑浮圖悅夜至南郭大將李長春閉關不納以俟官軍久之天且明春乃開門納之悅殺長春嬰城拒守城中士卒不滿數千死者親戚號哭滿街悅憂懼乃持佩刀乘馬立府外悉集軍民流涕言曰悅不肖蒙淄青成德二丈人保薦嗣守伯父業今二丈人卽世其子不得承襲悅不敢忘二丈人大恩不量其力輒拒朝命喪敗至此使士大夫肝腦塗地皆悅之罪也悅有老母不能自殺願諸公以此刀斷悅首持出城降馬僕射自取富貴無爲與悅俱死也因從馬上自投地將士爭前抱持悅曰尙書舉兵徇義非私己也一勝一負兵家之常某輩累世受恩何忍聞此願奉尙書一戰不勝則以死繼之悅曰諸公不以悅喪敗而棄之悅雖死敢忘厚意

於地下乃與諸將各斷髮約爲兄弟誓同生死悉出府庫所有及斂富民之財得百餘萬以賞士卒衆心始定（胡氏曰田悅善敗不亡所謂盜亦有道）復召貝州刺史邢曹俊使之整部伍繕守備軍勢復振李納軍於濮陽爲河南軍所逼奔還濮州徵援兵於魏州田悅遣軍使苻璘將三百騎送之璘父令奇謂璘曰吾老矣歷觀安史輩叛亂者今皆安在田氏能久乎汝因此棄逆從順是汝揚父名於後世也齧臂而別璘遂與其副李瑤帥衆降於馬燧悅收族其家令奇慢罵而死瑤父再春以博州降悅從兄昂以洺州降王光進以長橋降悅入城旬餘日馬燧等諸軍始至城下攻之不克李惟岳遣兵與孟祐守東鹿朱滔張孝忠攻拔之進圍深州惟岳憂懼掌書記邵真復說惟岳密爲表先遣弟惟簡入朝然後誅諸將之不從命者身自入朝使妻父冀州刺史鄭誥權知節度事以待朝命惟簡旣行孟祐知其謀密遣告田悅悅大怒使衙官扈岌往見惟岳讓之曰尙書舉兵正爲大夫求旌節耳非爲己也今大夫乃信邵真之言遣弟奉表悉以反逆之罪歸尙書自求雪身尙書何負於大夫而至此耶若相爲斬邵真則相待如初不然當與大夫絕矣判官畢華言於惟岳曰田尙書以大夫之故陷身重圍大夫一旦負之不義甚矣且魏博淄青兵燻食富足抗天下事未可知奈何遽爲二三之計乎惟岳素怯不能守前計乃引邵真對扈岌斬之發成德兵萬人與孟祐俱圍東鹿朱滔張孝忠與戰於東鹿城下惟岳大敗燒營而遁兵馬使王武俊爲左右所搆惟岳疑之惜其才未忍除也東鹿之戰使武俊爲前鋒私自謀曰我破朱滔則惟岳軍勢大振歸殺我必矣故戰不甚力而敗朱滔欲乘勝取恆州張孝忠引軍西北軍於義豐滔大驚孝忠將佐皆怪

之孝忠曰恆州宿將尙多未易可輕迫之則并力死鬥緩之則自相圖諸君第觀之吾軍義豐坐待惟岳之殄滅耳且朱司徒言大而識深可與共始難與共終也（胡氏曰朱滔後卒如張孝忠所料）於是滔亦屯束鹿不敢進惟岳將康曰知以趙州歸國惟岳益疑王武俊武俊甚懼或謂惟岳曰先相公委腹心於武俊使之輔佐大夫又有骨肉之親武俊勇冠三軍今危難之際復加猜阻若無武俊欲使誰爲大夫卻敵乎惟岳以爲然乃使步軍使衛常甯與武俊共擊趙州又使王士真將兵宿府中以自衛（漳水自南而北馬燧在西田悅在東長橋在其上洹水在漳水之東倉口在其北三鎮謂魏博田悅淄青李納成德李惟岳也三橋駕洹水上魏博在洹水南距悅營不五十里其南有平邑浮圖二丈人謂李正己李寶臣伯父田承嗣也濮州卽今濮州東鹿縣胡氏曰在深州西四十五里義豐縣今邳州）

淮南節度使陳少遊拔海密二州李納復攻陷之王武俊旣出恆州謂衛常甯曰武俊今幸出虎口不復歸矣當北歸張尙書常甯曰大夫暗弱信任左右觀其勢終爲朱滔所滅今天子有詔得大夫首者以其官爵與之中丞素爲衆所服與其出亡曷若倒戈以取大夫轉禍爲福特反掌耳事苟不捷歸張尙書未晚也武俊深以爲然會惟岳使要藉謝遵至趙州城下（胡氏曰要藉官亦唐時節度衙前之職）武俊引遵同謀取惟岳遵還密告王士真閏月申辰武俊常甯自趙州引兵還襲惟岳遵與士真矯惟岳命啓城門內之黎明武俊帥數百騎突入府門士真應之於內殺十餘人武俊令曰大夫叛逆將士歸順敢違拒者族衆莫敢動遂執惟岳收鄭誅畢華王他奴

等皆殺之武俊以惟岳舊使之子欲生送之長安常甯曰彼見天子將復以叛逆之罪歸咎於中丞乃縊殺之傳首京師深州刺史楊榮國惟岳姊夫也降於朱滔滔使復其位二月戊午李惟岳所署定州刺史楊政義降時河北略定惟魏州未下河南諸軍攻李納於濮州納勢日蹙朝廷謂天下不日可平甲子以張孝忠爲易定滄三州節度使王武俊爲恆冀都團練觀察使康日知爲深趙都團練觀察使以德棣二州隸朱滔令還鎮滔固請深州不許由是怨望留屯深州（胡氏曰朱滔討李惟岳再戰再勝及瓜分成德巡屬以賞降將尺寸之地滔不與焉又欲使之取德棣此左氏所以知桓王之失鄭也）王武俊素輕張孝忠自以手誅李惟岳功在康日知上而孝忠爲節度使已與康日知俱爲都團練使又失趙定二州亦不悅又詔以糧三千石給朱滔馬五百匹給馬燧武俊以爲朝廷不欲使故人爲節度使魏博旣下必取恆冀故分其糧馬以弱之疑未肯奉詔田悅聞之遣判官王侑許士則開道至深州說朱滔曰司徒奉詔討李惟岳旬朔之間拔東鹿下深州惟岳勢蹙故王大夫因司徒勝勢得以梟惟岳之首此皆司徒之功也又天子明下詔書令司徒得惟岳城邑皆隸本鎮今乃割深州以與日知是自棄其信也且今上志欲掃清河朔不使藩鎮承襲將悉以文臣代武臣魏亡則燕趙爲之次矣若魏存則燕趙無患然則司徒果有意矜魏博之危而救之非徒得存亡繼絕之義亦子孫萬世之利也（胡氏曰同舟遇風則胡越可使相救是以善用兵者必先離其交）又許州貝州賂滔滔素有異志聞之大喜卽遣王侑歸報魏州使將士知有外援各自堅又遣判官王邳與許士則俱詣恆州說王武俊曰大夫出萬死之計誅逆首拔亂根康

日知不出趙州豈得與大夫同日論功而朝廷褒賞略同貧不爲大夫憤邑者今又聞有詔支糧黨與鄰道朝廷之意蓋以大夫善戰恐爲後患先欲貧弱軍府俟平魏之日使馬僕射北首朱司徒南向共相滅耳朱司徒亦不敢自保使邗等效愚計欲與大夫共救田尙書而存之大夫自留糧馬以供軍朱司徒不欲以深州與康日知願以與大夫請早定刺史以守之三鎮連兵若耳目手足之相救則他日永無患矣武俊亦喜許諾卽遣判官王巨源使於滔且令知深州事相與刻日舉兵南向滔又遣人說張孝忠孝忠不從

宣武節度使劉洽攻李納於濮州克其外城納於城上涕泣求自新李勉又遣人說之癸卯納遣其判官房說以其母弟經及子成務入見會中使宋鳳朝稱納勢窮蹙不可捨上乃因說等於禁中納遂歸鄆州復與田悅等合朝廷以納勢未衰三月乙未始以徐州刺史李洧兼徐海沂都團練觀察使海沂已爲納所據洧竟無所得（胡氏曰史言帝銳意削平藩鎮而不能應機撫接以自遺患）李納之初反也其所署德州刺史李西華備守甚嚴都虞候李士真密毀西華於納納危西華還府以士真代之士真以又詐召棗州刺史李長卿長卿過德州士真劫之以同歸國夏四月戊午以士真長卿爲二州刺史士真求援於朱滔滔已有異志遣大將李濟時將三千人聲言助士真守德州且召士真詣深州議軍事至則留之使濟時領州事（胡氏曰德宗以德棗與朱滔滔卒以詐力得之不知又以爲王武俊之資也按德今陵縣棗今武定府）

吐蕃歸鄯日所俘掠兵民八百人（胡氏曰自吐蕃陷河隴入京師俘掠唐人可以數計耶德宗先歸所俘者以

懷之其歸向日所俘者八百人而已狼子野心姑以此報塞中國其志果如何哉觀異日平涼劫盟之事可見也）上遣中使發盧龍恆冀易定兵萬人（胡氏曰盧龍朱滔恆冀王武俊易定張孝忠）詣魏州討田悅王武俊不受詔執使者送朱滔滔言於衆曰將士有功者吾奏求官勳皆不遂今欲與諸君敕裝共趣魏州擊破馬燧以取溫飽何如皆不應三問乃曰幽州之人自安史之反從而南者無一人得還今其遣人痛入骨髓况太尉司徒皆受國寵榮將士亦各蒙官勳誠且願保目前不敢復有僥冀滔默然而罷乃誅大將數十人厚撫循其士卒康日知聞其謀以告馬燧燧以聞上以魏州未下王武俊復叛力未能制滔壬戌賜滔爵通義郡王冀以安之滔反謀益甚分兵營於趙州以逼康日知以深州授王巨源武俊以其子士真爲恆冀深三州留後將兵圍趙州涿州刺史劉怱聞滔欲救田悅以書諫之曰今昌平故里朝廷改爲太尉鄉司徒里此亦丈夫不朽之名也但以忠順自持則事無不濟竊思近日務大樂戰不顧成敗而家滅身屠者安史是也怱忝密親默而無告是負重知惟司徒圖之無貽後悔滔雖不用其言亦嘉其盡忠卒無疑貳滔將起兵恐張孝忠爲後患復遣牙將蔡雄往說之孝忠曰昔者司徒發幽州遣人語孝忠曰李惟岳負恩爲逆謂孝忠歸國卽爲忠臣孝忠性直用司徒之教今旣爲忠臣矣不復助逆也且孝忠與武俊皆出夷落深知其心最喜翻覆司徒勿忘鄙言他日必相念矣雄復欲以巧辭說之孝忠怒欲執送京師雄懼逃歸滔乃使劉怱將兵屯要害以備之孝忠完城礪兵獨居彊寇之閒莫之能屈滔將步騎二萬五千發深州至東鹿詰旦將行吹角未畢士卒忽大亂喧譟曰天子令司徒歸幽州奈何遠敕南

救田悅滔大懼走入驛後堂避匿蔡雄與兵馬使宗項等矯謂士卒曰汝輩勿喧聽司徒傳令衆稍止雄又曰司徒將發范陽恩旨令得李惟岳州縣卽有之司徒以幽州少絲纊故與汝曹竭力血戰以取深州冀得其絲纊以寬汝曹賦率不意國家無信復以深州與康日知又朝廷以汝曹有功賜絹人十匹至魏州西境盡爲馬僕射所奪司徒但處范陽富貴足矣今茲南行乃爲汝曹非自爲也汝曹不欲南行任自歸北何用喧悻乖失軍禮衆聞言不知所爲乃曰敕使何得不爲軍士守護賞物遂入敕使院壁裂殺之又呼曰雖知司徒此行爲士卒終不如且奉詔歸鎮雄曰然則汝曹各還部伍詰朝復往深州休息數日相與歸鎮耳衆然後定滔卽引軍還深州密令諸將訪察唱率爲亂者得二百餘人悉斬之餘衆股栗乃復引軍而南衆莫敢前卻進取甯晉留屯以待王武俊武俊將步騎萬五千取元氏東越甯晉武俊之始誅李惟岳也遣判官孟華入見華性忠直有才略應對慷慨上悅以爲恆冀團練副使會武俊與朱滔有異謀上遽遣華歸諭旨華至武俊已出師華諫曰聖意於大夫甚厚苟盡忠義何患官爵之不崇土地之不廣不日天子必移康中承於他鎮深趙終爲大夫之有何苦遽自同於逆亂乎異日無成悔之何及華彘在李寶臣幕府以直道已爲同列所忌至是爲副使同列尤疾之言於武俊曰華以軍中陰事奏天子請爲內應故得超遷是將覆大夫之軍大夫宜備之武俊以其舊人不忍殺奪職使歸私第田悅恃援兵將至遣其將康愔將萬餘人出城西與馬燧等戰於御河上大敗而還（御河在魏縣西卽今大名縣也餘俱今縣名）

時兩河用兵月費百餘萬緡府庫不支數月太常博士韋都賓陳京建議以爲貨利所聚皆在富商請括富商錢出萬緡者借其餘以供軍計天下不過借一二千商則數年之用足矣上從之甲子詔借商人錢令度支條上判度支杜佑大索長安中商賈所有貨意其不實輒加榜捶人不勝苦有縊死者長安囂然如被寇盜計所得纔八十餘萬緡又括僦櫃質錢凡蓄積錢帛粟麥者皆借四分之一封其櫃窖百姓爲之罷市相率遮宰相馬自訴以千萬數盧杞始慰諭之勢不可遏乃疾驅自他道歸計并借商所得纔二百餘萬緡人已竭矣

以昭義節度副使磁州刺史盧元卿爲洛州刺史兼魏博招討副使初李抱真爲澤潞節度使馬燧領河陽三城抱真欲殺懷州刺史楊鉞鉞奔燧燧納之且奏其無罪抱真怒及同討田悅數以事相恨望二人怨隙遂深不復相見由是諸軍逗撓久無成功上數遣中使和解之及王武俊逼趙州抱真分麾下二千人戍邢州燧大怒曰餘賊未除宜相與戮力乃分兵自守其地欲引兵歸李晟說燧曰李尙書以刑趙連壤分兵守之誠未有害今公遽自引去衆謂公何燧悅乃單騎造抱真壘相與釋恨結歡會洛州刺史田昂請入朝燧奏以洛州隸抱真請元卿爲刺史兼充招討之副李晟軍先隸抱真又請兼隸燧以示協和上皆從之（胡氏曰九域志云趙州南至邢州七十四里自界首至邢州七十里按與今微不同今順德至趙州臨城縣九十里臨城至趙州亦九十里）

朱滔王武俊軍至魏州田悅具牛酒出迎魏人懼呼動地滔營於愜山是日李懷光軍亦至馬燧等盛軍容迎之滔以爲襲已遽出陳懷光勇而無謀欲乘其營壘未就擊之燧請且休將士觀釁而動懷光曰彼營壘旣立將爲

後患此時不可失也遂擊滔於陜山之西殺步卒千餘人滔軍崩沮懷光按轡觀之有喜色士卒爭入滔營取寶貨王武俊引二千騎橫衝懷光軍軍分爲二滔引兵繼至官軍大敗蹙入永濟渠溺死者不可勝數人相蹈藉其積如山水爲之不流馬燧等各收軍保壘是夕滔等堰永濟渠入王莽故河絕官軍糧道及歸路明日水深三尺餘馬燧懼遣使卑辭謝滔求與諸節度歸本道奏天子請以河北事委五郎處之滔欲許之王武俊以爲不可滔不從秋七月燧與諸軍涉水而西退保魏縣以拒滔滔乃謝武俊武俊由是恨滔後數日滔等亦引兵營魏縣東南與官軍隔水相拒（愜山在大名府北其東爲永濟渠卽淇水也又東爲大河故瀆禹河也以王莽時枯故曰王莽河魏縣在今大名縣北永濟渠西魏州故城在今大名府東王莽河在其西故云絕歸路與今府治不同也）

四年 春正月李希烈遣其將李克誠襲陷汝州執別駕李元平元平本湖南判官薄有才藝性疎傲敢大言好論兵關播奇之薦於上以爲將相之器以汝州距許州最近擢元平爲汝州別駕知州事元平至汝州卽募工徒治城希烈陰使壯士應募執役入數百人元平不之覺希烈遣克誠將數百騎突至城下應募者應之於內縛元平馳去（胡氏曰史言關播所用非才）

三月江西節度使曹王皋敗李希烈將韓霜露於黃梅斬之拔黃州時希烈兵柵蔡山險不可攻皋聲言西取蘄州引舟師泝江而上希烈之將引兵循江隨戰去蔡山三百餘里皋乃復放舟順流而下急攻蔡山拔之希烈兵

還州之不及而敗梟遂進拔蘄州表伊慎爲蘄州刺史王鏐爲江州刺史（蔡山在黃梅縣西南九十里蘄州在其西）

夏四月上以神策軍使白志貞爲京城召募使募禁兵以討李希烈志貞請諸嘗爲節度觀察都團練使者不問孝沒並勒其子弟帥奴馬自備資裝從軍授以五品官貧者甚苦之人心始搖（胡氏曰史言德宗窮兵亂將作矣）

五月李晟謀取涿莫二州以絕幽魏往來之路與張孝忠之子升雲圍朱滔所署易州刺史鄭景濟於清苑累月不下滔以其司武尙書實爲留守將步騎萬餘守魏營自將步騎萬五千救清苑李晟軍大敗退保易州滔還軍瀛州張升雲奔滿城會晟病甚引軍還保定州王武俊以滔旣破李晟留屯瀛州未還魏橋遣其結事中宋端趣之端見滔言頗不遜滔怒使謂武俊曰滔以熱疾暫未南還大王二兄遽有云云滔以救魏博之故叛君棄兄如脫屣耳二兄必相疑惟二兄所爲端還報武俊自辨於馬實實以狀白滔言趙王知宋端無禮於大王深加責讓實無他志武俊亦遣承令官鄭和隨實使者見滔謝之滔乃悅相待如初然武俊以是益恨滔矣六月李抱真使參謀賈林詣武俊壁詐降武俊見之林曰林來奉詔非降也武俊色動問其故林曰天子知大夫宿著誠効及登壇之日撫膺顧左右曰我本徇忠義天子不察諸將亦嘗共表大夫之志天子語使者曰朕前事誠誤悔之無及朋友失意尙可謝况朕爲四海之主乎（胡氏曰賈林先言武俊心事後述天子詔旨鋪陳悔過之意可謂善說

矣）武俊曰僕胡人也爲將尙知愛百姓况天子豈專以殺人爲事乎今山東連兵暴骨如莽就使克捷與誰守之僕不憚歸國但已與諸鎮結盟胡人性直不欲使曲在己天子誠能下詔赦諸鎮之罪僕當首唱從化諸鎮有不從者請奉辭伐之如此則上不負天子下不負同列不過五旬河朔定矣使林還報抱真陰相約結（莫州在任邱北瀛州今河間府）

初行稅閒架陳陌錢法時河東澤潞河陽朔方四軍屯魏縣神策永平宣武淮南浙西荆南江西沔鄂湖南黔中劍南嶺南諸軍環淮甯之境舊制諸道軍出境皆仰給度支上優恤士卒每出境加給酒肉本道糧仍給其家人兼三人之給故將士利之各出軍纔逾境而止月費錢百三十餘萬緡常賦不能供判度支趙贊乃奏行二法所謂稅閒架者每屋兩架爲閒上屋稅錢二千中稅千下稅五百吏執筆推算入人室廬計其數或有宅屋多而無他資者出錢動數百緡敢匿一閒杖六十賞告者錢五十緡所謂除陌錢者公私結與及賣買每緡官留五十錢給他物及相貿易者約錢爲率敢隱錢百杖六十罰錢二千賞告者錢十緡其賞錢皆出坐事之家於是愁怨之聲盈於遠近初上在東宮聞監察御史嘉興陸贄名卽位召爲翰林學士數問以得失時兩河用兵久不決賦役日滋贄以兵窮民困恐別生內變乃上奏其略曰克敵之要在乎將得其人馭將之方在乎操得其柄將非其人者兵雖衆不足恃操失其柄者將雖材不爲用又曰將不能使兵國不能馭將非止費財翫寇之弊亦有不戢自焚之災又曰今兩河淮西爲叛亂之帥者獨四五凶人而已尙恐其中或遭詿誤內蓄危疑蒼黃失圖勢不得

止况其餘衆蓋並脇從苟知全生豈願爲惡又曰無紆目前之虞或興意外之變人者邦之本也財者人之心也其心傷則其本傷其本傷則枝幹顛瘁矣又曰人搖不甯事變難測是以兵貴拙速不貴巧遲若不靖於本而務救於末則救之所爲乃禍之所起也又論關中形勢以爲王者蓄威以昭德偏廢則危居重以馭輕倒持則悖王畿者四方之本也太宗列置府兵分隸禁衛大凡諸府八百餘所而在關中者殆五百焉舉天下不敵關中則居重馭輕之意明矣承平漸久武備寢微雖府衛具存而卒乘罕習故祿山竊倒持之柄乘外重之資一舉滔天兩京不守尙賴西邊有兵諸牧有馬每州有糧故肅宗得以中興乾元之後繼有外虞悉師東討邊備旣弛禁戎亦空吐蕃乘虛入爲寇故先皇帝莫與爲禦避之東遊是皆失居重馭輕之權忘深根固柢之慮內寇則殺函失險外侵則汧渭爲戎於斯之時雖有四方之師甯救一朝之患陛下追想及此豈不爲之寒心哉今朔方太原之衆遠在山東神策六軍之兵繼出關外倘有賊臣滔寇黠虜覷邊伺隙乘虛微犯亭障此愚臣所竊憂也未審陛下其何以禦之側聞伐叛之初議者多易其事僉謂有征無戰役不踰時計兵未甚多度費未甚廣於事爲無擾於人爲不勞曾不料兵連禍拏變故難測日引月長漸垂始圖往歲爲天下所患咸謂除之則可致升平者李正己李寶臣梁崇義田悅是也往歲爲國家所信咸謂任之則可除禍亂者朱滔李希烈是也旣而正己死李納繼之寶臣死惟岳繼之崇義平希烈叛惟岳戮朱滔攜然則往歲之所患者四去其三矣而患竟不衰往歲之所信者今則自叛矣而餘又難保是知立國之安危在勢任事之濟否在人勢苟安則異類同心也勢苟危則舟中敵國

也陛下豈可不追鑒往事惟新令圖修偏廢之柄以靖人復倒持之柄以固國而乃孜孜汲汲極思勞神徇無己之求望難必之效乎今關輔之閒徵發已甚宮苑之內備衛不全萬一將帥之中又如朱滔希烈或負固邊壘誘致豺狼或竊發郊畿驚犯城闕此亦愚臣所竊爲憂者也未審陛下復何以備之（胡氏曰姚令言朱泚之變卒如陸贄所料）陛下倘過聽愚計所遣神策六軍李晟等及節將子弟悉可追還明敕涇隴邠甯但令嚴備封守仍云更不徵發使知各保安居又降德音罷京城及畿縣閒等雜稅則冀已輸者弭怨見處者獲甯人心不搖邦本自固上不能用

九月神策將劉德信宣武將唐漢臣與淮寧將李克誠戰敗於滬澗時李勉遣漢臣將兵萬人救襄城上遣德信帥諸將家應募者三千人助之勉奏李希烈精兵皆在襄城許州空虛若襲許州則襄城圍自解遣二將趣許州未至數十里上遣中使責其違詔二將狼狽而返無復斥候克誠伏兵邀之殺傷太半漢臣奔大梁德信奔汝州希烈遊兵剽掠至伊闕勉復遣其將李堅帥四千人助守東都希烈以兵絕其後堅軍不得還汴軍由是不振襄城益危（滬澗在郟縣西北襄城縣在其東南伊闕在洛陽縣南）

上發涇原諸道兵救襄城冬十月丙午涇原節度使姚令言將兵五千至京師軍士冒雨寒甚多攜子弟而來冀得厚賜遺其家既至一無所賜丁未發至滎水詔京兆尹王翊犒師惟糲食菜餼衆怒蹴而覆之因揚言曰吾輩將死於敵而食且不飽安能以微命拒白刃耶聞瓊林大盈二庫金帛盈溢不如相與取之乃擐甲張旗鼓譟還

趣京城令言入辭尙在禁中聞之馳至長樂阪遇之軍士射令言抱馬鬣突入亂兵呼曰諸君失計東征立功何患不富貴乃爲族滅之計乎軍士不聽以兵擁令言而西上遽命賜帛人二匹衆益怒射中使又命中使宜慰賊已至通化門外中使出門賊殺之又命出金帛廿車賜之賊已入城喧聲浩浩不復可遏百姓狼狽走賊大呼告之曰汝曹勿恐不奪汝商貨儻質矣不稅汝開架陌錢矣上遣普王誼翰林學士姜公輔出慰諭之賊已陳於丹鳳門外小民聚觀者以萬計初神策使白志貞掌召募禁兵東征死亡者志貞皆隱不以聞但受市井富兒賂而補之名在軍籍受給賜而身居市廛爲販鬻司農卿段秀實上言禁兵不精其數至少卒有患難將何待之不聽至是上召禁兵以禦賊竟無一人至者賊已斬關而入上乃與王貴妃韋淑妃太子諸王唐安公主自苑北門出王貴妃以傳國寶繫衣中以從後宮諸王公主不及從者什七八初魚朝恩旣誅宦官不復典兵有竇文瑒霍仙鳴者嘗事上於東宮至是帥宦官左右僅百人以從使普王誼前驅太子執兵以殿司農卿郭曙以部曲數十人獵苑中聞蹕謁道左遂以其衆從右龍武軍使令狐建方教射於軍中聞之帥麾下四百人從乃使建居後爲殿姜公輔叩馬言曰朱泚嘗爲涇帥坐弟滔之故廢處京師心常快快臣謂陛下旣不能推心待之則不如殺之毋貽後患今亂兵若奉以爲主則難制矣請召使從行上倉猝不暇用其言曰無及矣遂行夜至咸陽飯數匕而過時事出非意羣臣皆不知乘輿所之盧杞關播鞦中書垣而出白志貞王翊及御史大夫于頔中丞劉從一戶部侍郎趙贊翰林學士陸贄吳通微等追及上於咸陽賊入宮登含元殿大呼曰天子已出宜人自求富遂

謹諫爭入府庫運金帛極力而止小民因之亦入宮盜庫物通夕不已其不能入者剽奪於路諸坊居民各相帥自守姚令言與亂兵謀曰今衆無主不能持久朱太尉閒居私第請相與奉之衆許諾乃遣數百騎迎泚於晉昌里第夜半泚按轡列炬傳呼入宮居含元殿設警嚴自稱權知六軍戊申旦徙居白華殿出榜於外稱涇原將士久處邊陲不閑朝禮輒入宮闕致驚乘輿西出巡幸太尉已權臨六軍應神策軍士及文武百官凡有祿食者悉詣行在不能者卽詣本司若出三日檢勘彼此無名者皆斬於是百官出見泚或勸迎乘輿泚不悅百官稍稍遁去源休以使回紇還賞薄怨朝廷入見泚屏人密語移時爲泚陳成敗引符命勸之僭遣泚喜然猶未決宿衛諸軍舉白幡降者列於闕前甚衆泚夜於苑門出兵且自通化門入絡繹不絕張弓露刃欲以威衆上思桑道茂之言自咸陽幸奉天縣僚聞車駕猝至欲逃匿山谷主簿蘇弁止之文武之臣稍稍繼至己酉左金吾大將軍渾瑊至奉天瑊素有威望衆心恃之稍安庚戌源休勸朱泚禁十城門毋得出朝士朝士往往易服爲傭僕潛出休又爲泚說誘文武之士使之附泚檢校司空同平章事李忠臣久失兵柄太僕卿張光晟自負其才皆鬱鬱不得志泚悉起而用之工部侍郎蔣鎮出亡墜馬傷足爲泚所得先是休以才能光晟以節義鎮以清素都官員外郎彭偃以文學太常卿敬釭以勇略皆爲時人所重至是皆爲泚用鳳翔涇原將張廷芝段誠諫將數千人救襄城未出潼關聞朱泚據長安殺其大將隴右兵馬使戴蘭潰歸於泚泚於是自謂衆心所歸謀反遂定以源休爲京兆尹判度支李忠臣爲皇城使百司供億六軍宿衛咸擬乘輿辛亥以渾瑊爲京畿渭北節度使行在都虞候白志

貞爲都知兵馬使令狐建爲中軍鼓角使以神策都虞候侯仲莊爲左衛將軍兼奉天防城使朱泚以司農卿段秀實久失兵柄意其必怏怏遣數十騎召之秀實閉門拒之騎士踰垣入劫之以兵秀實自度不免乃謂子弟曰國家有患吾於何避之常以死徇社稷汝曹宜人自求生乃往見泚泚喜曰段公來吾事濟矣延坐問計秀實說之曰公本以忠義著聞天下今涇軍以犒賜不豐遽有披猖使乘輿播越夫犒賜不豐有司之過也天子安得知之公宜此開諭將士示以禍福奉迎乘輿復歸宮闕此莫大之功也泚默然不悅然以秀實與己皆爲朝廷所廢遂推心委之左驍衛將軍劉海賓涇原都虞候何明禮孔目官岐靈岳皆秀實素所厚也秀實密與之謀誅泚迎乘輿上初至奉天詔徵近道兵入援有上言朱泚爲亂兵所立且來攻城宜早修守備盧杞切齒言曰朱泚忠貞羣臣莫及奈何言其從亂傷大臣心臣請以百口保其不反上亦以爲然又聞晝臣勸泚奉迎乃詔諸道援兵至者皆營於三十里外姜公輔諫曰今宿衛單寡防慮不可不深若泚竭忠奉迎何憚於兵多如其不然有備無患上乃悉召援兵入城盧杞及白志貞言於上曰臣觀朱泚心跡必不至爲逆願擇大臣入京城宣慰以察之上以諸從臣皆畏憚莫敢行金吾將軍吳澈獨請行上悅澈退而告澈人曰食其祿而違其難何以爲臣吾幸託肺腑非不知往必死但舉朝無蹈患之臣使聖情慊慊耳遂奉詔詣泚泚反謀已決雖陽爲受命館澈於客省尋殺之泚遣銳兵三千聲言迎大駕實襲奉天時奉天守備單弱段秀實謂岐靈岳曰事急矣使靈岳詐爲姚令言符令兵且還當與大軍俱發竊令言印未至秀實倒用司農印符募善走者追之兵至駱驛得符而還秀實謂同謀

曰兵還吾屬無類矣我當直搏泚殺之不克則死終不能爲之臣也乃令劉海賓何明禮陰結軍中之士欲使應之於外泚兵至泚令言大驚歧靈岳獨承其而死不以及秀實等是日泚召李忠臣源休姚令言及秀實等議稱帝事秀實勃然起奪休象笏前唾泚面大罵曰狂賊吾恨不斬汝萬段豈從汝反耶因以笏擊泚泚舉手扞之纔中其額濺血灑地泚與秀實相搏恟恟左右猝愕不知所爲海賓不敢進乘亂而逸忠臣前助泚泚得匍匐脫走秀實知事不成謂泚黨曰我不同汝反何不殺我衆爭前殺之泚一手承血一手止其衆曰義士也勿殺秀實既死泚哭之甚哀以三品禮葬之海賓縗服而逃後二日捕得殺之亦不引何明禮明禮從泚攻奉天復謀殺泚亦死上聞秀實死恨委用不至涕泗久之（滻水在長安東長樂阪在其西通化門長安東面北門丹鳳門大明宮南門大明宮東內也北卽後苑晉昌坊自啓夏門入向北第四坊含元殿正殿也白華殿據注當在大明宮太和門奉天今乾州皇城在長安城中駱驛未詳當在咸陽興平之間）

鳳翔節度使張鎰性儒緩好修飾邊幅不習軍事聞上在奉天欲迎大駕具服用貨財獻於行在後營將李楚琳爲人剽悍軍中畏之嘗事朱泚爲泚所厚行軍司馬齊映與同幕齊抗言於鎰曰不去楚琳必爲亂首鎰命楚琳出戍隴州楚琳託事不時發鎰方以迎駕爲憂謂楚琳已去矣楚琳夜與其黨作亂鎰縋城而走賊追及殺之判官王沼等皆死映自水竇出抗爲備保負荷而逃皆免始上以奉天迫隘欲幸鳳翔戶部尙書蕭復聞之遽請見曰陛下大誤鳳翔將卒皆朱泚故部曲其中必有與之同惡者臣尙憂張鎰不能久豈得以變輿蹈不測之淵乎

上曰吾行計已決試爲卿留一日明日聞鳳翔亂乃止齊映齊抗皆詣奉天以映爲御史中丞抗爲侍御史楚琳自爲節度使降於朱泚隴州刺史郝通奔於楚琳

右龍武將軍李觀將衛兵千餘人從上於奉天上委之召募數日得五千餘人列之通衢旗鼓嚴整城人爲之增氣姚令言之東出也以兵馬使京兆馮河清爲涇原留後判官河中姚况知涇州事河清况聞上幸奉天集將士大哭激以忠義發甲兵器械百餘車通夕輸行在城中方苦無甲兵得之士氣大振詔以河清爲四鎮北庭行營涇原節度使况爲行軍司馬

朱泚自將奉天軍勢甚盛以姚令言爲元帥張光晟副之以李忠臣爲兆京尹皇城留守仇敬忠爲同華等州節度拓東土以捍關東之師李日月爲西道先鋒經略使邠甯留後韓遊瓌慶州刺史論惟明監軍翟文秀詔將兵三千拒泚於便橋與泚遇於醴泉遊瓌欲還趣奉天文秀曰我向奉天賊亦隨至是引賊以迫天子也不若留壁於此賊必不敢越我向奉天若不顧而過則與奉天夾攻之遊瓌曰賊強我弱若賊分軍以綴我直趣奉天奉天兵亦弱何夾攻之有我今急趣奉天所以衛天子也且吾士卒飢寒而賊多財彼以利誘吾卒不能禁也（胡氏曰翟文秀欲留拒賊詔旨也夾攻之說兵家常論也挾詔旨而依兵家常論以制將帥未有不折而從之者微韓遊瓌持之奉天殆矣）遂引兵入奉天泚亦隨至官軍出戰不利泚兵爭門欲入渾城與遊瓌血戰竟日門內有草車數乘城使虞候高固帥甲士以長刀斫賊皆一當百曳車塞門縱火焚之衆軍乘火擊賊賊乃退會夜泚營

於城東三里擊柝張火布滿原野使西明寺僧法堅造攻具毀佛寺以爲梯衝韓遊瓌曰寺材皆乾薪但具火以待之泚自是日來攻城瓌遊瓌等晝夜力戰幽州兵救襄城者聞泚反突入潼關歸泚於奉天普潤戍卒亦歸之有衆數萬上與陸贄語及亂故深自克責贄曰致今日之患皆羣臣之罪也上曰此亦天命非由人事贄退上疏以爲陛下志壹區宇四征不庭凶渠稽誅逆將繼亂兵連禍結行及三年徵師日滋賦斂日重內自京邑外泊邊陲行者有鋒刃之憂居者有誅求之困是以叛亂繼起怨讟並興非常之虞億兆同慮惟陛下穆然凝邃獨不得聞致使冤卒鼓行白晝犯闕豈不以乘我閒隙因人攜離哉陛下有股肱之臣有耳目之任有諫諍之列有備衛之司見危不能竭其誠臨難不能效其死臣所謂致今日之患羣臣之罪者豈徒言與聖旨又以國家興衰皆有天命臣觀天所聽視皆因於人故祖伊責紂之辭曰我生不有命在天武王數紂之罪曰乃曰吾有命罔懲其侮此又捨人事而推天命必不可之理也易曰視履考詳又曰吉凶者失得之象此乃天命由人其義明矣然則聖哲之意六經會通皆謂禍福由人不言盛衰有命蓋人事理而天命降亂者未之有也人事亂而天命降康者亦未之有也自頃征討頻頻刑網稍密物力耗竭人心驚疑如居風濤洶洶靡定上自朝列下達蒸黎日夕族黨聚謀咸憂必有變故旋屬涇原叛卒果如衆庶所虞京師之人動逾億計固非悉知算術皆曉占書則明致寇之由未必盡關天命臣聞理或生亂亂或資理有以無難而失守有以多難而興邦今生亂失守之事則既往而不可復追矣其資理興邦之業在陛下克勵而謹修之何憂乎亂人何畏於厄運動勵不息足致升平豈止盪滌妖氛

旋復宮闕而已（便橋在咸陽醴泉在咸陽西北又西北則奉天）田悅說王武俊使與馬實共擊李抱真於臨洛抱真復遣賈林說武俊曰臨洛兵精而有備未易輕也今戰勝得地則利歸魏博不勝則恆冀大傷易定滄趙皆大夫之故地也（胡氏曰時張奉忠據易定滄康日知據趙州）不如先取之武俊乃辭悅與馬實北歸壬戌悅送武俊於館陶執手泣別下至將士贈遺甚厚先是武俊召回紇兵使絕李懷光等糧道懷光等已西去而回紇達于將回紇千人雜虜二千人適至幽州北境朱滔因說之欲與俱詣河南取東都應接朱泚許以河南子女賂之滔娶回紇女爲側室回紇謂之朱郎且利其俘掠許之賈林復說武俊曰自古國家有患未必不因之更興况主上九葉天子聰明英武天下誰肯捨之共事朱泚乎滔自爲盟主以來輕蔑同列河朔古無冀國冀乃大夫之封域也今滔稱王又西倚其兄北引回紇其志欲盡吞河朔而王之大夫雖欲爲之臣不可得矣（胡氏曰田悅之問王武俊朱滔與賈林說王武俊者同一利害耳人惟趨利而避害故說行非有他巧也）且大夫雄勇善戰非滔之比又本以忠義手誅叛臣當時宰相處置失宜爲滔所誑誘故蹉跌至此不若與昭義併力取滔其勢必蹙滔旣亡則泚自破矣此不世之功轉禍爲福之道也今諸道輻湊攻泚不日當平天下已定大夫乃悔過而歸國則已晚矣時武俊已與滔有隙因攘袂作色曰二百年天子吾不能臣豈能臣此田舍兒乎遂與抱真及馬燧相結約爲兄弟然猶外事滔禮甚謹與田悅各遣使見滔於河間賀朱泚稱尊號且請馬實之兵共攻康日知於趙州

初朱泚鎮鳳翔遣其將牛雲光將幽州兵五百人戍隴州以隴右營田判官韋臬領隴右留後及郝通奔鳳翔牛雲光詐疾欲俟臬至伏兵執之以應泚事泚帥其衆奔泚至汧陽遇泚遣中使蘇玉齋詔書加臬中丞玉說雲光曰韋臬書生也君不如與我俱之隴州臬幸而受命乃吾人也不受命君以兵誅之如取狐狍耳雲光從之臬從城上問雲光曰曷者不告而行今而復來何也雲光曰曷者未知公心今公有新命故復來願託腹心臬乃先納蘇玉受其詔書謂雲光曰大使苟無異心請悉納甲兵使城中無疑衆乃可入雲光以臬書生易之乃悉以甲兵輸之而入明日臬宴玉雲光及其卒於郡舍伏甲誅之築壇盟將士曰李楚琳賊虐本使既不事上安能恤下宜相與討之遣兄平弁詣奉天復遣使求援於吐蕃

十一月靈武留後杜希全驪州刺史戴休顏夏州刺史時常春會渭北節度使李建徽合兵萬人入援將至奉天上召將相議道所從出關播渾城曰漠谷道險狹恐爲賊所邀不若自乾陵北過附柏城而行營於城東北雞子堆與城中犄角相應且分賊勢盧杞曰漠谷道近若爲賊所邀則城中出兵應接可也儻出乾陵恐驚陵寢城曰自泚攻城斬乾陵松柏以夜繼晝其驚多矣今城中危急諸道救兵本至惟希全等來所繫非輕若得營據要地則泚可破也杞曰陛下行師豈比逆賊若令希全等過之是自驚陵寢上乃命希全等自漠谷進丙子希全等軍至漠谷果爲賊所邀乘高以大弩巨石擊之死傷甚衆城中出兵應接爲賊所敗是夕四軍潰退保邠州泚閱其輜重於城下從官相視失色（胡氏曰自兩河兵興以至乘輿播遷盧杞之言無一不誤國而德宗信之如故庸

昏甚矣）泚攻城益急穿塹環之泚移帳於乾陵下視城中動靜皆見之時遣使環城招誘士民笑其不識天命（靈武治今靈州鹽州在其東南花馬池北夏州治今榆林府又在其東渭北治鄜州在其南四鎮境相接也漠谷在乾州西北乾陵在谷東按杞旣以百口保泚又屢謀皆誤而德宗愈信之所謂臨亂之君各賢其臣）

朱泚攻圍奉天費月城中資糧俱盡上嘗遣健步出城覘賊其人懇以苦寒爲辭跪奏乞一襦袴上爲之尋求不獲竟憫默而遣之時供御纔有糲米二斛每伺賊之休息夜絕人於城外采蕪菁根而進之上召公卿將吏謂曰朕以不德自陷危亡固其宜也公輩無罪宜早降以救室家羣臣皆頓首流涕期盡死力故將士雖困極而銳氣不衰上之幸奉天也糧料使崔縱勸李懷光令入援懷光從之縱悉斂軍資與懷光皆來懷光晝夜倍道至河中力疲休兵三日河中尹李齊運傾力犒宴軍尙欲遷延崔縱先輩貨財度河謂衆曰至河西悉以分賜衆利之西屯蒲城有衆五萬李晟行且收兵亦自蒲津濟軍於東渭橋其始有卒四千晟善於撫御與士卒同甘苦人樂從之旬月閒至萬餘人神策兵馬使尙可孤討李希烈將三千元在襄陽自武關入援軍於七盤敗泚將仇敬遂取藍田可孤宇文部之別種也鎮國軍副使駱元光其先安息人駱奉先養以爲子將兵守潼關近十年爲衆所服朱泚遣其將何望之襲華州刺史董晉棄州走行在望之據其城將聚兵以絕東道元光引關下兵襲望之走遠長安元光遂軍華州召募士卒數日得萬餘人泚數遣兵攻元光元光皆擊卻之賊由是不能東出上卽以元光爲鎮國軍節度使元光乃將兵二千西屯昭應馬燧遣其行軍司馬王權及其子彙將兵五千人入援屯中渭橋

於是泚黨所據惟長安而已撥軍遊騎時至望春樓下李忠臣等屢出兵皆敗求救於泚泚恐民間乘弊鈔之所遣兵皆晝伏夜行泚內以長安爲憂乃急攻奉天使僧法堅造雲梯高廣各數丈裹以兇革下施巨輪上容壯士五百人城中望之恟懼上以問羣臣渾瑊候仲莊對曰臣觀雲梯勢甚重重則易陷臣請迎其所來鑿地道積薪蓄火以待之神武軍使韓澄曰雲梯小伎不足上勞聖慮臣請禦之乃度梯之傑所廣城東北隅三十步多儲膏油松脂薪葦於其上丁亥泚盛兵鼓譟攻南城韓遊瓌曰此欲分吾力也乃引兵嚴備東北戊子北風甚迅泚推雲梯上施溼氈懸水囊載壯士攻城翼以輜輶（胡氏曰輜輶攻城車也兵法修輜輶距堙者三月而後成）置人其下抱薪負土填塹而前矢石火炬所不能傷賊併兵攻城東北隅矢石如雨城中死傷者不可勝數賊已登城者上與渾瑊對泣羣臣惟仰首祝天上以無名告身自御史大夫實食五百戶以下千餘通授瑊使募敢死士禦之仍賜御筆使視其功之大小書名給之告身不足則書其身且曰今便與卿別瑊俯伏流涕上拊其背歔歔不自勝時士卒凍餒又乏甲冑瑊撫諭激以忠義皆鼓譟力戰城中流矢進戰不輟初不言痛會雪梯輾地道一輪偏陷不能前卻火從地中出風勢亦回城上人投葦炬散松脂沃以膏油謹呼震地須臾雲梯及梯上人皆爲灰燼臭聞數里賊乃引退於是三門皆出兵太子親督戰賊徒大敗死者數千人將士傷者太子親爲裹瘡入夜泚復來攻城矢及御前三步而墜上大驚李懷光自蒲城引兵趣涇陽傍北山而西先遣兵馬使張韶微服閒行詣行在藏表於蠟詔至奉天值九賊方攻城見韶以爲賤人驅之使與民俱瑊詔得閒踰塹抵城下呼曰我朔

方軍使者也城上人下繩引之比登身中數十矢得表於衣而進之上大喜昇詔以徇城四隅歡聲如雷癸巳懷光敗泚兵於醴泉泚聞之懼引兵遁歸長安衆以爲懷光復三日不至則城不守矣（胡氏曰史言李懷光解奉天之圍不爲無功）泚既退從臣皆賀泚滑行營兵馬使賈隱林進言陛下性太急不能容物若此性未改雖朱泚敗亡憂未艾也上不以爲忤甚稱之侍御史万俟著開金商運路重圍既解諸道貢賦繼至用度始振朱泚至長安但爲城守之計時遣人自城外來周走呼曰奉天破矣欲以惑衆泚既據府庫之富不愛金帛以悅將士公卿家屬在城者皆給月俸神策及六軍從車駕及哥舒曜李晟者泚皆給其家糧加以繕完器械日費甚廣及長安平府庫尙有餘蓄見者皆追怨有司之暴斂焉或謂泚曰陛下既受命唐之陵廟不宜復存泚曰朕嘗北面事唐豈忍爲此又曰百官多缺請以兵脅士人補之泚曰強授之則人懼但欲仕者則與之何必叩戶拜官耶泚所用者惟范陽神策團練兵涇原卒驕皆不爲用但守其所掠資貨不肯出戰又密謀殺泚不果而止李懷光性粗疎自山東來赴難數與人言盧杞趙贊白志貞之姦佞且曰天下之亂皆此曹所爲也吾見上當請誅之既解奉天之圍自矜其功謂上必接以殊禮或說王翊趙贊曰懷光緣道憤歎以爲宰相謀議乖方度支賦斂煩重京兆犒賜刻薄致乘輿播遷者三臣之罪也今懷光新立大功上必披襟布誠詢得失使其言入豈不殆哉翊贊以告盧杞杞懼從容言於上曰懷光勳業社稷是賴賊徒破膽皆無存心若使之乘勝取長安則一舉可以滅賊此破竹之勢也今聽其入朝必當賜宴留連累日使賊入京城得從容成備恐難圖矣上以爲然（胡氏曰懷光矜

功厚望其上而求逞其欲德宗欲速逼使其下而不憫其勞盧杞之心自營免罪而裨闔於其間是以雖急於平賊而不知更生一賊也詔懷光直引軍屯便橋與李建徽李晟及神策兵馬使楊惠元刻期共取長安懷光自以數千里謁誠赴難破朱泚解重圍而咫尺不得見天子意殊怏怏曰吾今已爲姦人所排事可知矣遂引兵去至魯店留二日乃行（河中在今蒲州府東渭橋在今西安府東七盤在商州北昭應今臨潼縣中渭橋在長安北金今興安府商今商州漢水道也胡氏曰魯店在奉天東南咸陽陳濤斜之西北）

淮南節度使陳少遊將兵討李希烈屯盱眙聞朱泚作亂歸廣陵修塹壘繕甲兵浙江東西節度使韓滉閉關梁禁牛馬出境築石頭城穿井近百所繕館第數十修塢壁起建業抵京峴樓堞相屬以備車駕度江且自固也少遊發兵三千大閱於江北滉亦發舟師三千曜武於京江以應之時南方藩鎮各閉境自守惟曹王皋數遣使閒道貢獻李希烈攻逼汴鄭江淮路絕朝貢皆自宣饒荆襄趣武關皋治郵驛平道路由是往來之使通行無阻（時滉治江甯府故修石頭城京峴山在鎮江府東五里江淮運路本自淮汴今希烈梗其中道故自甯國步道至饒州然後舟行自鄱陽以出江由荊州襄陽上商州興安復陸運度滑至乾州也此謂江浙往來之使）

讀史兵略卷三十六

益陽胡林翼纂

通鑑

興元元年 春正月癸酉朔赦天下改元制曰致理興化必在推誠忘己濟人不吝改過朕嗣服不構君臨萬邦失守宗祧越在草莽不念率德誠莫追於既往永言思咎期有復於將來明徵其義以示天下小子懼德弗嗣罔敢怠荒然以長於深宮之中暗於經國之務積習易溺居安忘危不知稼穡之艱難不恤征戍之勞苦澤靡下究情未上通事既擁隔人懷疑阻猶昧省已遂用興戎徵師四方轉餉千里賦車籍馬遠近騷然行齋居送衆庶勞止或一日屢交鋒刃或連年不解甲冑祀奠乏主室家靡依死生流離怨氣凝結力役不息田萊多荒暴令峻於誅求疲眊空於杼柚轉死溝壑離去鄉閭邑里邱墟人煙斷絕天譴於上而朕不寤人怨於下而朕不知馴致亂階變興都邑萬品失序九廟震驚上累於祖宗下負於蒸蒸痛心覩貌罪實在予永言愧悼若墜泉谷自今中外所上書奏不得更言聖神文武之號李希烈田悅王武俊李納等咸以勳舊各守藩維朕撫御乖方致其疑懼皆由上失其道而下罹其災朕實不君人則何罪（胡氏曰此等言語強藩悍將聞之宜其感服易心）宜并所管將吏等一切待之如初朱滔雖緣朱泚連坐路遠必不同謀念其舊勳務在宏貸如能效順亦與維新朱泚反易天

常盜竊名器暴犯陵寢所不忍言獲罪祖宗朕不敢赦其脅從將吏百姓等但官軍未到京城以前去逆效順并散歸本道本軍者並從赦例（胡氏曰所以攜從逆之黨）諸軍諸道應赴奉天及進收京城將士並賜名奉天定難功臣（胡氏曰所以作勤王之心）其所加墊陌錢稅閒架竹木茶漆權鐵之類悉宜停罷（胡氏曰所以順人情之欲）赦下四方人心大悅及上還長安明年李抱真入朝爲上言山東宣布赦書士卒皆感泣臣見人情如此知賊足不平也王武俊田悅李納見赦令皆去王號上表謝罪惟李希烈自恃兵強財富遂謀稱帝

李希烈以夏口上流要地使其驍將董侍募死士七千襲鄂州刺史李兼偃旗臥鼓閉門以待之侍撤屋材以焚門兼率士卒出戰大破之上以兼爲鄂岳沔都團練使於是希烈東畏曹王皋西畏李兼不敢復有窺江淮之志矣（胡氏曰鄂州治江夏縣按夏口在其江北）

上於行宮廡下儲諸道貢獻之物榜曰瓊林大盈庫陸贄以爲戰守之功賞賚未行而遽私別庫則士卒怨望無復鬪志上疏諫其略曰天子與天同德以四海爲家何必撓廢公方崇聚私貨降至尊而代有司之守辱萬乘以效匹夫之藏虧法失人誘姦聚慝以斯制事豈不過哉又曰頃者六師初降百物無儲外扞凶徒內防危堞晝夜不息殆將五旬凍餒交侵死傷相枕畢命同力竟夷大艱良以陛下不厚其身不私其欲絕甘以同卒伍輟食以啗功勞無猛制而人不攜懷所感也無厚賞而人不怨悉所無也今者攻圍已解衣食已豐而謠譁方興軍情稍阻豈不以勇夫恆性嗜利矜功其患難旣與之同憂而好樂不與之同利苟異恬默能無怨咨又曰陛下誠能近

想重圍之殷憂追戒平居之專欲凡在二庫貨賄盡令出賜有功每獲珍華先給軍賞如此則亂必靖賊必平徐駕六龍旋復都邑天子之貴豈當憂貧是乃散其小儲而成其大儲損其小寶而固其大寶也上卽命去其榜二月李希烈將兵五萬圍甯陵引水灌之濮州刺史劉昌以三千人守之滑州刺史李澄密遣使請降上許以澄爲汴滑節度使澄猶外事希烈希烈疑之遣養子六百人戍白馬召澄共攻甯陵澄至石柱使其衆陽驚燒營而遁又諷養子令剽掠澄悉收斬之以白希烈希烈無以罪也劉昌守甯陵凡四十五日不釋甲韓滉遣其將王栖曜將兵助劉洽拒希烈栖曜以彊弩數千游汴水夜入甯陵城明日從城上射希烈及其坐幄希烈驚曰宣潤弩手至矣遂解圍去（白馬山在滑縣石柱在其東南）

朱泚自奉天敗歸李晟謀取長安劉德信與晟俱屯東渭橋不受晟節制晟因德信至營中數以渥澗之敗及所過剽掠之罪斬之因以數騎馳入德信軍勞其衆無敢動者遂并將之軍勢益振李懷光旣脅朝廷逐盧杞等內不自安遂有異志又惡李晟獨當一面恐其成功奏請與晟合軍詔許之晟與懷光會於咸陽西陳濤斜築壘未畢泚衆大至晟謂懷光曰賊若固守宮苑或曠日持久未易攻取今去其巢穴敢出求戰此天以賊賜明公不可失也懷光曰軍適至馬未秣士未飯豈可遽戰耶晟不得已乃就壁晟每與懷光同出軍懷光軍士多掠人牛馬晟軍秋毫不犯懷光軍士惡其異已分所獲與之晟軍終不敢受懷光屯咸陽累月逗留不進上屢遣中使趣之辭以士卒疲弊且當休息觀釁諸將數勸之攻長安懷光不從密與朱泚通謀李晟屢奏恐其有變爲所併請移

軍東渭橋（胡氏曰李懷光既所異謀李晟與之連營於咸陽有不能一息安者其奏請移軍當也然必歸東渭橋者晟之本規也蓋朱泚擁涇卒而據長安其敗也必當西奔晟以師自東逼之所以開其走路耳兵法圍城爲之闕此其近之）上猶冀懷光革心收其力用寢晟奏不下懷光欲緩戰期且激怒諸軍奏言諸軍糧賜薄神策獨厚厚薄不均難以進戰上以財用方窘若糧賜皆比神策則無以給之不然又逆懷光意恐諸軍缺望乃遣陸贄詣懷光營宣慰因召李晟參議其事懷光意欲晟自乞減損使失士心沮敗其功乃曰將士戰鬪同而糧賜異何以使之協力贄未有言數顧晟晟曰公爲元帥得專號令晟將一軍受指蹤而已至於增減衣食公當裁之懷光默然又不欲自減之遂止（胡氏曰李晟之答懷光氣和而辭正故能伐其謀）時上遣崔漢衡詣吐蕃發兵吐蕃相尙結贊言蕃法發兵以主兵大臣爲信今制書無懷光署名故不敢進上命陸贄諭懷光懷光固執以爲不可曰若克京城吐蕃必縱兵焚掠誰能遏之此一害也前有敕旨募士卒克城者人賞百緡彼發兵五萬若援敕求賞五百萬緡何從可得此二害也虜騎雖來必不先進勒兵自固觀我兵勢勝則從而分功敗則從而圖變譎詐多端不可親信此三害也（胡氏曰李懷光雖欲養寇以自資然其陳用吐蕃三害其言亦各有理）竟不肯署敕尙結贊亦不進軍陸贄自咸陽還上言賊泚稽誅保聚宮苑勢窮援絕引日偷生懷光總仗順之師乘制勝之氣鼓行芟翦易若摧枯而乃寇奔不追師老不用諸帥每欲進取懷光輒沮其謀據茲事情殊不可解陛下意在全護委曲聽從觀其所爲亦未知感若不別務規略漸思制持惟以姑息求安終恐變故難測此誠事機危迫

之秋也固不可以尋常容易處之今李晟奏請移軍適遇臣銜命宣慰懷光偶論此事臣遂汎問所宜懷光乃云李晟既欲別行某亦都不要藉臣猶慮有翻覆因美其軍盛彊懷光大自矜誇轉有輕晟之意臣又從容問云回日或聖旨顧問事之可否決定何如懷光已肆輕言不可中變遂云恩命許去事亦無妨要約再三非不詳審雖欲追悔固難爲辭伏望卽以李晟表出付中書敕下依奏別賜懷光手詔示以移軍事由其手詔大意云昨得李晟奏請移軍城東以分賊勢朕本欲委卿商量適會陸贄回奏云見卿語及於此仍言許去事亦無妨遂敕本軍允其所請如此則詞婉而直理順而明雖蓄異端何由起怨上從之晟自咸陽結陳而行（胡氏曰結陳而行以防李懷光追掩）歸東渭橋時鄙坊節度使李建徽神策行營節度使楊惠元猶與懷光聯營陸贄復上奏曰懷光當管師徒足以獨制兇寇逗留未進抑有他由所患太彊不資傍助比者又遣李晟李建徽楊惠元三節度之衆附麗其營無益成功祇足生事何則四軍接壘羣帥異心論勢力則懸絕高卑據職名則不相統屬懷光輕晟等兵微位下而忿其制不從心晟等疑懷光養寇蓄姦而怨其事多陵已端居則互防飛謗欲戰則遞恐分功齟齬不和嫌釁遂構俾之同處必不兩全彊者惡積而後亡弱者勢危而先覆覆亡之禍翹足可期舊寇未平新患方起憂歎所切實堪疚心太上消隱於未萌其次救失於始兆况乎事情已露禍難垂成委而不謀何以寧亂李晟見機慮變先請移軍建徽惠元勢轉孤弱爲其吞噬理在必然他日雖有良圖亦恐不能自拔拯其危急唯在此時今因李晟願行便遣合軍同往託言晟兵素少慮爲賊泚所邀藉此兩軍迭爲掎角仍先諭旨密使促裝詔

書至營卽日進路懷光意雖不欲然亦計無所施是謂先人有奪人之心疾雷不及掩耳者也解鬪不可以不離救焚不可以不疾理盡於此惟陛下圖之上曰卿所料極善然李晟移軍懷光不免悵望若更遣建徽惠元就東恐因此生辭轉難調息且更俟旬時李晟以爲懷光反狀已明綏急宜有備蜀漢之路不可壅請以裨將趙光鈇等爲洋利劍三州刺史各將兵五百以防未然上疑未決欲親總禁兵幸咸陽以慰撫爲名趣諸將進討或謂懷光曰此漢祖遊雲夢之策也懷光大懼反謀益甚上垂欲行懷光辭益不遜上猶疑讒人閒之甲子加懷光太尉增實賜鐵券道神策石兵馬使李卞等往諭旨懷光對使者投鐵券於地曰聖人疑懷光邪人臣反賜鐵券懷光不反今賜鐵券是使之反也辭氣甚悖朔方左兵馬使張名振當軍門大呼曰太尉視賊不許擊待天使不敬果欲反邪功高太山一旦棄之自取族滅富貴他人何益哉我今日必以死爭之懷光聞之謂曰我不反以賊方彊故須蓄銳俟時耳懷光又言天子所居必有城隍乃發卒城咸陽未幾移軍據之張名振曰乃者言不反今日拔軍此來何也何不攻長安殺朱泚取富貴引軍還邪懷光曰名振病心矣命左右引去拉殺之右武鋒兵馬使石演芬本西域胡人懷光養以爲子懷光潛與朱泚通謀演芬遣其客郤成義詣行在告之請罷其都統之權成義至奉天告懷光子璀璨密白其父懷光召演芬責之曰我以爾爲子奈何欲破我家今日負我死甘心乎演芬曰天子以太尉爲股肱太尉以演芬爲心腹太尉旣負天子演芬安得不負太尉乎演芬胡人不能異心惟知事一人苟免賊名而死死甘心矣懷光使左右饘食之皆曰義士也可令快死以刀斷其喉而去李卞等還言懷光

驕慢之狀於是行在始嚴門禁從臣皆密裝以待乙丑加李晟河中同絳節度使上猶以爲薄丙寅又加同平章事上將幸梁州山南節度使鹽亭嚴震聞之遣使奉天奉迎又遣大將張用誠將兵五千至整屋以來迎衛用誠爲懷光所誘陰與之通謀上聞而患之會震繼遣牙將馬助奉表上語之故助請亟詣梁州取嚴震符召用誠還府若不受召臣請殺之上喜曰卿何時復至此助刻日時而去旣得震符請壯士五人與之俱出駱谷用誠不知事泄以數百騎迎之助與之俱入驛時天寒助多然藁火於驛外軍士皆往附火助乃從容出懷中符以示用誠曰大夫召君用誠錯愕起走壯士自後執其手擒之用誠子在助後斫傷助首壯士格殺其子仆用誠於地跨其腹以刀擬其喉曰出聲則死助入其營士卒已擐甲執兵矣助大言曰汝曹父母妻子皆在漢中一朝棄之與張用誠同反於汝曹何利乎大夫令我取用誠不問汝曹無自取族滅衆皆讐服助送用誠詣梁州震杖殺之命副將領其衆助裹其首復命於行在愆期半日李懷光夜遣人襲奪李建徽楊惠元軍建徽走免惠元將奔奉天懷光遣兵追殺之懷光又宣言曰吾今與朱泚連和車駕且當遠避懷光以韓遊瓌朔方將也掌兵在奉天與遊瓌書約使爲變遊瓌密奏之明日又以書趣之上稱其忠義因問策安出對曰懷光總諸道兵故敢恃衆爲亂今邠甯有張昕靈武有甯景璿河中有呂鳴岳振武有杜從政潼關有唐朝臣渭北有竇覲皆守將也陛下各以其地及其衆授之尊懷光之官罷其權則行營諸將各受本府指麾矣懷光獨立安能爲亂上曰罷懷光兵權若朱泚何對曰陛下旣許將士以克城殊賞將士奉天子之命以討賊取富貴誰不願之邠府兵以萬數借使臣得將之

足以誅泚况諸道必有杖義之臣泚不足憂也上然之丁卯懷光遣其將趙昇鸞入奉天約其夕使別將達奚小俊燒乾陵令昇鸞爲內應以驚脅乘輿昇鸞詣渾瑊自言瑊遽以聞且請決幸梁州上命瑊戒嚴城出部勒未畢上已出城西命戴休顏守奉天期臣將士狼狽扈從戴休顏徇於軍中曰懷光已反遂乘城拒守朱泚之稱帝也兵部侍郎劉迺臥病在家泚召之不起使蔣鎮自往說之凡再往知不可誘脅乃歎曰鎮亦忝列曹不能捨生以至於此豈可復以己之腥臊污漫賢者乎歐欬而返迺聞帝幸山南搏膺大呼自投於牀不食數日而卒太子少師喬琳從上至豎屋稱老疾不堪山險削髮爲僧匿於仙遊寺泚聞之召至長安以爲吏部尙書於是朝士之竄匿者多出仕泚矣懷光遣其將孟保惠靜壽孫福達將精騎趣南山邀車駕遇諸軍糧料使張增於豎屋三將曰彼使我爲不臣我以追不及報之不過不使我將耳因目增曰軍士未朝食如何增給其衆曰此東數里有佛祠吾貯糧焉三將帥衆而東縱之剽掠由是百官從行者皆得入駱谷以追不及還報懷光皆黜之李晟得除官制拜哭受命謂將佐曰長安宗廟所在天下根本若諸將皆從行誰當滅賊者乃治城隍繕甲兵爲復京城之計先是東渭橋有積粟十餘萬斛度支給李懷光軍幾盡是時懷光朱泚連兵聲勢甚盛車駕南幸人情擾擾晟以孤軍處二疆寇之閒內無資糧外無救援徒以忠義感激將士故其衆雖單弱而銳氣不衰又以書遺懷光辭禮卑遜雖示尊崇而諭以禍福勸之立功補過故懷光慙慙未忍擊之晟曰畿內雖兵荒之餘猶可賦斂宿兵養寇患莫大焉乃以判張彧假京兆尹擇四十餘人假官以督渭北芻粟不旬日皆充羨乃流涕誓衆決志平賊（胡氏

曰李懷光自河北千里赴難不可謂不勇於勤王以其兵力固可以指期收復君臣猜嫌反忠爲逆張名振所謂自取族滅富貴他人有味乎其言也後之觀史者觀懷光之勤王始末與張名振所以諫懷光之言與夫史家歸功李晟之言則凡居功名之際者可不戒哉按洋今洋縣利今廣元縣劍今劍州入蜀之要也梁州今漢中府駱谷在盩厔縣)

上之發奉天也韓遊瓌帥其麾下八百餘人還邠州李懷光以李晟軍浸盛惡之欲引軍自咸陽襲東渭橋三令其衆衆不應竊相謂曰若與我曹擊朱泚惟力是視若欲反我曹有死不能從也懷光知衆不可強問計於賓佐節度巡官良鄉李景略曰取長安殺朱泚散軍還諸道單騎詣行在如此臣節亦未虧功名猶可保也頓首懇請至於流涕懷光許之都虞候閻晏等勸懷光東保河中徐圖去就懷光乃說其衆曰今且屯涇陽召妻孥於邠俟請至與之俱往河中春裝旣辦還攻長安未晚也東方諸縣皆富實軍發之日聽爾俘掠衆許之懷光乃謂景略曰曷者之議軍衆不從子宜速去不且見害遣數騎送之景略出軍門慟哭曰不意此軍陷於不義懷光遣使詣邠州令留後張昕悉發所留兵萬餘人及行營將士家屬會涇陽仍遣其將劉禮等將三千餘騎脅遷之韓遊瓌說昕曰李太尉功高自蹈禍機中丞今日可以自求富貴遊瓌請帥麾下以從昕曰昕微賤賴李太尉得至此不忍負也遊瓌乃謝病不出陰與諸將高固楊懷賓等相結時崔漢衡以吐蕃兵營於邠南高固曰昕以衆去則邠城空矣乃詐爲渾瑊書召吐蕃使稍逼邠城昕等懼竟不敢出昕等謀殺諸將之不從者遊瓌知之先與高固等

舉兵殺听遣楊懷賓奉表以聞且遣人告崔漢衡漢衡矯詔以遊瓌知軍府事軍中大喜時楊懷賓子朝晟在懷光軍中爲右廂兵馬使聞之泣白懷光曰父立功於國子當誅夷不可典兵懷光囚之於是遊瓌屯邠甯戴休顏屯奉天駱元光屯昭應尙可孤屯藍田皆受李晟節度晟軍聲大振始懷光方彊朱泚畏之與懷光書以兄事之約分帝關中永爲鄰國及懷光決反逼乘輿南幸其下多叛之勢益弱泚乃賜懷光詔書以臣禮待之且徵其兵懷光慙怒內憂麾下爲變外恐李晟襲之遂燒營東走掠涇陽等十二縣雞犬無遺及富平大將孟涉段威勇將數千人奔於李晟將士在道散亡相繼至河中或勸河中守將呂鳴岳焚橋拒之鳴岳以兵少恐不能支遂納之（胡氏曰若呂鳴岳焚蒲津橋懷光將士之心已離必潰散於河西不得至河中矣）河中尹李齊運棄城走懷光遣其將趙貴先築壘於同州刺史李紆懼奔行在幕僚裴向攝州事詣貴先責以逆順之理貴先感寤遂請降同州由是獲全懷光使其將符嶠襲坊州據之渭北守將竇覲帥獵圍七百圍之嶠請降詔以覲爲渭北行軍司馬（昭應今臨潼西卽東渭橋也坊州今中部縣）

上在道民有獻瓜果者上欲以散試官授之訪於陸贄贄上奏以爲爵位恆宜慎惜不可輕用起端雖微流弊必大獻瓜果者止可賜以錢帛不當酬以官上曰試官虛名無損於事贄又上奏其略曰自兵興以來財賦不足以供賜而職官之賞與焉青朱雜沓於胥徒金紫普施於輿阜當今所病方在爵輕設法貴之猶恐不重若又自棄將何勸人夫誘人之方惟名與利名近虛而於教爲重利近實而於德爲輕專實利而不濟之以虛則耗匱而物

力不給專虛名而不副之以實則誕謾而人情不趨故國家命秩之制有職事官有散官有勳官有爵號然掌務而授俸者唯繫職事之一官也此所謂施實利而寓虛名者也其勳散爵號三者所繫大抵止於服色資蔭而已此所謂假虛名而佐實利者也今之員外試官頗同勳散爵號雖則授無費祿受不占員然而突銛鋒排患難者則以是賞之竭筋力展勞效者又以是酬之若獻瓜果者亦授試官則彼必相謂曰吾以忘軀命而獲官此以進瓜果而獲官是乃國家以吾之軀命同於瓜果矣視人如草木誰復爲用哉今陛下既未有實利以敦勸又不重虛名而濫施人無藉焉則後之立功者將曷用爲賞哉車駕至梁州山南地薄民貧自安史以來盜賊攻剽戶口減耗大半雖節制十五州租賦不及中原數縣及大駕駐蹕糧用頗窘上欲西幸成都嚴震言於上曰山南地接京畿李晟方圖收復藉六軍以爲聲援若幸西川則晟未有收復之期也衆議未決會李晟表至言陛下駐蹕漢中所以繫億兆之心成滅賊之勢若規小捨大遷都岷峨則士庶失望雖有猛將謀臣無所施矣上乃止嚴震百方以聚財賦民不至困窮而供億無乏牙將嚴礪震之從祖弟也震使掌轉餉事甚修辦（十五州胡氏謂梁洋與鳳開通渠集蓬利壁巴閬果金按梁今漢中府洋洋縣興略陽縣鳳鳳縣開開縣通綏定府渠渠縣集南江縣蓬蓬州利廣元縣壁通江縣巴州閬閬中縣果順慶府金興安府也）

初奉天圍既解李楚琳遣使入貢上不得已除鳳翔節度使而心惡之議者言楚琳凶逆反覆若不隄防恐生窺伺由是楚琳使者數轟至上皆不引見留之不遣甫至漢中欲以渾瑊代楚琳鎮鳳翔陸贄上奏以爲楚琳殺帥

助賊其罪固大但以乘輿未復大憝猶存勤王之師悉在畿內急宜速告晷刻是爭商嶺則道迂且遙駱谷復爲盜所扼僅通王命唯在襄斜此路若又阻艱南北遂將負絕以諸鎮危疑之勢居二逆誘脅之中洵洵羣情各懷向背儻成楚琳發憾公肆猖狂南塞要衝東延巨滑則我咽喉梗而心膂分矣今楚琳能兩端顧望乃是天誘其衷故通歸塗將濟大業陛下誠宜深以爲念厚加撫循得其遲疑便足集事必欲精求素行追扶宿疵則是改過不足以補愆自新不足以贖罪凡今將吏豈得盡無疵瑕人皆省思孰免疑畏又况阻命之輩脅從之流自知負恩安敢歸化斯釁非小所宜速圖伏願陛下思英主大略勿以小不忍虧撓興復之業也上釋然開悟善待楚琳使者優詔存慰之（從商州武關至漢中府最在東駱谷在襄斜之東襄斜則正路）

夏四月甲辰加李晟鄜坊京畿渭北商華副元帥晟家百口及神策軍士家屬皆在長安朱泚善遇之軍中有言及家者晟泣曰天子何在敢言家乎泚使晟親近以家書遺晟曰公家無恙晟怒曰爾敢爲賊爲開立斬之軍士未授春衣盛夏獨衣裘褐終無叛志（胡氏曰史言李晟以忠義感激士心）

上問陸贄近有卑官自山北來者率非良士有邢建者論說賊勢語最張皇察其事情頗似窺覘今已於一所安置如此之類更有數人若不追尋恐成姦計卿試思之如何爲便贄上奏以爲今盜據宮闕有涉險遠來赴行在者當量加恩賞豈得復猜慮拘囚其略曰以一人之聽覽而欲窮宇宙之變態以一人之防慮而求勝億兆之姦欺役習彌精失道彌遠項籍納秦降卒二十萬慮其懷詐復叛一舉而盡阬之其於防虞亦已甚矣漢高谿達大

度天下之士至者納用不疑其於備慮可謂疏矣然而項氏以滅劉氏以昌蓄疑之與推誠其效固不同也秦皇嚴肅雄猜而荆軻奮其陰計光武寬容博厚而馬援輸其款誠豈不以虛懷待人人亦思附仔數御物物終不親情思附則感而悅之雖寇讎化爲心膂矣意不親則懼而阻之雖骨肉結爲仇讎矣又曰陛下智出庶物有輕待人臣之心思周萬機有獨馭區寓之意謀吞衆略有過慎之防明照羣情有先事之察嚴東百辟有任刑致理之規威制四方有以力勝殘之志由是才能者怨於不任忠藎者憂於見疑著勳業者懼於不容懷反側者迫於及討馴致離叛構成禍災天子所作天下式瞻小猶慎之矧又非小願陛下以覆車之轍爲戒實宗社無彊之休朱滔攻貝州百餘日馬實攻魏州亦踰四旬皆不能下賈林復爲李抱真說王武俊曰朱滔志吞貝魏復值田悅被害儻旬日不救則魏博皆爲滔有矣魏博旣下則張孝忠必爲之臣（胡氏曰張孝忠時鎮易定）滔連三道之兵（胡氏曰三道謂幽州易定魏博）益以回紇（胡氏曰時回紇遣兵助滔）進臨常山（胡氏曰恆州常山郡王武俊居之）明公欲保其宗族得乎常山不守則昭義退保西山（胡氏曰自常山南至趙州皆恆冀巡屬又西南抵邢州界卽昭義巡屬阻山以爲固）河朔盡入於滔矣不若乘貝魏未下與昭義合兵救之滔旣破亡則關中喪氣朱泚不日梟夷變輿反正諸將之功孰有居明公之右者哉武俊悅從之戊辰武俊軍於南宮東南抱真自臨洛引兵會之與武俊營相距十里兩軍尙相疑明日抱真以數騎詣武俊營賓客共諫止之抱真命行軍司馬盧元卿勒兵以俟曰吾之此舉繫天下安危若其不還領軍事以聽朝命亦惟子勵將士以雪讎恥亦惟

子言終遂行武俊嚴備以待之抱真見武俊敍國家禍難天子播遷持武俊哭涕縱橫武俊亦悲不自勝左右莫能仰視遂與武俊約爲兄弟誓同滅賊武俊曰相公十兄名高四海（胡氏曰李抱真第十故呼爲十兄）曷蒙開諭得棄逆從順免菹醢之罪享王公之榮今又不聞胡虜辱爲兄弟武俊當何以爲報乎滔所恃者回紇耳不足畏也戰日願十兄按轡臨視武俊決爲十兄破之抱真退入武俊帳中酣寢久之武俊感激待之益恭指心仰天曰此身已許十兄死矣遂連營而進

山南地熱上以軍士未有春服亦自御袂衣五月鹽鐵判官萬年王紹以江淮繒帛來至上命先給將士然後御衫韓滉欲遣使獻綾羅四十擔詣行在幕僚何士幹請行滉喜曰君能相爲行請今日過江士幹許諾歸別家則家之薪米儲待已羅門庭矣登舟則資裝器用已充舟中矣下至廚籌滉皆手筆記列無不周備每擔夫與白金一版置腰間（胡氏曰史言韓滉敏精密）又運米百艘以餉李晟自負囊米置舟中將佐爭舉之須臾而畢艘置五弩手以爲防援有寇則叩舷相警五百弩已設矣比至渭橋盜不敢近時關中兵荒米斗直錢五百及滉米至減五之四滉爲人彊力嚴毅自奉儉素夫人常衣絹裙破然後易

朱泚使田希鑿厚以金帛賂吐蕃吐蕃受之韓遊瓌以聞渾瑊又奏尙結贊屢遣人約刻日共取長安旣而不至聞其衆今春大疫近已引兵去上以李晟渾瑊兵少欲倚吐蕃以復京城聞其去甚憂之以問陸贄贄以爲吐蕃貪狡有害無益得其引去實可欣賀乃上奏其略曰吐蕃遷延顧望反覆多端深入郊畿陰受賊使致令羣帥進

退憂虞欲捨之獨前則慮其懷怨乘蹠欲待之合勢則苦其失信稽延戎若未歸寇終不滅又曰將帥意陛下不見信任且患蕃戎之奪其功士卒恐陛下不恤舊勞而畏蕃戎之專其利賊黨懼蕃戎之勝不死則悉遣人禽百姓畏蕃戎之來有財必盡爲所掠是以順於王化者其心不得不怠陷於寇境者其勢不得不墜又曰今懷光別保蒲絳吐蕃遠避封疆形勢旣分腹背無患曷虞諸帥才力得伸又曰但願陛下慎於撫接勤於砥礪中興大業旬月可期不宜尙眷眷於犬羊之羣以失將士之情也上復使謂贄曰卿言吐蕃形勢甚善然曷虞諸軍當議規畫令其進取朕欲遣使宣慰卿宜審細條流以聞贄以爲賢君選將委任責成故能有功况今秦梁千里兵勢無常遙爲規畫未必合宜彼違命則失君威從命則害軍事進退羈礙難以成功不若假以便宜之權待以殊常之賞則將帥感悅智勇得伸乃上奏其略曰錄鏑交於原野而決策於九重之中機會變於斯須而定計於千里之外用捨相礙否臧皆凶上有掣肘之譏下無死綏之志又曰傳聞與指實不同懸算與臨事有異又曰設使其中有肆情干命者陛下能於此時戮其違詔之罪乎是則違命者旣不果行罰從命者又未必合宜徒費空言祇勞睿慮匪惟無益其損實多又曰君上之權特異臣下惟不自用乃能用人

李抱眞王武俊距貝州三十里而軍朱滔聞兩軍將至急召馬實實晝夜兼行赴之或謂滔曰武俊善野戰不可當其鋒宜徙營稍前逼之使回紇絕其糧道我坐食德棣之餉依營而陳利則進攻否則入保持其飢疲然後可制也滔疑未決會馬實軍至滔命明日出戰實言軍士冒暑困憊請休息數日乃戰常侍楊布將軍蔡雄引回紇

達干見滔達干曰回紇在國與鄰國戰常以五百騎破鄰國數千騎如掃葉耳今受大王金帛牛酒前後無算思爲大王立效此其時矣明日願大王駐馬高邱觀回紇爲大王翦武俊之騎使匹馬不返布雄曰大王英略蓋世舉燕薊全軍將掃河南清關中今見小敵穴豫不擊失遠近之望將何以成霸業乎達干請戰是也滔喜遂決意出戰丙子旦武俊遣其兵馬使趙琳將五百騎伏於桑林抱真列方陳於後武俊引騎兵居前自當回紇回紇縱兵衝之武俊使其騎控馬避之回紇突出其後將還武俊乃縱兵擊之趙琳自林中出橫擊之回紇敗走武俊急追之滔騎亦走自踐其步陳步騎皆束奔滔不能制遂走趣其營抱真武俊合兵追擊之時滔引三萬人出戰死者萬餘人逃潰者亦萬餘人滔纔與數千人入營堅守會日暮昏霧兩軍不能進抱真軍其營之西北武俊軍其東北滔夜焚營引兵出南門趣德州遁去委棄所掠資財山積兩軍以霧不能追也滔殺楊布蔡雄而歸幽州心旣內慚又恐范陽留守劉怱因敗圖己怱悉發留守兵夾道二十里具儀仗迎之入府相對悲喜

李晟大陳兵諭以收復京城先是姚令言等屢遣諜人覘晟進軍之期皆爲邏騎所獲晟引示以所陳兵謂曰歸語諸賊努力固守勿不忠於賊也皆飲之酒給錢而縱之遂引兵至通化門外曜武而還賊不敢出晟召諸將問兵所從入皆請先取外城據坊市然後北攻宮闕晟曰坊市狹隘賊若伏兵格鬪居人驚亂非官軍之利也今賊重兵皆聚苑中不若自苑北攻之潰其腹心賊必奔亡如此則宮闕不殘坊市無擾策之上者也諸將皆曰善乃牒渾瑊及鎮國節度使駱元光商州節度使尙可孤刻期集於城下壬辰尙可孤敗泚將仇敬忠於藍田西斬之

乙未李晟移軍於光泰門外米倉村丙申晟方自臨築壘泚驍將張庭芝李希倩引兵大至晟謂諸將曰始吾憂賊潛匿不出今來送死此天贊我不可失也命副元帥兵馬使吳詵第縱兵擊之時華州營在北兵少賊併力攻之晟命牙前將李演等帥精兵救之演等力戰賊敗走演等追之乘勝入光泰門再戰又破之會夜晟斂兵還賊餘衆走入白華門夜間慟哭希倩希烈之弟也丁酉晟復出兵諸將請待西師至夾攻之晟曰賊數敗已破膽不乘勝取之使其成備非計也賊又出戰官軍屢捷駱元光敗泚衆於滄西戊戌晟陳兵於光泰門外使李演及牙前兵馬使王必將騎兵牙前將史萬頃將步兵直抵苑牆神麇村晟先使人夜開苑牆二百餘步比演等至賊已樹柵塞之自柵中刺射官軍官軍不得進晟怒叱諸將曰縱賊如此吾先斬公輩矣萬頃懼帥衆先進拔柵而入似演引騎兵繼之賊衆大潰諸軍分道並入姚令言等猶力戰晟命決勝軍使唐良臣等步騎蹙之且戰且前凡十餘合賊不能支至白華門有賊數千騎出官軍之背晟帥百餘騎回禦之左右呼曰相公來賊皆驚潰先是泚遣張光晟將兵五千屯九曲去東渭橋十餘里光晟密輸款於晟及泚敗光晟勸泚出亡泚乃與姚令言帥餘衆西走猶近萬人光晟送泚出城還降於晟晟遣兵馬使田子奇以騎兵追泚晟屯含元殿前舍於右金吾仗令諸軍曰晟賴將士之力克清宮禁長安士庶久陷賊庭若小有震驚非弔民伐罪之意晟與公等室家相見非晚五日內無得通家信命京兆尹李齊運等安慰居人晟大將高明曜取賊妓尙可孤軍士擅取賊馬晟皆斬之軍中股票公私安堵秋毫無犯遠坊有經宿乃知官軍入城者是日渾瑊戴休顏韓遊瓌亦克咸陽敗賊三千餘衆聞

泚西走分兵邀之已亥晟使京西兵馬使孟涉屯白華門尙可孤屯望仙門駱元光屯章敬寺晟以牙前三千人屯安國寺以鎮京城斬泚黨李希倩敬釭彭偃等八人於市六月癸卯李晟遣掌書記吳人于公異作露布上行在曰臣已肅清宮禁祇謁寢園鐘簾不移廟貌如故上泣下曰天生李晟以爲社稷非爲朕也晟在渭橋熒惑守歲久之乃退賓佐皆賀曰熒惑退舍皇家之福也宜速進兵晟曰天子野次臣下知死敵而已天象高遠誰得知之旣克長安乃謂之曰彘非相拒也吾聞五星羸縮無常萬一復來守歲吾軍不戰自潰矣皆謝曰非所及也朱泚將奔吐蕃其衆隨道散亡比至涇州纔百餘騎田希鑿閉城拒之泚謂之曰汝之節吾所授也奈何臨危相負使焚其門希鑿節投火中曰還汝節泚衆皆哭涇卒遂殺姚令言詣希鑿降泚獨與范陽親兵及宗族賓客北趣驛馬關甯州刺史夏侯英拒之至彭原西城屯其黨斬之詣涇州降源休李子平奔鳳翔李楚琳斬之皆傳首行在上問陸贄今至鳳翔有迎駕諸軍形勢甚盛欲因此遣人代李楚琳何如贄上奏以爲如此則事同脅執以言乎除亂則不武以言乎務理則不誠用是時巡後將安入議者或謂之權臣竊未諭其理夫權之爲義取類權衡今輦路所經首行脅奪易一帥而虧萬乘之義得一方而結四海之疑乃是重其所輕而輕其所重謂之權也不亦反乎以反道爲權以任數爲智君上行之必失衆臣下用之必陷身歷代之所以多喪亂而長姦邪由此誤也不如奠枕京邑徵授一官彼喜於恩宥將奔走不暇安敢輒有旅拒復勞誅鉏哉

初上發吐蕃以討朱泚許成功以伊西北庭之地與之及泚誅吐蕃來求地上欲召兩鎮節度使郭昕李元忠還

朝以其地與之李泌曰安西北庭人性驍悍控制西域五十七國及十姓突厥又分吐蕃之勢使不能併兵東侵奈何拱手與之且兩鎮之人勢孤地遠盡忠竭力爲國家固守近二十年誠可哀憐一旦棄之以與戎狄彼其心必深怨中國他日從吐蕃入寇如報私讐矣况日者吐蕃觀望不進陰持兩端大掠武功受賂而去何功之有衆議亦以爲然上遂不與（伊西卽安西時治龜茲今庫車也北庭卽車師後王今濟木薩城五十七國漢三十六國之分如吐火羅二十七國之比）

以涇源節度使田希鑿爲衛尉卿李晟初至鳳翔希鑿遣使參候晟謂使者曰涇州逼近吐蕃萬一入寇州兵能獨禦之乎欲遣兵防援又未知田尙書意使者歸以告希鑿希鑿果請援兵晟遣腹心將彭令英等戍涇州晟尋託巡邊詣涇州希鑿出迎晟與之並轡而入道舊結歡希鑿妻李氏以叔父事晟晟謂之田郎晟命具三日食曰巡撫畢卽還鳳翔希鑿不復疑晟置宴希鑿與將佐俱至晟營晟伏中於外廡旣食而飲彭令英引涇州諸將下堂晟曰我與汝曹久別各宜自言姓名於是得爲亂者石奇等三十餘人讓之曰汝曹屢爲逆亂殘害忠良固天地所不容引出斬之希鑿尙在座晟顧曰田郎亦不得無過以親知之故當使身首得完希鑿曰唯遂引出縊殺之并其子萼晟入其營諭以誅希鑿之意衆股栗無敢動者

貞元元年 時連年旱蝗度支資糧匱竭言事者多請赦李懷光李晟上言赦懷光有五不可河中距長安纔三百里同州當其衝多兵則未爲示信少兵則不足隄防忽驚東偏何以制之一也今赦懷光必以晉絳絃隲還之

渾瑊既無所詣康日知又應遷移土宇不安何以獎勵二也陛下連兵一年討除小醜兵力未窮遽赦其反逆之罪今西有吐蕃北有回紇南有淮西皆觀我孱弱不謂陛下施德澤愛黎元乃謂兵屈於人而自罷耳必競起窺覲之心三也懷光既赦則朔方將士皆應叙勳行賞今府庫方虛賞不滿望是愈激之使叛四也既解何中罷諸道兵賞典不舉怨言必起五也今河中斗米五百芻藁且盡牆壁之閒餓殍甚衆且軍中大將殺戮略盡陛下但敕諸道圍守旬時彼必有內潰之變何必養腹心之疾爲他日之悔哉又請發兵二萬自備資糧獨討懷光秋七月甲午朔馬燧自行營入朝奏稱懷光凶逆尤甚赦之無以令天下願更得一月糧必爲陛下平之上許之

陝虢都兵馬使達奚抱暉燧殺節度使張勸代總軍務邀求旌節且陰召李懷光將達奚小俊爲援上謂李泌曰若蒲陝連衡則猝不可制且抱暉據陝則水陸之運皆絕矣不得不煩卿一往辛丑以泌爲陝虢都防禦水陸運使上欲以神策軍送泌之官問須幾何人對曰陝城三面懸絕攻之未可以歲月下也臣請以單騎入之上曰單騎如何可入對曰陝城之人不貫逆命此特抱暉爲惡耳若以大兵臨之彼閉壁定矣臣今單騎抵其近郊彼舉大兵則非敵若遣小校來殺臣未必不更爲臣用也且今河東全軍屯安邑馬燧入朝願敕燧與臣同辭皆行使陝人欲加害於臣則畏河東移軍討之此亦一勢也上曰雖然朕方大用卿甯失陝州不可失卿當更使他人往耳對曰他人必不能入今事變之初衆心未定故可出其不意奪其姦謀他人猶豫遷延彼旣成謀則不得前矣上許之泌見陝州進奏官及將吏在長安者語之曰主上以陝虢饑故不授泌節而領運使欲令督江淮米以賑

之耳陝州行營在夏縣若抱暉可用當使將之有功則賜旌節矣抱暉覩者馳告之抱暉稍自安泌具以語白上曰欲使其士卒思米抱暉思節必不害臣矣上曰善戊申泌與馬燧俱辭行庚戌加泌陝虢觀察使泌出潼關鄜坊節度使唐朝臣以步騎三千布於關外曰奉密詔送公至陝泌曰辭日奉進止以便宜從事此人不可相踞而來來則吾不得入陝矣唐臣以受詔不敢去泌寫宣以卻之因疾驅而前抱暉不使將佐出迎惟偵者相繼泌宿曲沃將佐不俟抱暉之命來迎泌笑曰吾事濟矣去城十五里抱暉亦出謁泌稱其攝事保完城隍之功曰軍中煩言不足介意公等職事皆按堵如故抱暉出面喜泌既入城視事賓佐有請屏人白事者泌曰易帥之際軍中煩言乃其常理泌到自妥貼矣不願聞也由是反仄者皆自安泌但索簿書治糧儲明日召抱暉至宅語之曰吾非愛汝而不誅恐自今有危疑之地朝廷所命將帥皆不能入故匄汝餘生汝爲我齎版幣祭前使愼無入關自擇安處潛來取家保無他也泌之辭行也上籍陝將預於亂者七十五人授泌使誅之泌既遣抱暉日中宣慰使至泌奏已遣抱暉餘不足問上復遣中使至陝必使誅之泌不得已械兵馬使林滔等五人送京師懇請赦之詔謫戍天德歲餘竟殺之而抱暉遂亡命不知所之達奚小俊引兵至境聞泌已入陝而還（蒲蒲州府指河中李懷光也陝陝州指抱暉也二鎮一河之隔天德軍在河套北今吳喇特旂西）

八月馬燧至行營與諸將謀曰長春宮不下則懷光不可得長春宮守備甚嚴攻之曠日持久我當身往諭之遂徑造城下呼懷光守將徐庭光庭光帥將士羅拜城上燧知其心屈徐謂之曰我自朝廷來可西向受命庭光等

復西向拜燧曰汝曹自祿山已來徇國立功四十餘年何忽爲滅族之計從吾言非止免禍富貴可圖也衆不對燧披襟曰汝不信吾言何不射我將士皆伏泣燧曰此皆懷光所爲汝曹無罪弟堅守勿出皆曰諾壬申燧與渾瑊韓遊瓌進軍逼河中至焦籬堡守將尉珪以七百人降是夕懷光舉火諸營不應駱元光在長春宮下使人招徐庭光庭光素輕元光遣卒罵之又爲優胡於城上以侮之且曰我降漢將耳元光使白燧燧還至城下庭光開門降燧以數騎入城慰撫其衆大呼曰吾輩復爲王人矣渾瑊謂僚佐曰始吾謂馬公用兵不吾逮也今乃知吾不逮多矣詔以庭光試殿中監兼御史大夫甲戌燧帥諸軍至河西河中軍士自相驚曰西城擐甲矣又曰東城旼隊矣須臾軍士皆易其號爲太平字懷光不知所爲乃縊而死初懷光之解奉天圍也上以其子瓘爲監察御史寵待甚厚及懷光屯咸陽不進瓘密言於上曰臣父必負陛下願早爲之備臣聞君父一也但今日之勢陛下未能誅臣父而臣父足以危陛下陛下待臣厚胡人性直故不忍不言耳上驚曰知卿大臣愛子當爲朕委曲彌縫而密奏之對曰臣父非不愛臣臣不愛其父與宗族也顧臣力竭不能回耳上曰然則卿以何策自免對曰臣之進言非苟求生臣父敗則臣與之俱死矣復者何策哉使臣賣父求生陛下亦安用之上曰卿勿死爲朕更至咸陽諭卿父使君臣父子俱全不亦善乎瓘至咸陽而還曰無益也願陛下備之勿信人言今往說諭萬方臣父言汝小子何知主上無信吾非貪富貴也直畏死耳汝豈可陷吾入死地耶及李泌赴陝上謂之曰朕所以再三欲全懷光者誠惜瓘也卿至陝試爲朕招之對曰陛下未幸梁洋懷光猶可降也今則不然豈有人臣迫逐其君

而可復立於其朝乎縱彼顏厚無慚陛下每視朝何心見之臣得入陝借使懷光請降臣不敢受况招之乎李璀固賢者必與父俱死矣若其不死則亦無足貴也及懷光死璀先刃其二弟乃自殺朔方將牛名俊斷懷光首出降河中兵猶萬六千人燧斬其將閻晏等七人餘皆不問燧自辭行至河中平凡二十七日燧出高郢李鄜於獄皆奏置幕下韓遊瓌之攻懷光也楊懷賓戰甚力上命特原其子朝晟遊瓌遂以朝晟爲都虞候上使問陸贄河中旣平復有何事所宜區處令悉條奏以河中旣平慮必有希旨生事之人以爲王師所向無敵請乘勝討淮西者李希烈必誘諭其所部及新附諸帥曰奉天息兵之旨乃因窘而言朝廷稍安必復誅伐如此則四方負罪者孰不自疑河朔非齊固當響應兵連禍結賦役繁興建中之憂行將復起乃上奏其略曰福不可以屢徼幸不可以常覬臣姑以生禍爲憂未敢以獲福爲賀又曰陛下懷悔過之深誠降非常之大號所在宜敷之際聞者莫不流涕假王叛換之夫削僞號以請罪觀鬻首鼠之將一純誠以效勤又曰曩討之而愈叛今釋之而畢來曩以百萬之師而力殫今以咫尺之詔而化洽是則聖王之敷理道服暴人任德而不任兵明矣羣帥之悖臣禮拒天誅圖活而不圖王又明矣是則好生以及物者乃自生之方施安以及物者乃自安之術擠彼於死地而求此之久生也措彼於危地而求此之久安也從古及今未之有焉又曰一夫不率闔境罹殃一境不甯普天致擾又曰億兆汙人四三叛帥感陛下自新之旨悅陛下盛德之言革面易辭且修臣禮其於深言密議固亦未盡坦然必當聚心而謀傾耳而聽觀陛下所行之事考陛下所誓之言若言與事符則遷善之心漸固儻事與言背則慮禍之

態復興又曰朱泚滅而懷光戮懷光戮而希烈征希烈儻平禍將次及則彼之蓄素疑而懷宿負者能不爲之動心哉又曰今皇運中興天禍將悔以逆泚之僞居上國以懷光之竊保中畿歲未再周相次梟殄實衆慝驚心之日羣生改觀之時威則已行惠猶未洽誠宜上副天眷下收物情布恤人之惠以濟威乘滅賊之威以行惠又曰臣所未敢保其必從唯希烈一人而已揆其私心非不願從也想其潛慮非不追悔也但以猖狂失計已竊大號雖荷陛下全宥之恩然不能不自覲於天地之間耳縱未順命斯爲獨夫內則無辭以起兵外則無類以求助其計不過厚撫部曲偷容歲時心雖陸梁勢必不致陛下但敕諸鎮各守封疆彼旣氣奪算窮是乃狴牢之類不有人禍則當鬼誅言之不戰而屈人之兵者此之謂歟丁卯詔以李懷光嘗有功宥其一男使續其後賜之田宅歸其首及尸使葬加馬燧兼侍中渾瑊檢校司空餘將卒賞賚各有差諸道與淮西連接者宜各守封疆非彼侵軼不須進討李希烈若降常待以不死自餘將士百姓一無所問（河西今朝邑縣長春宮在其西北胡氏曰西城河西縣東城河東縣夾河爲兩城也）

二年 秋七月以隴右行營節度使曲環爲陳許節度使陳許荒亂之餘戶口流散曲環以勤儉率下政令寬簡賦役平均數年之間流亡復業兵食皆足

初上與李泌議府兵泌因爲上歷叙府兵自西魏以來興廢之由且言府兵平日皆安居田畝每府有折衝領之折衝以農隙教習戰陳國家有事徵發則以符契下其州及府參驗發之至所期處將帥按閱有教習不精者

罪有折衝甚者罪及刺史軍還則賜勳加賞便道罷之行者近不踰時遠不經歲高宗以劉仁軌爲洮河鎮守使以圖吐蕃於是始有久戍之役武后以來承平日久府兵浸墮爲人所賤百姓恥之至蒸熨手足以避其役又牛仙客以積財得宰相邊將效之山東戍卒多齎繒帛自隨邊將誘之寄於府庫晝則苦役夜墊地牢利其死而沒入其財故自天寶以後山東戍卒還者什無二三其殘虐如此然未嘗有外叛內侮殺帥自擅者誠以顧戀田園恐累宗族故也自開元之末張說始募長征兵謂之彊騎其後益爲六軍及李林甫爲相奏諸軍皆募人爲之兵不土著又無宗族不自重惜忘身徇利禍亂遂生至今爲梗彘使府兵之法常存不廢安有如此下陵上替之患哉陛下思復府兵此乃社稷之福太平有日矣上曰俟平河中當與卿之九月丁亥詔十六衛各置上將軍以寵功臣改神策左右廂爲左右神策軍殿前射生左右廂爲殿前左右射生軍各置大將軍二人將軍二人吐蕃遊騎及好畤京城戒嚴復遣金吾將軍張獻甫屯咸陽民間傳言上復欲出幸以避吐蕃齊映見上言曰外閒皆言陛下已理裝具糗糧人情恟懼夫大福不再陛下奈何不與臣等熟計之因伏地流涕上亦爲之動容李晟遣其將王佖將驍勇三千伏於汧城戒之曰虜過城下勿擊其首首雖敗彼全軍而至汝弗能當也不若俟前軍已過見五方旗虎豹衣乃其中軍也出其不意擊之必大捷佖用其言尙結贊敗走軍士不識尙結贊僅而獲免尙結贊謂其徒曰唐之良將李晟馬燧渾瑊而已當以計去之入鳳翔境內無所俘掠以兵二萬直抵城下曰李令公召我來何不出犒我經宿乃引退冬十月癸亥李晟遣蕃落使野詩良輔與王佖將步騎五千襲吐蕃摧

砂堡壬申遇吐蕃衆二萬與戰破之乘勝逐北至堡下攻拔之斬其將扈屈律悉蒙焚其蓄積而還尙結贊引兵自甯慶北去癸酉軍於合水之北邠甯節度使韓遊瓌遣其將史履程夜襲其營殺數百人吐蕃追之遊瓌陳于平川潛使人鼓於西山虜驚棄所掠而去（好畤今乾州汧城在汧陽縣摧砂堡在固原州西甯甯州慶慶陽府合水在慶陽府東七十里）

韓遊瓌奏請發兵攻鹽州吐蕃救之則使河東襲其背十二月丙寅詔駱元光及陳許兵馬使韓全義將步騎萬二千人會邠甯軍趣鹽州又命馬燧以河東軍擊吐蕃燧至石州河曲六胡州皆降遷於雲朔之間（鹽州在靈州東南石州今永甯州河曲六胡州謂魯麗舍塞依契六州時已併爲宥州在河套內鹽州之北雲今大同府朔今朔州）

三年 初李希烈據淮西選騎兵尤精者爲左右門槍奉國四將步兵尤精者爲左右克平十將淮西少馬精兵皆乘騾謂之騾軍陳仙奇舉淮西降纔數月詔發其兵於京西防秋仙奇遣都知兵馬使蘇浦悉將淮西精兵五千人以行會仙奇爲吳少誠所殺少誠密遣人召門槍兵馬使吳法超等使引兵歸浦不之知法超等引步騎四千自鄜州叛歸渾瑊使其將白娑勒追之反爲所敗正月丙午上急遣中使敕陝虢觀察使李泌發兵防遏勿令濟河泌遣押牙唐英岸將兵趣靈寶淮西兵已陳於河南矣泌乃命靈寶給其食淮西兵亦不敢剽掠明日宿陝西七里泌不給其食遣將將選士四百人分爲二隊伏於太原倉之隘道令之曰賊十隊過東伏則大呼擊之西

伏亦大呼應之勿遮道勿留行常讓以半道隨而擊之（胡氏曰遮道留行賊必人自爲戰讓以半道隨而擊之前者得脫後者務進心不在戰此泌所以制勝）又遣虞候集近村少年各持弓刀瓦石躡賊後聞呼亦應而追之又遣唐英岸將千五百人夜出南門陳於澗北明日四鼓淮西兵起行入隘兩伏發賊衆驚亂且戰且走死者四之一進遇唐英岸邀而擊之賊衆大敗擒其驃軍兵馬使張崇獻泌以賊必分兵自山路南遁又遣都將燕子楚將兵四百自炭竇谷趣長水賊二日不食屢戰皆敗英岸追至永甯東賊皆潰入山谷吳法超果帥其衆大半趣長水燕子楚擊之斬法超殺其士卒三分之二上以陝上少發神策軍步騎五千往助泌至赤水聞賊已破而還上命劉元佐乘驛歸汴以詔書緣道誘之得百三十餘人至汴州盡殺之其潰兵在道復爲村民所殺得至蔡者纔四十七人吳少誠以其少悉斬之以聞且遣使以幣謝李泌爲其誅叛卒也泌執張崇獻等六十餘人送京師詔悉腰斬於鄜州軍門以令防秋之衆（胡氏曰自鄜州東南道蒲趨陝故濟河若從同華至陝則不必濟河矣按靈寶在陝州西四十五里陳於河南已濟河也太原倉附陝州西城外澗水卽安陽溪水導源石峪逕城南而城西入河也炭竇谷在城東南長水縣在盧氏縣北永甯縣在其東北赤水鎮在今華州）

初雲南王閣羅鳳陷蕩州獲西瀘令鄭回回相州人通經術閣羅鳳愛重之其子鳳迦異及孫異牟尋曾孫尋夢湊皆師事之每授學回得撻之及異牟尋爲王以回爲清平官清平官者蠻相也凡有六人而國事專決於回五人者事回甚卑謹有過則回撻之雲南有衆數十萬吐蕃每入寇常以雲南爲前鋒賦斂重數又奪其險要立城

堡歲徵兵助防雲南苦之回因說異牟尋復自歸於唐曰中國尚禮義有惠澤無賦役異牟尋以爲然而無路自致凡十餘年及西川節度使韋皋至鎮招撫境上羣蠻異牟尋潛遣人因羣蠻求內附皋奏令吐蕃棄好暴亂鹽夏宜因雲南及八國生羌有歸化之心招納之以離吐蕃之黨分其勢上命皋先作邊將書以諭之微觀其趣（按西瀘縣在甯遠府西昌縣西南舊州卽甯遠府也八國生羌胡氏曰白狗君哥鄰君述租君南水君弱水君悉董君清遠君咄霸君按雲南今仍曰雲南縣）

三月丁酉以左庶子李鋈充入吐蕃使初吐蕃尙結贊得鹽夏州各留千餘人戍之退屯鳴沙自冬入春羊馬多死糧運不繼又聞李晟克摧沙馬燧渾瑊等各舉兵臨之大懼屢遣使求和上未之許乃遣使卑辭厚禮求和於馬燧且請修清水之盟而歸侵地使者相繼於路燧信其言留屯石州不復濟河爲之請於朝李晟曰戎狄無信不如擊之韓遊瓌曰吐蕃弱則求盟強則入寇今深入塞內而求盟此必詐也韓滉曰今兩河無虞若城原鄯洮渭四州使李晟劉元佐之徒將十萬衆戍之河湟二十餘州可復也其資糧之費臣請主辦上由是不聽燧計趣使進兵燧請與吐蕃使論頰熱俱入朝論之會混卒燧及張延賞皆與晟有隙欲反其謀爭言和親使上亦恨回紇欲與吐蕃和共擊之得二人言正會己意計遂定延賞數言晟不宜久典兵請以鄭雲逵代之上曰當令自擇代者乃謂晟曰朕以百姓之故與吐蕃和親決矣大臣旣與吐蕃有怨不可復之鳳翔宜留朝廷朝夕輔朕自擇一人可代鳳翔者晟薦都虞候邢君牙丙午以君牙爲鳳翔尹兼團練使丁未加晟太尉中書令勳封如故餘悉

罷之晟在鳳翔嘗謂僚佐曰魏徵好直諫余竊慕之行軍司馬李叔度曰此乃儒者所爲非勳德所宜晟斂容曰司馬失言晟任兼將相知朝廷得失不言何以爲臣叔度慙而退及在朝廷上有所顧問極言無隱性沈密未嘗泄於人辛亥馬燧入朝燧旣來諸軍皆閉壁不戰尙結贊遽自鳴沙引歸其衆乏馬多徒行者崔潛見尙結贊責以負約尙贊曰吐蕃破朱泚未獲賞是以來而諸州各城守無由自達鹽夏守將以城授我而遁非我取之也今明公來欲踐修舊好固吐蕃之願也今吐蕃將相以下來者二十一人渾侍中嘗與之共事知其忠信靈州節度使杜希全涇原節度使李觀皆信厚聞於異域請使之主盟夏四月丙寅潛至長安辛未以潛爲鴻臚卿復使入吐蕃語尙結贊曰希全守靈不可出境李觀已改官今遣渾瑊盟於清水且令先歸鹽夏二州五月甲申渾瑊自咸陽入朝以爲清水會盟使戊子以兵部尙書崔漢衡爲副使司封員外郎鄭叔矩爲判官特進宋奉朝爲都監己丑瑊將二萬餘人赴盟所乙巳尙結贊遣其屬論泣贊來言清水非吉地請盟於原州之士黎樹旣盟而歸鹽夏二州上皆許之神策將馬有麟奏土黎樹多阻險恐吐蕃設伏兵不如平涼川坦夷時論泣贊已還丁未遣使追告之（按鹽州在靈州東南夏州今榆林府鳴沙今中衛縣在甯夏府西南三百六十里故云退屯以引而西也石州今永甯州原今固原州鄯今西甯府洮今洮州廳渭今鞏昌府時四州已陷於吐蕃吐蕃蓋空其地而不城守也）初韓滉薦劉元佐可使將兵復河湟上以問元佐元佐亦贊成之滉卒元佐奏言吐蕃方彊未可與爭上遣中使勞問元佐元佐臥而受命張延賞知元佐不可用奏以河湟事委李抱真抱真亦固辭皆由延賞罷李

晟兵柄故武臣皆憤怒解體不肯爲用故也

渾瑊之發長安也李晟深戒之以盟所爲備不可不嚴張延賞言於上曰晟不欲盟好之成故戒瑊以嚴備我有疑彼之形則彼亦疑我矣盟何由成上乃召瑊切戒以推誠待虜勿自爲猜貳以阻虜情瑊奏吐蕃決以辛未盟賞集百官以瑊表稱詔示之曰李太尉謂吐蕃和好必不成此渾侍中表也盟日定矣晟聞之泣謂所親曰吾生長西陲備諳諸虜情所以論奏但恥朝廷爲犬戎所侮耳上始命駱元光屯潘原韓遊瓌屯洛口以爲瑊援元光謂瑊曰潘原距盟所且七十里公有急元光何從知之請與公俱瑊以詔指固止之元光不從與瑊連營相次距盟所三十餘里元光壕柵深固瑊壕柵皆可踰也元光伏兵於營西韓遊瓌亦遣五百騎伏於其側曰若有變則汝曹西趣柏泉以分其勢尙結贊與瑊約各以甲士三千人列於壇之東西常服者四百人從至壇下辛未將盟尙結贊又請各遣遊騎數十更相覘索瑊皆許之吐蕃伏精騎數萬於壇西遊騎貫穿唐軍出入無禁唐騎入虜軍悉爲所擒瑊等皆不知入幕易禮服虜伐鼓三聲大譟而至殺宋奉朝等於幕中瑊自幕後出偶得他馬乘之伏齧入其銜馳十餘里銜方及馬口故矢過其背而不傷唐將卒皆東走虜縱兵追擊或殺或擒之死者數百人擒者千餘人崔漢衡爲虜騎所擒渾瑊至其營則將卒皆遁去營空矣駱元光發伏成陳以待之虜追騎愕胎瑊入元光營追騎顧見邠甯軍西馳乃還元光以輜重資瑊與瑊收散卒勒兵整陳而還是日上臨朝謂諸相曰今日和戎息兵社稷之福馬燧曰然柳渾曰戎狄豺狼也非盟誓可結今日之事臣竊憂之李晟曰誠如渾言上變

色曰柳渾書生不知邊計大臣亦爲此言邪皆伏地頓首謝因罷朝是夕韓遊瓌表言虜劫盟者兵臨近鎮上大驚街遞其表以示渾明旦謂渾曰卿書生乃能料敵如此其審乎上欲出幸以避吐蕃大臣諫而止李晟大安園多竹復有爲飛語者云晟伏兵大安亭謀因倉猝爲變晟遂伐其竹癸酉上遣中使王子恆齎詔遣尙結贊至吐蕃境不納而還渾城留屯奉天甲戌尙結贊至故原州引見崔漢衡等曰吾飾金械欲械城以獻贊普今失城虛致公輩又謂馬燧之姪弇曰胡以馬爲命吾在河曲春草未生馬不能舉足當是時侍中度河掩之吾全軍覆沒矣所以求和蒙侍中力今全軍得歸奈何拘其子孫命弇官官俱文珍渾城將馬甯俱歸分囚崔漢衡等於河廓鄯州上聞尙結贊之言由是惡馬燧（潘原在平涼府東洛口在靜甯州柏泉卽百泉在平涼縣北故原州卽固原州時已陷於吐蕃故稱故也河今河州廓在西甯府南鄯卽西甯府時皆陷於番矣）

上問李泌以復府兵之策對曰今歲徵關東卒戍京西者十七萬人計歲食粟二百四萬斛今粟斗直百五十爲錢三百六萬緡國家比遭饑亂經費不充就使有錢亦無粟可糴未暇議復府兵也上曰然則奈何亟減戍卒歸之何如對曰陛下用臣之言可以不減戍卒不擾百姓糧食皆足粟麥日賤府兵亦戍上曰苟能如是何爲不用對曰此須急爲之過旬日則不及矣今吐蕃久居原會之間以牛運糧糧盡牛無所用請發左藏惡繒染爲綵緡因黨項以市之每頭不過二三匹計十八萬匹可致六萬餘頭又命諸冶鑄農器糴麥種分賜沿邊軍鎮募戍卒耕荒田而種之約明年麥熟倍償其種其餘據時價五分增一官爲糴之來春種禾亦如之關中土沃而久荒所

收必厚戍卒獲利耕者浸多邊地居人至少軍士月食官糧粟麥無所售其價必賤名爲增價實比今歲所減多矣上曰善卽命行之泌又言邊地官多闕請募人入粟以補之可足今歲之糧上亦從之因問曰卿言府兵亦集如何對戍卒因屯田致富則安於其土不復思歸舊制戍卒三年而代及其將滿下令有願留者卽以所開田爲永業家人願來者本貫給長牒續食而遣之據應募之數移報本道雖河朔諸帥得免更代之煩亦善聞矣不過數番則戍卒土著乃悉以府兵之法理之是變關中之疲弊爲富彊也上喜曰如此天下無復事矣泌曰未也臣能不用中國之兵使吐蕃自困上曰計將安出對曰臣未敢言之俟麥禾有效然後可議也上固問不對泌意欲結回紇大食雲南與共圖吐蕃令吐蕃所備者多知上素恨回紇恐聞之不悅并屯田之議不行故不肯言旣而戍卒應募願耕屯田者什五六

四年 韓遊瓌以吐蕃犯塞自戍甯州病求代歸秋七月庚戌加渾瑊邠甯副元帥以左金吾將軍張獻甫爲邠寧節度使陳許兵馬使韓全義爲長武城行營節度使獻甫未至壬子夜遊瓌不告於衆輕騎歸朝戍卒裴滿等憚獻甫之嚴乘無帥之際癸丑帥其徒作亂曰張公不出本軍我必拒之因剽掠城市圍監軍楊明義所居使奏請范希朝爲節度使都虞候楊朝晟避亂出城聞之復入曰所請甚契我心我來賀也亂卒稍安朝晟潛與諸將謀晨勒兵召亂卒謂曰所請不行張公已至邠州汝輩作亂當死不可盡殺宜自推列唱帥者遂斬二百餘人帥衆迎獻甫上聞軍衆欲得范希朝將授之希朝辭曰臣畏遊瓌之禍而來今往代之非所以防窺覲安反仄也上

嘉之擢爲寧州刺史以副獻甫遊壤至京師除右龍武統軍

冬十月吐蕃發兵十萬將寇西川亦發雲南兵雲南內雖附唐外未敢叛吐蕃亦發兵數萬屯於瀘北韋皋知雲南計方猶豫乃爲書遺雲南王敍其叛吐蕃歸化之誠貯以銀函使東蠻轉致吐蕃吐蕃始疑雲南遣兵二萬屯會川寒雲南趨蜀之路雲南怒引兵歸國由是雲南與吐蕃大相猜阻歸唐之志益堅吐蕃失雲南之助兵勢始弱然矣然吐蕃業已入寇遂分兵四萬攻兩林驃旁三萬攻東蠻七千寇清溪關五千寇銅山泉遣黎州刺史韋晉等與東蠻連兵禦之破吐蕃於清溪關外（瀘北今金沙江之北會理州界會川卽會理州東蠻今涼山野夷所謂烏蠻也在甯遠府東故名兩林在會理州西北驃旁在其西南清溪關在清溪縣南接越嶲廳銅山在其西）李泌言於上曰江淮漕運之甬橋爲咽喉地屬徐州鄰於李納刺史高明應年少不習事若李納一旦復有異圖竊據徐州是失江淮也國用何從而致請徙壽廬濠都團練使張建封鎮徐州割濠泗以隸之復以廬壽歸淮南則濠青惕息而運路常通江淮安矣及今明應幼騃可代宜徵爲金吾將軍萬一使他人得之則不可復制矣上從之十一月以建封爲徐泗濠節度使建封爲政寬厚而有綱紀不貸人之法故其下無不畏而悅之（甬橋在宿州北唐時泔水上）

八年 陸贄上言以邊儲不贍由措置失當蓄斂乖宜其略曰所謂措置失當者戍卒不隸於守臣守臣不總於元帥至有一城之將一旅之兵各降中使監臨皆承別詔委任分鎮亘千里之地莫相率從緣邊列十萬之師不

設謀主每有寇至方從中覆比蒙徵發赴援寇已獲勝罷歸吐蕃之比於中國衆寡不敵工拙不侔然而彼攻有餘我守不足蓋彼之號令由將而我之節制在朝彼之兵衆合并而我之部分離析故也所謂蓄斂乖宜者陛下頃設就軍和糴之法以省運制與人加倍之價以勸農此令初行人皆悅慕而有司競爲苟且專事纖蓄歲稔則不時斂藏艱食則抑使收糴遂使豪家貧吏反操利權賤取於人以俟公私之乏又有勢要近親羈遊之士委賤糴於軍城取高價於京邑又多支絺紵充直窮邊寒不可衣鬻無所售上既無信於下下亦以僞應之度支物估轉高軍城穀價轉貴度支以苟售滯貨爲功利軍城以所得加價爲羨餘雖設巡院轉成囊橐至有空巾簿帳僞指困倉計其數則億萬有餘考其實則百十不足又曰舊制以關中用度之多歲運東方租米至有斗錢運斗米之言習聞見而不達時宜者則曰國之大事不計費損雖知勞煩不可廢也習近利而不防遠患者則曰每至秋成之時但令畿內和糴既易集事又足勸農臣以兩家之論互有長短將制國用須權重輕食不足而財有餘豈弛於積財而務實倉廩食有餘而財不足則緩於積食而蓄用貨泉近歲關輔屢豐公儲委積足結數年今夏江淮水潦米貴加倍人多流庸關輔以穀賤傷農宜加價以糴而無錢江淮以穀貴人困宜減價以糴而無米而又運彼所乏益此所餘斯所謂習見聞而不達時宜者也今江淮斗米直百五十錢運至東渭橋僦直又約二百米糙且陳尤爲京邑所賤據市司月估斗糴卅七錢耗其九而存其一餒彼人而傷此農制事若斯可謂深失矣頃者每年自江湖淮浙運米百一十萬斛至河陰留四十萬斛貯河陰倉至陝州又留三十萬斛貯太原倉餘四十

萬斛輸東渭橋今河陰太原倉見米猶有三百二十餘萬斛京兆諸縣米斗不過直錢七十請令來年江淮止運三十萬斛至河陰河陰陝州以次運至東渭橋其江淮所停運米八十萬斛委轉運使每斗取八十錢於水災州縣糶之以救貧乏計得錢六十四萬緡減僦直六十九萬緡請令戶部先以二十萬緡付京兆令糶米以補渭橋倉之缺數斗用百錢以利農人以一百二萬六千緡付邊鎮使糶十萬人一年之糧餘十萬四千緡以充來年和糶之價其江淮米錢僦直並委轉運使折市綾絹緇綿以輸上都償先貸戶部錢九月詔西北邊貴糶以實倉儲邊備浸充

九年 初鹽州既陷塞外無復保障吐蕃常阻絕靈武侵擾鄜坊二月辛酉詔發兵三萬五千人城鹽州又詔涇原山南劍南各發兵深入吐蕃以分其勢城之二旬而畢命鹽州節度使杜彥光戍之朔方都虞候楊朝晟戍木波堡由是靈夏河西獲安（木波堡在環縣）

陸贄上奏論備邊六失以爲措置乖方課責虧度財匱於兵衆力分於將多怨生於不均機失於遙制關東戍卒不習土風身若邊荒心畏戎虜國家資奉若驕子姑息如情人屈指計歸張頤待哺或利王師之敗乘擾攘而東潰或拔棄城鎮搖遠近之心豈惟無益實亦有損復有犯刑謫徙者既是無良之類且加懷土之情思亂幸災又甚戍卒可謂措置乖方矣自頃權移於下柄失於朝將之號令既鮮克行之於軍國之典常又不能施之於將務相遵養苟度歲時欲賞一有功翻慮無功者反仄欲罰一有罪復慮同惡者憂虞罪以隱忍而不彰功以嫌疑而

不賞姑息之道乃至於斯故使忘身效節者獲誚於等夷率先登者取怨於士卒債軍蹙國者不懷於愧畏緩救失期者自以爲智能此義士所以痛心勇夫所以解體可謂課責虧度矣虜每入寇將帥遞相推倚無敢誰何盧張賊勢上聞則曰兵少不敵朝廷莫之省察唯務徵發益師無裨備禦之功重增供億之弊閭井日耗徵求日繁以編戶傾家破產之資兼有司權鹽稅酒之利總其所入歲以事邊可謂財匱於兵衆矣吐蕃舉國勝兵之徒纔當中國十數大郡而已動則中國懼其衆而不敢抗靜則中國憚其強而不敢侵厥理何哉良以中國之節制多門蕃醜之統帥專一故也夫統帥專一則人心不分號令不貳進退可齊疾徐如意機會靡愆氣勢自壯斯乃以少爲衆以弱爲強者也開元天寶之間控禦西北兩蕃唯朔方河西隴右三節度中興以來未遑外討抗兩蕃者亦朔方涇原隴右河東四節度而已自頃分朔方之地建牙擁節者凡三使焉其餘鎮軍數且四十皆承特詔委寄各降中貴監臨人得抗衡莫相稟屬每俟邊書告急方令計會用兵旣無軍法下臨惟以客禮相待夫兵以氣勢爲用者也氣聚則盛散則消勢合則威析則弱今之邊備勢弱氣消可謂力分於將多矣理戎之要在於練覈優劣之科以爲衣食等級之制使能者企及否者息心雖有厚薄之殊而無缺望之歎今窮邊之地長鎮之兵皆百戰傷夷之餘終年勤苦之劇然衣糧所給唯止當身例爲妻子所分常有凍餒之色則關東戍卒怯於應敵懈於服勞衣糧所頒厚踰數等又有素非禁旅本是邊軍將校詭爲媚詞因請遙隸神策不羅舊所唯改舊名其於廩賜之饒遂有三倍之益夫事業未異而給養有殊苟未忘懷孰能無慍可謂怨生於不均矣凡欲選任將帥必先

考察行能可者遣之不可者退之疑者不使使者不疑故將在軍君命有所不受自頃邊軍就裁斷多出宸衷選置戎臣先求易制多其部以分其力輕其任以弱其心遂令爽於軍情亦聽命乖於事宜亦聽命戎虜馳突迅如風颺驛書上聞旬月方報守土者以兵寡不敢抗敵分鎮者以無詔不肯出師賊既縱掠退歸此乃陳功告捷其敗喪則減百而爲一其摺獲則張百而成千將帥既幸於總制在朝不憂罪累陛下又以爲大權由己不究事情可謂機失於遙制矣臣愚謂宜罷諸道將士防秋之制令本道但供衣糧募戍卒願留及蕃漢子弟以給之又多開屯田官爲收糴寇至則人自爲戰時至則家自力農與夫倏來忽往者豈可同等而論哉又宜擇文武能臣爲隴右朔方河東三元帥分統緣邊諸節度使有非要者隨所便近而併之然後減姦濫虛浮之費以豐財定衣糧等級之制以和衆宏委任以道以宣其用懸賞罰之典以考其成如是則戎狄威懷疆場寧謐矣上雖不能盡從心甚重之劉士甯旣爲宣武節度使諸將多不服士甯淫亂殘忍復出畋輒數日不返軍中苦之都知兵馬使李萬榮得衆心士甯疑之奪其兵權令攝汴州事十二月乙卯士甯帥衆二萬畋於外野萬榮晨入使府召所留親兵千餘人詐之曰敕徵大夫入朝以吾掌留務汝輩人賜錢三十緡衆皆拜又諭外營兵皆聽命乃分兵閉城門使馳白士甯曰敕徵大夫宜速卽路少或遷延當傳首以獻士甯知衆不爲用以五百騎逃歸京師比至東都所餘僕妾而已至京師敕歸第行喪禁其出入淮西節度使吳少誠聞變發兵屯郟城遣使問故且請戰萬楚以言戲之少誠慙而退上聞萬榮逐士甯使問陸贄贄上奏以爲今軍州已定宜且遣朝臣宣勞徐察事情冀免差失

其略曰今士甯見逐雖是衆情萬榮典軍且非朝旨此安危彊弱之機也願陛下審之慎之上復使謂贊若更淹遲恐於事非便今議除一親王充節度使且令萬榮知留後其制卽從內出贊復上奏其略曰臣雖服戎角力諒匪克堪而經武伐謀或有所見夫制置之安危由勢付授之濟否由才勢如器焉惟在所置之夷地則平才如負焉惟在所授授踰其力則踣萬榮今所陳奏頗涉張皇但露徼求之情殊無退讓之禮據茲鄙躁殊異循良又聞本是滑人偏厚當州將士與之相得纔止三千諸營之兵已甚懷怨據此頗僻亦非將材若得志驕盈不悖則敗悖則犯上敗則債軍又曰苟邀則不順苟允則不誠君臣之間勢必嫌阻與其圖之於滋蔓不若絕之於萌芽又曰爲國之道以義訓人將教事君先令順長又曰方鎮之臣事多專制欲加之罪誰則無辭若使傾奪之徒便得代居其任利之所在人各有心此源潛滋禍必難救非獨長亂之道亦關謀逆之端又曰昨逐士甯起於倉卒諸郡守將固非連謀一城師人亦未協志各計度於成敗之勢迴遑於逆順之名安肯捐軀與之同惡又曰陛下但選文武羣臣一人命爲節度仍降優詔慰勞本軍獎萬榮以撫定之功別加寵任褻將士以輯睦之義厚賜資裝揆其大情理必甯息萬榮縱欲跋扈勢何能爲又曰儻後事有愆素臣請受敗撓之罪上不從壬戌以通王謨爲宣武節度大使以萬榮爲留後（鄆城今屬許州）

十年 瀛州刺史劉瀛爲兄濟所逼請西扞隴坻遂將部兵千五百人男女萬餘口詣京師號令嚴整在道無一人敢取人雞犬者上嘉之二月丙午以爲秦州刺史隴右經略軍使理普潤軍中不擊柝不設音樂士卒病者瀝

親視之死者哭之（普潤今麟遊縣）

十三年 上以方渠合道木波皆吐蕃要路欲城之使問邠寧節度使楊朝晟須幾何兵對曰邠甯兵足以城之不煩他道上復使問之曰晟城鹽州用兵七萬僅能集事今三城尤逼虜境兵當倍之事更相反何也對曰城鹽州之衆虜皆知之今發本鎮兵不旬日至塞下出其不意而城之虜謂吾衆亦不減七萬其衆未集不敢輕來犯我不過三旬吾城已畢留兵戍之虜雖至無能爲也（胡氏曰此後周韋孝寬城汾石之故智也）城旁草盡不能久留虜退則運芻糧以實之此萬全之策也若大集諸道兵踰月始至虜亦集衆而來與我爭勝負未可知何暇築城哉上從之二月朝晟分軍爲三各築一城軍吏曰方渠無井不可屯軍判官孟子周曰方渠承平之時居人成市無井何以聚人乎命浚智井果得甘泉三月三城成夏四月庚申楊朝晟軍還至馬嶺吐蕃始出兵追之相拒數日而去朝晟遂城馬嶺而還開地三百里皆如其素（按今環縣卽方渠縣也其西有合道鎮西南有木波鎮馬嶺在其北胡氏曰方渠縣鹹河從土橋歸德州同家谷三處發源來鹹苦不可食甜水在城西從蕃部鼻家族北界來供人飲食今甜水河在縣西北入環河故逕城西也）

十五年 南詔異牟尋遣使與韋皋約共擊吐蕃皋以兵糧未集請俟他年（胡氏曰韋皋有智略恐南詔貌與而未悉其心也故以兵糧未集辭此可與忠者道）

八月陳許節度使曲環卒乙未吳少誠遣兵掠臨穎陳州刺史上官說知陳許留後遣大將王令忠將兵三千救

之皆爲少誠所虜丙午以浼爲陳許節度使少誠遂圍許州浼欲棄城走營田副使劉昌裔止之曰城中兵足以辦賊但閉城勿與戰不過數日賊氣自衰吾以全制其弊蔑不克矣少誠晝夜急攻昌裔募勇士千餘鑿城出擊少誠大破之城由是全昌裔兗州人也少誠又寇西華陳許大將孟元陽拒卻之陳許都知兵馬使安國甯與上官浼不叶謀翻城應少誠劉昌裔以計斬之召其麾下人給二緘伏兵要巷見持緘者悉斬之無得脫者

諸軍討吳少誠者既無統帥每出兵人自規利進退不壹十二月乙未諸軍自潰於小澗水委棄器械資糧皆爲少誠所有於是始議置招討使（小澗水潁水支流也導源青陵陂入大澗水在今商水縣唐時殷水縣也）

十七年 朔方邠甯慶節度使楊朝晟防秋於甯州五月乙酉卒初渾瑊遣兵馬使李朝案將兵戍定平城卒朝案請以其衆隸神策軍詔許之楊朝晟疾亟召僚佐謂曰朝晟必不起朔方命帥多自本軍雖徇衆情殊非國體甯州刺使劉南金練習軍旅宜使攝行軍且知軍事比朝廷擇帥必無虞矣又以手書授監軍劉英倩英倩以聞軍士私議曰朝廷命帥吾納之卽命劉君吾事之若命帥於他軍彼必以其麾下來吾屬被斥矣必拒之已丑上遣中使往察軍情軍中多與南金辛卯上復遣高品薛盈珍齎詔詣寧州六月甲午盈珍至軍宣詔曰朝案所將本朔方軍今將并之以壯軍勢威戎狄以李朝案爲使南金副之軍中以爲何如諸將皆奉詔丙申都虞候史經言於衆曰李公命收弓刀而送甲冑二千軍士皆曰李公欲內麾下二千爲腹心吾輩妻子其可保乎夜遣劉南金欲奉以爲帥南金曰節度使固我所欲然非天子之命則不可軍中豈無他將乎衆曰弓刀皆爲官所收惟軍

事府尙有甲兵欲因以集事南金曰諸君不願朝案爲帥宜以情告敕使若操甲兵乃拒詔也命閉門不內軍士去詣兵馬使高固固逃匿搜得之固曰諸君能用吾言則可衆曰惟命固曰毋殺人毋掠金帛衆曰諾乃共詣監軍請奏之衆曰劉君旣得朝旨爲副帥必撓吾事詐稱監軍命召計事至而殺之戊戌制以李朝案爲邠寧節度使是日甯州告變者至上追還制書復遣薛盈珍往調軍情壬寅至軍軍中以高固爲請盈珍卽以上旨命固知軍事或傳戊戌制書至邠州邠軍惑不知所從（胡氏曰薛盈珍已命高固知甯州軍事而又有傳李朝案制書至邠者故留邠之軍惑而不知所適從）姦人乘之且爲變留後孟子周悉內精甲於府廷日饗士卒內以悅衆心外以威姦黨邠軍無變子周之謀也（定平在甯州南涇州北）

二十一年 李師古發兵屯西境以脅滑州時告哀使未至諸道義成牙將有自長安還得遺詔者節度使李元素以師古鄰道欲示無外遣使密以遺詔示之師古欲乘國喪侵噬鄰境乃集將士謂曰聖上萬福而元素忽傳遺詔是反也宜擊之遂杖元素使者發兵屯曹州且告假道於汴宣武節度使韓宏使謂曰汝能越吾界而爲盜邪有以相待無爲空言元素告急宏使謂曰吾在此公安無恐或告翦棘夷道兵且至矣請備之宏曰兵來不除道也不爲之應師古詐窮變索且聞上卽位乃罷兵元素表請自貶朝廷兩慰解之吳少誠以牛皮鞵材遺師古師古以鹽資少誠潛過宣武界事覺宏皆留輸之庫曰此於法不得以私相餽師古等皆憚之（師古在淄青以曹爲西界義成滑鄭節度使也鄭在汴西故假道宣武汴宋節度也少誠在淮西今汝甯光州其之山東必由汴

宋

讀史兵略卷三十六唐

四二

讀史兵略卷三十七

益陽胡林翼纂

通鑑

憲宗元和元年 劉闢旣得旌節志益驕求兼領三川上不許闢遂發兵圍東川節度使李康於梓州欲以同幕盧文若爲東川節度使上欲討闢而重於用兵公卿議者亦以爲蜀險固難取杜黃裳獨曰闢狂戇書生取之如拾芥耳臣知神策軍使高崇文勇略可用願陛下專以軍事委之勿置監軍闢必可擒上從之翰林學士李吉甫亦勸上討蜀上由是器之正月戊子命左神策行營節度使高崇文將步騎五千爲前軍神策京西行營兵馬使李元奕將步騎二千爲次軍與山南西道節度使嚴礪同討闢時宿將名位素重者甚衆皆自謂當征蜀之選及詔用崇文皆大驚上與杜黃裳論及藩鎮黃裳曰德宗自經憂患務爲姑息不生除節帥有物故者先遣中使察軍情所與則授之中使或私受大將賂歸而譽之卽降旄鉞未嘗有出朝廷之意者陛下必欲振舉綱紀宜稍以法度裁制藩鎮則天下可得而理也上深以爲然於是始用兵討蜀以至威行兩河皆黃裳啓之也崇文屯長武城練卒五千常如寇至卯時受詔辰時卽行器械糗糧一無所闕甲午崇文出斜谷元奕出駱谷同趣梓州崇文軍至興元軍士有食於逆旅折人七筋者崇文斬之以徇劉闢陷梓州執李康二月嚴礪拔劍州斬其刺史文德

昭（胡氏曰嚴礪先拔劍州故高崇文因以鼓行入蜀礪之功爲不可揜矣）三月崇文引兵自閬州趣梓州劉關將邢泚引兵遁去崇文入屯梓州關歸李康於崇文以求自雪崇文以康敗軍失守斬之丙子嚴礪奏克梓州丁丑制削奪劉關官爵東川節度使韋丹至漢中表言高崇文客軍遠門無所資若與梓州綴其士心必能有功夏四月丁酉以崇文爲東川節度副使知節度事五月劉關城鹿頭關連八柵屯兵萬餘人以拒崇文六月丁酉崇文擊敗之關置柵於關東萬勝堆戊戌崇文遣驍將高霞寓攻奪之下瞰關城凡八戰皆捷庚子崇文破劉關於德陽癸卯又破之於漢州嚴礪遣其將嚴秦破關衆萬餘人於綿州石碑谷秋七月癸丑崇文破劉關之衆萬餘人於元武甲午詔凡西川繼援之兵悉取崇文處分九月壬寅崇文又敗劉關之衆於鹿頭關嚴秦敗劉關之衆於神泉河東將阿跌光顏將兵會崇文於行營愆期一日懼誅欲深入自贖軍於鹿頭之西斷其糧道城中憂懼於是關綿江柵將李文悅鹿頭守將仇良輔皆以城降於崇文獲關塔蘇彊士卒降者萬計崇文遂長驅直指成都所向崩潰軍不留行辛亥克成都劉關盧文若帥數十騎西奔吐蕃崇文使高霞寓等追之及於羊灌田關赴江不死擒之文若先殺妻子乃繫石自沈崇文入成都屯於通衢休息士卒市肆不驚珍貨山積秋毫不犯檻劉關送京師斬關大將邢泚館驛巡官沈衍無所問軍府事無巨細命一遵韋南康故事從容指撫一境皆平關有二妾皆殊色監軍請獻之崇文曰天子命我討平凶豎當以撫百姓爲先遽獻婦人以求媚豈天子之意邪崇文義不爲此乃以配將吏之無妻者杜黃裳建議征蜀及指授高崇文方略皆懸合事宜崇文素憚劉潼黃裳使謂

之曰若無功當以劉濼相代故能得其死力及蜀平宰相入賀上目高裳曰卿之功也（西川中江以西至邊界東川中江以東嘉陵江以西三川欲兼山南西道也長武城在長武縣防秋地也斜谷在郿縣駱谷在盩厔縣同會於興元興元漢中府也梓州潼川府也劍州入蜀之要害西南過鹽亭卽梓州矣閬州保甯府也在劍州東南二百二十里西南至鹽亭一百里鹽亭西南至梓州一百里鹿頭關在德陽縣北漢州在德陽西南八十五里綿州注云當作緜竹是也石碑谷在緜竹縣南元武今中江縣神泉今安縣縣江欄在漢州按崇文兵以神速勝）初韓全義入朝以其甥楊惠琳知夏綏留後杜黃裳以全義出征無功驕蹇不遜直令致仕以右驍衛將軍李演爲夏綏節度使惠琳勒兵拒之表稱將士逼臣爲節度使河東節度使嚴綏表請討之詔河東天德軍合擊惠琳綏遣牙將阿跌光進及弟光顏將兵赴之光進本出河曲步落稽兄弟在河東軍皆以勇敢聞未幾夏州兵馬使張承金斬惠琳傳首京師（夏綏今榆林府綏德州也天德軍在河套北今吳喇特旗界）

二年 夏蜀旣平（胡氏曰夏楊惠琳蜀劉闢）藩鎮惕息多求入朝鎮海節度使李錡亦不自安求入朝上許之遣中使至京口慰撫且勞其將士錡雖署判官王澹爲留後實無行意屢遷行期澹與敕使數勸諭之錡不悅上表稱疾請至歲暮入朝上以問宰相武元衡曰陛下初卽政錡求朝得朝求止得止可否在錡將何以令四海上以爲然下詔徵之錡詐寫遂謀反王澹旣掌留務於軍府頗有制置錡益不平密諭親兵使殺之會頒冬服錡嚴兵坐幄中澹與敕使入謁有軍士數百譟於庭曰王澹何人擅主軍務曳下燔食之大將趙琦出慰止又燔

食之注刃於敕使之頸詬詈將殺之。騎陽驚救之。冬十月己未，詔徵騎爲左僕射，以御史大夫李元素爲鎮海節度使。庚申，騎表言軍變，殺留後大將先是，騎選腹心五人爲所部五州鎮將：姚志安處蘇州，李深處常州，趙惟忠處湖州，瑒自昌處杭州，高肅處睦州，各有兵數千。伺察刺史動靜，至是，騎各使殺其刺史。遣牙將庾伯良將兵三千治石頭，常州刺史顏防用客李雲計，矯制稱招討副使，斬李深，傳檄蘇杭湖睦，請同進討。湖州刺史辛秘潛募鄉閭子弟數百，夜襲趙惟忠營，斬之。蘇州刺史李素爲姚志安所敗，生致於騎。具桎梏釘於船舷，未及京口，會騎敗，得免。乙丑，制削李騎官爵及屬籍，以淮南節度使王鏐統諸道兵爲招討處置使，徵宣武義甯武昌兵。胡氏曰：此時無義甯軍新書作武甯當從之。并淮南宣歙兵俱出宣州。胡氏曰：淮南兵與宣歙兵會於宣州界，乘上流之勢以臨京口。是時宣州之地北盡當塗至江潁，江西兵出信州，浙東兵出杭州以討之。李騎以宣州富饒，欲先取之，遣兵馬使張子良、李奉仙、田少卿將兵三千襲之。三人知騎必敗，與牙將裴行立同謀討之。行立，騎之甥也，故悉知騎之密謀。三將營於城外，將發，召士卒諭之曰：僕射反，逆官軍四集，常湖二將繼死，其勢已蹙。今乃欲使吾輩遠取宣城，吾輩何爲隨之？族滅豈若去逆效順，轉禍爲福乎？衆悅許諾。卽夜還趨城，行立舉火鼓譟，應之於內，引兵趨牙門。騎聞子良等舉兵，怒，聞行立應之撫膺曰：吾何望矣！跳走匿樓下，親將李鈞引挽彊三百趨山亭，欲戰，行立伏兵邀斬之。騎舉家皆哭，左右執騎裹之以幕，縋於城下，械送京師，挽彊蕃落爭自殺，尸相枕藉。癸酉，本軍以聞。乙亥，羣臣賀於紫宸殿上，愀然曰：朕之不德，致宇內數有干紀者，朕之愧也。何賀之爲？十一月

甲申朔鑄至長安上御興安門而詰之對曰臣初不反張子良等教臣耳上曰卿爲元帥子良等謀反何不斬之然後入朝鑄無以對乃并其子師回腰斬之（鎮海今大江南浙江西也睦州今嚴州府宣武汴宋也甯徐州也武昌鄂岳也淮南揚州也宣歙宣歙池也江西道治南昌府信州廣信府浙東道與鎮海分浙江水宣州甯國府宣城其治也）

三年 臨涇鎮將郝元以臨涇地險要水草美吐蕃將入寇必屯其地言於涇原節度使段祐奏而城之自是涇原獲安（臨涇今鎮原縣在固原州東）

四年 上密問諸學士曰今欲用王承宗爲成德留後割德棣二州更爲一鎮以離其勢并使承宗輸二稅請官吏一如師道何如李絳等對曰德棣之隸成德爲日已久今一旦割之恐承宗及其將士憂疑怨望得以爲辭况其隣道情狀一同各慮他日分割或潛相構扇萬一旅拒倍難處置願更三思所是二稅官吏願因弔祭使至彼自以其意諭承宗令上表陳乞如師道例勿令知出陛下意如此則幸而聽命於理固順若其不聽體亦無損上又問今劉濟田季安皆有疾若其物故豈可盡如成德付授其子天下何時常平議者皆言宜乘此際代之不受則發兵討之時不可失如何對曰羣臣見陛下西取蜀東取吳易於反掌故諂諛躁競之人爭獻策畫勸開河北不爲國家深謀遠慮陛下亦以前日成功之易而信其言臣等夙夜思之河北之勢與二方異何則西川浙西皆非反側之地其四鄰皆國家臂指之臣劉闢李錡獨生狂謀其下皆莫之與關錡徒以貨財啗之大軍一臨則渙

然離耳故臣等當時亦勸陛下誅之以其萬全故也成德則不然內則膠固歲深外則蔓連勢廣其將士百姓懷其累代煦嫗之恩不知君臣逆順之理論之不從威之不服將爲朝廷羞又鄰道平居或相猜恨及聞代易必各爲一心蓋各爲子孫之謀亦慮他日及此故也萬一餘道或相表裏兵連禍結財盡力竭西戎北狄乘閒窺竄其爲憂患可勝道哉濟季安與承宗事體不殊若物故之際有閒可乘當臨事圖之於今用兵則恐未可太平之業非朝夕可致願陛下審處之時吳少誠病甚絳等復上言少誠病必不起淮西事體與河北不同四旁皆國家州縣不與賊鄰無黨援相助朝廷命帥今正其時萬一不從可議征討臣願捨恆冀難致之策就申蔡易成之謀脫或恆冀連兵事未如意蔡州有聲勢可興師南北之役俱興財力之用不足儻事不得已須赦承宗（胡氏曰絳等之言後無不驗）則恩德虛施威令頓廢不如早賜處分以收鎮冀之心（胡氏曰此時未改恆州爲鎮州史以後來所改州名書之耳）坐待機宜必獲申蔡之利旣而承宗久未得朝命頗懼累表自訴八月壬午上乃遣京兆少尹裴武詣真定宣慰承宗受詔甚恭曰三軍見迫不暇俟朝旨請獻德棣二州以明懇款

上遣中使諭王承宗使遣薛昌朝還鎮承宗不奉詔冬十月癸未制削奪承宗官爵以左神策中尉吐突承璀爲左右神策河中河陽浙西宣歙等道行營兵馬使招討處置等使翰林學士白居易上奏以爲國家征伐當責成將帥近歲始以中使爲監軍自古及今未有徵天下之兵專令中使統領者也今神策軍旣不置行營節度使則承璀乃制將也又充諸軍招討處置使則承璀乃都統也臣恐四方聞之必窺朝廷四夷聞之必笑中國陛下忍

令後代相傳云以中官爲制將都統自陛下始乎臣又恐劉濟茂昭及希朝從史乃至諸道將校皆恥受承璀指麾心旣不齊功何由立此是資承宗之計而挫諸將之勢也陛下念承璀勤勞貴之可也憐其忠赤富之可也至於軍國權柄動關理亂朝廷制度出自祖宗陛下寧忍徇下之情而自隳法制從人之欲而自損聖明何不思於一時之閒而取笑於萬代之後乎時諫官御史論承璀職名太重者相屬上皆不聽戊子上御延英殿度支使李元素鹽鐵使李鄜京兆尹許孟容御史中丞李夷簡給事中呂元膺穆質右補闕獨孤郁等極言其不可上不得已明日削承璀四道兵馬使改處置爲宣慰而已

五年 吐突承璀至行營威令不振與王承宗戰屢敗神策大將軍鄺定進戰死諸軍討王承宗者久無功白居易上言以爲河北本不常用兵今旣出師承璀未嘗苦戰已失大將與從史兩軍入賊境遷延進退不惟意在逗留亦是力難支敵希朝茂昭至新市鎮竟不能過劉濟引全軍攻圍樂壽久不能下師道季安元不可保察其情狀似相計會各收一縣遂不進軍陛下觀此事勢成功有何所望以臣愚見須速罷兵若又遲疑其害有四可爲痛惜者二可爲深憂者二何則若保有成卽不論用度多少旣的知不可卽不合虛費貲糧悟而後行事亦非晚今遲校一日則有一日之費更延旬月所費滋多終須罷兵何如早罷以府庫錢帛百姓脂膏資助河北諸侯轉令彊大此臣爲陛下痛惜者一也臣又恐河北諸將見吳少陽已受制命必引事例輕重同詞請雪承宗若章表繼來卽義無不許請而後捨體勢可知轉令承宗膠固同類如此則與奪皆由鄰道恩信不出朝廷實恐威權盡

歸河北此爲陛下痛惜者二也今天時已熱兵氣相蒸至於飢渴疲勞疾疫暴露驅以就戰人何以堪縱不惜身亦難忍苦况神策烏雜城市之人例皆不慣如此忽思生路一人若逃百人相扇一軍若散諸軍必搖事忽至此悔將何及此爲陛下深憂者一也臣聞回鶻吐蕃皆有細作中國之事小大盡知今聚天下之兵唯討承宗一賊自冬及夏都未立功則兵力之孱弱資費之多少豈宜使西戎北虜一一知之忽見利生心乘虛入寇以今日之勢力可能救其首尾哉兵連禍生何事不有萬一及此實關安危此爲陛下深憂者二也（新市今新樂縣樂壽今獻縣）

盧從史首肆伐王承宗之謀及朝廷輿師從史逗留不進陰與承宗通謀令軍士潛懷承宗號（胡氏曰凡行軍各有號以相識別）又高芻粟之價以敗度支（胡氏曰時吐突承瓘總行營兵屯邢趙界邢州昭義巡屬也度支芻粟不無遠致以給行營就昭義市糴故盧從史得高其價以牟利）諷朝廷求平章事誣奏諸道與賊通不可進兵上甚患之會從史遣牙將王翊元入奏事裴垍引與語爲言爲臣之義微動其心翊元遂輸誠言從史陰謀及可取之狀垍令翊元還本軍經營復來京師遂得其都知兵馬使烏重允等款要垍言於上曰從史狡猾驕很必將爲亂今聞其與承瓘對營視承瓘如嬰兒往來都不設備失今不取後雖興大兵未可以歲月平也上初愕然熟思良久乃許之從史性貪承瓘盛陳奇玩視其所欲稍以遺之從史喜益相昵狎三月甲申承瓘與行營兵馬使李聽謀召從史入營博伏壯士於幕下突出擒詣帳後縛之內車中馳詣京師左右驚亂承瓘斬十餘人

諭以詔旨從史營中士聞之皆甲以出操兵趨譁烏重允當軍門叱之曰天子有詔從者賞違者斬士卒皆斂兵還部伍會夜車疾驅未明已出境上嘉烏重允之功欲卽授以昭義節度使李絳以爲不可請授重允河陽以河陽節度使孟元陽鎮昭義會吐突承璀奏已牒重允句當昭義留後絳上言昭義五州據山東要害（胡氏曰五州澤潞邢洛磁要害者於我爲要於敵爲害）魏博恆幽諸鎮蟠結（胡氏曰魏博一鎮恆一鎮幽一鎮謂之河朔三鎮）朝廷惟恃此以制之邢磁洛入其腹內（胡氏曰邢州臨趙境磁洛臨魏境其界犬牙相入）誠國之寶地安危所繫也邇爲從史所據使朝廷旰食今幸而得之承璀復以與重允臣聞之驚歎實所痛心昨國家誘執從史雖爲長策已失大體今承璀又以文牒差人爲重鎮留後爲之求旌節無君之心孰甚於此陛下昨日得昭義人神同慶威令再立今日忽以授本軍牙將物情頓沮紀綱大紊校計利害更不若從史爲之何則從史雖蓄姦謀已是朝廷牧伯重允出於列校以承璀一牒代之竊恐河南北諸侯聞之無不憤怒恥與爲伍且謂承璀誘重允遂從史而代其位彼人人麾下各有將校能無自危乎儻劉濟茂昭季安執恭韓宏師道繼有章表陳其情狀并指承璀專命之罪不知陛下何以處之若皆不報則衆怒益甚若爲之改除則朝廷之威重去矣上復使樞密使梁守謙密謀於絳曰今重允已總軍務事不得已須應與節對曰從史爲師不由朝廷故啓其邪心終成逆節今以重允典兵卽授之節威福之柄不在朝廷何以異於從史乎重允之得河陽已爲望外之福豈敢更爲旅拒况重允所以能執從史本以杖順成功一旦自逆詔命安知同列不襲其跡而動乎重允軍中等夷甚多必

不願重允獨爲主帥移之他鎮乃愜衆心何憂其致亂乎上悅皆如其請壬辰以重允爲河陽節度使元陽爲昭義節度使戊戌貶盧從史驩州司馬（順德邢州也北至趙州臨城縣界九十里廣平洺州也東南至大名府治百二十里故昭義一鎮爲太行以東之要害驩州在今越南國）

六年以金吾大將軍李惟簡爲鳳翔節度使隴州地與吐蕃接舊常朝夕相伺更入攻鈔人不得息惟簡以爲邊將當謹守備蓄財穀以待寇不常觀小利起事盜恩禁不得妄入其地益市耕牛鑄農器以給農之不能自具者墾墾田數十萬畝屬歲屢稔公私有餘販者流及他方（時吐蕃界極於平涼清水故隴州與接壤）

七年八月戊戌魏博節度使田季安卒初季安娶洺州刺史元誼女生子懷諫爲節度副使牙內兵馬使田興庭玠之子也有勇力頗讀書性恭遜季安淫虐興數規諫軍中賴之季安以爲收衆心出爲臨清鎮將將欲殺之興陽爲風痺灸灼滿身乃得免季安病風殺戮無度軍政廢亂夫人元氏召諸將立懷諫爲副大使知軍務時年十一遷季安於別寢月餘而卒召田興爲步射都知兵馬使辛亥以左龍武大將軍薛平爲鄭滑節度使欲以控制魏博上與宰相議魏博事李吉甫請興兵討之李絳以爲魏博不必用兵當自歸朝廷吉甫盛陳不可不用兵之狀上曰朕意亦以爲然絳曰臣竊觀兩河藩鎮之跋扈者皆分兵以隸諸將不使專在一人恐其權任太重乘閒而謀已故也諸將勢均力敵莫能相制欲廣相連結則衆心不同其謀必泄欲獨起爲變則兵少力微勢必不成加以購賞旣重刑誅又峻是以諸將互相顧忌莫敢先發跋扈者恃此以爲長策然臣竊思之若常得嚴明主

帥能制諸將之死命者以臨之則羸能自固矣今懷諫乳臭子不能自聽斷軍府大權必有所歸諸將厚薄不均怨怒必起不相服從則曷日分兵之策適足爲今日禍亂之階也田氏不爲屠肆則悉爲俘囚矣何煩天兵哉彼自列將起代主帥鄰道所惡莫甚於此彼不倚朝廷之援以自存則立爲鄰道所齏粉矣故臣以爲不必用兵可坐待魏博之自歸也但願陛下按兵養威嚴敕諸道選練士馬以須後敕使賊中知之不過數月必有自效於軍中者矣至時惟在朝廷應之敏速中其機會不愛爵祿以賞其人使兩河藩鎮聞之恐其麾下效之以取朝廷之賞必相恐懼爭爲恭順失此所謂不戰而屈人兵者也上曰善他日吉甫復於延英盛陳用兵之利且言芻糧金帛皆已有備上顧問絳絳對曰兵不可輕動前年討恆州四面發兵二十萬又發兩神策兵自京師赴之天下騷動所費七百餘萬緡訖無成功爲天下笑今瘡痍未復人皆懼戰若又以救命驅之臣恐非直無功成生他變况魏博不必用兵車勢明白願陛下勿疑上奮身撫按曰朕不用兵決矣絳曰陛下雖有是言恐退朝之後復有熒惑聖聽者上正色厲聲曰朕志已決誰能惑之絳乃拜賀曰此社稷之福也既而田懷諫幼弱軍政皆決於家僮蔣士則數以愛憎移易諸將衆皆憤怒朝命久不至軍中不安田興晨入府士卒數千人大譟環輿而拜請爲留後興驚仆於地衆不散久之興度不免乃謂衆曰汝肯聽吾言乎皆曰惟命興曰勿犯副大使守朝廷法令申版籍請官吏然後可皆曰諾興乃殺蔣士則等十餘人遷懷諫於外

魏博監軍以狀聞上亟召宰相謂李絳曰卿揣魏博若符契李吉甫請遣中使宣慰以觀其變李絳曰不可今田

興奉其土地兵衆坐待詔命不乘此際推心撫納結以大恩必待敕使至彼持將士表來請節鉞然後與之則是恩出於下非出於上將士爲重朝廷爲輕其感戴之心亦非今日之比也機會一失悔之無及吉甫素與樞密使梁守謙相結守謙亦爲之言於上曰故事皆遣中使宣勞今此鎮獨無恐更不諭上竟遣中使張忠順如魏博宣慰欲俟其還而議之癸卯李絳復上言朝廷恩威得失在此一舉時機可惜奈何棄之利害甚明顯聖心勿疑計忠順之行市應過陝乞明且即降白麻除興節度使猶可及也上且欲除留後絳曰興恭順如此自非恩出不次則無以使之感激殊常上從之甲辰以興爲魏博節度使忠順未還制命已至魏州興感恩流涕士衆無不鼓舞李絳又言魏博五十餘年不霑皇化一日舉六州之地來歸列河朔之腹心傾叛亂之巢穴不有重賞過其所望則無以慰士卒之心使四鄰勸募請發內庫錢百五十萬緡以賜之左右宦官以爲所與太多後有此比將何以給之上以語絳絳曰田與不貪專地之利不顧四鄰之患歸命聖朝陛下奈何愛小費而遺大計不以收一道人心錢用盡更來機事一失不可復追借使國家發十五萬兵以取六州期年而克之其費豈止百五十萬緡而已乎上悅曰朕所以惡衣菲食蓄聚貨財正爲欲平定四方不然徒貯之府庫何爲十一月辛酉遣知制誥裴度至魏博宣慰以錢百五十萬緡賞軍士六州百姓給復一年軍士受賜歡聲如雷成德袁軻使者數輩見之相顧失色歎曰倔強者果何益乎度爲興陳君臣上下之義興聽之終夕不倦侍度禮極厚請度徧至所部州縣宣布朝命奏乞除節度副使於朝廷詔以戶部郎中河東胡證爲之興又奏所部缺官九十員請有司注擬行朝廷法令

輸賦稅田承嗣以來室屋僭侈者皆避不居郟蔡恆遣遊客閒說百方與終不聽李師道使人謂宣武節度使韓宏曰我世與田氏約相保援今與非田氏族又首變兩河事亦公之所惡也我將與成德合軍討之宏曰我不知利害知奉詔行事耳若兵北渡河我則以兵東取曹州師道懼不敢動田與旣葬田季安送田懷諫於京師辛巳以懷諫爲右監門衛將軍

李絳奏振武天德左右良田可萬頃請擇能吏開置營田可以省費足食上從之絳命度支使盧坦經度用度四年之間開田四千八百頃收穀四千餘萬斛歲省度支錢二十餘萬緡邊防賴之

是歲吐蕃寇涇州及西門之外驅掠人畜而去上患之李絳上言京西京北皆有神策鎮兵（胡氏曰京西鳳翔秦隴原涇渭也京北邠甯丹延鄜坊慶靈鹽夏綏銀宥也）始置之欲以備禦吐蕃使與節度使犄角相應也今則鮮衣美食坐耗縣官每有寇至節度使邀與俱進則云申取中尉處分（胡氏曰唐神策鎮兵分屯於外皆屬左右神策中尉）比其得報虜去遠矣縱有果銳之將聞命奔赴節度使無刑戮以制之相視如平交左右前卻莫肯用命何所益乎請據所在之地士馬及衣糧器械皆割隸當道節度使使號令齊壹如臂之使指則軍威大振虜不敢入寇矣上曰朕不知舊事如此當亟行之旣而神策軍驕恣日久不樂隸節度使竟爲宦者所沮而止八年秋七月振武節度使李光進請修受降城兼理河防時受降城爲河所毀李吉甫請徙其徒於天德故城李絳及戶部侍郎盧坦以爲受降城張仁愿所築當磧口據虜要衝美水草守邊之利地今避河患退二三里可

矣奈何捨萬代永安之策徇一時省費之便乎况天德故城僻處确瘠去河絕遠烽候緊急不相應接虜忽唐突勢無由知是無故而蹙國二百里也及城使周懷義奏利害與絳坦同上卒用吉甫策以受降城騎士隸天德軍李絳言於上曰邊軍徒有其數而無其實虛費衣糧將帥但緣私役使（胡氏曰緣私者並緣公役之名而私使之）聚貨財以結權倖而已未嘗訓練以備不虞此不可不於無事之時豫留聖意也時受降城兵籍舊四百人及天德軍交兵止有五十人器械止有一弓自餘稱是故絳言及之上驚曰邊兵乃如是其虛耶卿曹當加按閱會絳罷相而止（此中受降城也城在今蘇爾哲河側故有河患天德城在其西北二百餘里今吳喇特旂之西不衝不要惟遠於河耳）

初吐蕃欲作烏蘭橋先儲材於河側朔方常潛遣人投之於河終不能成虜知朔方靈鹽節度使王佖貪先厚賂之然後併力成橋仍築月城守之自是朔方禦寇不暇（烏蘭橋卽靖遠縣之會甯關橋在其側大河上渡河而東卽朔方軍）

九年 閏月丙辰彰義節度使吳少陽卒少陽在蔡州陰聚亡命牧養馬騾時鈔掠壽州茶山以實其軍其子攝蔡州刺史元濟匿喪以病聞自領軍務上自平蜀卽欲取淮西淮南節度使李吉甫上言少陽軍中上下攜離請徙理壽州以經營之會朝廷方討王承宗未暇也及吉甫入相田宏正以魏博歸附吉甫以爲汝州扞蔽東都河陽宿兵本以制魏博今宏正歸順則河陽爲內鎮不應屯重兵以示猜阻辛酉以河陽節度使烏重允爲汝州刺

史充河陽懷汝節度使徙理汝州已巳宏正檢校右僕射賜其軍錢二十萬緡宏正曰吾未若移河陽軍之爲喜也九月庚辰以洺州刺史李光顏爲陳州刺史充忠武都知兵馬使以泗州刺史令狐通爲壽州防禦使丙戌以山南東道節度使袁滋爲荆南節度使以荆南節度使嚴綬爲山南東道節度使吳少陽判官蘇兆陽元卿大將侯惟清皆勸少陽入朝元濟惡之殺兆因惟清元卿先奏事在長安具以淮西虛實及取元濟之策告李吉甫請討之時元濟猶匿喪元卿勸吉甫凡蔡使入奏者所在止之少陽死近四十日不爲輟朝但易環蔡諸鎮將帥益兵爲備元濟殺元卿妻及四男以坊射期淮西宿將董重質吳少誠之壻也元濟以爲謀主李吉甫言於上曰淮西非如河北四無黨援國家常宿數十萬兵以備之勞費不可支也失今不取後難圖矣上將討之張宏靖請先爲少陽輟朝贈官遣使弔贈待共有不順之迹然後加兵上從之遣工部員外郎李君何弔祭元濟不迎敕使發兵四出屠舞陽焚葉掠魯山襄城關東震駭君何不得入而還以忠武節度副使李光顏爲節度使甲子以嚴綬爲申光蔡招撫使督諸道兵招討吳元濟乙丑命內常侍知省事崔潭峻監其軍（彰義帥蔡申光蔡今汝甯府申今信陽州光今光州茶山在霍山縣壽州在其北淮水南岸陳在蔡北忠武軍統陳許二州荆南治江陵府在蔡西南汝州在蔡西壽州在蔡東所謂環蔡境也餘皆今縣名）

十年 吳元濟縱兵侵掠及於東畿制削元濟官爵命宣武等十六道進軍討之嚴綬擊淮西兵小勝不設備淮西兵夜還襲之二月甲辰綬敗於磁邱卻五十餘里馳入唐州而守之壽州團練使令狐通爲淮西兵所敗走保

州城境上諸柵盡爲淮西所屠癸丑以左金吾大將軍李文通代之貶通昭州司戶詔鄂岳觀察使柳公綽以兵五千授安州刺史李聽使討元濟公綽曰朝廷以吾書生不知兵邪卽奏請自行許之公綽至安州李聽屬囊鞬迎之公綽以鄂岳都知兵馬使先鋒行營兵馬都虞候二牒授之選卒六千以屬聽戒其部校曰行營之事一決都將聽感恩畏威如出麾下公綽號令整肅區處軍事諸將無不服士卒在行營者其家疾病死喪厚給之妻淫洩者沈之於江士卒皆喜曰中丞爲我治家我何得不前死故每戰皆捷公綽所乘馬隄殺圍人公綽命殺馬以祭之或曰圍人自不備耳此良馬可惜公綽曰材良性驚何足惜也竟殺之三月元濟遣使求救於恆鄆王承宗李師道數上表請赦元濟上不從是時發諸道兵討元濟而不及淄青師道使大將將二千人趣壽春聲言助官軍討元濟實欲爲元濟之援也師道素養刺客奸人數十人厚資給之其人說師道曰用兵所急莫先糧儲今河陰院積江淮租賦請潛往焚之募東都惡少年數百劫都市焚宮闕則朝廷未暇討蔡先自救腹心此亦救蔡一奇也師道從之自是所在盜賊竊發辛亥暮盜數十人攻河陰轉運院殺傷十餘人燒帛錢三十餘萬緡匹殺三萬餘斛於是人情恇懼羣臣多請罷兵上不許諸軍討淮西久未有功五月上遣中丞裴度詣行營宣慰察用兵形勢度還言淮西必可取之狀且曰觀諸將惟李光顏勇而知義必能立功上悅考功郎中知制誥韓愈上言以爲淮西三小州殘弊困劇之餘而當天下之全力其破收可立而待然所未可知者在陛不斷與不斷耳因條陳用兵利害以爲今諸道發兵各二三千人勢力單弱羈旅異鄉與賊不相諳委望風懾懼將帥以其客兵待之旣

薄使之又苦或分割隊伍兵將相失心孤意怯難以有功又其本軍各須資道道路遼遠勞費倍多聞陳許安唐汝壽等州與賊連接處村落百姓悉有兵器習於戰鬪識賊深淺比來未有處分猶願自備衣糧保護鄉里若令召募立可成軍賊平之後易使歸農乞悉罷諸道軍募士人以代之又言蔡州士卒皆國家百姓若勢力窮不能爲惡者不須過有殺戮丙申李光顏奏敗淮西兵於時曲淮西兵晨壓其壘而陳光顏不得出乃自毀其柵之左右出騎以擊之光顏自將數騎衝其陳出入數四賊皆識之矢集其身如蝟毛其子攬轡止之光顏舉刃叱去於是人爭致死淮西兵大潰殺數千人上以裴度爲知人上自李吉甫卒悉以用兵事委武元衡李師道所養客說李師道曰天子所以銳意誅蔡者元衡贊之也請密往刺之元衡死則他相不敢主其謀爭勸天子罷兵矣師道以爲然卽資給遺之王承宗遣牙將尹少卿奏事爲吳元濟游說少卿至中書辭指不遜元衡叱出之承宗又上書詆毀元衡六月癸卯天未明元衡入朝出所居靖安坊東門有賊自暗中突出射之從者皆散走賊執元衡馬行十餘步而殺之取其顛骨而去又入通化坊擊裴度傷其首墜溝中度氈帽厚得不死僮人王義自後抱賊大呼賊斷義臂而去京城大駭於是詔宰相出入加金吾騎士張弦露刃以衛之所過坊門呵索甚嚴朝士未曉不敢出門上或御殿久之班猶未齊賊遺紙於金吾及府縣曰毋急捕我我先殺汝故捕賊者不敢甚急兵部侍郎許孟容見上言自古未有宰相橫尸路隅而盜不獲者此朝廷之辱也因涕泣又詣中書揮涕言請奏起裴中丞爲相大索賊黨窮其姦源戊申詔中外所在搜捕獲賊者賞錢萬緡官五品敢庇匿者舉族誅之於是京城大索

公卿家有複壁重櫺者皆索之成德軍進奏院有恆州卒張晏等數人行止無狀衆多疑之庚戌神策將軍王士則等告王承宗遣晏等殺元衡吏捕得晏等八人命京兆尹裴武監察御史陳中師鞠之癸亥詔以王承宗前後三表出示百僚議其罪裴度病瘡臥二旬詔以衛兵宿其第中使問訊不絕或請罷度官以安恆郢之心上怒曰若罷度官是奸謀得成朝廷無復綱紀吾用度一人足破二賊甲子上召度入對乙丑以度爲中書侍郎同平章事度上言淮西腹心之疾不得不除且朝廷業已討之兩河藩鎮跋扈者將視此爲高下不可中止上以爲然悉以用兵事委度討賊甚急初德宗多猜忌朝士有相過從者金吾皆伺察以聞宰相不敢私第見客度奏今寇盜未平宰相宜招延四方賢才與參謀議始請於私第見客許之陳中師按張晏等具服殺武元衡張宏靖疑其不實屢言於上不聽戊辰斬晏等五人殺其黨十四人李師道客竟潛匿亡去初上以嚴綬在河東所遣裨將多立功故使鎮襄且督諸軍討吳元濟綬無他材能到軍之日傾府庫賫士卒累年之積一朝而盡又厚賂宦官以結聲援擁八州之衆餘人屯境上閉壁經年無尺寸功裴度屢言其軍無政九月癸酉以韓宏爲淮西諸軍都統宏樂於自擅欲倚賊自重不願淮西速平李光顏在諸將中戰最力宏欲結其歡心舉大梁城索得一美婦人教之歌舞絲竹飾以珠玉金翠直數百萬錢遣使遺之使者光致書光顏大饗將士使者進妓容色絕世一座盡驚光顏謂使者曰相公愍光顏羈旋賜以美妓荷德誠深然戰士數萬皆棄家遠來冒犯白刃光顏何忍獨以聲色自娛悅乎因流涕座者皆泣卽於席上厚以繒帛贈使者并妓返之曰爲光顏多謝相公光顏以身許國誓不與

逆賊同戴日月死無貳矣十一月壽州刺史李文通奏敗淮西兵壬申韓宏請命衆軍合攻淮西從之李光顏烏重允敗淮西兵於小澗水拔其城乙亥以嚴綬爲太子少保盜焚襄州佛寺軍儲盡徙京城積草於四郊以備火丁丑李文通敗淮西兵於固始（慈邱在泌陽縣西唐州今唐縣昭州今平樂府安州今德安府時曲在商水縣西南靖安坊在安上門街東通化坊宋敏求作興化坊在含光門西小澗水卽小澗水在商水縣固始今沈邱縣）十一年春三月壽州團練使李文通奏敗淮西兵於固始拔鋤山已卯唐鄧節度使高霞寓奏敗淮西兵於朗山斬首千餘級焚二柵寒四月庚子李光顏烏重允敗淮西兵於陵雲柵斬首三千餘級五月壬申光顏重允又敗淮西兵於陵雲柵斬首二千餘級六月甲辰高霞寓大敗於鐵城僅以身免時諸將討淮西者勝則虛張殺獲敗則匿之至是大敗不可掩始上聞中外駭愕宰相入見將勸上罷兵上曰勝負兵家之常今但當論用兵方略察將帥之不勝任者易之兵食不足者助之耳豈得以一將失利遽議罷兵邪於是獨用裴度之言他人言罷兵者亦稍息矣巳酉霞寓退保唐州上責霞寓之敗霞寓稱李遜應接不至秋七月貶霞寓爲歸州刺史遜亦左遷恩王傅以河南尹鄭權爲山南東道節度使以荆南節度使袁滋爲彰義節度申光蔡唐隨鄧觀察使以唐州爲理所壬午宣武軍奏破郟城之衆二衆殺二千餘人捕虜千餘人九月李光顏烏重允奏拔吳元濟陵雲柵光顏又奏拔石越二柵壽州奏敗殷城之衆拔六柵時討淮西諸軍近九萬上怒諸將久無功十一月辛巳命知樞密梁守謙宣慰因留監其軍授以空名告身五百通及金帛以勸死事庚寅先加李光顏等檢校官而詔書切責示

以無功必罰李文通奏敗淮西兵於固始斬首千餘級袁滋至唐州去斥候止其兵不使覓吳元濟境元濟圍其新興柵滋卑辭以請之元濟由是不復以滋爲意朝廷知之十二月甲寅以太子詹事李愬爲唐隨鄧節度使初置淮潁水運使揚子院米自淮陰泝淮入潁至項城入澗輸於鄆城以饋討淮西諸軍省汴運之費七萬餘緡（鉞山在沈邱東朗山卽朗陵山在確山縣陵雲柵在商水西南鄆城東北鐵城在遂平縣西石越在陵雲之南新興柵在遂平西南胡氏據舊史云時運米泝淮至壽州四十里入潁口又泝流至沈邱五百里至項城又五百里入澗城又三百里輸於鄆城得米五十萬石麥五百萬束按里數未確）

十二年 春正月李愬至唐州軍中承喪敗之餘士卒皆憚戰愬知之有出逆者愬謂之曰天子知愬柔懦能忍恥故使來拊循爾曹至於戰攻進取非吾事也衆信而安之愬親行視士卒傷病者存恤之不事威嚴或以軍政不肅爲言愬曰吾非不知也袁尙書專以恩惠懷賊賊易之聞吾至必增備吾故示之以不肅彼必以吾爲懦而懈惰然後可圖也淮西人自以嘗敗高袁二帥輕愬名位素微遂不爲備二月李愬謀襲蔡州表請益兵詔以詔義河中鄆坊步騎二千給之丁酉愬遣十將馬少良將十餘騎巡邏遇吳元濟捉生虞候丁士良與戰擒之士良元濟驍將常爲東邊患衆請劄其心愬許之旣而召詰之士良無懼色愬曰眞丈夫也命釋其縛士良乃自言本非淮西士貞元中隸安州與吳氏戰爲其所擒自分死矣吳氏釋我而用之我因吳氏而再生故爲吳氏父子竭力昨日力屈復爲公所擒亦分死矣今公又生之請盡死以報德愬乃給其衣服器械署爲捉生將士良言於愬

曰吳秀琳擁三千之衆據文城柵爲賊左臂官軍不敢近者東陳光洽爲之謀主也光洽勇而輕好自出戰請爲公先擒光洽則秀琳自降矣戊申士良擒光洽以歸鄂岳觀察使李道古引兵出穆陵關甲寅攻申州克其外郭進攻子城城中守將夜出兵擊之道古之衆驚亂死者甚衆道古皋之子也淮西被兵數年竭倉廩以奉戰士民多無食采菱芡魚鼈鳥獸食之亦盡相帥歸官軍者前後五千餘戶賊亦患其耗糧食不復禁庚申敕置行縣以處之爲擇縣令使之撫養并置兵以衛之三月乙丑李愬自唐州徙屯宜陽柵吳秀琳以文城柵降於李愬戊子引兵至文城西五里遣唐州刺史李進誠將甲士八千至城下召秀琳城中矢石如雨衆不得前進誠還報賊僞降未可信也愬曰此待我至耳卽前至城下秀琳束兵投身馬足下愬撫其背慰勞之降其衆三千人秀琳將憲有材勇愬更其名曰忠義而用之悉遷婦女於唐州（胡氏曰質其家於唐州則文城之士心不敢懷反側）於是唐鄧軍氣復振人有欲戰之志賊中降者相繼於道隨其所便而置之置聞有父母者給粟帛遣之曰汝曹皆王人勿棄親戚衆皆感泣官軍與淮西兵夾澗水而軍諸軍相顧望無敢度澗水者陳許兵馬使王沛先引兵五千度澗水據要地爲城於是河陽宣武河東魏博等軍相繼皆度進逼鄆城丁亥李光顏敗淮西兵三萬於鄆城走其將張伯良殺士卒什二三己丑李愬遣山河十將董少玢等分兵攻諸柵其日少玢下馬鞍山拔路口柵（胡氏曰時都畿及唐鄧皆募土人之材勇者爲兵以討蔡號爲山河子弟置十將以領之按唐蔡交兵凡境上要地處處置守所謂馬鞍山路口柵固不可盡詳其處而強爲之注也）夏四月辛卯山河十將馬少良下墮崕山擒淮

西將柳子野吳元濟以蔡人董昌齡爲郾城令質其母楊氏楊氏謂昌齡曰順死賢於逆生汝去逆而吾死乃孝子也從逆而吾生是戮吾也會官軍圍青陵絕郾城歸路郾城守將鄧懷金謀於昌齡昌齡勸之歸國懷金乃請降於李光顏曰城人之父母妻子皆在蔡州請公來攻城吾舉烽求救救兵至公逆擊之蔡兵必敗然後吾降則父母妻子庶免矣光顏從之乙未昌齡懷金舉城降光顏引兵入據之吳元濟聞郾城不守甚懼時董重質將驃軍守洄曲元濟悉發親近及守城卒詣重質以拒之李愬山河十將媯雅田智榮下冶爐城丙申十將閻士榮下白狗汝港二柵癸卯媯雅田智榮破西平丙午游奕兵馬使王義破楚城五月辛酉李愬遣柳子野李忠義襲朗山擒其守將梁希果丁丑愬遣方城鎮遏使李榮宗擊青喜城拔之愬每得降卒必親引問委曲由是賊中險易虛實盡知之愬厚待吳秀琳與之謀取蔡秀琳曰公欲取蔡非李祐不可秀琳無能爲也祐者淮西騎將有勇略守興橋柵常陵暴官軍庚辰祐率士卒刈麥於張柴村愬召廂虞候史用誠戒之曰爾以三百騎伏彼林中又使人搖幟於前若將焚其麥積者祐素易官軍必輕騎來逐之爾乃發騎掩之必擒之用誠如言而往生擒祐以歸將士以祐曷日多殺官軍爭請殺之愬不許釋縛待以客禮時愬欲襲蔡而更密其謀獨召祐及李忠義屏人語或至夜分他人莫得預聞諸將恕祐爲變多諫愬愬待祐益厚士卒亦不悅諸軍日有牒稱祐爲賊內應且言得賊牒者具言其事愬恐謗先達於上已不及救乃持祐泣曰豈天不欲平此賊耶何吾二人相知之深而不能勝衆口也因謂衆諸君旣以祐爲疑請令歸死於天子乃械祐送京師先密表其狀且曰若殺祐則無以成功詔釋

之以還愬見之喜執其手曰爾之得全社稷之靈也乃署散兵馬使令佩刀巡警出入帳中或與之同宿密語不寐達曙有竊聽於帳外者但聞祐感泣聲時唐隨牙隊三千人（胡氏曰牙隊者節度使牙衛從之隊猶今之簇帳部）號六院兵馬皆山南東道之精銳也（胡氏曰時山南東道分爲兩鎮八州精銳盡抽選赴唐州使之攻戰）愬又以祐爲六院兵馬使舊軍令舍賊謀者屠其家愬除其令使厚待之謀反以情告愬愬益知賊中虛實乙酉愬遣兵攻朗山淮西兵救之官軍不利衆皆悵恨愬獨歡然曰此吾計也乃募敢死士三千人號曰突將朝夕自教習之使常爲行備欲以襲蔡會久雨所在積水未果吳元濟見其下數叛兵勢日蹙六月壬戌上表謝罪願束身自歸上遣中使賜詔許以不死而爲左右及大將董重質所制不得出諸軍討淮蔡四年不克饋運疲敝民至有以驢耕者上亦病之以問宰相李逢吉等競言師老財竭意欲罷兵裴度獨無言上問之對曰臣請自往督戰秋七月乙卯上復謂度曰卿真能爲朕行乎對曰臣誓不與此賊俱生臣比觀吳元濟表勢實窘蹙但諸將心不壹不併力迫之故未降耳若臣詣行營諸將恐臣奪其功必爭進破賊矣上悅丙戌以度爲門下侍郎同平章事兼彰義節度使仍充淮西宣慰招討處置使制下度以韓宏已爲都統不欲更爲招討請但稱宣慰處置使八月度過襄城南白草原淮西人以驍騎七百邀之鎮將楚邱曹華知而爲備擊郤之度雖辭招討名實行元帥事以鄆城爲治所甲申至鄆城先是諸道皆有中使監陳進退不由主將勝則先使獻捷不利則陵挫百端度悉奏去之諸將始得專軍事戰多有功九月庚子淮西兵寇澠水鎮殺三將焚芻藁而去李愬將攻吳房諸將曰

今日往亡愬曰吾兵少不足戰宜出其不意彼以往亡不吾虞正可擊也遂往克其外城斬首千餘級餘衆保子城不敢出愬引兵還以誘之淮西將孫獻忠果以驍騎五百追擊其背衆驚將走愬下馬據胡牀令曰敢退者斬返旆力戰獻忠死淮西兵乃退或勸愬乘勝攻其子城可拔也愬曰非計也引兵還營李祐言於李愬曰蔡之精兵皆在洄曲及四境拒守守州城者皆羸老之卒可以乘虛直抵其城比賊將聞之元濟已成擒矣愬然之冬十月甲子遣掌書記鄭澥至鄆城密白裴度度曰兵非出奇不勝常侍良圖也裴度帥僚佐觀築城於沱口董重質帥騎出五溝邀之大呼而進注弩挺刃勢將及度李光顏與田布力戰拒之度僅得入城賊退布扼其溝中歸路賊下馬踰溝墜壓死者千餘人辛未李愬留兵守文城命李祐李忠義帥突將三千爲前驅自與監軍將三千人爲中軍命李進誠將三千人殿其後軍出不知所之愬曰但東行行六十里夜至張柴村盡殺其戍卒及烽子（胡氏曰唐凡烽候之所有烽帥烽副烽子蓋守烽之卒候望警急而舉烽者也杜佑曰一烽六人五人爲烽子遞知更刻觀視動靜一人烽率知文書符辭轉牒）據其柵命士少休食乾糲整羈勒留義成軍五百人鎮之以斷洄曲及諸道橋梁復夜引兵出門諸將請所之愬曰入蔡州取吳元濟諸將皆失色監軍哭曰果落李祐姦計時大風雪旌旗裂人馬凍死者相望天陰黑自張柴村以東道路皆官軍所未嘗行人人自以爲必死然畏愬莫敢違夜半雪愈甚行七十里至州城近城有鵝鴨池愬令擊之以混軍聲自吳少誠拒命官軍不至蔡州城下三十餘年故蔡人不爲備壬申四鼓愬至城下無一人知者李祐李忠義鑿其城爲坎以先登壯士從之守門卒方熟

寐盡殺之而留擊柝者使擊柝如故遂開門納衆及裏城亦然城中皆不之覺雞鳴雪止愬入居元濟外宅或告元濟曰官軍至矣元濟尙寢笑曰俘囚爲盜耳曉當盡戮之又有告者曰城陷矣元濟曰此必洄曲子弟就吾求寒衣也起聽於廷聞愬軍號令曰常侍傳語應者近萬人元濟始懼曰何等常侍能至於此乃帥左右登牙城拒戰時董重質擁精兵萬餘人據洄曲愬曰元濟所望者重質之救耳乃訪重質家厚撫之遣其子傳道持書諭重質重質遂單騎詣愬降愬遣李進誠攻牙城毀其外門得甲庫取器械癸酉復攻之燒其南門民爭負薪芻助之城上矢如蝟毛晡時門壞元濟於城上請罪進誠梯而下之甲戌愬以檻車送元濟詣京師且告於裴度是日申光二州及諸鎮兵二萬餘人相繼來降自元濟就擒愬不戮一人凡元濟官吏帳下廚廩之卒皆復其職使之不疑然後屯於鞠場以待裴度淮西行營奏獲吳元濟光祿少卿楊元卿言於上曰淮西大有珍寶臣能知之往取必得上曰朕討淮西爲人除害珍寶非所求也董重質之去洄曲軍也李光顏馳入其壁悉降其衆庚申裴度遣馬總先入蔡州慰撫辛巳度建彰義軍節將降卒萬餘人入城李愬具囊韃出迎拜於路左度將避之愬曰蔡人頑悖不識上下之分數十年矣願公因而示之使知朝廷之尊度乃受之李愬還軍文城（胡氏曰裴度既入蔡李愬還軍文城此皆是識體統處又非諸帥怙功欲專地爲私利者比也）諸將請曰始公敗於朗山而不憂勝於吳房而不取冒大風甚雪而不止孤軍深入而不懼然卒以成功皆衆人所不諭也敢問其故愬曰朗山不利則賊輕我而不爲備矣取吳房則其衆奔蔡併力固守故存之以分其兵風雪陰晦則烽火不接不知吾至孤軍

深入則人皆致死戰自倍矣夫視遠者不顧近慮大者不詳細若矜小勝恤小敗先自撓矣何暇立功乎衆皆服
愬儉於奉已而豐於待士知賢不疑見可能斷此其所以成功也裴度以蔡卒爲牙兵或諫曰蔡人反仄者尙多
不可不備度笑曰吾爲彰義節度使元惡旣擒蔡人則吾人也又何疑焉蔡人聞之感泣先是吳氏父子阻兵禁
人偶語於塗夜不然燭有以酒食相過從者罪死度旣視事下令惟禁盜賊餘皆不問往來者不限晝夜蔡人始
知有生民之樂甲申詔韓宏裴度條列平蔡將士功狀及蔡之將士降者皆差第以聞淮西州縣百姓給復二年
近賊四州免來年夏稅官軍戰亡者皆爲收葬給其家衣糧五年其因戰傷殘廢者勿停衣糧十一月上御興安
門受俘遂以吳元濟獻廟社斬於獨柳之下初淮西之人劫於李希烈吳少誠之威虐不能自拔久而老者衰幼
者壯安於悖逆不復知有朝廷矣自少誠以來遣諸將出兵皆不束以法制聽各以便宜自戰故人得盡其才
韓全義之敗於潮水也於其帳中得朝貴所與問訊書少誠束以示衆曰此皆公卿屬全義書云破蔡州日乞一
將士妻女爲婢妾由是衆皆憤怒以死爲賊用雖居中土其風俗曠戾過於夷貊故以三州之衆舉天下之兵環
而攻之四年然後克之官軍之攻元濟也李師道募人通使於蔡察其形勢牙前虞候劉晏平應募出汴宋開潛
行至蔡元濟大喜厚禮而遣之晏平還至鄆師道屏人而問之晏平曰元濟暴兵數萬於外阡危如此而日與僕
妾遊戲於內晏然曾無憂色以愚觀之殆必亡不久矣師道素倚淮西爲援聞之驚怒尋誣以他過杖殺之戊子
以李愬爲山南東道節度使賜爵涼國公加韓宏兼侍中李光顏烏重允等各遷官有差（文城柵在上蔡西南

遂平東北穆陵關在麻城西北申州信陽州也宜陽柵在唐縣東馬鞍山路口柵查牙山疑皆在遂平縣界青陵在郟城西南洄曲卽時曲在商水西南冶鑪城在遂平縣查牙山東白狗汶港皆在正陽縣楚城在汝陽西南方城今裕州青喜城乃青臺城之誤在唐縣北張柴柵在文城柵東六十里又東則興橋柵灤水鎮卽商水縣吳房遂平縣也郟城南有沱口鎮其南爲五溝又南則洄曲興安門大明宮南面西頭門）

六鎮討王承宗者兵十餘萬回環數千里旣無統帥又相去遠期約難壹由是歷二年無功千里饋運牛驢死者什四五劉總旣得武疆引兵出境纔五里留屯不進月給度支錢十五萬緡李逢吉及朝士多言宜併力先取淮西俟淮西平乘其勝勢回取恆冀如拾芥耳上猶豫久乃從之（六鎮者河東幽州義武橫海魏博昭義也）

十三年 秋七月癸未朔徙李愬爲武甯節度使乙酉下制罪狀李師道令宣武魏博義成武寧橫海兵共討之十一月以河陽節度使烏重允爲橫海節度使先是田宏正請自黎陽渡河會義成節度使李光顏討李師道裴度曰魏博度旣度河不可復退立須進擊方有成功旣至滑州卽仰給度支（胡氏曰義成節度使治滑州魏博與滑州以河爲界兵至滑州爲己出界唐中世以來命藩鎮兵征討已出境芻糧皆仰給於度支惟裴度用兵於東平李德裕用兵於上黨知其弊有以制之）徒有供餉之勞更生觀望之勢又或與李光顏互相疑阻益致遷延（胡氏曰一栖不兩雄又有賓主之形疑阻或生何事不有其患豈止於遷延之役）與其度河而不進不若養威於河北宜且使之秣馬厲兵俟霜降水落自楊劉度河直指鄆州得至陽穀置營則兵勢自盛賊衆搖心矣上

從之是月宏正將全師自楊劉度河距鄆州四十里築壘賊中大震十二月魏博義成軍送所獲李師道都知兵馬使夏侯澄等四十七人上皆釋弗誅各付所獲行營驅使曰若有父母欲歸者優給遣之朕所誅者師道而已於是賊中聞之降者相繼武甯節度使李勣與平盧兵十一戰皆捷乙卯晦進攻金鄉克之李師道性懦怯自官軍致討聞小敗及失城邑輒憂悸成疾由是左右皆蔽匿不以實告金鄉兗州之要地也既失之其刺史驛騎告急左右不爲通師道至死竟不知也（武甯軍徐州也宣武軍汴宋也魏博軍大名也義成軍滑州也橫海軍滄州也黎陽濬縣也陽劉在東阿縣陽穀故城在今縣城東北三十里鄆州東平州也金鄉今屬濟甯州）

十四年春二月李師道聞官軍侵逼發民治鄆州城塹修守備役及婦人民益懼且怨都知馬使劉悟正臣之孫也師道使之將兵萬餘人屯陽穀以拒官軍悟務爲寬惠使士卒人人自便軍中號曰劉父及田宏正度河悟軍無備戰又數敗或謂師道曰劉悟不修軍法專收衆心恐有他志宜早圖之師道召悟計事欲殺之或諫曰今官軍四合悟無逆狀用一人言殺之諸將誰肯爲用是自脫其爪牙也師道留悟旬日復遣之厚贈金帛以安其意悟知之還營陰爲之個師道以悟將兵在外署悟子從諫門下別奏從諫與師道諸奴日游戲頗得其陰謀密疏以白父又有謂師道者曰劉悟終爲患不如早除之丙辰師道潛遣二使齎帖授行營兵馬副使張暹令斬悟首獻之勒暹權領行營時悟方據高郵張幕置酒去營二三里二使至營密以帖授暹暹素與悟善陽與使者謀曰悟自使府還頗爲備不可忽忽暹請先往白之云司空遣使存問將士兼有賜物請都頭速歸同受傳語如此

則彼不疑乃可圖也使者然之暹懷帖走詣悟屏人示之悟潛遣人先執二使殺之時已向暮悟按轡徐行還營坐帳下嚴兵自衛召諸將厲色謂之曰悟與公等不願死亡以抗官軍誠無負於司空今司空信讒言來取悟首悟死諸公其次矣且天子所欲誅者獨司空一人今軍勢日蹙吾曹何爲隨之族滅欲與諸公卷旗束甲還入郾州奉行天子之命豈徒免亡富貴可圖也諸公以爲何如兵馬使趙垂棘立於衆首良久對曰事果濟否悟應聲罵曰汝與司空合謀邪立斬之徧問其次有遲疑未言者悉斬之并斬軍中素爲衆所惡者凡三十餘尸於帳前餘皆股栗曰惟郾頭命願盡死乃令士卒曰入郾人賞錢百緡惟不得近軍帑其使宅及逆黨家財任自掠取有仇者報之使士皆飽食執兵夜半聽鼓三聲絕卽行人銜枚馬縛口遇行人執留之人無知者距城數里天未明悟駐軍使聽城上柝聲絕使十人前行宣言劉郾頭奉帖追入城門者請俟寫簡白使十人拔刀擬之皆竄匿悟引大軍繼至城中譟譁動地比至子城已洄開惟牙城拒守（胡氏曰凡大城謂之羅城小城謂之子城又有第三重城以衛節度使居宅謂之牙城）尋縱火斧其門而入牙中兵不過數百始猶有發弓矢者俄知力不支皆投於地悟勒兵升聽事使捕索師道與二子伏廁牀下索得之悟命置牙門外隙地使人謂曰悟奉密詔送司空歸闕然司空亦何顏復見天子師道猶有幸生之意其子宏方仰曰事已至此速死爲幸尋皆斬之自卯至午悟乃命兩都虞候巡坊市禁掠者卽時皆定大集兵民於毬場親乘馬巡繞慰安之斬贊師道逆謀者二十餘家文武將吏且懼且喜悟見李公度執手歔歔出賈直言於獄置之幕府悟之自陽穀還兵趨郾也潛使人以

其謀告田宏正事成當舉烽相白萬一城中有備不能入願公引兵爲助功成之日皆歸於公悟何敢有之且使宏正進據已營宏正見烽知得城遣使往賀悟函師道父子三首遣使送宏正營宏正大喜露布以聞淄青等十二州皆平

橫海節度使烏重允奏河朔藩鎮所以能旅拒朝命六十餘年者由諸州縣各置鎮將領事收刺史縣令之權自作威福彘使刺史各得行其職則雖者奸雄如安史必不能以一州獨反也臣所領德棣景三州已舉牒各還刺史職事應在州兵並令刺史領之夏四月丙寅詔諸道節度都團練都防禦經略等使所統支郡兵馬並令刺史領之自至德以來節度使權重所統諸州各置鎮兵以大將主之暴橫爲患故重允論之其後河北諸鎮惟橫海最爲順命由重允處之得宜故也（胡氏曰史言反側之地擇師不可不詳按橫海軍統德棣滄景四州德滄景皆今州名棣州今武定府）

是歲吐蕃節度論三摩等將十五萬衆圍鹽州黨項亦發兵助之刺史李文悅竭力拒守凡二十七日吐蕃不能克靈武牙將史奉敬言於朔方節度使杜叔良請兵三千齎三十日糧深入吐蕃以解鹽州之圍叔良以二千五百人與之奉敬行旬餘無聲問朔方人以爲俱沒矣無何奉敬自他道出吐蕃肯吐蕃大驚潰去奉敬奮擊殺獲不可勝計奉敬與鳳翔將野詩良輔涇原將郝玘皆以勇著名於邊吐蕃憚之

穆宗長慶元年 初劉總奏分所屬爲三道以幽涿營爲一道請除張宏靖爲節度使平薊媯檀爲一道請除平

盧節度使薛平爲節度使瀛莫爲一道請除權知京兆尹盧士玫爲觀察使宏靖先在河東以寬簡得衆總與之鄰境聞其風望以燕人桀驁日久故舉宏靖自代以安輯之平嵩之子知河朔風俗而盡誠於國故舉之士玫則總妻族之親也總又盡擇麾下伉健難制者都知兵馬使朱克融等送之京師乞加獎拔使燕人有慕羨朝廷祿位之志又獻征馬萬五千匹然後削髮委去克融滔之孫也是時上方酣宴不留意天下之務崔植杜元穎無遠略不知安危大體苟欲崇重宏靖惟割瀛莫二州以士玫領之自餘皆統於宏靖朱克融等久羈旅京師至假旬衣食日詣中書求官植元穎不之省及除宏靖幽州勒克融輩歸本軍驅使克融輩皆憤怨先是河北節度使皆親冒寒暑與士卒均勞逸及宏靖至雍容驕貴肩輿於萬衆之中燕人訝之宏靖莊默自尊涉旬乃一出坐決事賓客將吏罕得聞其言情意不接政事多委之幕僚而所辟判官韋雍輩多年少輕簿之士嗜酒豪縱出入傳呼甚盛或夜歸燭火滿街皆燕人所不習也詔以錢百萬緡賜將士宏靖留其二十萬緡充軍府雜用雍輩復裁刻軍士糧賜繩之以法數以反虜詬責吏卒謂軍士曰今天下太平汝曹能挽兩石弓不若識一丁字由是軍中人怨怒（胡氏曰撫柔荒宣獷流德化適其俗修其政者易爲功駭之以其所未嘗見懼之以其所未嘗聞鮮不速禍按幽今順天府涿今涿州營州已陷寄治幽州城中平今永平府薊今薊州媯今懷來縣檀今密雲縣瀛今河間府莫在今任邱縣北）

秋七月甲辰韋雍出逢小將策馬衝其前導雍命曳下欲於街中杖之河朔軍士不貫受杖不服雍以白宏靖宏

靖命軍虞候繫治之是夕士卒連營呼譟作亂將校不能制遂入府舍掠宏靖貨財婦女囚宏靖於薊門館殺幕僚韋雍張宗元崔仲卿鄭墳都虞候劉操押牙張抱元明日軍士稍稍自悔悉詣館謝宏靖請改心事之凡三請宏靖不應軍士乃相謂曰相公無言是不赦吾曹軍中豈可一日無帥乃相與逆舊將朱泚奉以爲留後泚克融之父也時以疾廢臥家自辭老病請使克融爲之衆從之衆以判官張徹長者不殺徹罵曰汝何敢反行且族滅衆共殺之

初田宏正受詔鎮成德自以久與鎮人戰有父兄之仇乃以魏兵二千從赴鎮因留以自衛奏請度支供其糧賜戶部侍郎判度支崔俊性剛褊無遠慮以爲魏鎮各自有兵恐闕事例不肯給宏正四上表不報不得已遣魏兵歸宏正厚於骨肉兄弟子姪在兩都者數十人競爲侈靡日費約二十萬宏正輦魏鎮之貨以供之相屬於道河北將士頗不平詔以錢百萬緡賜成德軍度支輦運不時至軍士益不悅都知兵馬使王庭湊本回鶻阿布思之種也性果悍陰狡潛謀作亂每挾其細故以激怒之尙以魏兵故不敢發及魏兵去壬戌夜庭湊結牙兵譟於府署殺宏正及僚佐元從將吏并家屬三百餘人庭湊自稱留後逼監軍宋惟澄奏求節鉞八月癸巳惟澄以聞朝廷震駭崔俊於崔植爲再從兄故時人莫敢言其罪初朝廷易置魏鎮帥臣左金吾將軍楊元卿上言以爲非便又詢宰相深陳利害及鎮州亂上賜元卿白玉帶辛未以元卿爲涇原節度使瀛莫將士家屬多在幽州壬申莫州都虞候張良佐潛引朱克融兵入城刺史吳暉不知所在癸酉王庭湊遣人殺冀州刺史王進巖分兵據其州

魏博節度使李勣聞田宏正遇害素服令將士曰魏人所以得通聖化至今安甯富樂者田公之力也今鎮人之道輒敢害之是輕魏以爲無人也諸君受田公恩宜如何報之衆皆慟哭深州刺死牛元翼成德良將也勣使以寶劍玉帶遺之曰昔吾先人以此劍立大勳吾又以之平蔡州今以授公努力翦庭湊元翼以劍帶徇於軍報曰願盡死勣將出兵會疾作不果元翼趙州人也乙亥起復前涇原節度使田布爲魏博節度使令乘驛之鎮布固辭不獲與妻子賓客訣曰吾不還矣悉屏去旌節導從而行未至魏州三十里被髮徒跣號哭而入居於聖室月俸千緡一無所取賣舊產得錢十餘萬緡皆以頒士卒舊將老者兄事之（胡氏曰以田布所爲宜可以得魏卒之心而卒不濟者人心已搖而布之威略不振也）丙子瀛州軍亂執觀察使盧士玫及監軍僚佐送幽州囚於客館王庭湊遣其將王立攻深州不克丁丑詔魏博橫海昭義河東義武諸軍出兵臨成德之境若王庭湊執迷不復宜卽進討成德大將王儉等五人謀殺王庭湊事泄并部兵三千人皆死己卯以深州刺史牛元翼爲深冀節度使丁亥以殿中侍御史溫造爲起居舍人充鎮州四面諸軍宣慰使歷澤潞河東魏博橫海深冀易定等道諭以軍期己丑以裴度爲幽鎮兩道招撫使癸巳王庭湊引幽州兵圍深州冬十月以裴度爲鎮州四面行營都招討使左領軍大將軍杜叔良以善事權倖得進時幽鎮兵勢方盛諸道兵未敢進上欲功速成宦官薦叔良以爲深州諸道行營節度使以牛元翼爲成德節度使橫海節度使烏重允將全軍救深州諸軍倚重允獨當幽鎮東南重允宿將知賊未可破按兵觀釁上怒以杜叔良爲橫海節度使徙重允爲山南西道節度使十一月叔良

將諸道兵與鎮人戰遇敵輒北鎮人知其無勇常先犯之十二月庚午監軍謝良通奏叔良大敗於博野死亡七千餘人叔良脫身還營喪其旌節自憲宗征伐四方國用已虛上卽位賞賜左右及宿衛諸軍無節及幽鎮用兵久無功府藏空竭勢不能支執政乃議王庭湊殺田宏正而朱克融全張宏靖罪有重輕請赦克融專討庭湊上從之乙酉以朱克融爲平盧節度使

二年 正月丁酉幽州兵陷弓高先是弓高守備甚嚴有中使夜至守將不內且乃得入中使大詬怒賊諜知之他日僞遣人爲中使投夜至城下守將遽內之賊衆隨之遂陷弓高（胡氏曰史言唐宦者陵轢守禦捍敵之臣使之失守）又圍下博中書舍人白居易上言以爲自幽鎮逆命朝廷徵諸道兵計十七八萬四面攻圍已踰半年王師無功賊勢猶盛弓高旣陷糧道不通下博深州飢窮日急（胡氏曰深州西南皆逼於王庭湊惟恃弓高以通橫海之餽弓高旣陷糧道遂梗九域志弓高東至滄州一百二十里西北深州二百里）蓋由節將太衆其心不齊莫肯率先遞相顧望又朝廷賞罰近日不行未立功者或已拜官已敗歟者不聞得罪旣無懲勸以至遷延若不改張必無所望請令李光顏將諸道勁兵約三四萬人從東速進開弓高糧路解深邢重圍（胡氏曰當作深州）與元翼合勢令裴度將太原全軍兼招討舊職西面壓境觀釁而動若乘虛得便卽令同力翦除若戰勝賊窮亦許受降納款如此則夾攻以分其力招諭以動其心必未及誅夷自生變故又請詔光顏選諸道兵精銳者留之其餘不可用者悉遣歸本道自守士疆蓋兵多而不精豈唯虛費衣糧兼恐撓敗軍陳故也今旣祇留

東西二帥請各置都監一人諸道監軍一時停罷如此則衆齊令一必有成功又朝廷本用田布令報父讎今領全帥出界供給度支數月以來都不進討非田布固欲如此抑有其由聞魏博一軍屢經優賞兵驕將富莫肯爲用况其軍一月之費計實錢二十八萬緡若更遷延將何供給此尤宜早令退軍者也若兩道止共留兵六萬所費無多既易支持自然豐足今事宜日急其閒變故遠不可知苟兵數不抽軍費不減食既不足衆何以安不安之中何事不有况有司迫於供軍百端斂率不許卽用度交闕盡許則人心無慘自古安危皆繫於此伏乞聖慮察而念之疏奏不省己亥度支饋滄州糧車六百乘至下博盡爲成德軍所掠時諸軍匱乏供軍院所運衣糧往往不得至院（胡氏曰此時供軍院置於行營者謂之北供軍院度支自南供軍院運以給之）在塗爲諸軍邀奪其懸軍深入者皆凍餒無所得初田布從其父宏正在魏善視牙將史憲誠屢稱薦至右職及爲節度使遂寄以腹心以爲先鋒兵馬使軍中精銳悉以委之憲誠之先奚人也世爲魏將魏與幽鎮本相表裏及幽鎮叛魏人固搖心布以魏兵討鎮軍於南宮上屢遣中使督戰而將士驕惰無鬥志又屬大雪度支饋運不繼布發六州租賦以供軍將士不悅曰故事軍出境皆給朝廷今尙書刮六州肌肉以奉軍雖尙書瘠已肥國六州之人何罪乎憲誠陰蓄異志因衆心不悅離閒鼓扇之會有詔分魏博軍與李光顏使救深州庚子布軍大潰多歸憲誠布獨與中軍八千人還魏壬寅至魏州癸卯布復召諸將議出兵諸將益偃蹇曰尙書能行河朔舊事則死生以之若使復戰則不能也布無如之何歎曰功不成矣卽日作遺表具其狀略曰臣觀衆意終負國恩臣旣無功敢忘卽

死伏願陛下速救光顏元翼不然者忠臣義士皆爲河朔屠害矣奉表號哭拜授幕僚李石乃入啓父靈抽刀而言曰上以謝君父下以示三軍遂刺心而死憲誠聞布已死乃諭其衆遵河北故事衆悅擁憲誠還魏奉爲留後戊申魏州奏布自殺己酉以憲誠爲魏博節度使憲誠雖喜得旄鉞外奉朝廷然內實與幽鎮連結庚戌以德州刺史王日簡爲橫海節度使日簡本成德牙將也壬子貶杜叔良爲歸州刺史王庭湊圍牛元翼於深州官軍三面救之皆以乏糧不能進雖李光顏亦閉壁自守而已軍士自采薪芻日給不過陳米一勺深州圍益急朝廷不得已二月甲子以庭湊爲成德節度使軍中將士官爵皆復其舊以兵部侍郎韓愈爲宣慰使上之初卽位也兩河略定蕭俛段文昌以爲天下已太平漸宜消兵請密詔天下軍鎮有兵處每歲百人之中限八人逃死上方荒宴不以國事爲意遂可其奏軍士落籍者衆皆聚山澤爲盜及朱克融王庭湊作亂一呼而亡卒皆集詔徵諸道兵討之諸道兵既少皆臨時召募烏合之衆又諸節度既有監軍其領偏軍者亦置中使監陳主將不得專號令戰小勝則飛驛奏捷自以爲功不勝則迫脅主將以罪歸之悉擇軍中驍勇以自衛遣羸懦者就戰故每戰多敗又凡用兵舉動皆自禁中授以方略朝令夕改不知所從不度可否惟督令速戰中使道路如織驛馬不足掠行人馬以繼之人不敢由驛路行故雖以諸道十五萬之衆裴度元臣宿望烏重允李光顏皆當時名將討幽鎮萬餘之衆屯守踰年竟無成功財竭力盡崔植杜元穎爲相皆庸才無遠略史憲誠既逼殺田布朝廷不能討遂并朱克融王庭湊以節授之由是再失河朔迄於唐亡不能復取（弓高今景州下博今深州六州魏博貝衛澶相

也）

三月武寧節度副使王智興將軍中精兵三千討幽鎮節度使崔羣忌之奏請卽用智興爲節度使否則召詣闕除以他官事未報智興亦自疑會有詔赦王庭湊諸道皆罷兵智興引兵先期入境羣懼遣使迎勞且使軍士釋甲而入智興不從乙巳引兵直進徐人開門待之智興殺不同己者十餘人乃入府牙見羣及監軍拜伏曰軍衆之情不可如何爲羣及判官從吏具人馬及治裝皆素所辦也遣兵衛從羣至埭橋而返遂掠鹽鐵院錢帛（胡氏曰埭橋有鹽鐵院）及諸道進奉在汴中者并商旅之物皆三分取二（胡氏曰史言唐下陵上慢無復紀綱按埭橋在汴河上故諸道進奉船由之）

初張宏靖爲宣武節度使屢賞以悅軍士府庫虛竭李愿繼之性奢侈賞勞旣薄於宏靖時又峻威刑軍士不悅愿以其妻弟竇瑗典宿直兵瑗驕貪軍中惡之牙將李臣則等作亂秋七月壬辰夜卽帳中斬瑗頭因大呼府中響應愿與一子踰城奔鄭州亂兵殺其妻推都押牙李宥爲留後乙巳詔三省官與宰相議汴州事皆以爲宜如河北故事授李宥節李逢吉曰河北之事蓋非獲已今若并汴州棄之則是江淮以南皆非國家有也杜元穎張平叔爭之曰奈何惜數尺之節不受一方之死乎議未決會宋亳穎三州各上奏請別命帥上大喜以逢吉議爲然遣中使詣三州宣慰逢吉因請以將軍徽宥入朝以義成節度使韓充鎮宣武充宏之弟素寬厚得衆心脫宥旅拒則命徐許兩軍攻其左右而滑軍蹙其北充必得入矣上皆從之丙午貶李愿爲隨州刺史以韓充爲宣武

節度兼義成節度使徵李宥爲右金吾將軍宥不奉詔宋州刺史高承簡斬其使者宥遣兵二千攻之陷甯陵襄邑宋州有三城賊已陷其南城承簡保北二城與賊十餘戰癸丑忠武節度使李光顏將兵二萬五千討李宥屯尉氏竟海節度使曹華聞宥作亂不俟詔卽發兵討之宥遣兵三千人攻宋州適至城下丙辰華逆擊破之丁巳李光顏敗宣武兵於尉氏斬獲二千餘人八月甲子韓充入汴境軍於千塔武甯節度使王智興與高承簡共破宣武兵斬首千餘級餘衆遁去壬申韓充敗宣武兵於郭橋斬首千餘級進軍萬勝初李宥旣爲留後以都知兵馬使李質爲腹心及宥除將軍不奉詔質屢諫不聽會宥疽發於首遣李臣則等將兵拒李光顏於尉氏旣而官軍四集兵屢敗宥疾甚悉以軍事屬李質臥於家丙子質與監軍姚文壽擒宥殺之詐爲宥牒追臣則等至皆斬之執宥四子送京師韓充未至質權知軍務時牙兵三千人日給酒食物力不能支質曰若韓公始至而罷之則人情大去矣不可留此弊以遺吾帥卽命能給而後迎充丁丑充入汴癸未以韓充專爲宣武節度使以曹華爲義成節度使高承簡爲兗海沂密節度使加李光顏兼侍中以李質爲右金吾將軍韓充旣視事人心粗定乃密籍軍中爲惡者千餘人一朝并父母妻子悉逐之曰敢少留境內者斬於是軍政大治（胡氏曰除亂而去其根則亂無從生矣按襄邑今睢州千塔郭橋皆在開封北萬勝鎮在中牟）

敬宗寶曆元年 昭義節度使劉悟卒子將作監主簿從諫匿其喪與大將劉武德及親兵謀以悟遺表求知留後朝廷得悟遺表議者多言上黨內鎮與河朔異不可許左僕射李絳上疏以爲兵機尙速威斷貴定人情未一

乃可伐謀劉悟死已數月朝廷尙未處分中外人意其惜事機今昭義兵衆必不盡與從諫同謀縱使其半叶同尙有其半効順從諫未嘗久典兵馬威惠未加於人又此道素貧非時必無擾賞今朝廷但速除近澤潞一將充昭義節度使令兼程赴鎮從諫未及布置新使已至潞州所謂先人奪人之心也新使既至軍心自有所繫從諫無位何名主張設使謀撓朝命其將士必不肯從令朝廷久無處分彼軍不曉朝廷之意欲効順則恐忽授從諫欲同惡則恐別更除人猶豫之間若有姦人爲之畫策虛張賞設錢數軍士覬望尤難指揮伏望速賜裁斷仍先下明敕宣示軍衆獎其從來忠節賜新使縉五十萬匹使之賞設續除劉從諫一刺史從諫既粗有所得必且擇利而行萬無違拒設不從命臣亦以爲不假攻討何則臣聞從諫已禁山東三州軍士不許自蓄兵刀足明羣心殊未得一帳下之事亦在不疑熟計利害決無卽援從諫之理時李逢吉王守澄計議已定竟不用絳等謀

讀史兵略卷三七唐

0013032

上海图书馆藏书



A541 212 0008 8695B

